
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>



This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>



**UNIVERSITY OF
ILLINOIS LIBRARY
AT URBANA-CHAMPAIGN
BOOKSTACKS**

SEEMANN

The person charging this material is responsible for its return to the library from which it was withdrawn on or before the **Latest Date** stamped below.

Theft, mutilation, and underlining of books are reasons for disciplinary action and may result in dismissal from the University.

To renew call Telephone Center, 333-8400

UNIVERSITY OF ILLINOIS LIBRARY AT URBANA-CHAMPAIGN

FEB 18 1987

APR 08 1987

JUN 08 1992

JUN 06 1994

MAY 10 1994

ÍSLENDINGABÓK,
ER SKRIFAÐ HEFIR
ARI ÞORGILSSON,
OG
LANDNÁMABÓK.

BÚIÐ HEFIR TIL PRENTUNAR
VALD. ÁSMUNDARSON.



REYKJAVÍK.
KOSTNAÐARMAÐUR: **I** SIGURÐUR KRISTJÁNSSON.
1909.

FÉLAGSPRENTSMÍÐJAN.

839.608

Is 41

1893

v. 1

FORMÁLI.

Íslendinga sögur hinar fornu gerast nú meir og meir fágætar meðal almennings, með því að hinar eldri útgáfur eru löngu uppseldar og slitnar. Þær sögur, sem aftur komið hafa út á síðari árum, hafa flestar verið gefnar út í vísindalegum útgáfum og því orðið dýrari enn svo að almenningr hafi getað keypt þær. Til að bæta úr þessari þörf almennings hefir því *Sigurdur* bóksali *Kristjánsson* í Reykjavík ráðið í að gefa út allar Íslendinga sögur í ódýrum alþýðuútgáfum.

Þetta fyrirtæki hefir fengið góð og greið svör hjá almenningi, og kemr hér fyrsta sögubókin, sem er Íslendingabók og Landnáma. Í boðsbréfinu var gert ráð fyrir að byrja á öðru, enn af því að Íslendingabók og Landnáma eru upphöf að hinum fornu íslensku sögum, þótti best fara á því að láta þessi rit fara á undan.

Það er í raun og veru engu minni vandi að gefa út alþýðu-útgáfu af fornsögum enn vísindalega útgáfu. Við alþýðu-útgáfur eða texta-útgáfur er ekki síðr margs að gæta; það er ekki vandaminna að velja um þegar

IV

alt verður að vera sem stýzt, og ekki má tilfæra frásagnamun eða orðamun eftir hinum ýmsu handritum. Það er ólaglegt og í alla staði óvísindalegt, að hræra mörgum handritum saman í einni útgáfu, án þess að geta þess hvaðan hvað eina sé tekið, enn undir eins og farið er að tilfæra þess konar að mun, getr útgáfan naumast heitið texta-útgáfa.

Með því að ætlast er til, að sú útgáfu-röð af öllum Íslendinga sögum, sem byrjar á þessari bók, verði svo ódýr, að allr þorri almennings geti keypt hana, verður því ekki hér við komið, að taka upp frásagnamun og orðamun eftir hinum ýmsu handritum, nema sem minst að verða má, og setr kostnaðarmaðrinn þessi skilyrði, Þó munu fyllri eða réttari frásagnir eða einstök orð, sem finnast réttari í öðrum handritum sögu þessarar enn því sem aðallega er fylgt, tekin upp í textann, og verða þá slíkar viðbætr eða leiðréttingar, svo og tilgátur allar, auðkendar með öðru letri, og þess getið í formála bókarinnar, hvaðan þetta sé tekið, eða hvernig á því standi.

Um þessa útgáfu af Íslendingabók og Landnámabók er það skjólast að segja, að hér er prentað eftir útgáfu þeirri sem fornfræðafélagið lét prenta 1843 (Íslendingasögur I. bindi) og Jón Sigurðsson hefir að unnið. Íslendingabók er hér prentuð eftir hinni stafréttu útgáfu, sem þar er prentuð aftan við Landnámu á blaðsíðunum 362–383, enn stafsetningin þó samræmd nokkuð, og er í því fylgt útgáfu Dr. Finns Jónssonar, Khöfn 1887. Í prentsmiðjunni var ekki nóg til af stafnum 9,

og er því ð haft í staðinn, enn ó er allstaðar haft til að tákna hljóð það sem breytist við eftirfaranda u, eins og er í útgáfu Dr. Finns Jónssonar.

Landnámabók er hér prentuð eftir meginmálinu í útgáfunni frá 1843. Þó hafa verið teknir inn í meginmálið nokkrir viðaukar eftir Melabók, úr orðamunargreinunum neðanmáls, og eru þessir kaflar og orð prentuð með skáletri og í milli hornklofu. Hið annað sem í þessari útgáfu er prentað með skáletri eru kaflar úr Hauksbók, hinir sömu, sem þannig eru teknir upp í meginmálið í útgáfu Jóns Sigurðssonar.

Hin elzta gerð af landnámabók er eftir Sturlu lögmann Þórðarson. Það er þessi gerð Landnámabókar, sem meginmálið í Khafnar útg. 1843 er tekið eftir. Þar næst ritaði Styrmir hinn fróði Landnámabók; hún er ekki lengr til. Þá ritaði Haukr lögmaðr Landnámabók (um 1300), sem er enn til, og er sumt í henni talið vera með eiginhendi Hauks, og hafði hann fyrir sér Sturlubók og Styrmisbók, „ok hafða ek þat ór hvárri, sem framar greindi, enn mikill þorri var þat, er þær sögðu eins báðar, ok því er þat ekki at undra, þó þessi landnámabók sé lengri enn nökkur önnur“, segir hann. Haukr segir og, að Ari prestur hinn fróði og Kolskeggr hinn vitri hafi fyrst skrifað um landnám, og má því ætla, að hin upphaflegasta Landnámabók sé samin af þeim. Auk þessara Landnámabóka, sem hér hafa nefndar verið, má telja fleiri gerðir af þeim, sem ekki hafa annað um fram hinar, en ættatölur. Svo er t. d. Melabók, sem til er í brotum.

VI

Ættatölurnar í Landnámu þurfa rannsókna við, því að þær munu vera rangar á sumum stöðum. Hér hafa að eins verið leiðréttar fáeinar villur, og eru þessar leiðréttingar með skáletri. Væri ættatölurnar úr Landnámu rannsakaðar nákvæmlega og bornar saman við ættatölur í öðrum sögum, einkanlega Sturlunga sögu, mundi mega lagfæra ýmislegt.

Stafsetningin á þessari útgáfu er ekki samræmd, enda er það ekki hægt, og þykir réttara að halda misjöfn-um rithætti handritanna á einstökum orðum. Fáein mannanöfn munu ef til vill vera rangt rituð. Nafnið Hallsteinn hefir verið haft um Hástein Atlason ens mjóva, því að bæði er svo ritað í Melabók og Flóamannasögu. Mannsnafnið Vali á bls. 71 og víðar á vist að vera *Váli*; mannsnafnið Arnóðr á bls. 101 og víðar á að vera *Arnmóðr*, og mannsnafnið Bruni á bls. 107 og víðar á vist að vera *Brúni*. Viðrnefnið *spörr* (Þórólfr spörr) á bls. 100 og víðar er ranghneigt í handritum, og á eignarfallið vist að vera *spörs*, enn ekki *sparrar*. Viðnefnið *rúmgylta* (Puríðr rúmgylta) er líklega réttara *rymgylta*, sem sum handrit hafa.

Í vísaskýringunum hefir verið fylgt skýringum dr. Jóns Þorkelssonar rektors og í tímatalinu dr. Guðbrandi Vigfússyni.

Þess er ekki að vænta, að útgáfa þessi fullnægi þeim kröfum, sem vísindalegum útgáfum hlýða, sem er tífall dýrari. Hún er ætluð alþýðu, og henni á hún að geta orðið að notum. Landnámabók er eitt af þeim fornritum, sem mestr vandi er að fást við, ef rækilega

VII

skyldi rannsaka hana og leiðrétta eftir hinum ýmsu handritum, og hér gat ekki verið um slíkt að ræða.

Aths.

Síðan 1891, er Landnáma var hér gefin út, hefir Finnur háskólakennari Jónsson gefið út vandaða útgáfu af henni (Kh. 1900). Það þótti ekki hlýða að ganga fram hjá þeirri útgáfu, og hefir henni verið fylgt þar sem hún vikur frá útg. 1891 (1843). Þó er sem áður að mestu fylgt vísaskýringum Jóns rektors Þorkelssonar, nema þar sem annað er auðsýnna. Þenna samanburð og prófarkalestur hefir annazt cand. phil. Páll E. Ólason.

TÍMATAL.

870. Ísland fundið.
874. Ingólfr byggir í Reykjavík.
877. Ketill hæingr nemr Rangárvöllu.
878. Skalla Grímr nemr land um Borgarfjörð og Mýrar.
884. Þórólfr mostrarskegg nemr land við Breiðafjörð sunnan fram.
886. Björn enn austroeni nemr land við Breiðafjörð sunnan fram.
Um 890. Ingimundr enn gamli nemr land um Húnavatnssýslu. Helgi enn magri nemr Eyjafjörð.
890—920. Hefjast landnám um Austfjörðu.
Um 892. Uðr en djúpauðga nemr land í Breiðafjarðardölum.
Um 900. Bygðir Vestfirðir.
900—910. Numin lönd í Skagafirði.
927. Úlfljótr hefir út lög.
929. Grímr geitskór (?) kannar Ísland.
930. Lokið landnámum að mestu. Alþingi sett.
982—983. Eiríkr enn rauði finnr Grænland.
985—986. Eiríkr enn rauði nemr land á Grænlandi.
1000. Kristni lögtekin á alþingi.
-

ÍSLENDINGABÓC.



ISLENDINGA BÓC gærþa ec fyrst byscopom ór-
om Þorláki oc Katli, oc sýndac bæpi
þeim oc Sæmundi presti. en með þúi at
þeim licapi suá at hava eþa þar við auka, þá
scrifaþa ec þessa of et sama far, fyr utan átt-
ar tölö oc conunga ævi, oc iócc þúi es mér
varþ síþan cunnara oc nú es górr sagt á þessi
an á þeiri. en huatki es missagt es í frøþom
þessom, þá es scyllt, at hava þat heldr, es
sannara raynisc.

Hálfðan huítbeinn Upplendinga conungr, sonr
Óláfs trételgio Suía, conungs, vas faþer Aysteins
fretz, föþor Hálfðanar ens milda oc ens matar-
illa, föþor Gopþrøpar veipiconungs, föþor Hálf-
ðanar ens suarta, föþor Harallz ens hárfagra,
es fyrstr varþ þess kyns einn conungr at öllum
Norvegi.

In hoc codice continentur capitula.¹

Frá Íslanz bygð .i. frá lannáms mönn-
om .ii. oc laga setning. frá alþingis setning
.iii. frá misseris tali .iiii. frá fiórþunga
deild .v. frá Grœnlanz bygð .vi. frá
þuí es cristni kom á Ísland .vii. frá bysc-
opom útlendum .viii. frá Ísleifi byscopi .ix.
frá Gizori byscopi (.x.).

Incipit libellus Islandorum.²

1. Ísland bygðisc fyrst ýr Norvegi á dögum Har-
allz ens hárfagra Hálfðanar sonar ens suarta f
þann tíð at ællon oc tölo þeira Teitz, fóstra
míns, þess mannz, es ec kunna spacastan, son-
ar Ísleifs byscops, oc Þorkels, föþorbróþor míns,
Gellissonar, es langt munþi fram, oc Þóríþar
Snorra dóttor goþa, es bæþe vas margspöc oc
óliúgrfrop, es Ívarr Ragnars sonr loþbrókar lét
drepa Eadmund enn helga Engla conung. en
þat vas .dcccclxx. *vetra* eptir burþ cristz, at þuí
es ritit es í sögu hans. Ingólfr hét maðr nó-
rœnn, es sannlega es sagt at fœri fyrst þapan
til Íslanz, þá es Haralldr enn hárfagri vas .xvi.
vetra gamall, en í annat sinn fóm vetrom síþar.
hann bygði supr í Raykiarvíc. þar es Ingólfs-
höfði kallapr, fyr austan Minþacsayri, sem hann

1) p. e.: Í þessi bók eru kapitular þessir.

2) p. e: Hér hefir Íslendingabók.

kom fyrst á land, en þar Ingólfsfell, fyr vestan Ölfossó, es hann lagði sína eigo á síðan. í þann tíð vas Ísland víði vaxit á miðli fiallz oc fiðro. þá vðro hér menn cristner, þeir es Norðmenn kalla papa. en þeir fóro síðan á braut, af því at þeir vildo eigi vesa hér víð heiðna menn, oc létu epter bæcr irscar oc bjöllor oc bagla. af því mátti scilia, at þeir vðro menn irskir. en þá varð för manna mikil miðc út hingat ýr Norvegi, til þess unz conungrenn, Haralldr, bannapi, af því at honum þótti landaupn nema. þá sættosc þeir á þat, at huerr maðr scyllði giallda conungi .v. aura, sá es eigi væri frá því scilipr, oc þapan færi hingat. en suá es sagt, at Haralldr væri .lxx. vetra conungr oc yrði átræpr. þau hafa upphöf verit at gialldi því, es nú es kallat landaurar. en þar gallzk stundom meira, en stundom minna, unz Óláfr enn digri gærði scýrt, at huerr maðr skyllði giallda conungi hálfa mörk, sá es færi á miðli Norvegs oc Íslanz, nema conor eða þeir menn, es hann næmi frá. suá sagði Þorkell oss Gellissonr.

2. **H**rollaugr, sonr Rögnvallz iarls á Mœri bygði austr á Síþo. þapan ero Síþomenn komner.

Ketilbiörn Ketilssonr, maðr nórcœnn, bygði suðr at Mosfelli eno øfra. þapan ero Mosfell-ingar comner.

Oþr, dóttir Ketils flatnefs, hersis nórœns, bygði vestr í Breiðafirði, þá þan ero Breiðfirðingar comner.

Helgi enn magri, nórœnn, sonr Ayvindar austmannz, bygði norðr í Ayiafirði. þá þan ero Ayfirðingar comner.

En þá es Ísland vas víða bygt orþit, þá hafði maðr austrœnn fyrst lög út hingat ýr Norvegi, sá es Úlfliótr hét, suá sagði Teitr oss, oc vóro þá Úlfliótlög köllop, — hann vas faðer Gunnars, es Diúpdæler ero comner frá í Ayafirði, — en þau vóro flest sett at þúi, sem þá vóro Golapings lög, eða róp Þorleifs ens spaca Hörþacára sonar vóro til, huar víð scyllði auca eða af nema eða annan veg setia. Úlfliótr vas austr í Lóni. en suá es sagt, at Grímr geitscor væri fóstbróðir hans, sá es kannaði Ísland alt at ráði hans, áðr alþingi væri átt, en honom fecc huerr maðr penning til á landi hér, en hann gaf fé þat síðan til hofa.

3. Alþingi vas sett at ráði Úlfliótz oc allra lanzmanna, þar es nú es. en áðr vas þing á Kjalarnesi, þat es Þorsteinn Ingólfs sonr lannnámannz, faðer Þorkels mána lögsögumannz, hafði þar, oc höfðingiar þeir es at þúi hurfu. en maðr hafði secr orþit of þræls morð eða laysings, sá es land átti í Bláscógom. hann es nefndr Þórer croppinskeggi. en dóttorsonr hans es callaðr

Þorvalldr croppinskeggi, sá es fór síþan í Austfiörþo, oc brendi þar inni Gunnar bróþor sinn. suá sagði Hallr Órækiosonr. en sá hét Kolr, es myrþr vas. við hann es kend gea sú, er þar es kölloþ síþan Colsgea, sem hræen fundusc. land þat varþ síþan allzheriar fé. en þat lögþo lanzmenn til alþingis nayslo. af því es þar almenn-ing at víða til alþingis í scógom, oc á heipom hagi til hrossa hafnar. þat sagði Úlfheþinn oss.

Suá hava oc spacer menn sagt, at á .lx. vetrar yrði Ísland albyggt, suá at eigi væri meirr síþan. því nær tóç Hramn lögsögo, Hœings sonr lann-námamannz, næstr Úlflióti, oc hafði .xx. sumor. hann vas ýr Rangárhuerfi. þat vas .lx. vetrar epter dráp Eadmundar conungs, vetri eða tueim áþr Haralldr enn hárfagri yrði dauþr at tölur spacra manna. Þórarinn Raga-bróþer, sonr Óleifs hialta, tóç lögsögo næstr Hramni, oc hafði önnor .xx. hann vas borgfirþer.

4. Þat vas oc þá, es ener spöcostu menn á landi hér hugþo tal í tueim misserom fióra daga ens fiórþa hundraps, þat verþa vicor .ii. ens sétta-tegar, en mōnoþr .xii. þritøgnáttar oc dagar .iiii. umbfram, þá merþo þeir at sólargangi, at sum-ar munapi aþtr til várs, en þat cunni engi segia þeim, at degi einom vas fleira, an heilom vicom gegndi, í tueim misserom, oc þat olli. en maþr hét Þorsteinn surtr, hann vas breiþfirþer, sonr

Hallsteins Þórólfs sonar mostrarsceggja, land-námamannz, oc Óscar Þorsteins dóttor ens raupa. Hann draymdi þat, at hann hygðisc vesa at lögbergi, þá es þar vas fiölment, oc vaca, en hann hugði alla menn apra sova, en síðan hugðisc hann sofna, en hann hugði þá alla menn apra vacna. Þann draum réþ Ósýfr Helgasonr, móþor faþer Gellis Þorkelssonar, suá, at aller menn mænþu *þögn varþa*¹, meþan hann mællti at lögbergi, en síðan, es hann þagnaði, at þá mœndi allir þat róma, es hann hefði mællt. en þeir vöro báþer spacer menn mjöc. en síðan es menn quömo til þings, þá leitaði hann þess ráps at lögbergi, at et siaunda huert sumar scyllði auka vico, oc freista, hvé þá hlýddi. en suá sem Ósýfr réþ draumenn, þá vöcnoþo aller menn við þat vel. oc vas þá þat þegar í lög leitt at ráði Þorkels mána oc annara spacara manna. at rétto tali *ero* í huerio áre .v. dagar ens fiórþa hundraps, ef eigi es hlaupár, en þá einom fleira, en at öro tali verþa .iiii. en þá es aycsc at öru tali et siaunda huert at vico, en öngo at hino, þá verþa .vii. ör saman iamnlöng at huörotueggja. en ef hlaupöðr verþa .ij. á mipli þeira, es auka scal, þá þarf auca et sétta.

5. Þinga deilld mikil varþ á mipli þeira Þórþar gellis, sonar Óleifs feilans ýr Breiþafirði, oc Odz,

Þögn varða. Upphaflega tilgáta dr. Jóns Þorkelssonar rektors (í bréfi til Eiríks Magnússonar). Þegn varð hdr.

Þess es kallaþr vas Tungo-Oddr. hann vas borgfirþr. Þorvalldr, sonr hans, vas at brenno Þorkels Blunnketilssonar með Hæsnabóre í Örnólfsdali. en Þórþr geller varþ höfþingi at söcenni, af þúi at Hersteinn Þorkelssonr Blunnketilssonar átti Þórunni systordóttor hans. Hon vas Helgo dóttor oc Gunnars, syster Jófriþar, es Þorsteinn átti, Egilssonr. en þeir vóro sötter á þingi þúi, es vas í Borgarfirþi í þeim stap, es síþan es kallat Þingnes. þat vóro þá lög, at vígsacar scylldi sækia á þúi þingi, es næst vas véttvangi. en þeir börþosc þar, oc mátti þinget eigi hayiasc at lögom. þar fell Þórólfr refr, bróþer Álfs í Dölum, ýr líþi Þórþar gellis. en síþan fóro sacarnar til alþingis, oc börþosc þeir þar þá enn. þá fello menn ýr líþi Odz. enda varþ secr hann Hæsnabórer oc drepinn síþan, oc fleiri, þeir es at brennonni vóro, þá talþi Þórþr geller tólo umb at lögbergi, hvé illa mönnum gegndi at fara í ócunn þing at sækia of vig eþa harma sína, oc talþi, huat honom varþ fyrer, áþr hann mætti þúi máli til laga coma, oc quap ýmissa vandræþi mendo verþa, ef eigi réþisc boetr á. þá vas landino scipt í fiórþunga, suá at .iii. urþu þing í hueriom fiórþungi, oc scylldo þingonautar eiga huar sacsócner saman, nema í Norþlendinga fiórþungi vóro .iiii., af þúi at þeir urþu eigi á annat sätter. þeir, es fyr norþan vóro Ayifiórþ, villdo eigi þangat sækia þinget, oc

eigi í Scagafiörp, þeir es þar vóro fyr vestan, en þó scylldi iömn dómnefna oc lögrétto scipon ýr þeira fiórþungi, sem ýr einom hueriom öþrom. en síþan vóro sett fiórþungar þing. suá sagði oss Úlfheþinn Gunnarssonr lögsögumaþr. Þorkell máni Þorsteinssonr Ingólfssonar tóe lög-sögo epter Þórarin Raga-bróþor, oc hafði .xv. sumor. þá hafði Þorgeirr at Liósavatni Þorkels-sonr .xvii. sumor.

6. Land þat es kallat es Grœnland fannze oc bygpisc af Íslandi. Eiríkr enn rauði hét maþr, breiþfirþer, es fór út heðan þangat, oc nam þar land, es síþan es kallaþr Eiríksfiórþr; hann gaf namn landino, oc kallaði Grœnland, oc quap menn þat mœndo fýsa þangat farar, at landet ætti namn gótt. þeir fundu þar manna vister bæði austr oc vestr á landi, oc keiplabrot oc steinsmíþi þat es af þúi má scilia, at þar hafði þess conar þióþ farit, es Vinland hevir bygt oc Grœnlendingar calla Scœlinga. en þat vas, es hann tóe byggva landet, .xiii. vetrom eþa .xv. fyrr an cristni quæmi hér á Ísland, at þúi es sá talpi fyr Þorkeli Gellissyni á Grœnlandi es siálfr fylgði Eiríki enom rauða út.

7. Óláfr conungr Tryggvasonr Óláfs sonar Harallz sonar ens hárfagra com cristni í Norveg oc á Ísland. hann sendi hingat til lanz prest

þann es hét Þangbrandr oc hér kendi mönnom cristne, oc skírði þá alla es víð trú tóco. en Hallr á Sípö Þorsteinssonr lét scírase snimhendis, oc Hiallti Sceggiasonr ýr Þíórsárdali, oc Gizorr enn huiti Teitzsonr Ketilbjarnarsonar frá Mosfelli, oc marger höfþingiar aprer, en þeir vóro þo fleiri, es i gegn mællto oc neitto. en þá es hann hafði hér verit einn vetr eða .ii., þá fór hann á braut, oc hafði vegit hér .ii. menn eða .iii., þá es hann höfþo nítt. en hann sagði conunginóm Óláfi, er hann com austr, alt þat, es hér hafði yfer hann gingit, oc lét örvænt at hér mendi cristni enn tacasc. en hann varð víð þat reipr miðe, oc ætlaði at láta meiða eða drepa ossa landa fyrer. þá es þar vóro austr. en þat sumar et sama quómu útan héþan þeir Gizorr oc Hiallti, oc þógo þá undan víð conungenn, oc héto honom umbsýslo sinni til á nýialeic, at hér yrði enn víð cristninni tekit, oc léto sér eigi annars vón, an þar mendi hlýða, en et næsta sumar epter fóro þeir austan oc prestr sá, es Þormóþr hét, oc quómo þá i Vestmannaeyiar, es .x. vicor vóro af sumri, oc hafði alt farize vel at. sua cuap Teitr þann segia, es siálfr vas þar. þá vas þat mællt et næsta sumar áþr i lögom. at menn scylldu suá coma til alþingis, es .x. vicor væri af sumri, en þangat til quómo menn vico fyrr. en þeir fóro þegar inn til meginlanz, oc síþan til alþingis, oc góto

at Hiallta, at hann vas epter í Laugardali með .xii. mann, af því at hann hafði áþr sekr orþit fiðrbaugsmaþr et næsta sumar á alþingi of goþgö. en þat vas til þess haft, at hann cuþ at lögbergi quipling þenna

vile eigi goþ gayia,

gray þyccer mér Frayia.

en þeir Gizorr fóro, unz þeir quðmo í staþ þann í hiá Ölfossvatni, es kallaþr es Vellankatla, oc gørho orþ þaþan til þings, at á mót þeim scyllði coma aller fultingsmenn þeira, af því at þeir höfþo spurt, at andscotar þeira villði veria þeim vígi þingvöllenn. en fyrr an þeir færi þaþan, þá kom þar riðandi Hiallti oc þeir es epter vðro með honom. en síþan riþo þeir á þinget, oc quðmo áþr á mót þeim frændr þeira oc vin-er, sem þeir höfþo æst, en ener heiþno menn hurfu saman með alvæþni, oc hafði suá nær, at þeir mendi beriasc, at *eigi* of sá á miþli. en annan dag epter gingo þeir Gizorr oc Hiallti til lögbergis, oc bðro þar upp erindi sín, en suá er sagt, at þat bæri frá, hué vel þeir mællto. en þat gørpisc af því, at þar nefndi annarr maþr at ðþrom váttu, oc sögþosc hvárer ýr lög-om við aþra, ener cristno menn oc ener heiþno, oc gingo síþan frá lögbergi. þá bðþo ener cristno menn Hall á Síþo, at hann scyllði lög þeira upp segia, þau es cristninni scyllði fylgia. en hann laystisc því undan við þá, at hann caypti

at Þorgeiri lögsögomanni, at hann scylldi upp segia, en hann vas enn þá heipinn. en síðan es menn quómo í búðir, þá lagðisc hann niðr, Þorgeirr, oc breiddi felld sinn á sic, oc hvilði þann dag allan oc nóttina epter oc quap ecki orð, en of morgonenn epter settisc hann upp, oc gæði orð, at menn scylldi ganga til lögbergis, en þá hóf hann tölu sína upp, es menn quómo þar, oc sagði, at honum þótti þá comit hag manna í ónýtt efni, ef menn scylldi eigi hava aller lög ein á landi hér, oc talði fyr mönnum á marga vega, at þat skyldi eigi láta verða, oc sagði, at þat mundi at þú ósætti verða, es vísavæn vas, at þær barsmíðir gæðisc á miðli manna, es landet ayddisc af. hann sagði frá þú, at conungar ýr Norvegi oc ýr Danmörco höfðu haft ófrið oc orrostor á miðli sín lánnga tíð, til þess unz lánzmenn gæðu frið á miðli þeira, þótt þeir villdi eigi. en þat ráð gæðisc suá, at af stundu sendosc þeir gersemar á miðli, enda hellt friðr sá, meðan þeir lifðu — „en nú þykkir mér þat ráð“, quap hann, „at vér látim oc eigi þá ráða, es mest vilia í gegn gangasc, oc miðlom suá mól á miðli þeira, at huerer tueggio havi nacquat síns máls oc hövom aller ein lög oc einn síð. þat mon verða satt es vér slítom í sundr lögom, at vér monom slíta oc friðenn“. en hann lauc suá máli síno, at huárer tueggio ióttu þú, at aller scylldi ein lög hava, þau sem

hann répi upp at segja. þá vas þat mællt í lögom, at aller menn scylldi cristner vesa oc scírn taca, þeir es áþr vðro óscírþer á landi hér. en of barna útburþ scylldo standa en forno lög oc of hrossakiðtz át. scylldo menn blóta á laun ef villdo, en varþa fiðrbaugsgarþr, ef vðttum of quæmi við. en síþar fðm vetrom vas sú heiþni af numin sem ðnnor. þenna atburþ sagþi Teitr oss at þui es cristni com á Ísland. en Óláfr Tryggvasonr fell et sama sumar at sögu Sæmundar prestz. þá barþisc hann við Suein Harallzson Dana conung oc Ólaf enn scensca, Eirics son at Uppsölom Suía conungs, oc Eiric, es síþan vas iarl at Norvegi, Hðconarson. þat vas .cxx. vetra epter dráp Eadmundar, en .m. epter burþ cristz at alþýþo tali.

8. Þessi ero nðmn byscopa þeira, es verit hava á Íslandi útlender, at sögo Teitz. Friprecr com í heiþne hér, en þesser vðro síþan: Biarnharþr enn bócvísi .v. ór. Colr fð ór. Hrópólfr .xix. ór. Jauhan enn irski fð ór. Biarnharþr .xix. ór. Heinrecr .ii. ór. enn quðmo hér aþrer .v., þeir es byscopar quðþosc vesa. Örnólfr oc Gopiscóler. oc .iii. ermsker, Pétrús oc Ábrahám oc Stephánús.

Grimr at Mosfelli Suertingssonr tóç lögsögo epter Þorgeir oc hafþi .ii. sumor, en þá fece hann lof til þess, at Scapti Þórodzsonr hefþi,

systorson hans, af því at hann var hásmæltr sjálfr. Scapti hafði lögsögo .xxvii. sumor. hann setti fimtardómslög, oc þat, at engi vegandi scyllði lýsa víg á hendr öðrom manni an sér. en áþr vðro hér slíc lög of þat sem í Norvegi. á hans dögom urðu marger höfþingiar oc ríkismenn seker eða landflótta of víg eða barsmíper af ríkis söcom hans oc landstiörn, en hann andaðisc á eno sama áre oc Óláfr enn digri fell Harallzsonr Gopþrþarsonar Biarnarsonar Harallzsonar ens hárfagra, .xxx. vetrom síþar, an Óláfr felli Tryggvasonr. þá tók Steinn Þorgestessonr lögsögo oc hafði .iii. sumor, þá hafði Þorkell Þiðrvasonr .xx. sumor. þá hafði Geller Bölvercs-sonr .ix. sumor.

9. Ísleifr Gizorar sonr ens huíta var vígþr til byscops á dögom Harallz Norvegs conungs Sigurþarsonar Hálfðanarsonar Sigurþar sonar hrisa Harallz sonar ens hárfagra, en es þat só höfþingiar oc góþer menn. at Ísleifr var myklo nýtri, an aðrer kennimenn, þeir es á þúisa landi næpi, þá selldo honom marger sono sína til læringar, oc léto vígia til presta; þeir urðu síþan vígþer .ii. til byscopa, Collr, es var í Víc austr, oc Jóan at Hólom. Ísleifr átti .iii. sono, þeir urðu aller höfþingiar nýter, Gizorr byscop oc Teitr prestr, faþer Hallz, oc Þorvalldr. Teit fœddi Hallr í Haukadali, sá maþr, es þat var al-

mællt, at mildastr væri oc ágæztr at góþo á landi hér ólærþra manna. ec com oc til Hallz .vii. vetra gamall, vetri epter þat es Geller Þorkelssonr, föpor faþer minn oc fóstri andapisc, oc vasc þar .xiii. vetr. Gunnarr enn spaci hafpi tekit lögsögo, þá es Geller lét af, oc hafpi .iii. sumor. þá hafpi Colbeinn Flosasonr .vi. þat sumar, es hann tók lögsögo, fell Haralldr conungr á Englandi. þá hafpi Geller í annat sinn .iii. sumor. þá hafpi Gunnar í annat sinn .i. sumar. þá hafpi Sighuatr Surtzsonr, systorson Colbeins, .viii. á þeim dögum com Sæmundr Sigfússonr sunnan af Fraclandi hingat til lanz, oc lét síþan vígiasc til prestz.

Ísleifr vas vígþr til byscops, þá es hann vas fimtøgr. þá vas Léó *nonus* páve. en hann vas enn næsta vetr í Norvegi, oc fór síþan út hingat. enn hann andapisc í Scálaholtti, þá es hann hafpi allz verit byscop .iiii. vetr oc .xx. suá sagpi Teitr oss. þat vas á dróttins degi .vi. nöttom epter hótíp þeira Petars oc Póls, .lxxx. vetra epter Ólafs fall Trygguasonar. þar vas ec þá með Teiti fósttra mínom. xii. vetra gamall. en Hallr sagpi oss suá, es bæþi vas minnigr oc ólyginn oc munþi siálfr þat, es hann vas scírþr, at Þangbrandr scírþi hann þrévetran. en þat vas vetri fyrr, an cristni væri hér í lög tekin. en hann gørþi bú þritøgr oc bió .lxiii. vetr í Haukadali, oc hafpi .xciii. vetr, þá es hann and-

aðisc, en þat vas of hótíþ Martens byscops á enom .x. vetri epter andlát *Ísleifs* byscops.

10. Gizorr byscop, sonr Ísleifs, vas vígþr til byscops at bæn lanzmanna á dögum Óláfs conungs Harallzsonar, .ii. vetrom epter þat, es Ísleifr andaðisc. þann vas hann allan hér á landi, en annan á Gautlandi. en þá vas namn hans rétt, at hann hét Gísrøþr. suá sagði hann oss. Marcús Sceggiasonr hafði lögsögo næstr Sighuati, oc tók þat sumar, es Gizorr byscop hafði einn vetr verit hér á landi, en fór með .iiii. sumor oc. xx. at hans sögo es scrífoþ ævi allra lögsögomanna á bók þessi, þeira es vöro fyr vart minni. en honom sagði Þórarinn bróþer hans, oc Sceggi faper þeira, oc fleiri spaker menn, til þeira ævi, es fyr hans minni vöro, at þúi es Biarni enn spaki hafði sagt, föþor faper þeira, es munði Þórarin lögsögomann oc .vi. aðra síþan. Gizorr byscop vas ástsælli af öllum lanzmönnom, an huerr maþr annarra, þeira es vér vitem hér á landi hava verit. af ástsælþ hans oc af tölom þeira Sæmundar, með umbráði Marcús lögsögomannz, vas þat í lög leitt, at aller menn tölþo oc virþo alt fé sitt, oc sóro at rétt virt væri, huárt sem vas í löndom eþa í lausaaurom, oc gærþo tíund af síþan. þat ero miclar iartegner, huat hlýþner lanzmenn vöro þeim manni, es hann com þúi fram, at fé alt vas virt með

suardögum, þat es á Íslandi vas, oc landet siálf, oc tíunder af gǫrvar, oc lög á lögb, at suá scal vesa meþan Ísland es bygt. Gizorr byscop lét oc lög leggja á þat, at stóll byscops þess, es á Íslandi væri, scyllði í Scálaholtti vesa, en áþr vas huergi, oc lagði hann þar til stólsens Scálahollz-land oc margra cynia auþœve önnor bæði í lönd-om oc í lausom aurom. en þá es hönnum þótti sá staþr hava vel af auþœvom þróazk, þá gaf hann meir an fiórþung byscopsdóms síns til þess, at helldr væri .ii. byscopsstólar á landi hér, an einn, suá sem Norþlendingar æsto hann til. en hann hafði áþr látit telia búendr á landi hér, oc vǫro þá í Austfirþinga fiórþungi .vii. hundroþ heil, en í Rangæinga fiórþungi .x., en í Breiþfirþinga fiórþungi .ix., en í Ayfirþinga fiórþungi .xii., en ótalþer vǫro þeir, es eigi ótto þingfar-ar caupi at gegna of alt Ísland.

Úlfheþinn Gunnars sonr ens spaca tóe lögsögo epter Marcús, oc hafði .ix. sumor, þá hafði Bergþórr Hramnssonr .vi., en þá hafði Gopmundr Þorgeirssonr .xii. sumor. et fyrsta sumar, es Bergþórr sagði lög upp, vas nýmæli þat gørt, at lög ǫr scyllði scriva á bók at Hafliþa Mós-sonar of vetrenn epter at sögo oc umbráði þeira Bergþórs oc annara spaca manna, þeira es til þess vǫro tecner. scylldu þeir gǫrva nýmæli þau öll í lögom, es þeim litisc þau betri, an en forno lög. scyllði þau segja upp et næsta sumar

epter í lögrétto, oc þau öll hallda, es enn meiri hlutr manna mællti þá eigi gegn. en þat varþ *fram at fara*, at þá vas scrifaþr Vigslópi oc mart annat í lögom, oc sagt upp í lögrétto af kennimönnom of sumaret epter. en þat lícapi öllom vel, oc mællti þúi mangi í gegn. þat vas oc et fyrsta sumar, es Bergþórr sagði lög upp, þá vas Gizorr byscop óþingfœrr af sótt. þá sendi hann orþ til alþingis vinom sínom oc höfþingiom, at biþia scyllði Þorlác Rúnólfsson Þorleikssonar, bróþor Hallz í Haukadali, at hann scyllði láta vígiasc til byscops. en þat gærþo aller suá sem orþ hans quómo til, oc fecsc þat af þúi, at Gizorr hafði sjálfr fyrr miöc beþit, oc fór hann útan þat sumar, en kom út et næsta epter, oc vas þá vígþr til byscops. Gizorr vas vígþr til byscops þá es hann vas fertøgr. þá vas Grégóriús septimus páve. en síþan vas hann enn næsta vetr í Danmörco, oc kom of sumaret epter hingat til lanz. en þá es hann hafði verit .xxiiii. vetr byscop, suá sem faper hans, þá vas Jóan Ögmundarsonr vígþr til byscops fyrstr til stóls at Hólom. þá vas hann vetri miþr an hálf*sextøgr*. en .xii. vetrom síþar, þá es Gizorr hafði allz verit byscop .xxxvi. vetr, þá vas Þorlác vígþr til byscops. hann lét Gizorr vígia til stóls í Sealaholtti at sér lifanda. þá vas Þorlác .ii. vetrom meirr an .xxx. en Gizorr byscop andap-

isc .xxx. nóttom sípar í Scálaholtti á enom þriðja degi í vico .v. kalend. iunii.

Á því áre eno sama andapisc Páschalis secundus páve, fyrr an Gizorr biscop, oc Baldvine Jórsala conungr, oc Arnaldus patriarcha í Hierúsalem, oc Philippús Suía conungr. en sípar et sama sumar Álexíus Grikkia conungr. þá hafði hann .xxxviii. vetr setit at stóli í Miclagarpi. en .ij. vetrom sípar varð allða mót. þá höfðu þeir Aysteinn oc Sigurðr verit .xvii. vetr conungar í Norvegi eptir Magnús föður sinn, Óláfsson Harallzsonar. þat vas .cxx. vetrom eptir fall Óláfs Tryggvasonar, en .ccl. epter dráp Eadmundar Engla conungs. en .dxvi. vetrom epter andlát Grégóriús páva, þess es cristni com á England, at því es talit es, en hann andapisc á öþro áre conungdóms Fócó keisara .dciiii. vetrom eptir burð cristz at almannatali. þat verður alt saman .mcxx. ór. hér lýcsc síá bók.

Þetta es cyn byscopa Íslendinga oc áttar tala:

Ketilbiörn landnámsmaðr, sá es bygði suðr at Mosfelli eno öfra, vas faðer Teitz, föður Gizorar ens huíta, föður Ísleifs, es fyrstr vas byscop í Scálaholte, föður Gizorar byscops.

Hrollaugr landnámsmaðr, sá es bygði austr

á Síþo, á Breiþabólstaþ, vas faþer Özorar, föþor Þórdísar, móþor Hallz á Síþo, föþor Egils, föþor Þorgerþar, móþor Jóans, es fyrstr vas byscop at Hólom.

Opr landnámscona, es bygþi vestr í Breiþafirþi, í Huammi, vas móþer Þorsteins ens rauþa, föþor Óleifs feilans, föþor Þórþar gelles, föþor Þórhíldar riúpu, móþor Þórþar hesthöfþa, föþor Carlsefnes, föþor Snorra, föþor Hallfríþar, móþor Þorlács, es nú es byscop í Scálaholtti, næstr Gizori.

Helgi enn magri landnámamaþr, sá es bygþi norþr í Eyiafirþi, í Cristnesi, vas faþer Helgo, móþor Einars, föþor Eyiólfs Valgerþarsonar, föþor Gopmundar, föþor Eyiólfs, föþor Þorsteins, föþor Ketils, es nú es byscop at Hólom, næstr Jóani.

Þessi ero nömn langfeþga Ynglinga oc Breiþfirþinga :

.i. Yngui Tyrkia conungr. .ii. Niörþr Suia conungr. .iii. Freyr. .iiii. Fiölner, sá es dó at Friþfróþa. .v. Suegþer. .vi. Vanlandi. .vii. Visburr. .viii. Dómaldr. .ix. Dómarr. .x. Dyggue. .xi. Dagr. .xii. Alreer. .xiii. Agne. .xiiii. Yngui. .xv. Jörundr. .xvi. Aun enn gamli. .xvii. Egill vendilcráca. .xviii. Óttarr. .xix. Apísl at Uppsölom. .xx. Eysteinn. .xxi. Ynguarr. .xxii. Brautönundr. .xxii. Ing-

ialdr enn illrápi. .xxiii. Óláfr trételgia. .xxv.
Hálfðan huitbeinn Upplendinga conungr. .xxvi.
Goðrøpr. xxvii. Óláfr. .xxviii. Helgi. .xxix.
Ingialdr dóttorsonr Sigurðar Ragnars sonar loð-
brócar. .xxx. Óleifr enn huíti. .xxxi. Þorsteinn
enn rauði. .xxxii. Óleifr feilan, es fyrstr byggi
þeira á Íslandi. .xxxiii. Þórðr geller. .xxxiiii.
Eyiólfr, es skírðr vas í elli sinni, þá es cristni
com á Ísland. .xxxv. Þorkell. xxxvi. Geller, faðer
þeira Þorkels, föður Branz, oc Þorgils, föður
míns, en ec heitec **Aro.**

LANDNÁMABÓK.



Landnámabók.

Þetta er prologus fyri bók þessi.

I aldarfarsbók þeiri, er Beda prestur heilagr gerði, er getið eylands þess, er Týli heitir, ok á bókum er sagt, at liggi sex dœgra sigling í norðr frá Bretlandi; þar sagði hann eigi koma dag á vetr ok eigi nótt á sumar, þá er dagr er sem lengstr. Til þess ætla vitrir menn þat ^{þrúðr} _{1, 683} haft, at Ísland sé Týli kallat, at þat er víða á landinu er sól skinn um nætr, þá er dagr er sem lengstr, enn þat er víða um daga er sól sér eigi, þá er nótt er sem lengst. Enn ^{incarnation} Beda prestr andaðist .dcccxxv. árum eftir holdgan drottins várs, at því er ritað er, ok meirr enn hundraði ára fyrr enn Ísland bygðist af Norðmönnum. Enn áðr Ísland bygðist af Noregi, váru þar þeir menn, er Norðmenn kalla Papa; þeir váru menn kristnir, ok hyggja menn, at þeir hafi verit vestan um haf, því at fundust eftir þeim bækr írskar, bjöllur ok baglar, ok enn

eller menning
anfæð sem grund

L.D.
735

fleiri hlutir, þeir er þat mátti skilja, at þeir váru Vestmenn; *þat fanst í Papey austr ok í Papli*; er ok þess getit á bókum enskum, at í þann tíma var farit milli landanna.

I.

Hér hefr landnámabók, ok segir í hinum fyrsta capítula hvert skemst er frá Íslandi.

1. Þá er Ísland fanst og bygðist af Noregi, var Adriánus pávi í Róma, ok Jóhannes eftir hann, sá er enn átti var með því nafni í postulegu sæti; enn Hlöðvér Hlöðvesson keisari fyrir norðan fjall; enn Leó ok Alexandr son hans yfir Miklagarði; þá var Haraldr hárfagri konungr yfir Noregi; enn Eiríkur Eymundarson í Svíþjóð ok Björn son hans; enn Gormr enn gamli at Danmörk; enn Elfráðr enn ríki í Englandi ok Játvarðr son hans; enn Kjarvalr at Dýflinni; Sigurðr jarl enn ríki í Orkneyjum.

Svá segja vitrir menn, at ór Noregi frá Staði sé sjau dægra sigling í vestr til Horns á Íslandi austanverðu; enn frá Snæfellsnesi, þar er skemst er, er fjögurra dægra haf í vestur til Grænlands. Enn svá er sagt, ef siglt er ór Björgyn rétt í vestr til Hvarfsins á Grænlandi, at þá mun siglt vera tylft fyrir sunnan Ísland. [*Af Hernum í Noregi skal sigla jamn-*

an í vestur til Hvarfs á Grænlandi, ok er þá siglt fyrir norðan Hjaltland svá, at því at eins sé þat, at allgóð sé sjóvar sýn; enn fyrir sunnan Færeyjar svá, at sjór er í miðjum hlíðum, enn fyrir sunnan Ísland, at þeir hafa af fugl ok hval]. Frá Reykjanesi á sunnanverðu Íslandi er fimm dægra haf til Jolduhlaups á Írlandi, í suður; enn frá Langanesi á norðanverðu Íslandi er fjögurra dægra haf norðr til Svalbarða í Hafsbotn; enn dægrsigling er til óbygða á Grænlandi ór Kolbeinsey norðr.

Svá er sagt, at menn skyldu fara ór Nor-egi til Færeyja; nefna sumir til Naddoð viking; enn þá rak vestr í haf, ok fundu þar land mikit; þeir gengu upp í Austfjörðum á fjall eitt hátt, ok sást um víða, ef þeir sæi reyki eða nokkur líkindi til þess at landið væri bygt; ok sá þeir þat ekki. Þeir fóru aftr um haustit til Færeyja; ok er þeir sigldu af landinu, fell snær mikill á fjöll, ok fyrir þat kölluðu þeir landit Snæland. Þeir lofuðu mjög landit. Þar heitir nú Reyðarfjöll í Austfjörðum, er þeir höfðu at komit. Svá sagði Sæmundur prestur enn fróði.

Maðr hét Garðarr Svavarsson, sønskur at ætt; hann fór at leita Snælands at tilvísun móður sinnar framsýnnar; hann kom at landi fyrir austan Horn et eystra; þar var þá höfn. Garðarr sigldi umhverfis landit, ok vissi, at þat var eyland. Hann var um vetr einn norðr í Húsa-

vik á Skjálfanda ok gerði þar hús. Um várit, er hann var búinn til hafs, sleit frá honum mann á báti, er hét Náttfari, ok þræl ok ambátt. Hann bygði þar síðan er heitir Náttfara-vik. Garðar fór þá til Noregs ok lofaði mjök landit. Hann var faðir Una, föður Hróars Tungugoða. Eftir þat var landit kallat Garðarshólmr, ok var þá skógr milli fjalls ok fjöru. *leach.*

2. Flóki Vilgerðarson hét maður; hann var vikingur mikill; hann [*bjóst af Rogalandi at leita Snælands. Þeir lágu í Smjörsumdi.* *ae. 11.* Hann fekk at blóti miklu ok blótaði *ae. 11.* hrafna þrjá, þá er honum skyldu leið vísa, því at þá höfðu hafsiglingarmenn engir leiðarstein *ae. 11.* þann tíma á Norðrlöndum. Þeir hlóðu þar varða, er blótit hafði verit, ok kölluðu Flókavarða; þat er þar er] mættist Hörðaland ok Rogaland. Hann fór fyrst til Hjaltlands ok lá þar í Flókavági; þar týndist Geirhildr dóttir hans í Geirhildarvatni. Með Flóka var á skipi bóndi sá er Þórólfr hét, annarr Herjólf. [*Flóki sigldi þaðan til Færeyja ok gifti þar dóttur sína. Frá henni var Þrándr í Götum. Þaðan sigldi hann út í haf með hrafna þá þrjá er bann hafði blótat í Noregi;* ok er hann lét lausan enn fyrsta, fló sá aftur um stafn; annarr fló í loft upp ok aftur til skips; enn þriði fló fram um stafn í þá átt sem þeir fundu

*re ship - gov. acc. of thing was sacrificed
of the thing sacrificed*

landit. Þeir kvámu austan at Horni, ok sigldu fyrir sunnan landit. Enn er þeir sigldu vestr um Reykjanes, ok upp lauk firðinum, svá at þeir sá Snæfellsnes, þá ræddi Faxi um: „Þetta mun vera mikit land, er vér höfum fundit; hér eru vatnföll stór“. Síðan er þat kallaðr Faxa-óss. Þeir Flóki sigldu vestr yfir Breiðafjörð, ok tóku þar land sem heitir Vatnsfjörðr, við Barðaströnd. Þá var fjörðrinn fullr af veiðiskap, ok gáðu þeir eigi fyrir veiðum at fá heyjanna, ok dó alt kvikfé þeira um vetrinn. Vár var heldr kalt. Þá gekk Flóki upp á fjall eitt hátt, ok sá norðr yfir fjöllin fjörð fullan af hafisum; því kölluðu þeir landit Ísland, sem þat hefir síðan heitit. Þeir Flóki ætluðu brutt um sumarit, ok urðu búnir litlu fyrir vetr. *Þar sér enn skálatóft þeira inn frá Br[i]anslæk ok svá hrófit, ok svá seyði þeira.* Þeim beit eigi fyrir Reykjanes, ok sleit frá þeim bátinn ok þar á Herjólf. Hann tók þar [land], sem nú heitir Herjólfshöfn. Flóki [*kom í Hafnarfjörð. Þeir fundu hval á eyri einni út frá firðinum ok kölluðu þar Hvaleyri. Þar fundust þeir Herjólfir.* Flóki var um vetrinn í Borgarfirði. Þeir sigldu um sumarit eftir til Noregs. Ok er menn spurðu af landinu, þá lét Flóki illa yfir, enn Herjólf sagði kost ok löst af landinu; enn Þórrólfr kvað drjúpa smjör af hverju strai

* good and bad

á landinu, því er þeir höfðu fundit; því var hann kallaðr Þórólfr smjör.

3. Björnólfur hét maðr, enn annarr Hróaldr; þeir váru synir Hrómundar Greipssonar; þeir fóru af Þelamörk fyrir víga sakir, ok staðfestust í Dalsfirði á Fjöllum. Sonr Björnólfs var Örn, faðir þeira Ingólfs og Helgu, enn Hróalds son var Hróðmarr, faðir Leifs. Þeir Ingólfr ok Leifr fóstbræðr fóru í hernað með sonum Atla jarls ens mjóva af Gaulum, þeim H[all]steini, ok Hersteini ok Hólmsteini. Með þeim fóru öll skifti vel; ok er þeir kvámu heim, mæltu þeir til samfara með sér annat sumar; enn um vetrinn gerðu þeir fóstbræðr veizlu sonum jarlsins. At þeiri veizlu strengdi Hólmsteinn heit, at hann skyldi eiga Helgu Arnardóttur eða öngva konu ella. Um þessa heitstrenging fanst mönnum fátt; enn Leifr roðnaði á at sjá, ok varð fátt um með þeim Hólmsteini, er þeir skildu þar at boðinu.

4. Um várit eftir bjoggust þeir fóstbræðr at fara í hernað, ok ætluðu til móts við sonu Atla jarls. Þeir fundust við Hísargafl, ok lögðu þeir Hólmsteinn bræðr þegar til orrostu við þá Leif. Enn er þeir höfðu barizt um hrið, kom at þeim Ölmóðr enn gamli, son Hörða-Kára, frændi Leifs, ok veitti þeim Ingólfi. Í þeiri orrostu fell Hólmsteinn, enn Hersteinn flýði. Þá fóru þeir Leifr í hernað. Enn um vetriun

eftir fór Hersteinn at þeim Leifi, ok vildi drepa þá; enn þeir fengu njósn af för hans, ok gerðu/*st*/mót honum; varð þá enn orrosta mikil, ok fell þar Hersteinn. Eftir þat dreif at þeim fóstbræðrum vinir þeira ór Firðafylki. Vóru þá menn sendir á fund Atla jarls ok H/*all*/steins at bjóða sættir, ok sættust þeir at því, at þeir Leifr guldu eignir sínar þeim feðgum. Enn þeir fóstbræðr bjoggu skip mikit, er þeir áttu, ok fóru at leita lands þess, er Hrafnaflóki hafði fundit ok þá var Ísland kallat. Þeir fundu landit, ok váru í Austfjörðum í Álftafirði enum syðra. Þeim virðist landit betra suðr enn norðr. Þeir váru einn vetr á landinu, ok fóru þá aftr til Noregs.

5. Eftir þat varði Ingólfr fé þeira til Íslands ferðar, enn Leifr fór í hernað í vestrvíking; hann herjaði á Írland, ok fann þar jarðhús mikit; þar gekk hann inn í, og var myrkt, þar til er lýsti af sverði því, er maðr helt á. Leifr drap þann mann ok tók sverðit, ok mikit fé af honum; síðan var hann kallaðr Hjörleifr. Hjörleifr herjaði víða um Írland, ok fekk þar mikit fé; þar tók hann þræla tíu, er svo hétu: Dufþakr ok Geirrøðr, Skjaldbjörn, Halldórr ok Drafdritr; eigi eru nefndir fleiri. Enn eftir þat fór Hjörleifr til Noregs ok fann þar Ingólf fóstbróður sinn. Hann hafði áðr fengit Helgu Arnardóttur, systur Ingólfs. Þenna vetr fekk Ing-

ólfr at blóti miklu, ok leitaði sér heilla um forlög sín; enn Hjörleifr vildi aldri blóta. Fréttin vísaði Ingólfi til Íslands. Eftir þat bjó sitt skip hvárr þeira mága til Íslands ferðar; hafði Hjörleifr herfang sitt á skipi, enn Ingólfr félags fé þeira, ok lögðu til hafs er þeir váru búnir.

8) 4 6. Sumar þat, er þeir Ingólfr fóru til at byggja Ísland, hafði Haraldr hárfagri verit tólf ár konungr at Noregi; þá var liðit frá upphafi þessa heims sex þúsundir vetra ok sjautigir ok þrir vetr, enn frá holdgan dróttins átta hundruð ok sjautigir ok fjogur ár. Þeir höfðu samflot, þar til er þeir sá Ísland; þá skildi með þeim. Þá er Ingólfr sá Ísland, skaut hann fyrir borð öndugis súlum sínum til heilla; hann mælti svá fyrir, at hann skyldi þar byggja, er súlurnar kœmi á land. Ingólfr tók þar land, er nú heitir Ingólfshöfði; enn Hjörleif rak vestr fyrir land, ok fékk hann vatnfátt. Þá tóku þrælarnir írsku þat ráð, at hnoða saman mjöl ok smjör, ok kölluðu þat óporstlátt; þeir nefndu þat minpak; enn er þat var tilbúið, kom regn mikit, ok tóku þeir þá vatn á tjöldum; enn er minpakit tók at mygla, köstuðu þeir því fyrir borð, ok rak þat á land, þar sem nú heitir Minpaks-eyrr. Hjörleifr tók land vit Hjörleifshöfða, ok var þar þá fjörðr, ok horfði botninn inn at höfðanum. Hjörleifr lét þar gera skála tvá, ok er önnur

tóftin átján faðma, enn önnur nitján. Hjörleifr sat þar um vetrinn. Enn um várit vildi hann sá; hann átti einn uxa, ok lét hann þrælana draga arðrinn. ^{slaw} Enn er þeir Hjörleifr váru at skála, þá gerði Dufþakr þat ráð, at þeir skyldi drepa uxann ok segja, at skógarbjörn hefði drepit, enn síðan skyldu þeir ráða á þá Hjörleif, ef þeir leitaði bjarnarins. Eftir þat sögðu þeir Hjörleifi þetta. Ok er þeir fóru at leita bjarnarins, ok dreifðust í skóginn, þá settu þrælarnir at sérhverjum þeira, ok myrðu þá alla, jafnmarga sér. Þeir hljópu á brutt með konur þeira ok lausafé ok bátinn. Þrælarnir fóru í eyjar þær, er þeir sá í haf til útsuðrs, ok bjoggust þar fyrir um hrið. Vífill ok Karli hétu þrælar Ingólfs; þá sendi hann vestr með sjó at leita öndvegissúlna sinna; enn er þeir komu til Hjörleifshöfða, fundu þeir Hjörleif dauðan; þá fóru þeir aftr, ok sögðu Ingólfi þau tíðindi; hann lét illa yfir drápi þeira Hjörleifs.

7. Eftir þat fór Ingólfr vestr til Hjörleifshöfða; ok er hann sá Hörleif dauðan, mælti hann: „Lítit lagðist hér fyrir góðan dreng, er þrælar skyldu at bana verða, ok sé ek svá hverjum verða, ef eigi vill blóta“. Ingólfr lét búa gröf þeira Hjörleifs, ok sjá fyrir skipi þeira ok fjárhlut. Ingólfr gekk þá upp á höfðann, ok sá eyjar liggja í útsuðr til hafs; kom honum þat í hug, at þeir mundu þangat hlaupit hafa, því at bátrinn var

* Fritz. Det går en ild, en har lidt fald

horfinn; fóru þeir at leita þrælanna, ok fundu þá þar sem Eið heitir í eyjunum; váru þeir þá at mat, er þeir Ingólfr kvámu at þeim. Þeir urðu felmsfullir, ok hljóp sinn veg hverr. Ingólfr drap þá alla. Þar heitir Dufþaksskor, er hann lézt. Fleiri hljópu þeir fyrir berg, þar sem við þá er kent síðan. Vestmannaeyjar heita þar síðan, er þrælarnir váru drepnir, því at þeir váru Vestmenn. Þeir Ingólfr höfðu með sér konur þeira, er myrðir höfðu verit; fóru þeir þá aftr til Hörleifshöfða; var Ingólfr þar vetr annan; enn um sumarit eftir fór hann vestr með sjó. Hann var enn þriðja vetr undir Ingólfsfelli fyrir vestan Ölfusá, *þar sem sumir segja hann sé heygðr*. Þau missari fundu þeir Vífill ok Karli öndvegissúlur hans við Arnarhval fyrir neðan heiði.

8. Ingólfr fór um vart ofan um heiði; hann tók sér bústað þar sem öndvegissúlur hans höfðu á land komit; hann bjó í Reykjarvík; þar eru enn öndvegissúlur þær í eldhúsi. Enn Ingólfr nam land milli Ölfusár ok Hvalfjarðar, fyrir utan Brynjudalsá, milli ok Öxarár, ok öll nes út. Þá mælti Karli: „Til ills fóru vér um góð herað, er vér skulum byggja útnes þetta“. Hann hvarf á brutt ok ambátt með honum. Vífli gaf Ingólfr frelsi, ok bygði hann at Vífilstóftum; við hann er kent Vífilfell; þar bjó *hann* lengi, ok varð skilríkr maðr. Ingólfr lét gera skála

hones t

á Skálafelli; þaðan sá hann reyki við Ölfusvatn ok fann þar Karla.

9. Ingólfr var frægastr allra landnámsmanna, því at hann kom hér at óbygðu landi, ok bygði fyrstr landit; gerðu þat aðrir landnámsmenn eftir hans dæmum. Ingólfr átti Hallveigu Fróðadóttur, systur Lofts ens gamla. Þeira son var Þorsteinn, er þing lét setja á Kjalarnesi, áðr alþingi var sett. Son Þorsteins var Þorkell máni lögsögumaðr, er einn heiðinna manna hefir bezt verit siðaðr, at því er menn vita dæmi til. Hann lét sik bera í sólargeisla í banasótt sinni, ok fal sig á hendi þeim guði, er sólina hafði skapat; hafði hann ok lifat svá hreinliga sem þeir kristnir menn, er bezt eru siðaddir. Son hans var Þormóðr, er þá var allsherjargoði er kristni kom á Íslandi. Hans son var Hamall, faðir Más ok Þormóðar ok Torfa. Sigurðr var son Más, faðir Hamals, föður Guðmundar, föður Þormóðar Skeiðagoða.

10. Björn buna hét hersir ágætr í Noregi, son Veðrar-Gríms, hersis ór Sogni. Móðir Gríms var Hervör, dóttir Þorgerðar Eylaugsdóttur, hersis ór Sogni. Frá Birni er því nær alt stórmenni komit á Íslandi. Hann átti Vélaugu, systur Vémundar ens gamla; þau áttu þrjá sonu: einn var Ketill flatnefr, annarr Hrappr, þriði Helgi; þeir váru ágætir menn, ok er frá þeira afkvæmi mart sagt í þessi bók.

subname
piscat
Lohanes 114
alþingi
saga þess

Þórðr skeggi hét maðr; hann var son Hrapps, Bjarnarsonar bunu. Þórðr átti Vilborgu Ósvaldsdóttur. Helga hét dóttir þeira; hana átti Ketilbjörn enn gamli. Þórðr fór til Íslands ok nam land með ráði Ingólfs í hans landnámi á milli Úlfarsár ok Leiruvágs. Hann bjó á Skeggjastöðum. Frá Þórði er mart stórmenni komit á Íslandi.

11. Hallr goðlauss hét maðr; hann var son Helga goðlauss. Þeir feðgar vildu eigi blóta ok trúðu á mátt sinn. Hallr fór til Íslands, ok nam land með ráði Ingólfs frá Leiruvági til Mógilsár. Son Halls var Helgi, er átti Þuríði Ketilbjarnardóttur. Þeira son var Þórðr í Álfsnesi, er átti Guðnýju Hrafnkelsdóttur. Hallr bjó í Múla.

Haraldr enn hárfagri herjaði vestr um haf, sem ritat er í sögu hans. Hann lagði undir sik allar Suðreyjar, svá langt vestr, at engi *Noregs konungr* hefir síðan lengra eignast. Enn er hann fór vestan, slógust í eyjarnar víkingar ok Skotar ok Írar, ok herjuðu ok ræntu víða. Ok er þat spurði Haraldr konungr, sendi hann vestr Ketil flatnef, son Barnar bunu, at vinna aftr eyjarnar. Ketill átti Yngveldi, dóttur Ketils veðrs, hersis af Hringaríki. Þeira synir váru þeir Björn enn austroeni ok Helgi bjóla. Uðr en djúpauðga ok Þórunn hyrna váru dætr þeira. Ketill fór vestr, enn setti eftir Björn son sinn;

hann lagði undir sik allar Suðreyjar, ok gerðist höfðingi yfir, enn galt øngva skatta konungi, sem ætlat var; tók þá konungr undir sik eignir hans, ok rak á brutt Björn son hans.

Helgi bjóla, son Ketils flatnefs, fór til Íslands ór Suðreyjum. Hann var með Ingólfi enn fyrsta vetr, ok nam með hans ráði Kjalarnes alt, milli Mógilsár ok Mýdalsár; hann bjó at Hofi. Hans son var Víga-Hrappr ok Kollsveinn, faðir Eyvindar hjalta, föður Kollsveins, föður Þorgerðar, móður Þóru, móður Ögmundar, föður Jóns byskups ens helga.

12. Örlygr hét son Hrapps Bjarnarsonar bunu, hann var at fóstri með enum *helga* Patreki byskupi í Suðreyjum. *Hann* fýstist at fara til Íslands ok það, at biskup sæi um með honum. Byskup lét hann hafa með sér kirkjuvið ok járnklokku, ok plenarium ok mold vigða, er hann skyldi leggja undir hornstafina. Byskup það hann þar land nema, er hann sæi fjöll tvau af hafi, ok byggja undir enu syðra fjallinu, ok skyldi dalr í hvárutveggja fjallinu; hann skyldi þar taka sér bústað ok láta þar kirkju gera ok eigna enum helga Kolumba. Með Örlygi var á skipi maðr sá, er Kollr hét, fóstbróðir hans; annarr Þorbjörn ^{sparr}sporr, þriði Þorbjörn tálkni, ok bróðir hans Þorbjörn skúma; þeir váru synir Böðvars blóðruskalla. Þeir Örlygr létu í haf, ok fengu útivist harða, ok vissu eigi, hvar þeir fóru; þá

hét Örlygr á Patrek byskup til landtöku sér, at hann skyldi af hans nafni gefa örnefni þar sem hann tæki land. Þeir váru þaðan frá litla hrið úti, áður þeir sá land, ok váru komnir vestr um landit. Þeir tóku þar sem heitir Örlygshöfn, enn fjörðinn inn frá kölluðu þeir Patreksfjörð. *Enn Kollr hét á Þór. Þá skildi í storminum, ok kom hann þar sem Kollsvík heitir ok braut hann þar skip sitt.* Þar váru þeir um vetr; enn um várit bjó Örlygr skip sitt; enu hásetar hans námu þar sumir land, sem enn mun sagt verða, Örlygr sigldi vestan fyri Barð; enn er hann kom suður um Snæfellsjökul á fjörðinn, sá hann fjöll tvau ok dal í hvarutveggja. *Þar fell útbyrðis járnklokkann ok sökk niður.* Þar kendi hann land þat, er honum var til visat. Hann helt þá at enu syðra fjallinu, ok var þat Kjalarnes, ok hafði Helgi bræðrungr hans numit þar áður. *[Enn þeir sigldu inn eftir firði ok tóku þar land sem nú heitir Sandvík á Kjalarnesi; þar lá þá járnklokkann í þarabrúki].* Örlygr var með Helga enn fyrsta vetr, enn um várit nam hann land at ráði Helga frá Mógilsá til Ósvífrslækjar ok bjó at Esjubergi. Hann lét þar gera kirkju, sem mælt var. *[Hjálp hét kona hans; þeira son var Valbjófr, er fulltíða kom til Íslands með Örlygi]* faðir Valbrands, föður Torfa. *[Síðan átti Örlygr Ísgerði, dóttur Þormóðar Bresasonar. Þeira son var Geirmundr, faðir Halldóru, er átti Þjóstólfr,*

son Bjarnar gullbera. *Þeira son var Þorleifr, er bjó at Esjubergi eftir Geirmund móðurföður sinn*]. Þeir Örlygr frændr trúðu á Kolumba, [*þó at þeir væri óskirðir. Þorleifr var trollaukinn, ok tók þó kristni; frá honum eru Esbergingar ok mart manna komit. Dóttir Örlygs ens gamla ok Ísgerðar*] var Vélaug, er átti Gunnlaugr ormstunga, sonr Hrómundar í Þverárhlið; þeira dóttir var Þuriðr dylla, móðir Illuga ens svarta á Gilsbakka.

13. Svartkell hét maðr katneskr; hann [*for af Englanditil Íslands ok*] nam land fyrir innan Mýdalsá milli ok Eilífsdalsár, ok bjó at Kiðjafelli fyrst, enn síðan á Eyri. Hans son var Þorkell faðir Glúms, er svá baðst fyrir at krossi: „Gott ey gömlum mönnum, gott ey ungum mönnum“. Hann var faðir Þórarins, föður Glúms á Vatnlausu. Arnleif hét systir Svartkels, er átti Þórólfr viligisl, faðir Kleppjárns ens gamla ór Flókadal; þeira dóttir var Hallgerðr, er átti Bergþórr Kollsson.

Valþjófr, son Örlygs ens gamla frá Esjubergi nam Kjós alla, ok bjó at Meðalfelli. [*Þorbjörn kollr hét son hans, faðir Hallveigar, er átti Þórðr lambi; þat er Valþýflinga kyn. Signý hét dóttir Valþjófs, er Signýjarstaðir eru viðkendir; hana átti Grínkell, son Bjarnar gulibera; þeira synir váru þeir Hörðr, er drepinn var í Geirshólmi, ok Gnúpr, faðir*] Birnings, föður Gnúps,

föður Eiríks Grœnlendinga byskups. [*Valbrandr hét annarr son Valbjófs, faðir Torfa, er fyrst bjó á Möðruvöllum. Þeir feðgar gerðu félag við Tungu-Odd; af því bjoggu þeir síðan á Breiðabólstaði Reykjardal hinum nørðra. Torfi var faðir Þorkels at Skáneyju, er átti Arngerði dóttur Þorkels Svartkelssonar*].

14. Hvamm-Þórir nam land á milli Laxár ok Forsár, ok bjó í Hvammi. Þórir deildi við Ref enn gamla um kú þá, er Brynja hét; við hana er dalrinn kendr; hon gekk þar úti með xl nauta, ok váru öll frá henni komin. Þeir Refr ok Þórir börðust hjá Þórishólum; þar fell Þórir ok átta menn hans.

Þorsteinn, son Sölmundar Þórólfssonar smjørs, nam land milli Botnsár ok Forsár: Brynjudal allan. Hann átti Þorbjörgu kottlu, dóttur Helga skarfs, *Geirleifssonar, er nam Barðaströnd; þeira son var Refr enn gamli [er bjó at Múla í Brynjudal]*, er Bryndælir eru frá komnir. Nú eru taldir þeir menn, er búit hafa í landnámi Ingólfs, vestr frá honum.

Maðr hét Avangr, írskr at kyni; hann bygði fyrst í Botni; þar var þá svá stórr skógr, at hann gerði þar af hafskip, ok hlóð þar sem nú heitir Hlaðhamarr. Hans son var Þorleifr, faðir Þuriðar, er átti Þormóðr Þjóstarsson á Álftanesi ok Iðunnar Molda-Gnúps dóttur. Sonr Þormóðar var Börkr, faðir Þórðar, föður Auðunar

í Brautarholti. Kolgrímr enn gamli, son Hrólfss hersis, nam land út frá Botnsá til Kalmansár, ok bjó á Ferstiklu. Hann átti Gunnvöru, dóttur Hróðgeirs ens spaka; þeira börn voru þeir Þórhalli, faðir Kolgríms, föður Steins, föður Kvists, er Kvistlingar eru frá komnir. Bergþóra var dóttir Kolgríms ens gamla, er átti Refr í Brynjudal.

15. *[Þormóðr hinn gamli ok Ketill Bresa synir fóru af Írlandi til Íslands, ok námu Akranes alt, á milli Örriðaár ok Kalmansár; þeir váru írskir; Kalman var ok írskr, er áin er við kend, ok bjó fyrst í Katanesi. Þeir bræðr skiftu löndum með sér, svá at Þormóðr átti fyrri sunnan Reyni ok til Kalmansár, ok bjó at Hólmi hinum iðra, enn Ketill bróðir hans átti fyrri vestan Reyni ok fyrri norðan Akrafell til Örriðaár. Bersi hét son hans, faðir Þorgests, föður Stara at Hólmi, föður Knattar, föður Ásdísar, er átti Klængr Snæbjarnar son, sonar Hafnar-Orms. Geirlaug var dóttir Þormóðs hins gamla, móðir Tungu Odds. Jörundr hinn kristni var son Ketils Bresasonar; hann bjó í Jörundarholti; þat er nú kallat í Görðum. Hann helt vel kristni til dauðadags, ok var einsetumaðr í elli sinni. Son Jörundar var Kleppr, faðir Einars, föður Narva. Hávarr hét annarr son Klepps, faðir Þorgeirs. Eðna hét dóttir Ketils Bresasonar; hon var gift á Írlandi þeim manni, er Konáll hét; þeira son*

var Ásólfr alskik, er í þann tíma fór af Írlandi til Íslands ok kom út austr í Ósum á Austfjörðum. Hann var frændi Jörundar í Görðum ok var kristinn ok vildi ekki eiga við heiðna menn ok eigi vildi hann þiggja fæðu at þeim. Þeir fóru tólfsaman austan, þar til er þeir kómu at garði Þorgeirs ens hörðska í Holti undir Eyjafjöllum, ok settu þar tjald sitt. Enn förunautar hans þrír voru þá sjúkir; þeir önduðust þar; enn Jón prestur Þorgeirsson, faðir Gríms í Holti, fann bein þeira ok flutti til kirkju. Síðan gerði Ásólfr sér skála, því nær sem nú er kirkju hornit at Ásólfs skála, at ráði Þorgeirs, því at Þorgeirr vildi þá eigi hafa við kús sín].

16. [Á fell við skála Ásólfs sjálfan. Þat var öndverðan vetr. Áin varð þegar full með fiskum. Þorgeirr sagði, at þeir sæti í veiðistöð hans. Síðan fór Ásólfr brott þaðan, ok gerði annan skála vestar við aðra á; sú heitir Írá, því at þeir váru menn írskir. Enn er menn kómu til árinnar, var hon full með fiskum, svá at slíkt undr þóttust menn eigi sét hafa, enn brottu var alt ór hinni eystri ánni. Þá ráku heraðsmenn þá brott þaðan, ok fór hann þá til hins vestasta skálans; fór alt á sömu leið. Bændr kölluðu þá fjölkunga, enn Þorgeirr kvezt hyggja, at þeir mundu vera góðir menn. Um vart fóru þeir brott, ok vestr á Akranes. Hann gerði bú at Hólmi á kirkjubólstað. Hans son var Sölvi, faðir Þór-

hildar, er átti Brandr, son Þorgríms Kjallaks-sonar; þeira son Þorleifr, faðir Bárðar, föður Jófríðar, er átti Árni Torfuson; þeira dóttir Helga, er átti Arngrímr Guðmundarson. Enn er Ásólfr eldist, gerðist hann einsetumaðr. Þar var kofi hans sem nú er kirkjan; þar andaðist hann, ok var þar grafinn at Hólmi. Enn þá er Halldórr, son Illuga hins rauða, bjó þar, þá vandist fjóskona ein at þerra fætr sína á þúfu þeiri, er var á leiði Ásólfs. Hana dreymdi, at Ásólfr ávitaði hana um það, er hon þerði fætr sína saurga á húsi hans: „enn þá munu vit sátt“, segir hann, „ef þú segir Halldóri draum þinn“. Hon sagði honum, ok kvað hann ekki mark at því, er konor dreymdi, ok gaf ekki gaum at. Enn er Hróðólfr byskup fór brott ór Bæ, þar sem hann hafði búit um xix ár, þá vóru þar eftir munkar þrír; einn þeira dreymdi, at Ásólfr mælti við hann: „Sentu húskarl þinn til Halldórs at Hólmi ok kaup at honum þúfu þá, er á fjósgötu er, ok gef við mörk silfrs“. Munkinn gerði svá. Húskarlinn gat keypt þúfuna, ok gróf síðan jörðina, ok hitti þar manns bein; hann tók þau upp ok fór heim með. Ena næstu nótt eftir dreymdi Halldór, at Ásólfr kom at honum, ok kvezt bæði augu mundu sprengja ór hausi honum, nema hann keypti bein hans slíku verði sem hann seldi. Halldórr keypti bein Ásólfs, ok lét gera at tréskrin ok setja yfir altari. Halldórr sendi Illuga son sinn

útan eftir kirkjuviði, enner hann fór út aftr, er hann kom mil'im Reykjaness ok Snjófjallsness, þá náði hann eigi fyrir stýrimönnum at taka land þar er hann vildi. Þá bar hann fyrir borð kirkjuviðinn allan ok bað þar koma sem Ásólfr vildi. Enn Austmenn kómu vestr í Vaðil. Enn þrimr nóttum síðar kom viðrinn á Kirkjusand at Hólmi, nema tvau tré kómu á Raufarnes á Mýrum. Halldór r lét gera kirkjo xxx álna ok viði þakta, ok helgaði Kolumba með guði].

17. Bekan hét maðr, er nam land í landnámi Ketils, frá Berjadalsá til Örriðaár, ok bjó at Bekansstöðum.

Fiðr enn auðgi Halldórsson, Högnasonar, *fír ór Stafangri til Íslands; hann átti Þórvöru, dóttur Þorbjarnar frá Mosfelli, Hraðasonar. Hann nam land fyrir sunnan Laxá ok til Kalmansár ok bjó at Miðfelli. Hans son var Þorgeirr, faðir Jósteins, föður Þórunnar, móður Guðrúnar, móður Sæmundar, föður Brands byskups. Skeggi í Skógum var son Þórunnar, faðir Styrmis ok Bolla í Skógum.*

Hallkell, er nam Hvítársiðu, bjó fyrst á Akranesi, á Hallkelsstöðum, áðr Bresasynir ráku hann brott. Enn er hann fór eftir fé sínu, því er þar hafði sjálfala úti gengit, var hann drepinn, ok er þar heygðr.

Hafnar-Ormr nam lönd um Melahverfi út til Örriðaár ok Laxár, ok inn til Andakílsár, ok

bjó í Höfn. Hans son var Þorgeirr höggvinkinni, faðir Þórunnar, móður Þórunnar, móður Jósteins, föður Sigurðar, föður Bjarnheðins. Þorgeirr höggvinkinni var hirðmaðr Hákonar konungs Aðalsteinsfóstra; hann fekk á Fitjum kinnarsár ok orð gott.

Bræðr tveir bjoggu í landnámi þeira Finns ok Orms. Hróðgeirr enn spaki í Saurbæ, enn Oddgeirr at Leirá; enn þeir Finnur ok Ormr keyptu þá brutt, því at þeim þótti þar þrönglent. Þeir Hróðgeirr bræðr námu síðan lönd í Flóa, Hraungerðingahrepp; bjó Hróðgeirr í Hraungerði, enn Oddgeirr í Oddgeirshólum; hann átti dóttur Ketils gufu. [*Hafnar-Ormr er heygðr þar í höfðanum framfrá bænum í Höfn sem hann tók land*].

18. Úlfr hét maðr, sonr Brunda-Bjálfa ok Hallberu, dóttur Úlfs ens óarga ór Hrafnistu; Úlfr átti Salbjörgu, dóttur Berðlu-Kára; hann var kallaðr Kveldúlfur. Þórólfr ok Skalla-Grímr váru synir þeira. Haraldr konungur hárfagri lét drepa Þórólfr norðr í Alöst á Sandnesi af rögi Hildiriðarsona; þat vildi Haraldr konungur eigi bæta; þá bjoggu þeir Grímr ok Kveldúlfur kaupskip ok ætluðu til Íslands, því at þeir höfðu þar spurt til Ingólfs vinar síns. Þeir lágu til hafs í Sólundum; þar tóku þeir knör þann, er Haraldr konungur lét taka fyrir Þórólfi, þá er

menn hans váru nýkomnir af Englandi, ok drápu þar Hallvarð harðfara ok Sigtrygg snarfara, er því höfðu valdit. Þar drápu þeir ok sonu Guðþorms Sigurðarsonar hjartar, bræðrunga konungs, ok alla skipshöfn þeira, nema tvá menn, er þeir létu segja konungi tíðindin. Þeir bjoggu hvárttveggja skipit til Íslands ok þrjá tigu manna á hváru; stýrði Kveldúlfur því, er þá var fengit. Grímr enn háleyski, Þórisson, Gunnlaugssonar, Hrólfs-sonar, Ketilssonar kjölfara, var ^{forráðgjafi} forráðamaður með Kveldúlfi á því skipi, er hann stýrði; þeir vissust jafnan til í hafinu; ok er mjök sóttist hafit, þá tók Kveldúlfur sótt; hann bað þess, at kistu skyldi gera at líki hans, ef hann dæi, ok bað svá segja Grími syni sínum, at hann tæki skamt þaðan bústað á Íslandi, er kista hans kæmi á land, ef þess yrði auðit. Eftir þat andaðist Kveldúlfur, ok var skotit fyrir borð kistu hans. Þeir Grímr heldu suður um landit, því at þeir höfðu spurt, at Ingólfr bygði sunnan á landinu. Sigldu þeir vestr fyrir Reykjanes, ok stefndu þar inn á fjörðinn; skyldi þá með þeim, svá at hvárigir vissu til annarra. Sigldu þeir Grímr enn háleyski alt inn á fjörðinn, þar til er þraut sker öll, ok köstuðu þá akkerum sínum. Enn er flóð gerði, fluttust þeir upp í áros einn, ok leiddu þar upp skipit sem gekk; sú á heitir nú Gufá; báru þeir þar á land föng sín; enn er þeir könnuðu landit, þá höfðu þeir

explare

skamt gengit út frá skipinu, áðr þeir fundu kistu Kveldúlfs rekna í vik eina; þeir báru hana á þat nes, er þar var, ok hlóðu at grjóti.

19. Skalla-Grímr kom þar at landi, er nú heitir Knarrarnes á Mýrum; síðan kannaði hann landit, ok var þar mýrlendi mikit ok skógar víðir, langt á milli fjalls ok fjöru; enn er þeir fóru inn með firðinum, kómu þeir á nes þat, er þeir fundu álfir; þat kölluðu þeir Álftanes. Þeir létu eigi fyrr enn þeir fundu þá Grím enn háleyska; sögðu þeir Grími alt um ferðir sínar, ok svá hver orð Kveldúlfr hafði sent Grími syni sínum. Skalla-Grímr gekk til at sjá, hvar kistan hafði á land komit; hugðist honum svá, at skamt þaðan mundi vera bólstaðr góðr. Skalla-Grímr var þar um vetrinn, sem hann kom af hafi, ok kannaði þá alt herað; hann nam land útan frá Selalóni ok et efra til Borgarhrauns, ok suðr alt til Hafnarfjalla; herað alt svá. vítt sem vatnföll deila til sjóvar; hann reisti bæ hjá vik þeiri, er kista Kveldúlfs kom á land, ok kallaði at Borg; ok svá kallaði hann fjörðinn Borgarfjörð. Síðan skipaði hann heraðit sínum félögum, ok þar námu margir menn síðan land með hans ráði. Skalla-Grímr gaf land Grími enum háleyska fyrir sunnan fjörð, á milli Andakilsár ok Grímsár; hann bjó á Hvanneyri. Úlfr hét son hans. faðir Hrólfs í Geitlandi.

Þorbjörn svartir hét maðr; hann keypti land

at Hafnar-Ormi inn frá Selaeyri ok upp til Forsár; hann bjó á Skeljabrekku; hans son var Þorvarður, er átti Þórunni, dóttur Þorbjarnar ór Arnarholti; þeira synir váru þeir Þórarinn blindi ok Þorgils orraskáld, er var með Óláfi kváran í Dýflinni.

Skorri, leysingi Ketils gufu, nam Skorradal fyri ofan vatn, ok var þar drepinn.

Björn gullberi nam Reykjardal enn syðra [*frá Grímsá til Flókadalsár*] ok bjó á Gullberastöðum; Hans son var Grímkell goði í Bláskógum; hann átti Signýju Valbrandsdóttur, Valþjófssonar; þeira son var Hörður, er var fyrir Hólmsmönnum. Björn gullberi átti Ljótunni [*Hrólfsdóttur*], systur Kolgríms ens gamla. Svarthöfði at Reyðarfelli var annarr son þeira; hann átti Þuríði Tungu-Odds dóttur; þeira dóttir Þórdís, er átti Guðlaugr enn auðgi; Þjóstólfr var enn þriði son Bjarnar, fjórði Geirmundr.

Þorgeirr meldun þá lönd öll at Birni fyrir ofan Grímsá; hann bjó í Tungufelli; hann átti Geirbjörgu, dóttur Bálda ór Hrútafirði; þeira son Véleifr enn gamli.

Flóki [*leysingi Ketils gufu, bróðir Skorra*]. nam Flókadall [*allan á milli Flókadalsár ok Geirsár ok bjó í Hrísum*] ok var þar drepinn.

20. Óleifr Hjalti hét maðr göfugr; hann kom skipi sínu sínu í Borgarfjörð, ok var enn fyrsta vetr með Skalla-Grími; hann nam land at ráði Skalla-

Gríms milli Grímsár ok Geirsár, ok bjó at Varma-
læk; hans synir váru þeir Ragi í Laugardal ok
Þórarinn lögsögumaðr, er átti Þórdísi, dóttur Óláfs
feilans; þeira dóttir Vígdís, er átti Steinn Þorfinns-
son. Son Raga var Guðþormr, faðir Gunnvarar,
móður Þórnyjar, móður Þorláks, föður Rúnólfs,
föður Þorláks byskups.

Ketill blundr ok Geirr son hans kvámu til Ís-
lands, ok váru með Skalla-Grími enn fyrsta vetr;
þá fekk Geirr Þórunnar, dóttur Skalla-Gríms.
Um várit eftir vísaði Grímr þeim til landa, ok
námu þeir upp frá Flókadalsá til Reykjadalsár,
ok tungu þá alla upp til Rauðsgils, ok Flóka-
dal allan fyrir ofan brekkur. Ketill bjó í Þránd-
arholti; við hann er kent Blundsvatn; þar bjó
hann síðan. Geirr enn auðgi, son hans, bjó
í Geirshlíð, enn átti annat bú á Reykjum en-
um efrum; hans synir váru þeir Þorgeirr
blundr ok Blundketill, ok Svarðkell á Eyri;
dóttir Geirs var Bergdís, er Gnúpr átti Flóka-
son í Hrísum; þeirar ættar var Þóroddr hrísa-
blundr.

Önundr breiðskeggr var son Úlfars Úlfssonar
Fitjumskeggja, Þórissonar hlammanda; Önundr
nam tungu alla milli Hvítár ok Reykjadalsár,
ok bjó á Breiðabólstað; hann átti Geirlaugu,
dóttur Þormóðar á Akranesi, systur Bersa; þeira
son var Tungu-Oddr; enn Þórodða hét dóttir
þeira; hennar fekk Torfi, son Valbrands Val-

þjófssonar, Örlygssonar frá Esjubergi, ok fylgdi henni heiman hálfr Breiðabólstaðr ok Hálsaland með. Hann gaf Signýju systur sinni Signýjarstaði, ok bjó hon þar. Torfi drap Kroppsmenn tólf saman; ok hann réð mest fyrir drápi Hólmsmanna; ok hann var á Hellisfitjum, ok Illugi enn svartí ok Sturla goði, þá er þar váru drepnir átján Hellismenn; enn Auðun Smiðkelsson brendu þeir inni á Þorvarðsstöðum. Sonr Torfa var Þorkell at Skáney. Tungu-Oddr átti Jór-
ef. Hæns. sa 5
 unni Helgadóttur; þeira börn váru þau: Þorvaldr, er réð brennu Blundketils, ok Þóroddr, er átti Jófriði Gunnarsdóttur; þeira dóttir Húngerðr, er átti Svertingr Hafrbjarnarson. Dóttir Tungu-Odds var Þuriðr, *[er átti Svarthöfði, ok Jófriðr]*, er Þorfinnr Selþórisson átti, ok Hallgerðr, er Hallbjörn átti, son Odds frá Kiðjabergi. Kjöl-vör var móðursystir Tungu-Odds, er bjó á Kjöl-vararstöðum, móðir Þorleifar, móður Þuriðar, móður þeira Gunnhildar, er Kali átti, ok Glúms föður Þórarins, föður Glúms at Vatnlausu.

21. Rauðr hét maðr, er nam land upp frá Rauðsgili til Giljár, ok bjó at Rauðsgili; hans synir váru þeir Úlfr á Úlfsstöðum ok Auðr á Auðsstöðum fyrir norðan á, er Hörðr vá; þar hefst saga Harðar Grímkelssonar ok Geirs.

Grímr hét maðr, er nam land et syðra upp frá Giljum til Grímsgils, ok bjó við Grímsgil; hans synir váru þeir Þorgils auga á Augastöðum

ok Hrani á Hranastöðum, faðir Gríms, er kallaður var Stafngrímr; hann bjó á Stafngrímsstöðum; þar heitir nú á Sigmundarstöðum; þar gagnvart fyrir norðan Hvítá við sjálfa ána er haugr hans; þar var hann veginn.

Þorkell kornamúli nam ás enn syðra upp frá Kollslæk til Deildargils, ok bjó í Ási; hans son var Þorbergr kornamúli, er átti Álöfu ell-
iðaskjöld, dóttur Ófeigs ok Ásgerðar, systur Þorgeirs gollnis; börn þeira váru þau Ey-
steininn ok Hafþóra, er átti Eiður Skeggjason, er síðan bjó í Ási; þar dó Miðfjarðar-Skeggi, ok er þar haugr hans fyri neðan garð. Ann-
arr son Skeggja var Kollr, er bjó at Kollslæk. Synir Eiðs váru Eysteinn ok Illugi.

Úlfr, son Gríms ens háleyska ok Svanlaugar, dóttur Þormóðar af Akranesi, systur Bersa, (*hann*) nam land milli Hvítár ok suðrjökla, ok bjó í Geitlandi; hans synir váru þeir Hrólfr enn auði, faðir Halldóru, er átti Gizurr hvíti; þeira dóttir Vilborg, er átti Hjalti Skeggjason. Annarr son hans var Hróaldr, faðir Hrólfs ens yngra, er átti Þuriði Valþjófsdóttur, Örlygssonar
ensgamla; þeira börn váru þau: Kjallakr at Lundi í Syðradal, faðir Kolls, föður Bergþórs; annarr var Sölvi í Geitlandi, faðir Þórðar í Reykjaholti, föður Sölva, föður Þórðar, föður Magnúss, föður Þórðar, föður Helgu, móður Guðnýjar, móður Sturlusona, *Sighvats ok Þórðar ok Snorra.*

Son Sighvats var Sturla, faðir Þuríðar, er herra Rafn átti; þeira börn Jón korpr, Hallkatla ok Valgerðr ok Þorgerðr. Synir Hallkötlu ok Jóns Péturssonar váru þeir Sturla ok Pétr, ok Steinunn dóttir, er átti Guðmundr Þorsteinsson, Skeggja-sonar. Þriði son Hrólfs var Illugi enn rauði, er fyrst bjó í Hraunsási; hann átti þá Sigríði, dóttur Þórarins ens illa, systur Músa-Bölverks; þann bústað gaf Illugi Bölverki, enn Illugi fór þá at búa á Hofstöðum í Reykjadal, því at Geitlendingar áttu at halda uppi hofi því at helmingi við Tungu-Odd. Síðast bjó Illugi at Hólmi iðra á Akranesi, því at hann keypti við Hólmu-Starra bæði löndum ok konum ok fé öllu; þá fekk Illugi Jórunnar, dóttur Þormóðs Þjóstarssonar af Álftanesi; enn Sigríðr hengdi sig í hofinu, því at hon vildi eigi manna kaupit. Hrólfr enn yngri gaf Þorlaugu ^{priestess} gyðju, dóttur sína, Oddi Ýrarsyni; því réðst Hrólfr vestr til Ballarár, ok bjó þar lengi síðan, ok var kallaðr Hrólfr at Ballará.

II.

Hér hefr upp landnám í Vestfirðinga fjórðungi, er mart stórmenni hefr bygðan.

1. Maðr hét Kalman, suðreyskr at ætt; hann fór til Íslands ok kom í Hvalfjörð, ok sat við

Kalmansá. Þar druknuðu synir hans tveir á Hvalfirði. Enn síðan nam hann land fyrir vestan Hvítá, á milli ok Fljóta, Kalmanstungu alla, ok svá alt austr undir jökla sem grös eru vaxin, ok bjó í Kalmanstungu. Hann druknaði í Hvítá, er hann hafði farit suður í Hraun at hitta friðlu sína, ok er haugr hans á Hvítárbakka fyrir sunnan. Hans son var Sturla goði, er bjó á Sturlustöðum uppi undir Tungufelli, upp frá Skáldskelmisdal; enn síðan bjó hann í Kalmanstungu. Hans son var Bjarni, er deildi við Hrólf enn yngra ok sonu hans um Tunguna litlu; þá hét Bjarni at taka kristni; eftir þat braut Hvítá út farveg þann, er nú tellr hún; þá eignaðist Bjarni Tunguna litlu, ok ofan um Grindr ok Sölmundarhöfða. Kýlan hét bróðir Kalmans; hann bjó fyrir neðan Kollshamar; hans son var Kári, er deildi við Karla Konáls-son á Karlastöðum, leysingja Hrólfs ór Geitlandi, um oxa, ok reyndist svá, at Karli átti. Síðan eggjaði Kári þræl sinn til at drepa Karla; þrællinn lét sem hann ^{var} væri, ok hljóp suður um hraun; Karli sat á þreskildi; þrællinn hjó hann banahögg; síðan drap Kári þrællinn. Þjóðólfr, sonr Karla, drap Kýlan Kárasen í Kýlanshólum. Síðan brendi Þjóðólfr Kára inni þar sem nú heitir á Brennu. Bjarni Sturluson tók skírn, ok bjó á Bjarnastöðum í Tungunni litlu, ok lét þar gera kirkju.

Pránder nefja hét maðr ágætr, faðir Þorsteins, er átti Lofthœnu dóttur Arinbjarnar hersis ór Fjörðum. Systir Lofthœnu var Arnþrúðr, er átti Þórir hersir Hróaldsson; var þeira son Arinbjörn hersir. Móðir þeira Arnþrúðar var Ástriðr slækidrengur, dóttir Braga skálds ok Lofthœnu, dóttur Erps lútanda. Sonr Þorsteins ok Lofthœnu var Hrosskell, er átti Jóreiði Ölvésdóttur, [*sonar Möttuls Finna konungs*]; Hallkell hét son þeira. Hrosskell fór til Íslands, og kom í Grunnafjörð; hann bjó fyrst á Akranesi; þá ömuðust þeir Ketill bræðr við hann; síðan nam hann Hvitársíðu milli Kjarrár ok Fljóta; hann bjó á Hallkellsstöðum, ok Hallkell son hans eftir hann, ok átti hann Þuriðyllum, dóttur Gunnlaugs ór Þverárhlið ok Vélaugar Örlygsdóttur frá Esjubergi. Hrosskell gaf land Þorvarði, föður Smiðkels, föður þeira Þórarins ok Auðunar, er réðu fyrir Hellismönnum; hann bjó á Þorvarðsstöðum, ok átti Fljótsdal allan upp með Fljótum. Hrosskell gaf Þorgauti, skipverja sínum, land niðri í Síðu; hann bjó á Þorgautsstöðum; hans synir voru Gíslar tveir. Börn þeira Hallkels ok Þuriðar voru þau Þórarinn ok Finnvarðr, Tindr ok Illugi enn svartir, ok Gríma, er átti Þorgils Arason. Þórarinn var Músa-Bölverkr, er hann bjó í Hraunsási; þá lét hann gera þar virki, ok veitti Hvítá í gegnum

Gunnlaug
saga

ásinn, enn áðr fell hon um Melrakkadal ofan; Illugi ok Tindr sóttu Bólverk í virkit.

2. Ásbjörn hinn auði Harðarson keypti land fyrir sunnan Kjarrá, upp frá Sleggjulæk til Hvítbjarga; hann bjó á Ásbjarnarstöðum; hann átti Þorbjörgu, dóttur Miðfjarðar-Skeggja; þeira dóttir var Ingibjörg, er átti Illugi enn svarti.

Örnólfr hét maðr, er nam Örnólfsdal ok Kjarradal fyrir norðan upp til Hvítbjarga; Ketill blundr keypti land at Örnólfi, alt fyrir norðan Klif, ok bjó í Örnólfsdal; Örnólfr gerði þá bú upp í Kjarradal, þar er nú heita Örnólfsstaðir. Fyrir ofan Klif heitir Kjarradalr, því at þar vǫru hrískjörkr ok smáskógar, milli Kjarrár ok Þverár, svo at þar mátti eigi byggja. Blundketill var maðr stórauðigr; hann lét ryðja víða í skógum ok byggja.

Hrómundr hét bróðir Gríms ens háleyska, son Þóris Gunnlaugssonar, Hrólfssonar, Ketilssonar kjölfara; Hrómundr kom skipi sínu í Hvítá; hann nam Þverárdal og Þverárhlið ofan til Hallarmúla ok fram til Þverár; hann bjó á Hrómundarstöðum; þar er nú kallat at Karlsbrekku. Hans son var Gunnlaugr ormsunga; er bjó á Gunnlaugsstöðum fyrir sunnan Þverá; hann átti Vélaugu, sem fyrr er ritat, Örlygsdóttur frá Esjubergi; þeira d'ttir Þuríðr, móðir Illuga ens svarta, föður Hermundar, föður Hreins, föður Styrmis, föður Hreins ábóta, föður

*me þ
neus*
ur Valdisar, móður Snorra á Melum, föður Hallberu, er Markús Þórðarson átti. Högni hét skipveri Hrómundar; hann bjó á Högnastöðum; hans son var Helgi at Helgavatni, faðir Arngríms goða, er var at Blundketils brennu; Högni var bróðir Finns ens auðga.

Ísleifr ok Ísrøðr, bræðr tveir, námu land ofan frá Sleggjulæk, milli Örnólfsdalsár ok Hvítár, et nyrðra ofan til Rauðalækjar, enn et syðra ofan til Hörðhóla; Ísleifr bjó á Ísleifstöðum, enn Ísrøðr á Ísrøðarstöðum, ok átti land et syðra með Hvítá; hann var faðir Þorbjarnar, föður Ljóts á Veggjum, er fell í Heiðarvigi.

*me þ
neus*
Ásgeirr hét skipveri Hrómundar, er bjó á Hamri upp frá Helgafelli; hann átti Hildi stjörnu, dóttur Þorvalds Þorgrímssonar brækis; þeira synir váru þeir Steinbjörn hinn sterki ok enn stórhöggvi, ok Þorvarðr, faðir Mæfu, er Hrifla átti, ok Þorsteinn enn þriði; fjórði Helgi, faðir Þórðar, föður Skáld-Helga.

3. Arnbjörg hét kona; hon bjó at Arnbjargarlæk; hennar synir váru þeir Eldgrímr, er bjó á hálsinn upp frá Arnbjargarlæk, á Eldgrímstöðum, ok Þorgestr, er fekk banasár, þá er þeir Hrani börðust, þar sem nú heitir Hranafall. Þórunn hét kona, er bjó í Þórunnarholti; hon átti land ofan til Viðilækjar ok upp til

móts við Þuríði spákonu, systur sína, er bjó í Gröf; við hana er kendr Þórunnarhyllr í Þverá, ok frá henni eru Hamarbyggjar komnir.

Þorbjörn, son Arnbjarnar Óleifssonar langháls, hann var bróðir Lýtings í Vápnafirði; Þorbjörn nam Stafaholtstungu milli Norðrár ok Þverár; hann bjó í Arnarholti; hans son var Teitr í Stafaholti, faðir Einars [ok Þorvalds, föður Þorköllu, er átti Hyrningr Kleppjárnsson].

Þorbjörn blesi nam land í Norðrárdal fyrir sunnan á, upp frá Króki, ok Hellisdal allan, ok bjó á Blesastöðum; hans son var Gísli at Melum í Hellisdal; við hann eru kend Gíslavötn; annarr son Blesa var Þorfinnr á Þorfinnstöðum, faðir Þorgerðar heiðarekkju, móður Þórðar erru, föður Þorgerðar, móður Helga at Lundi.

Geirmundr, son Gunnbjarnar gands, nam tunguna á milli Norðrár ok Sandár, ok bjó í Lungu; hans son var Brúni, faðir Þorbjarnar at Steinum, er fell í Heiðarvigi.

Örn enn gamli nam Sanddal ok Mjóvadal, ok svá Norðrárdal ofan frá Króki til Arnarbælis, ok bjó á Háreksstöðum.

Rauða-Björn nam Bjarnardal, ok þá dali, er þar ganga af [hann bjó at Dalsmynni; hann blés fyrstr manna rauða á Íslandi, ok var hann at því kallaðr Rauða-Björn], ok átti annat bú niðr

frá Mælifellsgili, en annat niðri í heraði, sem ritat er.

Karl nam Karlsdal upp frá Hreðuvatni, ok bjó undir Karlsfelli; hann átti land ofan til Jafna-skarðs til móts við Grím.

Gríss ok Grímr hétu leysingjar Skalla-Gríms; þeim gaf hann lönd uppi við fjöll: Grísi Grísar-tungu, enn Grími Grímsdal.

4. Bersi goðlauss hét maðr, son Báлка Blæ-ingssonar ór Hrútafirði; hann nam Langavatns-dal allan ok bjó þar [*á Torfhvalastöðum*]. Hans systir var Geirbjörg, er átti Þorgeirr í Tungu-felli; þeira son var Véleifr enn gamli. Bersi goðlauss fekk Þórdísar, dóttur Þórhadds ór Hitár-dal, ok tók með henni Hólmslönd; þeira son var Arngeirr, faðir Bjarnar Hitdælakappa.

Sigmundr hét einn leysingi Skalla-Gríms; hon-um gaf hann land milli Gljúfrár ok Norðrár; hann bjó at Haugum, áðr hann færði sik í Munodarnes; við hann er kent Sigmundarnes.

Rauða-Björn keypti land at Skalla-Grími milli Gljúfrár ok Gufár; hann bjó at Rauða-Bjarnar-stöðum upp frá Eskiholti; hans son var Þorkell trefill í Skarði ok [*Þorgeirr reyðr*], Helgi í Hvammi ok Gunnvaldr, faðir Þorkels, er átti Helgu, dóttur Þorgeirs á Viðimýri.

[*Son Trefils var Þormóðr, er orti Hrafnsmát um Snorra goða*].

Þorbjörn krumr ok Þórðr beigaldi hétu bræðr

tveir; þeim gaf Skalla-Grímr lönd fyrir utan Gufá, ok bjó Þorbjörn í Hólum, enn Þórðr á Beigalda.

Þóri purs ok Þorgeiri jarðlang ok Þorbjörgu stöng, systur þeira, gaf Skalla-Grímr land upp með Langá fyrir sunnan; bjó Þórir á Pursstöðum, enn Þorgeirr á Jarðlangsstöðum, Þorbjörg í Stangarholti.

Einn maðr hét Áni, sá er Grímr gaf land ofan með Langá, milli ok Hafslækjar; hann bjó at Ánabrekku; hans son var Önundr sjóni, faðir Steinars ok Döllu, móður Kórmaks.

Þorfinnr enn strangi hét merkismaðr Þórólfs Skalla-Grímssonar; honum gaf Skalla-Grímr *Sæunni* dóttur sína, ok land fyrir utan Langá út til Leirulækjar ok upp til fjalls; hann bjó at Forsi; þeira dóttir var Þórdís, móðir Bjarnar Hitdælakappa.

Ingvarr hét maðr, faðir Beru, er Skalla-Grímr átti; honum gaf Grímr land á milli Leirulækjar ok Straumfjarðar; hann bjó á Álftanesi. Önnur dóttir hans var Þórdís, er átti Þorgeirr lambi á Lambastöðum, faðir Þórðar, er þrælarnir Ketils gufu brendu inni. Son Þórðar var Lambi enn sterki.

Steinólfr hét maðr, er nam Hraundal hvárn-
tveggja alt til Grjótár að leyfi Skalla-Gríms
[ok bjó í enum syðra Hraundal]; hann var faðir
Þorleifs, er Hraundælir eru frá komnir. Þór-

unn hét dóttir Steinólfs, er átti Þorbjörn Vífils-son, faðir Þo gerða; móður Ásmundar, föður Sveinbjarna; föður Odds, föður Gró, móður Odds á Álftanesi.

Þórhaddr, son Steins mjöksiglanda, Vígbjóðssonar, Böðmóðssonar ór Búlkarúmi, hann nam Hitárdal til Grjótár et syðra, enn et ytra til Kaldár ok á milli Hitár ok Kaldár til sjóvar; hans son var Þorgeirr, faðir Hafþórs, föður Guðnýjar, móður Þorláks ens auðga, föður Þo-leifs beiskalda, föður Þorláks, föður Ketíls, föður Valgerðar, móðu þeira Narfasona, Þorláks ok Þórðar. Þorgeirs synir váru þeir Grímr í Skarði ok Þórarinn, Finnbogi, Eysteinn, Gestr, Torfi.

Þorgils knappi, leysingi Kolla Hróaldssonar, nam Knappadal; hans synir váru þeir Ingjaldr ok Þórarinn ok Þórir er bjó at Ökrum, ok eignaðist land á milli Hitár ok Álftár, ok upp til móts við Steinólf. Son Þóris var Þrándr, er átti Steinunni, dóttur Hrúts á Kambsnesi; þeira synir váru þeir Þórir ok . . . Skúmr, faðir Torfa föður Tanna; hans son var Hrútr, er átti Kolfinnu, dóttur Illuga ens svarta.

Nú eru þeir menn taldir, er lönd hafa bygt í landnámi Skalla-Gríms.

5. Grímr hét maðr, Ingjaldsson, Hróaldssonar ór Haddingjadal, bróðir Ása hersis; hann fór til Íslands í landaleit, ok sigldi fyrir norðan

landit; hann var um vetrinn í Grímsey á Stein-
grímsfjöði; Bergdis hét kona hans, enn Þórir
son þeira; Grímr ræri til fiska um haustit með
húskarla sína, enn sveinninn Þórir lá í stafni,
ok var í selbelg, ok dreginn at hálsinum; Grímr
dró marmennil, ok er hann kom upp, spurði
Grímr: „Hvat spár þú oss um forlög vár, eðr
hvar skulu vér byggja á Íslandi?“ Marmennill
svarar: „Ekki þarf ek at spá yðr, enn svein-
inum, er liggir í selbelginum; hann skal þar
byggja ok land nema, er Skálm, ^{mære} merr yður, legst
undir klyfjum“. Ekki fengu þeir fleiri orð af
honum. Enn síðar um vetrinn ræru þeir Grímr
svá at sveinninn var á landi; þá týndust þeir
allir. Þau Bergdis ok Þórir fóru um várit ór
Grímsey ok vestr yfir heiði til Breiðafjarðar;
þá gekk Skálm fyrir ok lagðist aldri. Annan
vetr váru þau á Skálmarnesi í Breiðafirði; enn
um sumarit eftir snøru þau suðr; þá gekk enn
Skálm fyrir, þar til er þau kvámu af heiðum
suðr til Borgarfjarðar, þar sem sandmelir tveir ^{S-}
rauðir stóðu fyrir; þar lagðist Skálm niðr und-
ir klyfjum, undir enum ytra melnum; þar nam
Þórir land fyrir sunnan Gnúpá til Kaldár, fyr-
ir neðan Knappadal, milli fjalls ok fjöru; hann
bjó at Rauðamel enum ytra; hann var höfðingi
mikill. Þá var Þórir gamall ok blindr, er hann
kom út sið um kveld, ok sá, at maðr ræri utan
í Kaldárós á jarnnökkva, mikill ok illilegr, ok

gekk þar upp til bæjar þess, er í Hripi hét, ok gróf þar í stöðulshliði; enn um nóttina kom þar upp jarðeldr, ok brann þá Borgarhraun; þar var bærinn, sem nú er borgin. Son Selpóris var Þorfinnr, er átti Jófriði, dóttur Tungu-Odds; þeira synir váru þeir Þorkell ok Þorgils, Steinn ok Galti, Ormr ok Þórormr ok Þórir. *Steinn Þorfinnsson var faðir Arnóru, móður Hallbjargar, móður Oddnýjar, móður Geirlaugar, móður, Snælaugar, móður Markúss á Melum.* Dóttir Þorfinns var *Þorbjörg*, er átti Þorbrandr ór Álftafirði. Þeir Selpórir frændr enir heiðnu dó í Þórisbjörg. Þeir Þorkell ok Þorgils, synir Þorfinns, áttu báðir Unni, dóttur Álfs ór Dölum. Skálm, merr Þóris, dó í Skálmarkeldu.

Kolbeinn klakkhöfði Atlason, ór Atleyju af Fjölum, fór til Íslands, ok keypti lönd öll millum Kaldár ok Hitár fyrir neðan Sandbrekku, ok bjó á Kolbeinsstöðum; hans son var Finnbogi í Fagraskógi ok Þórðr skáld.

6. Þormóðr ok Þórðr gnúpa, synir Odds ens rakka, Þorviðarsonar, Freyviðarsonar, Álfssonar af Vors, þeir bræðr fóru til Íslands ok námu land frá Gnúpá til Straumsfjarðarar; hafði Þórðr Gnúpudal, ok bjó þar; hans son var Skafti, faðir Hjörleifs goða ok Finnu, er átti Refr enn mikli, faðir Steinunnar, móður Hofgarða-Refs. Þormóðr bjó á Rauðkollsstöðum; hann var kallaðr Þormóðr goði; hann átti Gerði,

dóttur Kjallaks ens gamla; þeira son var Guðlaugr enn auðgi; hann átti Þórdísi, dóttur Svart-höfða, Bjarnarsonar gullbera ok Þuríðar Tungu-Odds dóttur, er þá bjó í Hörghsholti. Guðlaugr enn auðgi sá, at Rauðamels lönd váru betri enn önnur lönd suðr þar í sveit; hann skoraði á Þorfinn til landa, ok bauð honum *hólmgöngu*; þeir fellu báðir á hólmi, enn Þuríðr Tungu-Odds dóttir græddi þá báða ok sætti þá. Guðlaugr nam síðan land frá Straumfjarðará til Furu, milli fjalls ok fjöru, ok bjó í Borgarholti; frá honum eru Straumfirðingar komnir; hans son var Guðleifr, er skip átti annat, en annat Þórólfr, son Lofts ens gamla, þá er þeir börðust við Gyrð jarl Sigvaldason. Annarr son Guðlaugs, var Þorfinnr, faðir Guðlaugs, föður Þórdísar, móður Þórðar, föður Sturlu í Hvammi. Valgerðr hét dóttir Guðlaugs ens auðga.

Vali enn sterki hét hirðmaðr Haralds konungs ens hárfagra; hann vá vig í véum ok varð útlægr; hann fór til Suðreyja, ok staðfestist þar, enn synir hans þrír fóru til Íslands; Hlíf hestageldir var móðir þeira; hét einn Atli, annarr Alfarinn, þriði Auðun stoti; þeir fóru allir til Íslands. Atli Valason ok Ásmundr, son hans, námu land frá Furu til Lýsu. Ásmundr bjó í Langaholti at Þórutóftum; hann átti Langaholts-Þóru. Þá er Ásmundr eldist, bjó hann í Öxl, enn Þóra bjó þá eftir, ok lét gera skála

sinn um þvera þjóðbraut, ok lét þar jafnan standa borð, enn hon sat úti á stóli ok laðaði þar gesti, hvern er mat vildi eta. Ásmundr var heygðr á Ásmundarleiði, ok lagðr í skip, ok þræll hans hjá honum. Vísu þessa heyrði (*kona*) kveðna í haugi hans er (*hon*) gekk hjá:

Einn byggi ek, stoð steina, *woman*
 stafnrúm Atals hrafni; *skif*
 skal-at of þegn á þiljum
 þrangbýlt á mar ranga. "
 Rúm er böðvitrum betra
 brimdýris knáum stýri
 (lífa man þat með lofðum
 lengr), enn ilt of gengi *companion*

*spoiled in
 battle*

[Atli var son Ásmundar, faðir Surts, föður Guðleifs, föður Guðbrands, föður Surts smíðs, föður Eyjólfss prests munks]. Eftir þat var leitat til haugsins, ok var þrællinn tekinn ór skipinu.

Hrólfir enn digri, son Eyvindar eikikróks, bróðir Illuga Fellsgoða austan af Stöu, nam land frá Lýsu til Hraunhafnarár; hans son var Helgi í Hofgörðum, faðir Finnboga ok Bjarnar ok Hrólfs. Björn var faðir Gests, föður Skáld-Refs.

7. Sölvi hét maðr, er nam land milli Hellis ok Hraunhafnar; hann bjó í Brenningi, enn stóð á Sölvahamri, því at hann þóttist þar vera gagnsamari.

Sigmundr, son Ketils pistils, þess er numit hafði Pistilfjörð norðr, hann átti Hildigunni; Sigmundr

nam land á milli Hellishrauns ok Beruvíkrhrauns; hann bjó at Laugarbrekku, ok er þar heygðr; hann átti þrjá sonu; einn var Einarr, er síðan bjó at Laugarbrekku. Þeir feðgar seldu Lónland Einari, er síðan bjó þar; hann var kallaðr Lón-Einarr. [*Hval rak á fjöru hans, ok rak á land af nakkvat; hann sleit veðr út, ok rak á land Einars Sigmundarsonar. Lón-Einarr taldi fjölkyngi Hildigunnar því valda. Enn þá er hvalinn hafði út tekit frá Lón-Einari, fór hann at leita, ok kom svá at, at Einarr Sigmundarson skar hvalinn með húskarla sína. Hann hjó þegar einn þeira banahögg. Laugarbrekku-Einarr bað nafna sinn frá fara; „því at yðr man eigi duga at at sækja.“ Lón-Einarr hvarf frá, því at hann var liðvani. Einarr Sigmundarson flutti heim hvalinn.*] Eftir andlát Sigmundar fór Einarr til Laugarbrekku með sjaunda mann, ok stefndi Hildigunni um fjölkyngi; [*hon var dóttir Beinís Mássonar, Naddaða sonar ór Færeyjum*]; enn Einarr, son hennar, var eigi heima; hann kom heim, þá er Lón-Einarr var nýfarinn á burt; Hildigunnr sagði honum þessi tíðindi, ok færði honum kyrtíl nýgervan. Einarr tók skjöld sinn ok sverð ok verkhest, ok reið eftir þeim; hann sprengdi hestinn á Þúfubjörgum. Þá rann Fiarr sem hann mátti; enn þá er hann kom hjá Dröngum, sá hann tröllkarl sitja

*þar á uppi, ok láta róa fætr, svá at þeir
tóku brimit, ok skelti þeim saman, svá at
sjódrif varð af, ok kvað vísu:*

*Vark þars fell af fjalli
flóðkorn jötuns móður
hám bergrisa ór himni
heiðins á nóleidar.
Görir fár jötunn fleiri,
fold ífinga, moldu
hömlu heiðar þrumlu
hamvata mér báta*

*Einarr gaf engan gaum at þessu. Þeir fund-
ust þar sem heita Mannfallsbrekkur ok börð-
ust þar. Enn kyrtil Einars bitu eigi járn.
Fjórir menn fellu af Lón-Einari, enn tveir
flýðu.] Þeir nafnar sóttust lengi, áðr sundr gekk
bróklindi Lón-Einars; ok er hann tók þar til, hjó
nafni hans hann banahögg. Þræll Laugarbrekku-
Einars hét Hreiðarr; hann rann eftir þeim, ok
drap þá báða í Þrælavík. Fyrir þat gaf Einarr
honum frelsi, ok land svá vítt, sem hann fengi
gert um þrjá daga; þat heitir Hreiðarsgerði, er
hann bjó síðan. Einarr at Laugarbrekku átti
Unni, dóttur Þóris, bróður Ásláks í Langadal.
Hallveig var dóttir þeira, er Þorbjörn Vífilsson
átti. Breiðr hét annarr son Sigmundar, bróðir Ein-
ars; hann átti Gunnhildi, dóttur Ásláks ór Langa-
dal; þeira son var Þormóðr, er átti Helgu Önundar-
dóttur, systur Skáld-Hrafns; þeira dóttir Herprúðr,
er Símon átti; þeira dóttir Gunnhildr, er Þorgils átti;*

Sigmundar

þeira dóttir Valgerðr, móðir Finnboga ens ramma, Geirssonar. Þorkell hét enn þriðji son Sigmundar; hann átti Jóreiði, dóttur *Tinds* Hallkelssonar. Laugarbrekku-Einarr var heygðr skamt frá Sigmundarhaugi, ok er haugr hans ávalt grænn vetr ok sumar. Þorkell hét son [*Laugarbrekku*]-Einars; hann átti Grímu Hallkelsdóttur, fyrr enn Þorgils Arason; Finnvarðr var son þeira. Önnur dóttir Laugarbrekku-Einars var Arnóra, er átti Þorgeirr Vífilsson; þeira dóttir var Ingveldr, er atti Þorsteinn, son Snorra góða. Inguðr var dóttir þeira, er átti Ásbjörn Arnórsson.

8. Grímkell hét maðr, son Úlfs kráku, Hreiðarssonar, bróður Gunnbjarnar, er Gunnbjarnarsker eru við kend; hann nam land frá Beruvíkrhrauni til Neshrauns, ok út um öndvert nes ok hjó at Saxahváli; hann rak á brutt þaðan Saxa Alfarinsson, Valasonar, ok bjó hann síðan í Hrauni hjá Saxahváli; Grímkell átti Þorgerði, dóttur Valþjófs ens gamla; þeira son var Þórarinn korni; hann var hamrammr mjök, ok liggir í Kornahaugi. [*Þat kvað maðr, er brotit hafði hauginn* :

*Hljóp ek í hauginn forna,
hvílt hefik lengr of morna,
lét ek á braut of borna
beltis hringju Korna].*

Þórarinn korni átti Jórunni, dóttur Ein-

Núdröpa
68

LANDNÁMABÓK.

ars í Stafaholti; þeira dóttir var Járngerðr, er átti Úlfr Uggason. Klængr hét annarr son Grimkels; hann átti Oddfriði, dóttur Helga af Hvanneyri; son þeira var Kolli, er átti Þuriði, dóttir Ásbrands frá Kambi; þeira son var Skeggi. faðir Þorkötl, er átti Illugi, son Þorvalds Tindssonar, faðir Gils, er vá Gjafvald. Bárðr hét annarr son Kolla; hann átti Valgerði Viðarsdóttir; Vigdís var dóttir þeira, er átti Þorbjörn enn digri; þeira dóttir Þórdís, er átti Þorbrandr at Ölfusvatni; Þórir var son þeira, ok Bjarni á Breiðabólstað, ok Torfi, enn dóttir Valgerðr, er átti Rúnólfr byskups son. Ásdís hét önnur dóttir Bárðar; hana átti fyrr Þorbjörn Þorvaldsson, bróðir Mána-Ljóts sammæðri; þeira dóttir Þuriðr, er átti Þorgrímr Odds-son; börn þeira: Geirmundr í Mávahlið, ok fjogrtán önnur. Ásdísi átti síðar Skúli Jörundarson Valgerðr frá Mosfelli var dóttir þeira.

Alfarinn Valason hafði fyrst numit nesit á milli Beruvíkrhrauns ok Ennis; hans synir váru þeir Höskuldr er bjó at Höskuldsám, ok Ingjaldr, er bjó at Ingjaldshváli; enn Goti at Gotalæk, enn Hólmkell at Forsi við Hólmkelsá.

Óláfr belgr hét maðr, er nam land fyrir innan Enni alt til Fróðár, ok bjó í Ólafsvík.

Sim 9. Ormr enn mjóvi hét maðr, er kom skipi sínu í Fróðarós, ok bjó á Brimilsvöllum um hrið; hann rak á brutt Ólaf belg, ok nam Vík-

ina gömlu milli Ennis ok Höfða, ok bjó þá at Fróðá. Hans son var Þorbjörn enn digri; hann átti fyrr Þuriði, dóttur Asbrands frá Kambi, ok váru þeira börn: Ketill kappi, Hallsteinn ok Gunnlaugr, ok Þorgerðr, er átti Önundr sjóni; Þorbjörn átti síðar Þuriði, dóttur Barkar ens digra ok Þórdísar Súrzdóttur. Þorbjörn enn digri stefndi Geirriði Bægifótsdóttur um fjölkyngi, eftir þat er Gunnlaugr son hans dó af meini því, er hann tók, þá er hann fór at nema fróðleik at Geirriði; hon var móðir Þórarins í Mávahlið. Um þá sök var Arnkell goði kvaddr tólfstarkvöð, ok bar hann af, því at Þórarinn vann eið at stalla-hring, ok hratt svá málinu. Enn eftir þat hurfu Þorbirni stóðhross á fjalli; þat kendi hann Þórarni, ok fór í Mávahlið ok setti duradóm. Þeir váru tólf, enn þeir Þórarinn váru sjau fyrrir: Álfgeirr Suðreyingr ok Nagli ok Björn austmaðr ok húskarlar þeir; þeir hleyptu upp dóm-inum ok börðust þar í túniu; Auðr, kona Þórarins, hét á konur at skilja þá; einn maðr fell af Þórarni enn tveir af Þorbirni. Þeir Þorbjörn fóru á brutt, ok bundu sár sín hjá stakkgarði upp með Vágum. Hönd Auðar fanst í túni; því fór Þórarinn eftir þeim, ok fann þá hjá garðinum. Nagli hljóp grátandi um þá, ok í fjall upp. Þá vá Þórarinn Þorbjörn, ok særði Hallstein til ólifis; fimm menn fellu þar af Þorbirni. Þeir Arnkell ok Vermundr veittu Þórarni, ok höfðu

* made the case void; & never

setu at Arnkels. Snorri goði mælti eftir Þorbjörn, ok sekti þá alla, er at vígum höfðu verit, á Þórnesþingi. Eftir þat brendi hann skip þeira Alfgeirs í Salteyrarósi. Arnkell keypti þeim skip í Dögurðarnesi, ok fylgdi þeim út um eyjar. Af þessu gerðist fjandskapr þeira Arnkels ok Snorra goða. Ketill kappi var þá utan; hann var faðir Hróðnýjar, er átti Þorsteinn son Víga-Styrs.

Sigurðr svínhöfði var kappi mikill; hann bjó á Kvernvágaströnd. Herjólfur son hans var þá átta vetra, er hann drap skógbjörn fyrir þat er hann hafði bitit geit fyrir honum; þar um *var* þetta kveðit:

Bersi brunninrazi
beit geit fyrir Herjólfu,
enn Herjólfur hokinrazi
hefndi geitr á bersa.

Þá var Herjólfur tólf vetra, er hann hefndi föður síns; hann var enn mesti afreksmaður. Herjólfur fór til Íslands í elli sinni, ok nam land milli Búlandshöfða ok Kirkjufjarðar; hans son var Þorsteinn kolskeggr, faðir Þórólfs, föður Þórarins ens svarta Máhliðings ok Guðnýjar, er átti Vermundr hinn mjóvi; þeira son Brandr enn örvi ok dóttir Þorfinna, er átti Þorsteinn Kuggason.

Vestarr, son Þórólfs blöðruskalla, átti Svönu Herreðardóttur; þeira son var Asgeirr. Vestarr fór til Íslands með föður sinn afgamlan, ok

nam Eyrarlönd ok Kirkjufjörð; hann bjó á Öndurðri-Eyri. Þeir Þórólfr feðgar eru heygðir á Skallanesi báðir. Asgeirr Vestarsson átti Helgu Kjarlaksdóttur; þeira son var Þorlákr; hans son Steinþórr, ok þeira Þuríðar, dóttur Auðunar stota, ok Þórðr bligr, er átti Otkötlur Þorvaldsdóttur, Þormóðssonar goða; þriði var Þormóðr, er átti Þorgerði, dóttur Þorbrands ór Álftafirði; fjórði Bergþórr, er fell á Vigrafirði; *systir* þeira Helga, er átti Ásmundr Þorgests-son. Steinþórr átti Þuríði, dóttur Þorgils Arasonar; Gunnlaugr var son þeira, er átti Þuríð ena spöku, dóttur Snorra goða.

10. Kolr hét maðr, er nam land útan frá Fjarðarhorni til Trollaháls, ok út um Berserks-eyri til Hraunsfjarðar; hans son var Þórarinn ok Þorgrímr; við þá er kent Kolssonafell. Þeir feðgar bjoggu allir at Kolgröfum; frá þeim eru Kolgreflingar komnir.

Auðun stoti, son Vala ens sterka, nam Hraunsfjörð allan fyrir ofan Hraun, á milli Svínavatns ok Trollaháls; hann bjó í Hraunsfirði, ok var mikill fyrir sér ok sterkr. Auðun átti Mýrúnu, dóttur Maddaðar Írakonungs. Auðun sá um haust, at hestr apaldgrár rann ofan frá Hjarðarvatni ok til stóðhrossa hans; sá hafði undir stóðhestinn; þá fór Auðun til, ok tók enn grá hestinn, ok setti fyrir tveggja öxna sleða, ok ók saman alla töðu sína. Hestrinn var góðr

meðferðar um miðdegit; enn er á leið, steig hann í völlinn til hófskeggja; enn eftir sólarfall sleit hann allan reiðing ok hljóp til vatnsins; hann sást aldri síðan. Son Auðunar var Steinn, faðir Helgu, er átti Án í Hrauni; þeira son var Már, faðir Guðriðar, móður Kjartans ok Ánar í Kirkjufelli. Ásbjörn hét annarr son Auðunar; þriði Svarthöfði, enn dóttir Þuríðr, er átti Þorlákr son Ásgeirs á Eyri.

11. Björn hét son Ketils flatnefs ok Yngveldar, dóttur Ketils veðrs, hersis af Hringaríki. Björn sat eftir at eignum föður síns, þá er Ketill fór til Suðreyja; enn er Ketill hélt sköttum fyrir Haraldi konungi enum hárfagra, þá rak konungr Björn son hans af eignum sínum, ok tók undir sik; þá fór Björn vestr um haf, ok vildi þar eigi staðfestast; því var hann kallaðr Björn enn austroeni; hann átti Gjaflaugu Kjallaksdóttur, systur Bjarnar ens sterka. Björn enn austroeni fór til Íslands, ok nam land á milli Hraunsfjarðar ok Skaftár; hann bjó í Bjarnarhöfn á Borgarholti, ok hafði selför upp til Selja, ok átti rausnarbú; hann dó í Bjarnarhöfn ok er heygðr við Borgarlæk, því at hann einn var óskirðr barna Ketils flatnefs. Son þeira Bjarnar ok Gjaflaugar var Kjallakr enn gamli, er bjó í Bjarnarhöfn eftir föður sinn, ok Óttarr, faðir Bjarnar, föður Vigfúss í Drápuhlíð, er Snorri goði lét drepa. Annarr son Óttars

var Helgi; hann herjaði á Skotland, ok tók þar at herfangi Niðbjörgu, dóttur Bjólans konungs ok Kaðlinar, dóttur Göngu-Hrólf; hann fekk hennar ok var son þeira Ósvífr enn spaki ok Einarr skálaglam, er druknaði á Einarsskeri í Selasundi, ok kom skjöldr hans í Skjaldey, enn feldr á Feldarhólm. Einarr var faðir Þorgerðar, móður Hérðisar, móður Steins skálds. Ósvífr átti Þórdísi, dóttur Þjóðólfs ór Höfn; þeira börn váru þau: Óspakr, faðir Úlfs stallara, *föður Jóns á Reyrvelli, föður Erlends himalda, föður Eysteins erkibiskups*, ok Þórólfr, Torráðr, Einarr, Þorbjörn ok Þorkell; þeir urðu sekir um víg Kjartans Ólafssonar, ok Guðrún, móðir Gellis ok Bolla ok Þorleiks ok Þórðar kattar. Vilgeirr hét son Bjarnar ens austroena. Kjallakr enn gamli átti Ástriði, dóttur Hrólf hersis ok Öndóttar, systur Ölvés barnakarls; þeira son var Þorgrimr goði; hann átti *Þórhildi dóttur* [*Þorkels meinakrs*]; váru synir þeira Víga-Styrr ok Vermundr mjóvi ok Brandr, faðir Þorleiks. Dætr Kjallaks ens gamla: Gerðr, er Þormóðr goði átti, ok Helga, er Ásgeirr á Eyri átti.

12. Þórólfr, son Örnólfs fiskreka, bjó í Mostr; því var hann kallaðr Mostrarskegg; hann var blótmaðr mikill, ok trúði á Þór; hann fór fyrir ofríki Haralds konungs hárfagra til Íslands ok sigldi fyrir sunnan land; enn er hann kom vestr fyrir Breiðafjörð, þá skaut hann fyrir borð önd-

vegis súlum sínum; þar var skorinn á Þórr; hann mælti svá fyrir, at Þórr skyldi þar á land koma sem hann vildi, at Þórólfr bygði; hét hann því, at helga Þór alt landnám sitt, ok kenna við hann. Þórólfr sigldi inn á fjörðinn, ok gaf nafn firðinum, ok kallaði Breiðafjörð; hann tók land fyrir sunnan fjörðinn, nær miðjum firðinum; þar fann hann Þór rekinn á nesi einu; þat heitir nú Þórsnes. Þeir lendu þar inn frá í váginn, er Þórólfr kallaði Hofsvág; þar reisti hann bæ sinn, ok gerði þar hof mikit, ok helgaði Þór; þar heita nú Hofstaðir. Fjörðrinn var þá bygðr lítt eðr ekki. Þórólfr nam land frá Stafá inn til Þórsár, ok kallaði þat alt Þórsnes; hann hafði svá mikinn átrúnað á fjall þat, er stóð í nesinu, er hann kallaði Helgafell, at þangat skyldi engi maðr óþveginn líta, ok þar var svá mikil friðhelgi, at öngu skyldi granda í fjallinu, hvárki fé né mönnum, nema sjálft gengi braut; þat var trúa þeira Þórólfs frænda, at þeir dœi allir í fjallit. Þar á nesinu, sem Þórr kom á land, hafði Þórólfr dóma alla, ok þar var sett heraðsþing með ráði allra sveitarmanna. Enn er menn váru þar á þinginu, þá skyldi víst eigi hafa álfreka á landi, ok var ætlat til þess sker þat, er Dritsker heitir, því at þeir vildu eigi saurga svá helgan völl sem þar var. Enn þá er Þórólfr var dauðr, enn Þorsteinn son hans var ungr, þá vildu þeir

Þorgrímr Kjallaksson ok Ásgeirr mágr hans eigi ganga í skerit örna sinna; þat þoldu eigi Þórsnesingar, er þeir vildu saurga svá helgan völl; því bórðust þeir Þorsteinn þorskabítr ok Þorgeirr kengr við þá Þorgrím ok Ásgeir þar á þinginu um skerit, ok féllu þar nokkurir menn, enn margir urðu sárir, áðr þeir urðu skildir. Þórðr gellir sætti þá, ok með því hvárigir vildu láta af sínu máli, þá var völlrinn óheilagr af heiftar blóði. Þá var þat ráð tekit, at föera brutt þaðan þingit, ok inn í nesit, þar sem nú er; var þar þá helgistaðr mikill, ok þar stendr enn Þórs-steinn, er þeir brutu þá menn um, er þeir blótuðu; ok þar hjá er sá dómhringr, er menn skyldu til blóts dæma. Þar setti ok Þórðr gellir fjórðungsþing með ráði allra fjórðungsmanna. Son Þórólfs Mostrarskeggja var Hallsteinn Þorkafjarðargoði, faðir Þorsteins surts ens spaka; Ósk var móðir Þorsteins surts, dóttir Þorsteins rauðs. Annarr son Þórólfs var Þorsteinn þorskabítr; hann átti Þóru, dóttur Óláfs feilans, systur Þórðar gellis; þeira son var Þorgrímr, faðir Snorra goða, ok Börkr enn digri, faðir Sáms, er Ásgeirr vá.

13. Geirrøðr hét maðr, er fór til Íslands, ok með honum Finngeirr, sonr Þorsteins öndurs, ok Úlfarr kappi; þeir fóru af Hálogalandi til Íslands. Geirrøðr nam land inn frá Þórsá til Langadalsár; hann bjó á Eyri. Geirrøðr gaf

land Úlfari skipverja sínum tveim megin Úlfarsfells ok fyrir innan fjall. Geirrøðr gaf Finngeiri lönd uppi um Álftafjörð; hann bjó þar er nú heitir á Kársstöðum; Finngeirr var faðir Þorfinns, föður Þorbrands í Álftafirði, er átti Þorbjörgu, dóttur Þorfinns Selþórissonar. Geirriðr hér systir Geirrøðar, er átt hafði Björn, son Bólverks blindingatrjónu; Þórólfr hét son þeira. Þau Geirriðr fóru til Íslands eftir andlát Bjarnar, ok vátu enn fyrsta vetr á Eyri. Um vátit gaf Geirrøðr systur sinni bústað í Borgardal, enn Þórólfr fór útan ok lagðist í viking. Geirriðr sparði ekki mat við menn, ok lét gera skála sinn um þjóðbraut þvera; hún sat á stóli ok laðaði úti gesti, enn borð stóð inni jafnan, ok matr á. Þórólfr kom til Íslands eftir andlát Geirriðar; hann skoraði á Úlfar til landa, ok bauð honum hólmgöngu; Úlfarr var þá gamall ok barnlauss; hann fell á hólmi, enn Þórólfr var sárr á fœti, ok gekk haltr ávalt síðan; því var hann bægifótr kallaðr. Þórólfr tók lönd sum eftir Úlfar, enn sum Þorfinnr í Álftafirði; hann setti á leysingja sína Úlfar ok Örlyg. Geirrøðr á Eyri var faðir Þorgeirs kungs, er bæinn færði ór eyrinni upp undir fjallit; hann var faðir Þórðar, föður Atla. Þórólfr bægifótr var faðir Arnkels goða ok Geirriðar, er átti Þórólfr í Mávahlíð. Synir Þorbrands í Álftafirði vátu þeir Þorleifr kimbi ok

Þóroddr, Snorri, Þorfinnr, Illugi, Þormóðr; þeir deildu við Arnkel um arf leysingja sinna, ok váru at vigi hans með Snorra goða á Örylgsstöðum. Eftir þat fór Þorleifr kimbi utan; þá laust Arnbjörn, son Ásbjörns ór Breiðavík, hann með grautarþvöru; Kimbi brá á gaman; Þórðr bligr brá honum því á Þórsnesþingi, þá er hann bað Helgu, systur hans; þá lét Kimbi ljósta Blig með sandtorfu. Af því gerðust deilur þeira Eyrbyggja ok Þorbrandssona ok Snorra goða; þeir börðust í Alftafirði ok á Vigrafirði.

Þorbergr hét maðr, er fór ór Íafirði til Íslands, ok nam Langadal hvárntveggja ok bjó í enum ytra; hans son var Áslákr, er átti Arnleifu, dóttur Þórðar gellis; þeira börn váru þau Illugi enn rammi, ok Gunnhildr, er Breiðr átti fyrr, enn siðar Halldórr á Hólmslátri. Illugi enn rammi átti Guðleifu, dóttur Ketils smiðju-drums; þeira synir Eyjólfir ok Endriði, Kollr ok Gellir, enn dóttir Herþrúðr, er Þorgrímr Vermundar son átti, ens mjöva, ok Friðgerðr, er Oddr Draflason átti, ok Guðriðr, er Bergþórr, son Þormóðar Þorlákssonar, átti fyrr, enn siðar Jörundr í Skorradal, ok Jódís, er átti Már, son Illuga Arasonar, ok Arnleif, er átti Kollr, son Þórðar bligs. Frá Illuga eru Langdœlir komnir.

Steinn mjöksiglandi, Vígbjöldsson, bróðir Þóris haustmyrkr, nam Skógarströnd til móts við

Þorberg, ok inn til Laxár; hann bjó á Breiðabólstað. Hans son var Þórhaddr í Hitárdal, ok Þorgestr, er átti Arnóru, dóttur Þórðar gellis; synir þeira: Steinn lögsögumaðr, ok Asmundr, ok Hafliði, ok Þórhaddr.

14. Þorvaldr, son Ásvalds Úlfssonar, Öxna-Þórissonar, ok Eiríkr rauði, son hans, fóru af Jaðri fyrir víga sakir, ok námu land á Hornströndum, ok bjoggu at Dröngum; þar andaðist Þorvaldr. Eiríkr fekk þá Þjóðhildar, dóttur Jörundar Atlasonar ok Þorbjargar knarrarbringu, er þá átti Þorbjörn enn haukdælski; réðst Eiríkr þá norðan, ok ruddi lönd í Haukadal; hann bjó á Eiríksstöðum hjá Vatnshorni. Þá feldu þrælar Eiríks skriðu á bœ Valþjófs á Valþjófsstöðum, enn Eyjólfur saurr, frændi hans, drap þrælana á Skeiðsbrekkum upp frá Vatnshorni. Fyrir þá sök vá Eiríkr Eyjólf saur; hann vá ok Hólmgöngu-Hrafn at Leikskálum. Geirsteinn ok Oddr á Jörfa, frændr Eyjólf, mæltu eftir hann; þá var Eiríkr gerr ór Haukadal; hann nam þá Brokey ok Öxney, ok bjó at Töðum í Suðrey enn fyrsta vetr; þá léði hann Þorgesti setstokka; síðan fór Eiríkr í Öxney, ok bjó á Eiríksstöðum; þá heimti hann setstokkana, ok náði eigi; Eiríkr sótti setstokkana á Breiðabólstað, enn Þorgestr fór eftir honum; þeir börðust skamt frá garði at Dröngum; þar fellu tveir synir Þorgests ok nokkurir menn

aðrir. Eftir þat höfðu hvárirtveggju setu; Styrr veitti Eiriki, ok Eyjólfr ór Svíney ok synir Þorbrands ór Áltafirði ok Þorbjörn Vífilsson; enn Þorgesti veittu synir Þórðar gellis ok Þorgeirr ór Hitárdal, Áslákr ór Langadal ok Illugi son hans. Þeir Eiríkr urðu sekir á Þórsnesþingi; hann bjó skip í Eiríksvági; enn Eyjólfr leyndi honum í Dímunarvági, meðan þeir Þorgestr leituðu hans um eyjar. Þeir Þorbjörn ok Eyjólfr ok Styrr fylgdu Eiriki út um eyjar; hann sagði þeim, at hann ætlaði at leita lands þess, er Gunnbjörn, son Úlfs kráku, sá, er hann rak vestr um Ísland, þá er hann fann Gunnbjarnarsker; hann kvaðst aftr mundu leita til vina sinna, ef hann fyndi landit. Eiríkr sigldi undan Snæfellsnesi, enn hann kom útan at Miðjökli, þar sem Bláserkr heitir; hann fór þaðan suðr með landi at leita þess, ef þannig væri byggjandi. Hann var enn fyrsta vetr í Eiríksey, nær miðri enni vestri byggð; um várit eftir fór hann til Eiríksfjarðar, ok tók sér þar bústað; hann fór þat sumar í ena vestri óbyggð, ok gaf víða örnefni. Hann var annan vetr í Eiríkshólmum við Hvarfsgnipu; enn et þriðja sumar fór hann alt norðr til Snæfells, ok inn í Hrafnfjörð; þá lézt hann kominn fyrir botn Eiríksfjarðar; hvarf hann þá aftr, ok var enn þriðja vetr í Eiríksey fyrir mynni Eiríksfjarðar. Eftir um sumarit fór hann til Íslands, ok kom í Breiðafjörð; hann var þann

vetr á Hólmslátri með Ingólfi. Um várit börðust þeir Þorgestr, ok fekk Eiríkr þá ósigur; eftir þat váru þeir sættir. Þat sumar fór Eiríkr at byggja land þat, er hann hafði fundit, ok hann kallaði Grœnland, því at hann lét þat menn mjök mundu fýsa þangat, ef landit hétí vel.

Svá segja fróðir menn, at þat sumar fóru xxv skipa til Grœnlands ór Breiðafirði ok Borgarfirði, en xiiij komust út; sum rak aftr, enn sum týndust; þat var xv vetrum fyrr enn kristni var í lög tekin á Íslandi.

Herjólfur hét maðr, Bárðarson, Herjólfssonar, frænda Ingólfs landnámsmanns; þeim Herjólfur gaf Ingólfr land á milli Vágs ok Reykjaness. Herjólfur enn yngri fór til Grœnlands, þá er Eiríkr enn rauði bygði landit. Með honum var á skipi suðreyskr maðr kristinn, sá er orti Hafgerðingadrápu; þar er þetta stef í:

Mínar bið ek munkareyni
meinarlausen farar beina,
heiðis haldi hárar foldar
hallar dróttinn of mér stalli.

Herjólfur nam Herjólfssfjörð, ok bjó á Herjólfssnesi; hann var enn göfgasti maðr.

Eiríkr nam síðan Eiríksfjörð, ok bjó í Brattahlíð, enn Leifr son hans eftir hann. Þessir menn námu land á Grœnlandi, er þá fóru út með Eiríki: Herjólfur Herjólfssfjörð; hann bjó á Herjólfssnesi; Ketill Ketilsfjörð; Hrafn Hrafn-

fjörð; Sölvi Sölvadal; Snorri Þorbrandsson Álfta-
fjörð; Þorbjörn glora Siglufjörð; Einarr Einars-
fjörð; Hafgrímr Hafgrímsfjörð ok Vatnahverfi;
Arnlaugr Arnlaugsfjörð. Enn sumir fóru til
vestri bygðar.

Maðr hét Þorkell farserkr, systrungr Eiríks/
rauða; hann fór til Grænlands með Eiríki, ok
nam Hvalseyjarfjörð ok víðast milli Eiríksfjarð-
ar ok Einarsfjarðar, ok bjó í Hvalseyjarfirði; frá-
honum eru Hvalseyjarfirðingar komnir. Hann
var mjök rammaukinn; hann lagðist eftir geld-
ingi gömlum út í Hvalsey ok flutti utan á baki
sér, þá er hann vildi fagna Eiríki frænda sín-
um, enn ekki var sæfært skip heima; þat er
löng hálf vika. Þorkell var dysjaðr í túni í
Hvalseyjarfirði, ok hefir jafnan gengit þar um
hýbýli.

15. Ingólfr enn sterki nam land inn frá Laxá
til Sraumuhlaupsár, ok bjó á Hólmslátri. Hans-
bróðir var Þorvaldr, faðir Þorleifs, er þar bjó
síðan.

Óleifr enn hvíti hét herkonungr; hann var
son Ingjalds konungs, Helgasonar, Ólafssonar,
Guðrøðarsonar, Hálfðanarsonar hvítbeins Upp-
lendinga konungs. Óleifr enn hvíti herjaði í
vestrvíking, ok vann Dýflinni á Írlandi ok Dýfl-
innarskíri, ok gerðist þar konungr yfir; hann
fekk Uðar ennar djúpauðgu, dóttur Ketils flat-
nefs; Þorsteinn rauðr hét son þeira. Óleifr fell

á Írlandi í orrostu, enn Uðr ok Þorsteinn fóru þá í Suðreyjar; þar fekk Þorsteinn Þuríðar dóttur Eyvindar austmanns, systur Helga ens magna; þau áttu mörg börn. Óláfr feilan hét son þeira, enn dótr Gróa ok Álöf, Ósk ok Þórhildr, Þorgerðr ok Vigdís. Þorsteinn gerðist herkonungur; hann réðst til félags með Sigurði enum ríka, syni Eysteins glumru; þeir unnu Katanes ok Suðrland, Ros ok Merrhæfi, ok meirr enn hálf Skotland; gerðist Þorsteinn þar konungur yfir, ok Skotar sviku hann, ok fell hann þar í orrostu. Uðr var þá á Katanesi, er hon spurði fall Þorsteins; hon lét þá gera knör í skógi á laun; enn er hann var búinn, helt hún út í Orkneyjar; þar gifti hún Gró, dóttur Þorsteins rauðs; hon var móðir Grelaðar, er Þorfinnr hausa-kljúfr átti. Eftir þat fór Uðr at leita Íslands; hon hafði á skipi með sér xx karla frjálsa.

16 Kollr hét maðr, Veðrar-Grimsson, Ásasonar, hersis; hann hafði forráð með Uði, ok var virðr mest af henni. Kollr átti Þorgerði, dóttur Þorsteins rauðs. Erpr hét leysingi Uðar; hann var son Mellduns jarls af Skotlandi, þess er fell fyrir Sigurði jarli enum ríka; móðir Erps var Myrgjol, dóttir Gljómals Írakonungs. Sigurðr jarl tók þau at herfangi ok þjáði. Myrgjol var ambátt konu jarls, ok þjónaði henni trúlega; hon var margkunnandi; hon varðveitti barn drotningar óborit, meðan hon var í laugu.

Siðan keypti Uðr hana dýrt, ok hét henni frelsi, ef hon þjónaði svá þuriði, konu Þorsteins rauðs, sem drotningu. Þau Myrgjol ok Erpr son hennar fóru til Íslands með Uði. Uðr helt fyrst til Færeyja, ok gaf þar Álofu, dóttur Þorsteins rauðs; þaðan eru Götuskeggjar komnir. Siðan fór hon at leita Íslands; hon kom á Vikarsskeið ok braut þar; fór hon þá á Kjalarnes til Helga bjólu, bróður síns; hann bauð henni þar með helming liðs síns, enn henni þótti þat varboðit, ok kvað hon hann lengi mundu litilmenni vera. Hon fór þá vestr í Breiðafjörð til Bjarnar bróður síns; hann gekk mót henni með húskarlasína, ok lézt kunna veglyndi systur sinnar; bauð hann henni þar með alla sína menn, ok þá hún þat. Eftir um várit fór Uðr í landaleit inn í Breiðafjörð, ok lagsmenn hennar; þau átu dögurð fyrir sunnan Breiðafjörð, þar er nú heitir Dögurðarnes; siðan fóru þau inn eyjasund; þau lendu við nes þat, er Uðr tapaði kambi sínum; þat kallaði hon Kambsnes. Uðr nam öll Dalalönd í innanverðum firðinum frá Dögurðará til Skraumuhlaupsár; hon bjó í Hvammi við Örríðarós; þar heita Uðartóftir; hon hafði boenahald sitt á Krosshólum; þar lét hon reisa krossa, því at hon var skírð ok vel trúuð. Þar höfðu frændr hennar siðan átrúnað mikinn á hólana. Var þá gerr hörgr, er blót tóku til; trúðu þeir því, at þeir dæi í hólana, ok þar var Þórðr gellir leiddr í

áðr hann tók mannvirðing, sem segir í sögu hans.

17. Uðr gaf lönd skipverjum sínum ok leysingjum.

Ketill hét maðr, er hon gaf land frá Skraumuhlaupsá til Hörðadalsár; hann bjó á Ketilsstöðum; hann var faðir Vestliða ok Einars, föður Kleppjárns ok Þorbjarnar, er Styrr vá, ok Þórdísar móður Þorgests.

Hörðr hét skipveri Uðar; honum gaf hon Hörðadal; hans son var Ásbjörn, er átti Þorbjörgu, dóttur Miðfjarðar-Skeggja; þeira börn: Hóaki, hann átti Þorgerði, dóttur Þorgeirs höggvinkinna, ok Ingibjörg, er Illugi enn svartí átti.

Vífill hét leysingi Uðar; hann spurði þess Uði, hví hon gaf honum öngvan bústað, sem öðrum mönnum; hon kvað þat eigi skifta, kvað hann þar göfgan mundu þykkja sem hann væri; honum gaf hon Vífilssdal; þar bjó hann, ok átti deilur við Hörð. Son Vífils var Þorbjörn, faðir Guðriðar, er átti Þorsteinn, son Eiríks ens rauða, enn síðar Þorfinnr karlsefni; frá þeim eru biskupar komnir: Björn, Þorlákr, Brandr. Annarr son Vífils var Þorgeirr, er átti Arnóru, dóttur Laugarbrekku-Einar; þeira dóttir Ingvildr, er átti Þorsteinn, son Snorra goða.

Hundi hét leysingi Uðar, skozkr; honum gaf hon Hundadal; þar bjó hann lengi.

Sökkólfr hét leysingi Uðar; honum gaf hon

Sökkólfssdal. Hann bjó á Breiðabólstað, ok er mart manna frá honum komit.

Erpi, syni Mellduns jarls, er fyrr var getit, gaf Uðr frelsi ok Sauðafells lönd. Frá honum eru Erplingar komnir. Orinr hét son Erps; annarr Gunnbjörn, faðir Arnóru, er átti Kolbeinn Þórðarson; þriði Ásgeirr, faðir Þórðrnu, er átti Sumarliði Hrappsson; dóttir Erps var Halldís, er átti Álfr í Dölum; Dufnall var enn son Erps, faðir Þorkels, föður Hjalta, föður Beinis. Skati var enn son Erps, faðir Þórðar, föður Gísla, föður Þorgerðar.

Þorbjörn hét maðr, er bjó at Vatni í Haukadals; hann átti (*Þorbjörgu knarrarbringu*), ok var þeira dóttir Hallfríðr, er átti Höskuldr í Laxárdal; þau áttu mörg börn; Bárðr var son þeira, ok Þorleikr, faðir Bolla, er átti Guðrúnu Ósvífrsdóttur; þeira synir váru þeir Þorleikr ok Höskuldr, Surtr ok Bolli; Herdís ok Þorgerðr dætr þeira. Þórðr Ingunnarson átti fyrr Guðrúnu, ok váru þeira börn: Þórðr kóttir ok Arnkatla. Þorkell Eyjólfsson átti Guðrúnu síðast; þeira börn: Gellir ok Rjúpa. Bárður Höskuldsson var faðir Hallbjargar, er átti Hallr, son Víga-Styrs; Hallgerðr snúinbrók var dóttir Höskulds, ok Þorgerðr ok Þuríðr.

18. *Kollr nam Laxárdal allan ok alt til Haukadalsár; hann var kallaðr Dala-Kollr; hann átti Þorgerði, dóttur Þorsteins rauðs; börn þeira váru*

þau Höskuldr ok Gróa, er átti Véleifr enn gamli, ok Þorkatla, er Þorgeirr goði átti. Höskuldr átti Hallfriði, dóttur Þorbjarnar frá Vatni; Þorleikr var son þeira; hann átti Þuriði, dóttur Arnbjarnar, Sléttu-Bjarnarsonar; þeira son var Bolli. Höskuldr keypti Melkorku, dóttur Mýrkjartans Írakonungs; þeira son var Ólafr pá ok Helgi; dótr Höskulds Þuriðr ok Þorgerðr ok Hallgerðr snúinbrók. Óláfr átti Þorgerði, dóttur Egils Skalla-Grimssonar; þeira son Kjartan ok Halldór, Steinpórr ok Þorbergr; dótr Óláfs Þuriðr, Þorbjörg digra ok Bergþóra. Kjartan átti Hrefnu, dóttur Ásgeirs æðikolls; þeira son Ásgeirr ok Skúmr.

Herjólf, son Eyvindar elds, fekk síðar Þorgerðar, dóttur Þorsteins rauðs; Hrútr var son þeira. Honum galt Höskuldr í móðurarf sinn Kambsness land milli Haukadalsár ok hryggjar þess, er gengr ór fjalli ofan í sjó. Hrútr bjó á Hrútsstöðum; hann átti Hallveigu, dóttur Þorgríms ór Þykkvaskógi, systur Armóðs ens gamla; þau áttu mörg börn; þeira son var Þórhallr, faðir Halldóru, móður Guðlaugs, föður Þórdísar, móður Þórðar, föður Sturlu í Hvammi. Grímr var ok sonr Hrúts, ok Már, Endriði ok Steinn, Þorljótr ok Jörundr, Þorkell, Steingrímr, Þorbergr, Atli, Arnórr, Ívarr, Kárr, Kúgaldi; enn dótr: Bergþóra. Steinunn, Rjúpa, Finna, Ástriðr.

Uðr gaf dóttur Þorsteins rauðs, Þórhildi, Eysteini meinfret, syni Álfs ór Ostu; þeira son var Þórðr, faðir Kolbeins, föður Þórðar skálds, ok Álfr í Dölum; hann átti Halldísi, dóttur Erps; þeira son var Snorri, faðir Þorgils Höllusonar. Dætr Álfs í Dölum váru þær Þorgerðr, er átti Ari Másson, ok Þórelfr, er átti Hávarr, son Einars Kleppssonar; þeira son Þorgeirr. Þórólfr refr var ok son Eysteins, er fell á Þingness þingi ór liði Þórðar gellis, er þeir Tungu-Oddur börðust. Hrappr hét hinn fjórði Eysteins son.

Uðr gaf Ósk, dóttur Þorsteins, Hallsteini goða; þeira son var Þorsteinn surtr. Vigdís Þorsteinsdóttur gaf Uðr Kampa-Grimi; þeira dóttir Arnbjörg, er Ásólfr flosi átti í Höfða; þeira börn Oddr ok Vigdís, er átti Þorgeirr Kaðalsson.

19. Uðr fæddi Ólaf feilan, son Þorsteins rauðs; hann fekk Álfdisar ennar barreysku, dóttur Konáls, Steinmóðssonar, Ölvéssonar barnakarls. Sonr Konáls var Steinmóðr, faðir Halldóru, er átti Eilifr, son Ketils ens einhenda. Þeira börn Þórðr gellir ok Þóra, móðir Þorgríms, föður Snorra goða; hon var ok móðir Barkar ens digra, ok Más Hallvarðssonar. Ingjaldr ok Grani váru synir Óláfs feilans; Vigdís hét dóttir Óláfs feilans; Helga hét en þriðja dóttir Óláfs, hana átti Gunnar Hlífason; þeira dóttir Jófriðr, er Þóroddr Tungu-Oddsson átti.

+ from Barra in the Hebra

enn síðar Þorsteinn Egilsson; Þórunn var önnur dóttir Gunnars, er Hersteinn Blundketilsson átti; Rauður ok Höggvandill váru synir Gunnars. Þórdís hét en fjórða dóttir Óláfs feilans; hana átti Þórarinn Ragabróðir; þeira dóttir var Vigdís, er Steinn Þorfinnsson átti, at Rauðamel.

Uðr var vegskona mikil; þá er hon var elli-móð, bauð hon til sín frændum sínum ok mágum ok bjó dýrlega veizlu; enn er þrjár nætr hafði veizlan staðit, þá valdi hon gjafir vinum sínum ok réð þeim heilræði; sagði hon, at þá skyldi standa veizlan enn þrjár nætr; hon kvað þat vera skyldu erfi sitt; þá nótt eftir andaðist hon ok var grafin í flæðarmáli, sem hon hafði fyrir sagt, því at hon vildi eigi liggja í óvígðri moldu, er hon var skirð. Eftir þat spiltist trúa frænda hennar.

Kjallakr hét maður, son Bjarnar ens sterka, bróður Gjaflaugar, er átti Björn enn austrœni; hann fór til Íslands, ok nam land frá Dögurðará til Klofninga, ok bjó á Kjallaksstöðum; hans son var Helgi hrogn ok Þorgrímr þöngull undir Felli, Eilífr prúði, Ásbjörn vöðvi á Orrastöðum, Björn hvalmagi í Túngarði, Þorsteinn þynning, Gizurr glaði í Skoravík, Þorbjörn skrofuður á Ketilsstöðum, Æsa í Svíney, móðir Eyjólfss ok Tin-Forna. Ljótólfr hét maður; honum gaf Kjallakr bústað á Ljótólfsstöðum inn frá Kaldakinn; hans synir váru þeir Þorsteinn ok Björn ok Hrafsi;

hann var risa ættar at móðerni; Ljótólfr var
járnsmiðr; þeir réðust út í Fellsskóga á Ljótólfs-
staði. Vífill var vin þeira, er bjó á Vífilstöft-
 um. Þórunn at Þórunnartóftum var móðir Odd-
 mars ok fóstura Kjallaks, sonar Bjarnar hval-
 maga. Ólof, dóttir Þorgríms undir Felli, tók
 ærsl; þat kendu menn Hrafsa; enn hann tók
 Oddmar hjá hvílu hennar, ok sagði hann sik
 valda; þá gaf Þorgrímr honum Deildarey. Hrafsi
 kvaðst mundu höggva Oddmar á Birni eðr hann
 boetti fyrir hann. Eigi vildi Kjallakr láta eyna.
 Hrafsi tók fé þeira ór torfnausti; Kjallakssynir
 fóru eftir ok náðu eigi. Eftir þat stukku þeir
 Eilífr ok Hrafsi í eyna; *ör kom í þarminn Ei-*
lífs í-grás, ok hamaðist hann; Björn hvalmagi
vá Björn Ljótólfsson at leik. Þeir Ljótólfr keyptu
 at Oddmari, at hann kæmi Birni í færi. Kjall-
 akr ungi rann eftir honum; eigi varð hann sóttir
 áðr þeir tóku sveininn ok vágu hann á Kjallaks-
 hóli; *hann var þá sjau vetra.* Eftir þat sóttu
 Kjallakssynir Ljótólf ok Þorstein í jarðhús í
 Fellsskógum, ok fann Eilífr annan munna; gekk
 hann á bak þeim ok vá þá báða. Hrafsi gekk
 inn á Orrastöðum at boði; hann var í kven-
 fótum; Kjallakr sat á palli með skjöld; Hrafsi
 hjó hann Ásbjörn banahögg ok gekk út um vegg.
 Þórðr Vífilsson sagði Hrafsa, at uxi hans lægi
 í keldu; hann bar skjöld hans; Hrafsi fleygði
 honum fyrir kleif, er hann sá Kjallakssonu; eigi

gátu þeir sótt hann, áðr þeirfeldu viðum; Eilífr sat hjá er þeir sóttu hann.

Hjörleifr Hörða konungr átti Æsu ena ljósu; þeira son var Ótryggr, faðir Óblauðs, föður Högna ens hvíta, föður Úlfs ens skjálga. Annarr son Hjörleifs var Hálf, er réð Hálsrekkum; hans móðir var Hildr en mjóva, dóttir Högna í Njarðey. Hálf konungr var faðir Hjörs konungs, þess er hefndi föður sins með Sölva Högnasyni. Hjör herjaði á Bjarmaland; hann tók þar at herfangi Ljúfvinu, dóttur Bjarmakonungs; hon var eftir á Rogalandi þá er Hjör konungr fór í hernað; þá ól hon sonu tvá; hét annar Geirmundr enn annar Hámundr; þeir váru svartir mjök; þá ól ok ambátt hennar son; sá hét Leifr, son Loðhattar þræls; Leifr var hvítr; því skifti drotning sveinum við ambáttina, ok eignaði sér Leif; enn er konungr kom heim, var hann illa við Leif ok kvað hann vera smámannlegan. Næst er konungr fór í viking, bauð drotning heim Braga skáldi ok bauð hann skynja um sveinana; þá váru þeir þréttrir; hon byrgði sveinana í stufu hjá Braga, enn fal sik í pallinum. Bragi kvað þetta:

Tveir 'ro inni,
trúik báðum vel,
Hámundr ok Geirmundr,
Hjörvi bornir,
enn Leifr þriðji
Loðhattarson,

fæddir-at þú þann, kona,
fáir munu verri.

Hann laust sprotanum á pall þann, er drotning var í. Þá er konungr kom heim, sagði drotning honum þetta, ok. sýndi honum sveinana; hann lézt eigi slík heljarskinn sét hafa; því váru þeir svá síðan kallaðir báðir bræðr. Geirmundr heljarskinn var herkonungr; hann herjaði í vestrvíking, enn átti ríki á Rogalandi; enn er hann kom aftr, þá er hann hafði lengi í brutt verit, þá hafði Haraldr konungr barizt í Hafrsfirði við Eirík Hörðakonung ok Súlka konung af Rogalandi ok Kjötva enn auðga ok fengit sigr. Hann hafði þá lagt undir sik alt Rogaland; ok tekit þar marga menn af óðulum sínum; sá þá Geirmundr öngvan annan sinn kost enn ráðast brutt, því at hann fekk þar öngvar sæmdir; hann tók þá þat ráð at leita Íslands; til ferðar réðust með honum þeir Úlfr enn skjálgi, frændi hans, ok Steinólfr enn lági, son Hrólfs hersis af Ögðum ok Öndóttar, systur Ölvés barnakarls. Þeir Geirmundr höfðu samflot, ok stýrði sinu skipi hvárr þeira; þeir tóku Breiðafjörð, ok lágu við Elliðaey; þá spurðn þeir, at fjörðrinn var bygðr et syðra, enn lítt eða ekki et vestra. Geirmundr helt inn at Meðalfellsströnd, ok nam land frá Fábeinsá til Klofasteina; hann lagði í Geirmundarvág, enn var enn fyrsta vetr í Búðardal. Steinólfr nam land inn frá Klofasteinum, enn Úlfr

fyrir vestan fjörð, sem nú mun sagt verða. Geirmundi þótti landnám sitt of lítið, er hann hafði rausnarbú ok fjölment, svá at hann hafði lxxx frelsingja; hann bjó á Geirmundarstöðum undir Skarði.

Maðr hét Þrándr mjóbeinn; hann fór til Íslands með Geirmundi heljarskinni; hann var ættaðr af Ögðum; Þrándr nam eyjar fyrir vestan Bjarneyjaflóa, ok bjó í Flatey; hann átti dóttur Gils skeiðarnefs; þeira son var Hergils hnappraz, er bjó í Hergilsey; dóttir Hergils var Þorkatla, er átti Már á Reykjahólum; Hergils átti Þórörnu, dóttur Ketils ilbreiðs. Ingjaldr var son þeira, er bjó í Hergilsey ok veitti Gísla Súrssyni; fyrir þat gerði Börkr enn digri af honum eyjarnar, enn hann keypti Hlið í Þorskafirði; son hans var Þórarinn, er átti Þorgerði, dóttur Glúms *Geirasonar*; þeira son var *Helgu-Steinarr*; Þórarinn var með Kjartani í Svínadal, þá er hann fell. Þá bjó Þrándr mjóbeinn í Flatey, er Oddr skauti ok Þórir, son hans, kvámu út; þeir námu land í Þorskafirði; bjó Oddr í Skógum, enn Þórir fór utan, ok var í hernaði; hann fekk gull mikit á Finnmörk; með honum váru synir Halls af Hofsstöðum; enn er þeir kvámu til Íslands, kallaði Hallr til gullsins, ok urðu þar um deilur miklar; af því gerðist Þorkfirðinga saga. Gull-Þórir bjó á Þórisstöðum; hann átti Ingibjörgu, dóttur Gils skeið-

arnefs, ok var þeira son Guðmundr; Þórir var et mesta afarmenni.

20. Geirmundr fór vestr á Strandir, ok nam þar land frá Rýta-gnúp vestan til Horns, ok þaðan austr til Straumness; þar gerði hann fjögur bú: eitt í Aðalvík; þat varðveitti ármaðr hans; annat í Kjaransvík, þat varðveitti Kjaran, þræll hans; þriðja á almenningum enum vestrum; þat varðveitti Björn, þræll hans, er sekr varð um sauðatöku eftir dag Geirmundar; af hans sektarfé urðu almenningar; fjórða í Barðsvík; þat varðveitti Atli, þræll hans, ok hafði hann fjogrtán þræla undir sér. Enn er Geirmundr fór meðal búa sinna, hafði hann jafnan áttatigi manna; hann var vellauðigr at lausafé, ok hafði of kvikfjár; svá segja menn, at svín hans gengi á Svínanesi, enn sauðir á Hjarðarnesi, enn hann hafði selför í Bitru; sumir segja, at hann hafi ok 'bú átt í Selárdal á Geirmundarstöðum í Steingrímsfirði. Þat segja vitrir menn, at hann hafi göfgastr verit allra landnámsmanna á Íslandi; lítt átti hann hér deilur við menn; hann kom heldr gamall út. Þeir Kjallakr deildu um land þat, er var á meðal Klofninga ok Fábeinsár, ok börðust á ekrunum fyrir utan Klofninga; þeir vildu hváirtveggja sá; þar veitti Geirmundi betr. Þeir Björn enn austroeni ok Vestarr af Eyri sættu þá; þá lendi Vestarr í Vestarsnesi, er hann fór til fundarins. Geirmundr

fal fé sitt mikit í Andarkeldu undir Skarði; hann átti Herriði Gautsdóttur, Gautrekssonar. Ýr var dóttir þeira; síðan átti hann Þorkötu, dóttur Ófeigs Þórólfssonar; þeira börn Geirriður ok Geirmundr andaðist á Geirmundarstöðum, ok er hann lagður í skip þar út í skóginn frá garði.

21. Steinólfr enn lági, son Hrólfs hersis af Ögðum, nam land inn frá Klofasteinum til Grjótvallarmúla, ok bjó í Fagradal á Steinólfshjalla; hann gekk þar inn á fjallit, ok sá fyrir innan dal mikinn ok vaxinn allan víði; hann sá eitt rjóðr í dal þeim; þar lét hann bæ gera ok kallaði Saurbæ, því at þar var mýrlent mjök, ok svá kallaði hann allan dalinn; þat heitir nú Torfnes, er bærinn var gerr. Steinólfr átti Eirnýju Þiðrandadóttur; Þorsteinn búandi var son þeira, enn Arndís en auðga var dóttir þeira, móðir Þórðar, föður Þorgerðar, er Oddr átti; þeira son var Hrafn Hlymreksfari, er átti Vigdisi, dóttur Þórarins fýlsennis; þeira son var Snörtr, faðir Jódísar, er átti Eyjólf Hallbjarnarson; þeira dóttir Halla, er átti Atli Tannason; þeira dóttir Yngvildr, er átti Snorri Húnbogason. Steinólfi hurfu svín þrjú; þau fundust tveim vetrum síðar í Svínadal, ok vóru þau þá þrír tigr svína. Steinólfr nam ok Steinólfsdal í Króksfirði.

Slétu-Björn hét maðr; hann átti Þuriði, dótt-

ur Steinólfs ens lága; hann nam með ráði Steinólfs enn vestra dal í Saurbœ; hann bjó á Sléttu-Bjarnarstöðum upp frá Þverfelli; hans son var Þjóðrekr, er átti Arngerði, dóttur Þorbjarnar Skjalda-Bjarnarsonar; þeira son var Víga-Sturla, er bœinn reisti á Staðarhóli, ok Knöttr, faðir Ásgeirs, ok Þorbjörn, ok Þjóðrekr, er borgin er við kend á Kollafjarðarheiði. Þjóðreki Sléttu-Bjarnarsyni þótti of þrönglent í Saurbœ; því réðst hann til Ísafjarðar. Þar gerðist saga þeira Þorbjarnar ok Hávarðar ens halta.

Óláfr belgr, er Ormr enn mjóvi rak á brutt ór Ólafsvík, nam Belgsdal, ok bjó á Belgstöðum, áðr þeir Þjóðrekr ráku hann á brutt; síðan nam hann inn frá Grjótvallarmúla, ok bjó í Ólafsdal; hans son var Þorvaldr, sá er sauðatökusök seldi á hendr Þórarni gjallanda Ögmundi Völusteinssyni; fyrir þat vá hann Ögmund á Þoskafjarðarþingi.

Gils skeiðarnef nam Gilsfjörð, milli Ólafsdals ok Króksfjarðarmúla; hann bjó á Keifum; hans son var Heðinn, faðir Halldórs Garpdalsgoða, föður Þorvalds í Garpsdal, er átti Guðrúnu Ósvífrsdóttur.

22. Þórarinn krókr nam Króksfjörð til Hafra-fells frá Króksfjarðarnesi; hann deildi um Steinólfsdal við Steinólf enn lága, ok ræri eftir honum með tíunda mann, er hann fór ór seli með sjaunda mann; þeir börðust við Fagradalsárós

á eyrinni; þá komu menn til frá húsi at hjálpa Steinólfi; þar fell Þórarinn krókr, er þeir fjórir, enn sjau menn af Steinólfi; þar eru kuml þeira.

Ketill ilbreiðr nam Berufjörð, son Þorbjarnar tálkna; hans dóttir var Þóarna, er átti Hergils hnappraz, son Þrándar mjóbeins. Ingjaldr hét son þeira; hann var faðir Þórarins, er átti Þorgerði dóttur Glúms Geirasonar; þeira son var Helgu-Steinarr. Þrándr mjóbeinn átti dóttur Gils skeiðarnefs; þeira dóttir var Þóarna, er átti Hrólfr, son Helga ens magra. Þorbjörg knarrarbringa var önnur dóttir Gils skeiðarnefs. Herfiðr hét son hans, er bjó í Króksfirði.

Úlfr enn skjálgi, son Höгна ens hvíta, nam Røykjanes alt, milli Þorskafjarðar ok Hafrafells; hann átti Björgu, dóttur Eyvindar austmanns, systur Helga ens magra; þeira son var Atli rauði, er átti Þorbjörgu, systur Steinólfs lága; þeira son var Már á Hólum; hann átti Þorkötlu, dóttur Hergils hnappraz; þeira son var Ari; hann varð sæhafi til Hvíttramannalands; þat kalla sumir Írland et mikla; þat er kallat sex dægra sigling vestr frá Írlandi; þaðan náði Ari eigi á brutt at fara, ok var þar skírðr. Þessa sögu sagði fyrst Hrafn Hlymreksfari, er lengi hafði verit í Hlymreki á Írlandi. Svá kvað Þorkell Gellisson segja is-

x ind. s. idj. driven out of ...

lenska menn, þá er heyrt hófðu frá segja Þorfinn í Orkneyjum, at Ari hefði kendr verit á Hvítramannalandi, ok náði eigi brutt at fara, enn var þar vel virðr. Ari átti Þorgerði dóttur Álfs í Dölum; þeira son var Þorgils ok Guðleifr ok Illugi; þat er Keyknesinga ætt. Jörundr hét son Úlfs ens skjálga; hann átti Þorbjörgu knarrarbringu; þeira dóttir var Þjóðhildr, er átti Eiríkr rauði; þeira son Leifr enn heppni á Grænlandi. Jörundur hét son Atla ens rauða; hann átti Þórdisi, dóttir Þorgeirs suðu; þeira dóttir var Otkatla, er átti Þorgils Kollsson. Jörundr var ok faðir Snorra.

23. Hallsteinn son Þórólfs Mostrarskeggs nam Þorskafjörð, ok bjó á Hallsteinsnesi; hann blótaði þar til þess at Þórr sendi honum öndvegissúlur; eftir þat kom tré á land hans, þat er var sextigi og þriggja álna ok tveggja faðma digrt; þat var haft til öndvegissúlna, ok eru þar af gervar öndvegissúlur nær á hverjum bæ um þverfjörðuna; þar heitir nú Grenitrésnes, er trét kom á land. Hallsteinn hafði herjat á Skotland, ok tók þar þræla þá, er hann hafði út; þá sendi hann til saltgerðar í Svefneyjar; þar höfðu þeir 'Hallsteins hœla hag farm¹. Hallsteinn átti Ósku, dóttur Þorsteins rauðs; þeira son var Þorsteinn (*surtr*), er fann sumaraukã. Þorsteinn

1) Orðin 'þeir Hallsteins hœla hag farm' eru líklega eitthvað misrituð.

* a week added very 7th of.

surtr átti; þeira son var Þórarinn, enn dóttir Þórdís, er átti Þorkell trefill, ok Ósk, er átti Steinn mjöksiglandi; Þorsteinn hvíti hét son þeira. Sámr hét son Þorsteins surts, óskilgetinn; hann deildi um arf Þorsteins við Trefil, því at hann vildi halda í hendr börnum Þórarins.

Þorbjörn loki hét maðr, son Böðmóðs ór Skut; hann fór til Íslands ok nam Djúpafjörð, ok Grónes til Gufufjarðar; hans son var Þorgils á Þorgilsstöðum í Djúpafirði, faðir Kolls, er átti Þuríði Þórisdóttur, Hallaðarsonar jarls, Rögnvaldssonar Mærajarls; Þorgils var son þeira; hann átti Otkötl, dóttur Jörundar Atlasonar ens rauða; þeira son var Jörnndr; hann átti Hallveigu, dóttur Odda Ýrarsonar ok Ketils gufu. Snorri var Jörundarson; hann átti Asnýju, dóttur Víga-Sturlu; þeira son var Gils, er átti Þórdísi Guðlaugsdóttur ok Þorkötl Halldórsdóttur, Snorra sonar goða; enn son Gils var Þórðr; hann átti Vigdísi Svertingsdóttur; þeira son var Sturla í Hvammi.

24. Ketill gufa hét maðr, Örlygsson, Böðvarssonar, Vigsterkssonar; Örlygr átti Signýju Óblauðsdóttur, systur Höгна ens hvíta. Ketill son þeira kom út síð landnámatiðar; hann hafði verit í vestrvíking, ok haft ór vestrvíking þræla írska; hét einn Þormóðr, annarr Flóki, þriði Kori, fjórði Svartr, ok Skorrrar tveir. Ketill

tók Rosmhvalanes; sat hann enn fyrsta vetr at Gufuskálum, enn um várit fór hann inn á Nes, ok sat á Gufunesi annan vetr; þá hljópu þeir Skorri enn eldri ok Flóki frá honum með konur tvær ok fé mikit; þeir váru á laun í Skorrakholti, enn þeir váru drepnir í Flókadal ok Skorradal. Ketill fekk ængvan hústað á Nesjum, ok fór hann inn í Borgarfjörð, ok sat hinn þriðja vetr at Gufuskálum við Gufá; snemma um várit fór hann vestr í Breiðafjörð at leita sér landa; þar var hann á Geirmundarstöðum, ok bað Ýrar, dóttur Geirmundar, ok gat; vísaði hann þá Katli til landa fyrir vestan fjörð. Enn meðan Ketill var vestr, þá hljópu þrælarnir hans á braut, ok kámu fram um nótt á Lambastöðum; þar bjó þá Þórðr, son Þorgeirs lamba ok Þórdísar Ingvarsdóttur, móðursystur Egils Skalla-Grímssonar; þrælarnir báru eld at húsum, ok brendu Þórð inni ok hjón hans öll; þeir brutu þar upp gervibúr, ok tóku vöru mikla ok lausafé; síðan ráku þeir heim hross ok klyfjuðu; þeir snøru á leið til Álftaness. Lambi enn sterki, son Þórðar kom af þingi um morgininn, þá er þeir váru farnir á braut; hann fór eftir þeim, ok drifu þá menn til af bæjum; enn er þrælarnir sá þat, hljóp sinn veg hverr þeira. Þeir tóku Kora í Koranesi, enn sumir gengu á sund; Svart tóku þeir í Svartskerri, enn Skorra í Skorraey fyrir Mýrum, enn

Pormóð úti í Pormóðsskeri; þat er vika undan landi. Enn er Ketill gufa kom aftr, þá fór hann vestr fyrir Mýrar, ok var enn fjórða vetr á Snæfellsnesi at Gufuskálum; hann nam síðan Gufufjörð ok Skálanes til Kollafjarðar. Þau Ketill ok Ýri áttu tvá sonu: var Þórhallr annarr, faðir Hallvarar, er átti Börkr, son Pormóðar Þjóstarrssonar; annarr var Oddi, er átti Þorlaugu Hrólfsdóttur frá Ballará ok Þuriðar, dóttur Valþjófs Örlygssonar frá Esjubergi.

25. Kolli Hróaldsson nam Kollafjörð ok Kvigandanes ok Kvigandafjörð; hann seldi ýmsum mönnum landnám sitt *[enn hann fór í Laxárdal á Höskuldsstaði, er hann kvángaðist. Hann var kallaðr Dala-Kollr; hans son var Höskuldr, er átti Hallfríði, dóttur Bjarnar, er nam Bjarnarfjörð fyrir norðan Steingrímsfjörð. Þeira son var Þorleikr, faðir Bolla, er átti Guðrúnu Ósvífrsdóttur]*.

Knjúkr hét son Þórólfs sparrar, er út kom með Örlygi; hann var kallaðr Nesja-Knjúkr; hann nam nes öll til Barðastrandar frá Kvigandafirði, ok bjó Annarr son Knjúks var Einarr, faðir Steinólfs, föður Salgerðar, móður Bárðar svarta. Þóra hét dóttir Knjúks, er átti Þorvaldr, son Þórðar Víkingssonar; þeira son var Mýra-Knjúkur, faðir Þorgauts, föður Steinólfs, föður Höllu, móður Steinunnar, móður Hrafns á Eyri ok Herðisar, er átti Hallr Gizurarson lög-

maðr. Dóttir Rafns var Steinunn, móðir he ra Rafns ok Höllu, ok Herdis, er Svarthöfði Dugfússon átti; þeira son Óli, er átti Salgerði Jónsdóttur; þeira dóttir Steinunn, er Haukr Erlendsson átti. Knjúkr átti Eyju, dóttur Ingjalds Helgasonar magra; þeira son var Eyjólfur, faðir Þorgríms Kötlusonar. Glúmr átti fyrir Kötlum; ok var þeira dóttir Þorbjörg kolbrún, er Þormóðr orti um. Steingrímur hét son Þorgríms, faðir Yngvildar, er átti Úlfheðinn á Víðimýri.

Geirsteinn kjálki nam Kjálkafjörð ok Hjarðarnes með ráði Knjúks. Hans son var Þorgils, er átti Þóru, dóttur Vestars af Eyri; þeira son var Steinn enn danski; hann átti Hallgerði Örnólfsdóttur, Ármóðssonar ens rauða. Örnólfr átti Vigdísu dóttur *Þorgils*. Vigdís hét dóttir Steins ens danska ok Hallgerðar, er átti Illugi Steinbjarnarson; þeira dóttir var Þórunn, móðir Þorgeirs langhöfða.

Geirleifr, son Eiríks Högnasonar ens hvíta, nam Barðaströnd milli Vatnsfjarðar ok Berghlíða; hann var faðir þeira Oddleifs ok Helga skarfs. Oddleifr var faðir Gests ens spaka ok Þorsteins ok Æsu, er átti Þorgils, son Gríms ór Grímsnesi; þeira synir váru þeir Jörundr í Miðengi ok Þórarinn at Búrfelli. Gestur átti; váru þeira börn Þórðr ok Halla, er *Snorri* Dala-Álfsson átti. Þorgils var son þeira. Önnur dóttur Gests var Þorey, er Þor-

gils átti; Þórarinn var son þeira, faðir Jódisar, móður Illuga, föður Birnu, móður Illuga ok Arnórs ok Eyvindar, *föður Steingríms. föður Helgu, móður Jórunnar, móður Hauks Erlendssonar.* Helgi *skarfr* var faðir Þorbjargar kötlu, er átti Þorsteinn Sölmundarson; þeira synir Refr í Brynjudal ok Þórðr, faðir Illuga, föður Hróðnýjar, er Þorgrímr sviði átti. Þórdís hét önnur dóttir Helga skarfs, er átti Þorsteinn Ásbjarnarson ór Kirkjubæ austan; þeira son var Surtr, faðir Sighvats lögsögumanns. Geirleifr átti Jóru Helgadóttur. Þorfinnr hét enn þriði son Geirleifs; hann átti Guðrúnu Ásólfadóttur; Ásmundr hét son þeira; hann átti Hallkötlu, dóttur Bjarnar Mássonar, Ásmundarsonar. Hlenni hét son þeira; hann átti Ægileifu, dóttur Þorsteins Kröflussonar. Þorfiðr var son þeira, faðir Þorgeirs langhöfða. Þorsteinn Oddleifsson var faðir Ísgerðar, er átti Bölverkr, son Eyjólfss ens grá; þeira son Gellir lögsögumaðr. Véný var enn dóttir Þorsteins, móðir Þórðar krákunefs; þaðan eru Krákneflingar komnir.

26. Armóðr enn rauði Þorbjarnarson, fóstbróðir Geirleifs, nam Rauðasand; hans synir váru þeir Örnólfur ok Þorbjörn, faðir Hrólfs ens rauðsenska.

Þorólfur spórr kom út með Örlygi, ok nam Patreksfjörð fyrir vestan, ok Víkr fyrir vestan Barð nema Kollsvík; þar bjó Kollr, fóstbróðir

Örlygs. Þórólfr nam ok Keflavík fyrir sunnan Barð, ok bjó at Hvallátrum. Þeir Nesja-Knjúkr ok Ingólfr enn sterki ok Geirþjófr váru synir Þórólfs sparrar. Þórnarna var dóttir Ingólfs, er Þorsteinn Oddleifsson átti.

Þorbjörn tálkni ok Þorbjörn skúni, synir Böðvars blöðruskalla, kvámu út með Örlygi; þeir námu Patreksfjörð hálfan ok Tálknafjörð allan til Kópaness.

Ketill ilbreiðr, son Þorbjarnar tálkna, nam Dali alla frá Kópanesi til Dufansdals; hann gaf Þórörnu, dóttur sína, Hergilsi hnappraz; rézt. hann þá suðr í Breiðafjörð, ok nam Berufjörð hjá Reykjanesi.

Örn hét maðr ágætr; hann var frændi Geir-^{ef. p. 26}mundar heljarskinns; hann fór af Rogalandi fyrir ofriki Haralds konungs; hann nam land í Arnarfirði svá vitt sem hann vildi; hann sat um vetrinn á Tjaldanesi, því at þar gekk eigi sól af um skammdegi.

Án rauðfeldr, son Gríms loðinkinna ór Hrafnistu ok Helgu, dóttur Anar bogsveigis, varð missátttr við Harald konung enn hárfagra, ok fór því ór landi í vestrvíking; hann herjaði á Írland, ok fekk þar Grelaðar, dóttur Bjartmars jarls; þau fóru til Íslands ok kvámu í Arnarfjörð vetri síðar enn Örn. Án var enn fyrsta vetr í Dufansdal; þar þótti Grelöðu illa ilmat ór jörðu. Örn spurði til Hámundar heljarskinns,

frænda síns, norður í Eyjafirði, ok fýstist hann þangat; því seldi hann Áni rauðfeld lönd öll milli Langaness ok Stapa; Án gerði bú á Eyri; þar þótti Grelöðu hunangsilmr ór grasi. Dufan var leysingi Ánar; hann bjó eftir í Dufansdal. Bjartmarr var son Ánar, faðir Végesta tveggja ok Helga, föður Þuriðr arnkötlu, er átti Her-gils; þeira dóttir var Þuriður arnkatla, er átti Helgi Eypjófsson. Þórhildr var dóttir Bjartmars, er átti Vésteinn Végeirsson; Vésteinn ok Uðr váru börn þeira. Hjallkarr var leysingi Ánar; hans son var Björn, þræll Bjartmars; hann gaf Birni frelsi; þá græddi hann fé, enn Végestr vandaði um, ok lagði hann spjóti gögnum, enn Björn laust hann með grefi til bana.

Geirþjófr Valþjófsson nam land í Arnarfirði: Forsfjörð, Reykjarfjörð, Trostansfjörð, Geirþjófs-fjörð, ok bjó í Geirþjófsfirði; hann átti Valgerði dóttur Úlfs eps skjálga. Þeira son var Högni; hann átti Uði, dóttur Ólafs jafnakolls ok Þóru Gunnsteinsdóttur. Atli var son þeira; hann átti Þuriði Þorleifsdóttur, Eyvindarsonar knés ok Þuriðar rymgyltu. Þorleifr átti Gró, dóttur Þór-ólfs brækis. Höskuldr var son Atla, faðir *Atla*, föður *Bárðar* ens svarta, föður *Sveinbjarnar*, föður *Rafns*, föður *Steinunnar*, móður *herra Rafns*.

27. Eiríkr hét maðr, er nam *Keldudal fyrir sunnan* Dýrafjörð ok Sléttanes til Stapa, ok til

Háls ens ytra í Dýrafirði; hann var faðir Þorkels, föður Þórðar, föður Þorkels, föður Steinólfs, föður Þórðar, föður Þorleifar, móður Þorgerðar, móður Þóru, móður Guðmundar gríss, *er átti Solveigu, dóttur Jóns Loftssonar Þeira börn váru Magnús góði, ok Þorlákr, faðir Árna byskups, ok Þóra, móðir Gizurar jarls.* Þorleif var móðir Línu, móður Ceciliu, móður Bírðar ok Þorgerðar, er átti Björn enn enski; þeira börn váru þau Arnis ábóti ok Þóra, er átti Ámundi Þorgeirsson.

Vésteinn son Végeirs, bróðir Vebjarnar Sygnakappa, nam land milli Hálsa í Dýrafirði ok bjó í Haukadal; hann átti Þórhildi Bjartmarsdóttur; þeira börn Vésteinn ok Uðr. Þorbjörn súrr kom út at albygðu landi; honum gaf Vésteinn hálfan Haukadal; hans synir váru þeir Gísli ok Þorkell ok Ari, enn dóttir Þórdís, er Þorgrímr átti; þeira son Snorri goði. Síðan átti Þórdísi Börkr enn digri; þeira dóttir Þuríðr, er átti Þorbjörn digri, enn síðar Þóroddr skattkaupandi; þeira son var Kjartan at Fróðá.

Dýri hét maðr ágætr; hann fór af Sunnmœri til Íslands at ráði Rögnvalds jarls, enn fyrir ofriki Haralds konungs hárfagra. Dýri nam Dýrafjörð ok bjó at Hálsu; hans son var Hrafn á Ketilseyri, faðir Þuríðar, er átti Vésteinn Vésteinsson; þeira synir Bergr ok Helgi.

Þórðr hét maðr, Víkingsson, eðr son Haralds

honungs hárfagra; *hann* fór til Íslands, ok nam land milli Þúfu á Hjallanesi ok Jarðfallsgils; hann bjó í Alviðru; Þórðr átti Þórhildi, dóttur Eyvindar austmanns, systur Helga ens magra. Þorkell Alviðrukappi enn auðgi var son þeira; hann átti Þórðr hét son þeira; annar Eyjólfur, faðir Gísla, er átti Hallgerði Vermundar dóttur ens mjóva; þeira son var Brandr faðir Guðmundar prests í Hjarðarholti, enn dóttir Þóra, er átti Brandr Þórhallsson; þeira dóttir Steinvör, móðir Rannveigar, móður Sæhildar, er Gizurr átti. Helgi hét annarr son Eyjólfs; hans börn váru þau Óláfr ok Guðleif, er Fjarska-Fiðr átti. Þorvaldr hvíti hét annarr son Þórðar Víkingssonar; hann átti Þóru dóttur Nesja-Knjúks; þeira son var Mýra-Knjúkr, faðir Þorgauts föður Steinólfs, er átti Herðísi Tindsdóttur; þeira börn váru þau Þorkell á Mýrum ok Halla, er átti Þórðr Oddleifsson. Annarr son Þorvalds hvíta var Þórðr örvöndr, er átti Ásdísi Þorgrímdóttur, Harðrefssonar. Móðir Ásdísar var Rannveig, dóttir Grjótgarðs Hlaðajarls. Ásdís var móðir Úlfs stallara, enn systir Ljóts ens spaka, ok Halldísar, er Þorbjörn Þjóðreksson átti. Dóttir þeira Þórðar örvandar var Oddkatla, er átti Sturla Þjóðreksson; þeira son Þórðr, er átti Hallberu, dóttur Snorra goða; þeira dóttir Þuríðr, er átti Hafliði Másson. Snorri var son Þórðar Sturlusonar, er átti Oddbjörgu dótt-

ur Gríms Loðmundarsonar; þeira börn váru þau Flugu-Grímr ok Hallbera, er Mág-Snorri átti. Doetr Sturlu váru sex; ein var Ásný, er Snorri Jörundarson átti; þeira dóttir Þórdís, móðir Höskulds læknis, *föður Margretar, móður Þorfinns ábóta*. Son þeira Snorra ok Ásnýjar var Gils, faðir Þórðar, föður Sturlu í Hvammi.

28. Ingjaldr Brunason nam Ingjaldssand milli Hjallaness ok Ófœru; hann var faðir Harðrefs, föður Þorgríms, föður þeira Ljóts ens spaka, sem áðr var ritat.

Ljótr enn spaki bjó á Ingjaldssandi, son Þorgríms Harðrefssonar, enn móðir hans var Rannveig, dóttir Grjótgarðs jarls. Þorgrímr gæðr var son Ljóts. Halldísi, systur Ljóts, átti Þorbjörn Þjóðreksson, enn Ásdísi, aðra systur Ljóts, nam Óspakr Ósvífrsson; um þá sök sótti Ljótr Óspak til sektar. Úlfr hét son þeira; þann fœddi Ljótr. Grímr kögr bjó á Brekku, hans synir váru þeir Sigurðr ok Þorkell, litlir menn ok smáir. Þórarinn hét fósterson Ljóts. Ljótr kaupir slátr at Grími til xx hundraða, ok galt læk, er fell meðal landa þeira; sá hét Ósómi. Grímr veitti hann á eng sína ok gróf land Ljóts, enn hann gaf sök á því, ok var fátt með þeim. Ljótr tók við austmanni í Vaðli; sá lagði hug á Ásdísi. Gestr Oddleifsson sótti haustboð til Ljóts; þá kom þar Egill Völu-Steinsson, ok bað Gestr, at hann legði ráð til at föður hans bætt-

ist helstrið, er hann bar um Ögmund son sinn. Gestr orti upphaf Ögmundar-^{drápu}. Ljótr spurði Gest, hvat manna Þorgrímr ^{dey}gagarr mundi verða. Gestr kvað Þórarin fósttra hans frægra mundu verða, ok bað Þórarin við sjá, at eigi vefðist hár þat um höfut honum, er lá á tungu hans. Óvirðing þótti Ljóti þetta, ok spurði um morgininn, hvat fyrir Þorgrími lægi. Gestr kvað Úlf systurson hans mundu frægra verða. Þá varð Ljótr reiðr, ok reið þó á leið með Gest, ok spurði: „Hvað man mér at bana verða?“ Gestr kvezt eigi sjá örlög hans, enn bað hann vera vel við nábúa sína. Ljótr spurði: „Munu jarðlýsnar, synir Gríms kögrs, verða mér at bana?“ „Sárt bítr soltin lús“, kvað Gestr. „Hvar man þat verða?“ kvað Ljótr. „Heðra nær“, kvað Gestr. Austmaðr reiddi Gest á heiði upp, ok studdi Gest á baki, er hestr rasaði undir honum. Þá mælti Gestr: „Happ sótti þik nú, enn brátt mun annat; gættu at þér verði þat eigi at óhappi“. Austmaðrinn fann graf-silfr, er hann fór heim, ok tók tuttugu penninga, ok ætlaði at hann mundi feta til síðar; enn er hann leitaði, fann hann eigi; enn Ljótr fekk tekit hann, er hann var at grefti, ok gerði af honum þrjú hundruð fyrir hvern penning. Þat haust var veginn Þorbjörn Þjóðreksson. Um várit sat Ljótr at þrælum sínum á hæð einni; hann var í kápu, ok var höttrinn lerk-

aðr um hálsinn, ok ein ermr á. Þeir Kōgrssynir hljópu á hæðina, ok hjoggu til hans báðir senn; eftir þat snaraði Þorkell höttinn at höfði honum. Ljótr bað þá láta gótt í búsiðjum sínum, ok hröpuðu þeir af hæðinni á götu þá, er Gestr hafði riðit; þar dó Ljótr. Þeir Grimssynir fóru til Hávarðs halta. Eyjólfur grái veitti þeim öllum, ok Steingrímur son hans.

29. Önundur Víkingsson, bróðir Þórðar í Alviðru, nam Önundarfjörð ok bjó á Eyri.

Hallvarðr súgandi var í orrustu mót Haraldi konungi í Hafrsfirði; hann fór af þeim ófriði til Íslands, ok nam Súgandafjörð ok Skálavík til Stiga ok bjó þar.

Þuriðr sundafyllir ok Völu-Steinn, son hennar, fóru af Hálogalandi til Íslands, ok námu Bolungarvík, ok bjoggu í Vatnsnesi; hon var því kölluð sundafyllir, at hon seiddi til þess í hallæri á Hálogalandi, at hvert sund var fult af fiskum; hon setti ok Kvíarmið á Ísafjarðardjúpi, ok tók til á kollótta af hverjum bónda í Ísafirði. Synir Völu-Steins váru þeir Ögmundur ok Egill.

Helgi hét son Hrólfs ór Gnúpufelli; hann var getinn austr, ok upplenzkr at móðurætt. Helgi fór til Íslands at vilja frænda sinna; hann kom í Eyjafjörð ok var þá albyggt; eftir þat vildi hann útan ok varð aftreka í Súgandafjörð; hann var um vetrinn með Hallvarði, enn um

várit fór hann at leita sér bústaðar; hann fann fjörð einn, ok hitti þar skutil í flæðarmáli; þat kallaði hann Skutilsfjörð; þar bygði hann siðan. Hans son var Þorsteinn ógæfa; hann fór utan ok vá hirðmann Hákonar jarls Grjótgarðssonar, enn Eyvindr ráðgjafi jarlsins sendi Þorstein til handa Vébirni Sygnatrausta; hann tók við honum, enn Védís systir hans latti þess. Fyrir þat seldi Vébjörn eigur sínar ok fór til Íslands, er hann treystist eigi at halda manninn.

Þórólfr brækir nam sunnan Skutilsfjörð ok Skálavík ok bjó þar.

Eyvindr kné fór af Ögðum til Íslands ok Þuríðr rymgylta, kona hans; þau námu Álfafjörð ok Seyðisfjörð, ok bjoggu þar. Þeira son var Þorleifr, er fyrr var getit, ok Valbrandr, faðir Halldórs ok Gunnars ok Bjargeyjar, er átti Hávarðr halti; þeira son var Óláfr.

Geirr hét maðr ágætr í Sogni; hann var kallaðr Végeirr, því at hann var blótmaðr mikill; hann átti mörg börn. Vébjörn Sygnakappi var elztr sona hans, ok Vésteinn, Vépormr, Vémundr, Végestr, ok Véporn, enn Védís dóttir. Eftir andlát Végeirs varð Vébjörn ósáttir við Hákon jarl, sem fyrr var getit; því fóru þau systkin til Íslands. Þau höfðu útivist harða ok langa; þau tóku um haustit Hlöðuvík fyrri vestan Horn; þá fekk Vébjörn at blóti miklu; hann kvað Hákon þann dag blóta þeim til ópurftar. Enn er hann

var at blótinu, eggjuðu bræðr hans hann til braut-
 farar, ok gáði hann eigi blótsins, ok létu þeir
 út; þeir brutu þann dag skip sitt undir hömr-
 um miklum í illviðri; þar komust þeir nauðu-
 lega upp, ok gekk Vébjörn fyrir; þat er nú
 kölluð Sygnakleif. Enn um vetrinn tók við
 þeim öllum Atli í Fljóti, þræll Geirmundar helj-
 arskinns [*ok bað þau engu launa vistina; sagði
 Geirmund eigi vanta mat. Enn er Atli fann
 Geirmund, spurði Geirmundr, hví hann var
 svá djarfr at taka slíka menn upp á kost hans.
 Atli svaraði: „Því at þat man uppi meðan
 Ísland er bygt, hversu mikils hátlar sá maðr
 mundi vera, at einn þræll þorði at gera slíkt
 utan hans orlof.“ Geirmundr svarar: „Fyr-
 ir þetta þitt tiltæki skaltu þiggja frelsi ok bú
 þetta, er þú hefir varðveitt; ok varð Atli/
 síðan mikilmenni. Vébjörn nam um várit eftir
 land milli Skötufjarðar ok Hestfjarðar, svá vitt
 sem þann gengi um á dag, ok því meirr, sem
 hann kallaði Folaþót. Vébjörn var vígamaðr
 mikill, ok er saga mikil frá honum. Hann gaf Vé-
 dtsi Grímólfi í Unaðsdal; þeir urðu missáttir, ok
 vá Vébjörn hann hjá Grímólfsvötnum; fyrir þat
 var Vébjörn veginn á fjórðungspingi á Þórsnesi
 ok þrír menn aðrir.*

Gunnsteinn ok Halldórr hétu synir Gunnbjarn-
 ar, Úlfs sonar kráku, er Gunnbjarnarsker eru við
 kend; þeir námu Skötufjörð, ok Laugardal ok

Ögrvík til Mjóvafjarðar. Bersi var son Halldórs, faðir Þormóðar Kolbrúnarskálds. Þar í Laugar-
dal bjó síðan Þorbjörn Þjóðreksson, er vá Ólaf,
son Hávarðar halta ok Bjargeyjar Valbrands-
dóttur; þar af gerðist saga Ísfirðinga ok víg
Þorbjarnar.

30. Snæbjörn, son Eyvindar austmanns, bróð-
ir Helga magra, nam land milli Mjóvafjarðar ok
Langadalsár, ok bjó í Vatnsfirði; hans son var
Hólmsteinn faðir Snæbjarnar galta; móðir Snæ-
bjarnar var Kjalvör, ok váru þeir Tungu-Oddr
systrasynir. Snæbjörn var fósturaðr í Þingnesi
með Þóroddi, *enn stundum var hann með*
Tungu-Oddi eðr móður sinni. Hallbjörn, son
Odds frá Kiðjabergi Hallkelssonar, bróður Ketil-
bjarnar ens gamla, fekk Hallgerðar dóttur Tungu-
Odds; þau váru með Oddi enn fyrsta vetr; þar var
Snæbjörn galti. Óástúðigt var með þeim hjónum.
Hallbjörn bjó fór sína um vórit at fardögum;
enn er hann var at búnaði, fór Oddr frá húsi
til laugar í Reykjaholt; þar váru sauðahús hans;
vildi hann eigi verða við er Hallbjörn færi, því
at hann grunaði, hvort Hallgerðr mundi fara
vilja með honum. Oddr hafði jafnan boett um
með þeim. Þá er Hallbjörn hafði lagt á hesta
þeira gekk hann til dyngju, ok sat Hallgerðr
á palli ok kembdi sér; hárit fell um alla hana
ok niðr á gólf; hon hefir kvenna bezt verit
hærð á Íslandi með Hallgerði snúinbrók. Hall-

björn bað hana upp standa ok fara; hön sat ok þagði; þá tók hann til hennar ok lyftist hon ekki; þrisvar fór svá; Hallbjörn nam staðar fyrir henni ok kvað:

Ölkarma lætr erma
eik, firrumk þat, leika,
Lofn fyr lesnis stafni
línbundin mik sínum.
Bíða man ek of brúði
(böl gærir mik fólvan;
snertumk harmr í hjarta
hrót) aldrigi bótir.

Eftir þat snaraði hann hárit um hönd sér, ok vildi kippa henni af pallinum, enn hön sat ok veikst ekki. Eftir þat brá hann sverði ok hjó af henni höfuðit, gekk þá út ok reið í brutt. Þeir váru þrír saman, ok höfðu tvau klyfja-hross. Fátt var manna heima, ok var þegar sent at segja Oddi. Snæbjörn var á Kjalvararstöðum, ok sendi Oddr honum mann; bað hann sjá fyrir reiðinni, enn hvergi kvezt hann fara mundu. Snæbjörn reið eftir þeim með tólfta mann, ok er þeir Hallbjörn sá eftirreiðina, báðu förunautar hans hann undan riða, enn hann vildi þat eigi. Þeir Snæbjörn kvámu eftir þeim við hæðir þær, er nú heita Hallbjarnarvörður; þeir Hallbjörn fóru á hæðina ok vörðust þaðan; þar fellu þrír menn af Snæbirni ok báðir förunautar Hallbjarnar; Snæbjörn hjó þá fót af Hallbirni í ristarlið; þá hnekti hann á ena syðri

hæðina ok vá þar tvá menn af Snæbirni, ok þar fell Hallbjörn; því eru þrjár vörður á þeirri hæðinni enn fimm á hinni; síðan fór Snæbjörn aftr. Snæbjörn átti skip í Grímsárósi; þat kaupir hálftr Hrólfr enn rauðsenzki; þeir váru tólf hvarir. Með Snæbirni váru þeir Þorkell ok Sumarliði, synir Þorgeirs rauðs, Einarssonar Stafhyltings. Snæbjörn tók við Þóroddi ór Þingnesi, fóstura sínum, ok konu hans, enn Hrólfr tók við Styrbirni, er þetta kvað eftir draum sinn:

Bana sé ek okkarn
 beggja, tveggja,
 alt ömurlegt
 útnorðr í haf, -
 frost ok kulda
 feikn hvers konar;
 veit ek af slíku
 Snæbjörn veginn.

Þeir fóru at leita Gunnbjarnarskerja ok fundu land; eigi vildi Snæbjörn kanna láta um nótt. Styrbjörn fór af skipi ok fann fésjóð í kumli ok leyndi; Snæbjörn laust hann með öxi; þá fell sjóðrinn niðr. Þeir gerðu skála ok lagði hann í fönn. Þorkell, son Rauðs, fann at vatn var á forki, er stóð úti í skálaglugg; þat var um góí; þá grófu þeir sik út. Snæbjörn gerði at skipi, enn þau Þóroddr váru at skála af hans hendi, enn þeir Styrbjörn af Hrólfs hendi; aðrir fóru at veiðum. Styrbjörn vá Þórodd, enn

Hrólfr ok þeir báðir Snæbjörn. Rauðssynir sóru eiða ok allir aðrir til lífs sér. Þeir tóku Hálogaland ok fóru þaðan til Íslands í Vaðil. Þorkell trefill gat sem farit hafði fyrir Rauðssonum. Hrólfr gerði virki á Strandarheiði. Trefill sendi Sveinung til höfuðs honum; fór hann fyrst á Mýri til Hermundar, þá til Óláfs at Dröngum, þá til Gests í Haga; hann sendi hann til Hrólfs vinar síns. Sveinungr vá Hrólfr ok Styrbjörn; þá fór hann í Haga. Gestr skifti við hann sverði ok öxi, ok fekk honum hesta tvá hnökkóttu, ok lét mann riða um Vaðil alt í Kollafjörð, ok lét Þorbjörn enn sterka heimta hestana. Þorbjörn vá hann í Sveinungseyri, því at sverðit brotnaði undir hjöltunum. Því höeldist Trefill við Gest, þá er saman var jafnat viti þeira, at hann hefði því komit á Gest, at hann sendi sjálfr mann til höfuðs vin sínum.

31. Óláfr jafnakollr nam land frá Langadalsá til Sandeyrarár ok bjó í Unaðsdal; hann átti Þóru Gunnsteinsdóttur; þeira son var Grímólfr, er átti Védisi, systur Vébjarnar.

Þórólfr fasthaldi hét maðr ágætr í Sogni; hann var ósáttr við Hákon jarl Gróttgarðsson ok fór til Íslands með ráði Haralds konungs; hann nam land frá Sandeyrará til Gýgjarsporsár í Hrafnfirði; hann bjó at Snæfjöllum. Hans son var Ófeigr, er átti Otkötl.

Örlygr, son Bōðvars Vígsterkssonar, fór til Íslands fyrir ofriki Haralds konungs hárfagra; hann var enn fyrsta vetr með Geirmundi heljarskinn, enn um várit gaf Geirmundr honum bú í Aðalvík, ok lönd þau, sem þar lágu til. Örlygr átti Signýju, dóttur Óblauðs, systur Högnæns hvíta; þeira son var Ketill gufa, er átti Ýri Geirmundardóttur.

Nú taka til landnám Geirmundar, sem fyrr er ritað, alt til Straumness fyrir austan Horn.

Örlygr eignaðist Sléttu ok Jökulsfjörðu.

Hella-Björn, son Herfinns ok Höllu, var víkingr mikill; hann var jafnan óvin Haralds konungs; hann fór til Íslands, ok kom í Bjarnarfjörð með alskjölduðu skipi; síðan var hann Skjalda-Björn kallaðr; hann nam land frá Straumnesi til Dranga; hann bjó í Skjalda-Bjarnarvík, enn átti annat bú á Bjarnarnesi; þar sér miklur skálatóftir hans. Son hans var Þorbjörn, faðir Arngerðar, er átti Þjóðrekr Sléttu-Bjarnarson; þeira synir Þorbjörn ok Sturla ok Þjóðrekr.

Geirólfr hét maðr, er braut skip sitt við Geirólfsgrúp; hann bjó þar síðan undir grúpinum at ráði Bjarnar.

Þorvaldr Ásvaldsson, Úlfssonar, Öxna-Þórissonar, nam Drangaland ok Drangavík til Enginess, ok bjó at Dröngum alla ævi; hans son

var Eiríkr rauði, er bygði Grænland, sem fyrr segir.

Herrøðr hvítaský var göfgr maðr; hann var drepinn at ráðum Haralds konungs, enn synir hans þrír fóru til Íslands ok námu land á Ströndum: Eyvindr Eyvindarfjörð, Ófeigr Ófeigsfjörð, Ingólfr Ingólfsfjörð; þeir bjoggu þar síðan.

Eiríkr snara hét maðr, er land nam frá Ingólfsfirði til Veðílausu, ok bjó í Trékyllisvík; hann átti Álofu, dóttur Ingólfs ór Ingólfsfirði; þeira son var Flosi, er bjó í Vík, þá er austmenn brutu þar skip sitt ok gerðu ór hrænum skip þat, er þeir kölluðu Trékylli; á því fór Flosi útan, ok varð aftrreka í Öxarfjörð; þaðan af gerðist saga Böðmóðs gerpis ok Grimólfs.

32. Önundr tréfótr (*var*) son Ófeigs burlufótar, Ívarssonar beytils; Önundr var á móti Haraldí konungi í Hafrsfirði ok lét þar fót sinn; eftir þat fór hann til Íslands ok nam land frá Kleifum til Ófæru: Kaldbaksvík, Kolbeinsvík, Byrgisvík, ok bjó í Kaldbak til elli; hann var bróðir Guðbjargar, móður Guðbrands kúlu, föður Ástu, móður Óláfs konungs. Önundr átti fjóra sonu: einn hét Grettir, annarr Þorgeirr flöskubak, þriðji Ásgeirr æðikollr, faðir Kálfs ok Hrefnu er Kjartan átti, ok Þuríðar, er Þorkell kuggi átti, enn síðarr Steinþórr Ólafsson; enn fjórði var Þorgrímr hærulkollr, faðir Ásmundar, föður Grettis ens sterka.

Björn hét maðr, er nam Bjarnarfjörð; hann átti Ljúfu; þeira son var Svanr, er bjó á Svanhóli.

Steingrímur nam Steingrímsfjörð allan ok bjó í Trollatungu; hans son var Þórir, faðir Halldórs, föður Þorvalds örgoða, föður Bitru-Odda, föður Steindórs, föður Odds, föður Há-Snorra, föður Odds munks ok Þórólfs ok Þórarins rosta.

Kolli hét maðr er nam Kollafjörð ok Skriðnesenni, ok bjó undir Felli meðan hann lifði.

Þorbjörn bitra hét maðr; hann var víkingr ok illmenni; hann fór til Íslands með skuldalið sitt; hann nam fjörð þann, er nú heitir Bitra, ok bjó þar. Nokkuru síðar braut Guðlaugr, bróðir Gils skeiðarnefs, skip sitt þar út við höfða þann, er nú heitir Guðlaugshöfði. Guðlaugr komst á land, ok kona hans ok dóttir, enn aðrir menn týndust; þá kom til Þorbjörn bitra ok myrði þau bæði, enn tók meyna ok fæddi upp. Enn er þessa varð varr Gils skeiðarnef, fór hann til ok hefndi bróður síns; hann drap Þorbjörn bitru ok enn fleiri menn. Við Guðlaug er kend Guðlaugsvík.

f. Bandam Bálki hét maðr Blæingsson, Sótasonar af Sótanesi; hann var á móti Haraldi konungi í Hafsfirði; eftir þat fór hann til Íslands ok nam Hrútafjörð allan; hann bjó á Bálkastöðum hværumtveggjum, enn síðast í Bø, ok dó þar. Hans son var Bersi goðlauss, er fyrst bjó á Bersastöðum í Hrútafirði, enn síðan nam hann Langa-

vatnsdal ok átti þar annat bú, áðr hann fekk Þórdisar, dóttur Þórhadds ór Hitárdal, ok tók með Hólmsland; þeira son var Arngeirr, faðir Bjarnar Hitdælakappa. Geirbjörg var dóttir Bálka, móðir Véleifs ens gamla.

Arndis en auðga, dóttir Steinólfs ens lága, nam síðan land í Hrútafirði út frá Borðeyri; hon bjó í Bœ; hennar son var Þórðr, er bjó fyrr í Múla í Saurbœ.

33. Þröstr ok Grenjuðr, synir Hermundar hokins, námu land í Hrútafirði inn frá Borðeyri ok bjoggu at Melum. Frá Grenjaði var kominn Hesta-Gellir prestur, enn Ormr frá Presti. Son Prastar var ok Þorkell á Kerseyri, faðir Guðrúnar, er átti Þorbjörn þyna, son Hrómundar halta; þeir bjoggu at Fagrabrekku; Þorleifr Hrómundarfóstri var son þeira. Hásteinn hét enn son Hrómundar; þeir váru allir um eitt ráð. Þórir hét son Þorkels Prastarsonar; hann bjó at Melum; Helga hét dóttir hans. Í þann tíma kom Sleitu-Helgi út á Borðeyri ok Jörundr bróðir hans; þeir váru víkingar tólf frjálsir ok sveinar um fram; þeir fóru allir til Mela; þá fekk Helgi Helgu Þórisdóttur. Þeim Hrómundi hurfu stóðhross; þat kendu þeir Helga, ok stefndi Miðfjarðar-Skeggi þeim um stuld til alþingis, enn þeir Hrómundr skyldu gæta heraðs, ok höfðu virki gott á Brekku. Austmenn bjoggu skip sitt. Einn morgin kom hrafn á

f. Baud.

ljóra á Brekku ok gall hátt; þá kvað Hrómundr:

Út heyrik svan sveita
sára þorns es mornar
(bráð vegr borginmóða)
bláfjallaðan gjalla.
Svá gól fyrr, þás feigir
fólknárungar váru,
Gunnar haukr, es gaakar
Gauts bragða spá sagðu.

Þorbjörn kvað;

Hlakkar høgli stokkinn
hræs es kemr at sævi
(móðr krefr morgunbráðar)
már valkastar báru.
Svá gól endr þás unda
eiðs af fornum meiði
hræva gaukr, es haukar
hildinga mjöð vildu.

Í þenna tíma komu austmenn í virkit, því at verkmenn höfðu eigi aftr látit. Þeir bræðr gengu út, enn konur sögðu Hrómund of gamlan enn Þorleif of ungan at ganga út; hann var fimtán vetra. Þá kvað Hrómundr:

Vas-at mér í dag dauði,
draugr flatvallar bauga,
búumk við llmar jálmi,
áðr né gær of ráðinn.
Rækik lítt þót leiki
litvöndr Heðins fitjar
(oss vas áðr of markaðr
aldr) við rauða skjaldu.

Austmenn fellu sex í virkinu, enn aðrir sex

stukku brutt. Þá er Þorbjörn vildi lúka aftr virkinu, var hann skotinn í gegnum með atgeiri; Þorbjörn tók atgeirinn ór sárinu ok setti milli herða Jörundi, svá at út kom í brjóst. Helgi kastaði honum á bak sér ok rann svá. Fallinn var Hrómundr, enn Þorleifr sárr til ólifs. Hásteinn rann eftir þeim, þar til er Helgi kastaði af sér Jörundi dauðum; þá hvarf hann aftr. Konur spurðu tíðinda; Hásteinn kvað:

Hér hafa sex, þeirs sæfast
sútlaut bana úti
svipnjörðungar sverða
sárteini á brústeinum.
Hygg, at hálfir liggi
heftendr laga eftir;
eggskeindar lét ek undir
óbiðingum sviða.

Konur spurðu, hvé margir þeir væri. Hásteinn kvað:

Bark-at ek *fúr* með fleiri
fetla stígs at vígi
fyrir várum þar fjórir
frændr ofstopa vændir;
enn tólf af glað Gylfa
gunnþings hvatir runnar
kvöld ruðu vápn, þeirs vildu
várs fundar til skunda.

Konur spurðu, hvé margir væri fallnir af vikingum; Hásteinn kvað:

Sjav hafa sœkitivar
Svólnis garðs til jarðar
(blóð fell varmt til vallar

valdögg) nössum höggvit.
 Mun-at fúrvíðir fleiri
 Fjölnis þings, enn hingat
 út um Ekkils brautir
 lálks mærar skæ föra.

Hér megu hælíðrvar
 hljóms daltangar skjóma
 dýrs, hvat drýgðu fjórir
 dagverks súa merki;
 enn ek hyrbrigðir hugða
 (hrafn sleit af ná beitu)
 Gunnar ræfrs, at gæfim
 griðbitum frið lítinn.

Unnum auðimönnum
 (á ek þunna hjör) Gunnar
 (drýgdum vér at vígi
 verk) dreyrunga serki
 Höfðu herði-lofðar
 hildar borðs und skildi
 (þvarr hangvölum hengi
 hungr), valfasta tungur.

Harðr vas gnýr, þás gørdum
 grjóttvarps lotu snarpa,
 gengu sverðs at sǫngvi
 sundr grá klæði Þundar,
 áðr á hæl til hvíldar
 (hlutu þeir bana fleiri,
 hjaldrs kom hrið á skjöldum),
 hækings víðir æki.

Heyri svan, þars sára

sigrstalls viðir falla,
 (benskári drekkur báru
 blóðfalls) of ná gjalla.
 Þar fekk örn (enn erni
 eru greipar hræjum sveipðar)
 sylg, er Sleitu-Helgi
 segðauðigr felt rauðu.

Báru upp af ára
 allpakklegum blakki
 ýtar oss at móti
 álmþin s sama hjálma;
 enn á braut til þeitis
 beiðendr goðum leiðir
 hliða, herðimeiddar,
 hauðrmens skarar rauðar.

Þeir Helgi létu út enn sama dag, ok týndust allir á Helgaskeri fyrir Skriðnesenni. Þorleifr varð græddr ok bjó at Brekku. Hásteinn fór utan ok fell á Orminum langa.

Nú eru rituð landnám flest í Vestfirðingafjórðungi, eftir því sem fróðir menn hafa sagt; má þat nú heyra, at þann fjórðung hefir margt stórmenni bygt, ok frá þeim eru margar göfigar ættir komnar, sem nú mátti heyra.

Þessir landnámsmenn eru göfgastir í Vestfirðinga fjórðungi: Hrosskell, Skalla-Grímr, Selþórir, Björn enn austœni, Þórólfr Mostrarskegg, Uðr djúpauðga, Geirmundr heljarskinn, Úlfr skjálgi, Þórðr Víkingsson, þótt langfeðri haldist stœrra í sumum ættum. Einn þá er bœndr

váru taldir á Íslandi, þá varu DCCCC bónda í þessum fjórðungi.

III.

Nú hefr upp landnám í Norðlendinga fjórðungi, er fjölbygðastr hefr verit af öllu Íslandi, ok stærstar sögur hafa gerzt bæði at fornu ok nýju, sem enn mun ritat verða ok raun berr á.

1. Eysteinn meinfretr, son Alfs ór Ostu, nam Hrútafjarðarströnd ena eystri, næst eftir Bálka, ok bjó þar nokkura vetr, áðr hann fekk Þórhildar, dóttur Þorsteins rauðs; þá réðst hann norðan í Dali ok bjó þar; þeira synir váru þeir Álfr í Döllum, Þórðr ok Þórólfr refr, ok Hrappr.

Þóroddr hét maðr, er land nam í Hrútafirði ok bjó á Þóroddsstöðum. Hans son var Arnórr hýnefr, er átti Gerði, dóttir Böðvars ór Böðvarshólum; þeira synir váru þeir Þorbjörn, er Grettir vá, ok Þóroddr drápustúfr, faðir Valgerðar, er átti Skeggi skammhöndungr Gamla-son, Þórðarsonar, Eyjólfssonar, Eyjarssonar, Þórólfssonar fasthalda frá Snæfjöllum. Son Skeggja skammhöndungs var Gamli, faðir Ásdísar, móður Odds munds.

Skútaðar-Skeggi hét maðr ágætr í Noregi; hans son var Björn, er kallaðr var Skinna-Björn, því at hann var Hólmgarðsfari; ok er honum leiddust kaupferðir, fór hann til Íslands ok nam Miðfjörð ok Linakradal; hans son var Miðfjarðar-Skeggi; hann var garpr mikill ok farmaðr; hann herjaði í Austrveg ok lá í Danmörk við Sjóland, er hann fór austan; þar gekk hann upp ok brauzt í haug Hrólf's kraka ok tók þar ór Sköfnung, sverð Hrólf's konungs, ok öxi Hjalta ok mikit fé annat, enn hann náði eigi Laufa. Skeggi bjó á Reykjum í Miðfirði ok átti *Hallberu Grímsdóttur*; þeira börn váru þau Eiðr, er átti Hafþóru dóttur Þorbergs kornamúla ok Álofar elliðaskjaldar, systur Þorgeirs gollnis; þau áttu mörg börn. Annarr son Skeggja var Kollr, faðir Halldórs, föður þeira Þórdisar, er Skáld-Helgi átti, ok Þorkötl. Dætr Skeggja váru þær Hróðný, er átti Þórðr gellir, ok Þorbjörg, er átti Asbjörn enn auðgi Harðarson; þeira dóttir var Ingibjörg, er átti Illugi enn svartu; þeira synir Gunnlaugr ormsunga, Hermundr ok Ketill. *Son Eiðs einn hét Þórhallr, faðir Eiðs föður Þórhalls, föður Oddnýjar, móður Geirlaugar, móður Snælaugar, móður Markúss á Melum.*

Haraldr hringr hét maðr ættstórr; hann kom skipi sínu í Vestrhóp, ok sat enn fyrsta vetr þar nær sem hann hafði lent ok nú heita Hringssaðir; hann nam Vatnsnes alt utan til

Ambáttarar fyrir vestan, enn fyrir austan inn til Þverár, ok þar yfir um þvert til Bjargaóss, ok alt þeim megin bjarga út til sjóvar, ok bjó at Hólum. Son hans var Þorbrandr, faðir Ásbrands, föður Sölva ens prúða á Ægissíðu, ok Þorgeirs, er bjó at Hólum; hans dóttir var Ástriðr, er átti Arnmóðr Heðinsson; Heðinn var son þeira. Önnur dóttir Þorgeirs var Þorgerðr, er átti Þorgrím, son Péturs frá Ósi.

Sóti hét maðr, er nam Vestrhóp ok bjó undir Sótafelli.

Hunda-Steinarr hét jarl á Englandi; hann átti Álofu dóttur Ragnars loðbrókar; þeira börn váru þau: Björn, faðir Auðunar skökuls, ok Eiríkr, faðir Sigurðar bjóðaskalla, ok Ísgerðr, er átti Þórir jarl á Vermalandi. Auðun skökull fór til Íslands ok nam Viðidal, ok bjó á Auðunarstöð-með *honum* kom út Þorgils gjallandi, félagi hans, faðir Þórarins goða. Auðun skökull var faðir Þóru mósháls, móður Úlfhildar, móður Astu, móður Óláfs konungs ena helga. Son Auðunar, skökuls var Ásgeir at Ásgeirsá; hann átti Jórinni, dóttur Ingimundar ens gamla; þeira börn váru þau Þorvaldr, faðir Döllu, móður Gizurar byskups, ok Auðun, faðir Ásgeirs, föður Auðunar, föður Egils, er átti Úlfeði, dóttur Eyjólfss Guðmundarsonar, ok var þeira son Eyjólf, er veginn var á alþingi, faðir Orms, kapalins Þorláks byskups. Annar son Auðunar skökuls var

Eysteinn faðir Þorsteins, föður Helga, föður Þórorms, föður Odds, föður Arnbjarnar, föður Sighvats prests. Dóttir Ásgeirs at Ásgeirsá var Þorbjörg bekkjarbót.

Ormr hét maðr, er nam Ormsdal ok bjó þar; hann var faðir Odds, föður Þórodds, föður Helga, föður Harra, föður Jóru, móður Þórdísar, móður Tanna, föður Skafta.

2. Ketill raumr hét hersir ágætr í Raumsdal í Noregi; hann var son Orms skeljamola, Hross-Bjarnarsonar, Raumssonar, Jötun-Bjarnarsonar norðan ór Noregi; Ketill átti Mjöll, dóttur Ánar bogsveigis. Þorsteinn hét son þeira; hann vá á skóginum til Upplanda af áeggjun föður síns Jökul, son Ingimundar jarls af Gautlandi; Jökull gaf honum lif; síðan fekk Þorsteinn Þórdísar systur hans. Þeira son var Ingimundr enn gamli; hann var fæddr í Hefni með Þóri, föður Gríms ok Hrómundar. Heiðr völvu spáði þeim öllum at byggja átti því landi, er þá var ófundit vestr í haf; enn Ingimundr kveðst við því skyldu gera; völvu sagði hann þat eigi mundu mega, ok sagði þat til jartegna, at þá mundi horfinn hlutr ór þússi hans, ok mundi finnast, er hann græfi fyrir öndvegissúlum sínum á landinu. Ingimundr var víkingr mikill, ok herjaði í vestrvíking jafnan. Sæmundr hét félagi hans, suðreyskr; þeir kvámu ór hernaði þann tíma er Haraldr konungr gekk

g. A
127

til lands ok lagði til orrustu í Hafsfirði við
 þá Þóri haklang; Ingimundr vildi veita konungi,
 enn Sæmundr eigi, ok skildi þar félag þeira.
 Eftir orrostuna gíffi konungr Ingimundi Vig-
 dís, dóttur Þóris jarls þegjanda; þau Jörundr
 háls váru frillubörn hans. Ingimundr undi hvergi;
 því fýsti Haraldr konungr hann at leita forlaga
 sinna til Íslands. Ingimundr lézt þat eigi ætlat
 hafa, enn þó sendi hann þá Finna tvá í hamför-
um til Íslands eftir hlut sínum; þat var Freyr ok
 gerr af silfri. Finnar kvámu aftr, ok höfðu
 fundit hlutinn ok náð eigi; visuðu þeir Ingi-
 mundi til í dal einum milli holta tveggja, ok
 sögðu Ingimundi alt landslag, hvé háttat var þar er
 hann skyldi byggja. Eftir þat byrjar Ingimundr
 för sína til Íslands, ok með honum Jörundr háls,
 mágr hans, ok Eyvindr sörkvir ok Ásmundr ok
 Hvati, vinir hans, ok þrælar hans: Friðmundr,
 Böðvarr, Þórir refskegg, Úlfkell. Þeir tóku fyrir
 sunnan land, ok váru allir um vetrinn á Hvann-
 eyri með Grími, fóstbróður Ingimundar; enn
 um vórit fóru þeir norðr um heiðar. Þeir kvámu
 í fjörð þann er þeir fundu ^{ham} hrúta tvá; þat köll-
 uða þeir Hrútafjörð; síðan fóru þeir norðr um
 heruð ok gáfu víða örnetni; hann var um vetr
 í Viðidal í Ingimundarholti; þeir sá þaðan fjöll
 snælaus í landsuðr, ok fóru þann veg um vórit;
 þar kendi Ingimundr lönd þau, er honum var
 til vísat. Þórdís, dóttir hans, var alin í Þórdís-

arholti. Ingimundr nam Vatnsdal allan upp frá Helgavatni ok Urðarvatni fyrir austan; hann bjó at Hofi, ok fann hlut sinn, þá er hann gróf fyrir öndvegissúlum sínum. Þorsteinn var son þeira Vigðisar ok Jökull ok Þórir hafrsþjó ok Högni. Smiðr hét ambáttar son ok Inginundar, enn dætr Jórunn ok Þórdís. 9. h. 127

3. Jörundr nam út frá Urðarvatni til Mógilslækjar, ok bjó á Grund undir Jörundarfelli; hans son var Már á Másstöðum. Hvati nam út frá Mógilslæk til Giljár, ok bjó á Hvatastöðum. Ásmundr nam út frá Helgavatni um Þingeyrasveit ok bjó undir Gnúpi. Friðmundr nam Forsæludal. Eyvindr sörkvir nam Blöndudal; hans son var Hermundr ok Hrómundr enn halti. Ingimundr fann beru ok ^{enla} húná tvá hvíta á Húnavatni; eftir þat fór hann utan ok gaf Haraldr konungi dýrin; ekki höfðu menn í Noregi áðr séð hvíta björnu. Þá gaf Haraldr konungr Ingimundi skip með viðarfarmi, ok silgdi hann tveim skipum fyrir norðan land fyrstr manna fyrir Skága, ok hélt upp í Húnavatn; þar er Stigandahróf hjá Þingeyrum. Eftir þat var Hrafn austmaðr með Ingimundi; hann hafði sverð gótt; þat bar hann í hof; því tók Ingimundr af honum sverðit. Hallormr ok Þórormr bræðr kvámu út ok váru með Ingimundi; þá fekk Hallormr Þórdísar dóttur hans, ok fylgðu henni Kornsárlönd; þeira son var Þorgrímr Kornsárgoði. Þór-

ormr bjó í Þórormstungu. Ingimundi hurfu svín
tiu, ok fundust annað haust í Svinadal, ok var
þá hundrað svina; göltr hét Beigaðr; hann hljóp
á Svinavatn ok svam þar til er af gengu klauf-
irnar; hann sprakk á Beigaðarhváli.

4. Hrolleifr enn mikli ok Ljót, móðir hans,
kvámu út í Boigarfjörð; þau fóru norðr um
sveitir ok fengu hvergi ráðstafa, áðr þau kvámu
í Skagafjörð til Sæmundar. Hrolleifr var son
Arnhallz, bróður Sæmundar; því vísaði hann þeim
norðr á Höfðaströnd til Þórðar, enn hann fekk
honum land í Hrolleifsdal, ok bjó hann þar.
Hrolleifr fíflði Hróðnýju, dóttur Una ór Unadal;
Oddr Unason sat fyrir honum ok vá Ljót systr-
ung hans, enn særði hann á fœti, því at kyrtill
hans bitu eigi járn. Hrolleifr vá Odd ok tvá
menn aðra, enn tveir kvámust undan; fyrir þat
gerði Höfða-Þórðr hann heraðssekan, svá vitt
sem vatnsföll deildi til sjóvar í Skagafirði;
þá sendi Sæmundr Hrolleif til Ingimundar ens
gamla; Ingimundr setti hann niðr í Oddsás gegnt
Hofi. Hann átti veiði í Vatnsdalsá við Ingi-
mund, ok skyldi hann ganga ór á fyrir Hofsmönnum,
enn hann vildi eigi ór ganga fyrir
sonum Ingimundar, ok börðust þeir um ána; þá
var sagt Ingimundi; hann var þá blindr, ok lét
hann smalasvein leiða hestinn undir sér á ána
milli þeira. Hrolleifr skaut spjóti í gegnum hann;
þeir fóru þá heim. Ingimundr sendi sveininn at

segja Hrolleifi, enn hann var dauður í öndvegi, þá er synir hans kvámu heim. Hrolleifr sagði móður sinni; hon hvað þá reyna mundu, hvárt meira mætti gifta Ingimundarsona eða kunnusta hennar, ok bað hann fyrst á braut fara. Þorsteinn skyldi reyna eftir Hrolleifi ok hafa kostgrip af arfi. Eigi settust Ingimundarsynir í hásæti föður síns; þeir fóru norður til Geirmundar, ok gaf Þorsteinn honum sex tigi silfrs til, at hann skyti Hrolleifi á braut; þeir röktu spor hans norðan um hálsa til Vatnsdals. Þorsteinn sendi húskarl sinn í Ás á njósn; hann kvað tólf visur, áður til dura var gengit, ok sá fatahrúgu á bröndum, ok kom undan rautt klæði; Þorsteinn kvað þar verit hafa Hrolleif: „ok mun Ljót hafa blótat til langlífis honum“. Þeir fóru í Ás, ok vildi Þorsteinn sitja fyrir dyrum, ok náði eigi fyrir Jökli, því at hann vildi þar vera. Maðr gekk út ok sást um; þá leiddi annarr Hrolleif eftir sér. Jökull brást við ok feldi ofan skiðahlaða, enn gat kastat kefli til bræðra sinna. Eftir þat rann hann á Hrolleif, ok ultu þeir ofan fyrir brekkuna, ok varð Jökull efri; þá kom Þorsteinn at, ok neyttu þeir þá vápna. Þá var Ljót út komin ok gekk öfig; hon hafði höfuðit milli fóta sér, enn klæðin á baki sér. Jökull hjó höfuðið af Hrolleifi, ok rak í andlit Ljótu; þá kvaðst hon of sein orðit hafa: „nú mundi æm snúast jörðin fyrir sjónum mínum, enn þér

mundut allir ærzt hafa“. Eftir þat kaus Þorsteinn Hofslund, enn Jökull hafði sverðit ok bjó í Tungu; Þórir hafði goðorð ok bjó at Undornfelli, ok gekk berserksgang; Högni hafði Stiganda, ok var formaðr; Smiðr bjó á Smiðsstöðum. Þorsteinn átti Þuriði gyðju, dóttur Sölmundar í Ásbjarnarnesi; þeira son var Ingólfr hinn fagri ok Guðbrandr. Jökull var son Bárðar Jökulssonar, ok Óláfr konungr hinn helgi lét drepa. Þat sagði Jökull stígamaðr, at lengi mundi glapvíg haldast í ætt þeiri. Þorgrímr bjó á Hjallalandi, Þeir synir Ingimundar ok Jörundarsynir börðust um Deildarhjalla, ok fell þar Högni ok leysingi Þorsteins, enn ór Más liði dótturson Jörundar ok fimm menn aðrir. Jökull hjó Þorgrím á þjó ok flýði á braut. Már galt átta tigi silfrs ok hafði Hjalla(land). Þeir Þorsteinn ok Jökull drápu Þórólf heljarskinn ok tvá menn aðra.

Þórólf sleggjá bjó á Sleggjustöðum, upp frá Helgavatni; hann elti á kaf Hallvarð, austmann Þorsteins, í fen fyri þeim bræðrum, ok banaði þeim báðum. Bergr enn rakki systurson Finnboga ens ramma frá Borg (kom út). Þorgrímr fekk dóttu Skíða af Skíðastöðum í Vatnsdal; þar sló Jökull Berg með sverðshjöltum at brúðlaupi; fyrir því skyldi Þorsteinn ganga undir jarðarmen þrjú á Húnavatns þingi, ok vildi eigi; þá skoraði Finnbogi á Þorstein til

hólmgöngu, enn Bergr á Jökul. Faxa-Brandr bjó fyrir ofan Hóla; hann fór til hólms með þeim Þorsteini í Viðidalsey; þar reisti Jökull nið Finn-boga. Gróa ok Þórey kómu út; Gróa bjó á Gróustöðum hjá Hofi; Þórey bjó í Vestrhópi at Þóreyjargnúpi; þá gerði Gróa haustboð Þorsteini ok þeim bræðrum; Þorstein dreymdi þrisvar, at hann skyldi eigi fara; þá hleypti Gróa skriðu á þá menn alla, er þar váru, af fjölkyngi. Þá hét Þorsteinn á þann, er sólina skapaði, at berserks-gangr hyrfi af Þóri, at hann fæddi upp Þorkel kröflu Þorgrímsson frá Kornsa, ok komst svá at goðorði. Ingólfr orti um Valgerði Óttarsdóttur mansöngsdrápu; þá sótti Óttarr Ingólf ok ónýttist þat. Þá andaðist Þórir, enn Óttarr réðst á braut. Guðbrandr bjó á Guðbrandsstöðum. Þórir varð sekr um konu; hann var flugumaðr til Ingólfs at ráði Óttars; hann hljóp til Guðbrands, enn Guðbrandr vá hann. Þá vildu þeir gera til Óttars ok náðu eigi. Óttarr galt fimm hundruð silfrs. Enn Svartr kom út á Minþakseyri ór Suðreyjum brotnu skipi; hann var flugumaðr (til Ingólfs ok Guðbrands). Hestar váru í dyngju. Ingólfr varaðist (enn Svartr vá) Guðbrand meðal sels ok vetrarhúsa; þar lá ok Svartr eftir á Svartsmýri; þá galt Óttarr þrjú hundruð silfrs. Þá fékk Ingólfr Hildar Ólafsdóttur frá Haukagili. Ingólfr vá tvá menn í einu höggi af Hellismönnum í seli í Miklagili, ok þrjá

menn aðra; þar fell förunautr hans, enn hann varð sárr mjök ok dó litlu síðar.

Porgils gjallandi bjó at Svinavatni, er út kom með Auðuni skökli, hans synir váru þeir Digr-Ormr, er vágú Skarphéðinn Vefreðarson á Vatns-skarði, ok Þorkell. Glæðir var bróðir hans enn systurson Guðmundar ens ríka. Þorkell (krafla) vá Þorkel frá Helgavatni at mannfundi at Kornsa, ellefu vetra gamall; síðan fór Þorkell utan, ok var með Sigurði Hlöðvéssyni. Þorkell Porgilsson fekk Hildar, dóttur Þórorms frá Þórormslungu; at því brúðlaupi vá Þorkell (krafla) Glæði. Hildir Hermundardóttir, Eyvindarsonar, fylgdi honum; hann falst í Kröfluhelli undir forsi í Vatnsdalsá. Þórdís spákona réð ráð til, at Þorkell skyldi ljósta sprota hennar í höfuð Guðmundi (ríka) at dómi, er Hegnöðr hét, ok mundi hann þá eigi at mæla, enn (þeir) tóku tvau hundruð silfrs. Þá tók Þorkell við Hofslandi ok goðorði, ok hafði meðan hann lifði; hann fekk Vigðisar, dóttur Óláfs frá Haukagili. Í þann tíma kom út Friðrekr biskup með Þorvaldi Koðránssyni, ok var at Giljá með þeim Ormi Koðránssyni feðgum; biskup var at haustboði at Óláfs, ok vígði biskup þar elda; þar váru ok berserkir tveir, ok hét Haukr hvárrlveggja; þeir váðu eldinn ok brunnu báðir, ok heitir þar síðan Haukagil; þá tók Þorkell skírn ok allir

Vatnsdælar. Hann lét kirkju gera at Hofi, ok veitti þar gröft öllum þingmönnum sínum.

5. Eyvindr auðkúla hét maðr; hann nam allan Svínadal ok bjó á Auðkúlustöðum; Þorbjörn kolka hét maðr; hann nam Kolkumýrar ok bjó þar maðan hann lifði.

Eyvindr sörkvir nam Blöndudal, sem fyrr er ritat; hans son var Hrómundr enn halti, er vá Högna Ingimundarson, þá er þeir Már ok Ingimundarsynir börðust um Deildarhjalla; því var hann gerr úr Norðlendinga fjórðungi. Hans synir váru þeir Hásteinn ok Þorbjörn, er börðust við Sleitu-Helga í Hrútafirði. Annar son Eyvindar var Hermundr, faðir Hildar, er átti Ávaldi Ingjaldsson; þeira börn váru þau Kolfinna, er átti Gríss Semingsson, ok Brandr, er vá Galta-Óttarsson á Húnavatnspingi fyrir nið Hallfreðar.

Ævarr hét maðr, son Ketils helluflaga ok Þuríðar, dóttur Haraldar konungs gullskeggs ór Sogni. Ævarr átti þeira son var Véfrøðr. Synir Ævars laungetnir váru þeir Karli ok Þorbjörn strjúgr ok Þórðr mikill. Ævarr fór til Íslands ór víkingi, ok synir hans aðrir enn Véfrøðr; með honum fór út Gunnsteinn, frændi hans, ok Auðólfr ok Gautr, enn Véfrøðr var fyrir víkingu; Ævarr kom skipi sínu í Blönduós; þá váru numin lönd fyrir vestan Blöndu. Ævarr fór upp með Blöndu at leita sér landnáms, enn er hann kom þar sem heita

Móbergsbrekkur, setti hann þar niðr stöng háva, ok kveðst þar taka Véfrœði syni sínum bústað. Síðan nam hann Langadal allan upp þaðan ok svá þar fyri norðan háls; þar skifti hann lönd-með skipverjum sínum. Ævarr bjó í Ævars-skarði. Véfrœðr kom út síðar í Gönguskarðs-árós ok gekk norðan til föður síns, ok kendi faðir hans hann eigi. Þeir glimdu, svá at upp gengu stokkar allir í húsinu, áðr Véfrœðr sagði til sín. Hann gerði bú at Móbergi, sem ætlat var, enn Þorhjörn strúgr á Strúgsstöðum, enn Gunnsteinn á Gunnsteinsstöðum, Karli á Karla-stöðum, Þórð á Mikilsstöðum, Auðólfr á Auð-ólfssöðum. Gautr bygði Gautsdal; hann var ein-hendr. Þeir Eyvindr sörkvir fóru sér sjálfir, ok vildu eigi lifa Ingimund enn gamla. Haukr bjó þar sem nú heita Hauksgrafir. Véfrœðr átti Gunnhildi, dóttur Eiríks ór Guðdölum, systur Hólmgöngu-Starra. Þeira synir váru þeir Úlf-heðinn, er þeir Þjóstólfr vágú við Grindarlæk, ok Skarphéðinn, er þeir Digr-Ormr vágú í Vatns-skarði, ok Húnrœðr, faðir Más, föður Hafliða. *Halldóra hét dóttir Húnrœðar, móðir Vigðísar, móður Úlfheðins, föður Rafns, föður Hallberu, móður Valdísar, móður Snorra, föður Hallberu, er átti Markús Þórðarson á Melum.*

Holti hét maðr, er nam Langadal ofan frá Móbergi, ok bjó á Holtastöðum; hann var faðir Isræðar, föður Ísleifs, föður Þorvalds, föður Þór-

killed
them
selves

arins ens spaka. Dóttir Þorvalds var Þórdís, er átti Halldórr, son Snorra goða. Þeira doetr varu þær Þorkatla, er átti Guðlaugr Þorfinns-son í Straumfirði; þaðan eru Sturlungar komnir ok Oddverjar. Önnur var Guðrún, er átti Kjartan Asgeirsson ór Vatnsfirði; þeira son Þorvaldr, faðir Ingiriðar, er Guðlaugr prestur átti.

*Fóstólfr ok Þjóstólfr bjoggu í Engihlíð í Langa-
dal; þeir tóku við sekum manni, þeim er Þor-
grímr hét; þann vágur þeir Húnrrøðr ok Þór-
ólfr leikgoði á Kili. Eftir þat vágur þeir Fóstólfr
ok Þjóstólfr Úlfheðin, bróður Húnrrøðar hjá
Grindalæk; þeir bjoggu þá í Holti, enn Finnur
Jörundarson á Beiðabólstaði í Vestrhópi, frændi
Fóstólfs, barg þeim, enn Þorkell krafla kom
þeim útan. Úlfheðinn leyndi sári sínu, ok bað
eigi til hefnda at leita, kvað engum auðit
mundu verða. Síðan vágur þeir Fóstólfr anstr
í Noregi Skúm, leysingja Húnrrøðar, vellauðg-
an at fé, enn sendu alt féit út Húnrrøði, ok
þá sættust þeir heilum sáttum.*

Hólmgöngu-Máni hét maðr, er nam Skaga-
strönd fyrir vestan inn til Fossár, enn fyrir
austan til Mánapúfu, ok bjó í Mánavík; hans
dóttur átti Þorbrandr í Dölum, faðir Mána, föð-
ur Kálfs skálds.

9. Eilífr örn hét maðr, son Atla Skiðasonar
ens gamla, Bárðarsonar í Ál. Son Eilífs arnar
var Konráð at Giljá ok Þjóðólfr goði at Hofi á

Skagaströnd, ok Eysteinn, faðir Þorvalds tinteins ok Þorsteins heiðmennings ok Arnar í Fljótum. Eilífr nam land inn frá Mánapúfu til Gönguskarðsár, ok Laxárdal, ok bjó þar. Eilífr átti Þorlaugu dóttur Sæmundar ór Hlíð; þeira synir voru þeir Sölmundr, faðir Guðmundar, föður þeira Víga-Barða ok bræðra hans; annarr var Atli enn rammi, er átti Herðisi, dóttur Þórðar frá Höfða; þeira börn voru þau Þorlaug, er átti Guðmundr enn ríki, ok Þórarinn, er átti Höllu, dóttur Jörundar háls; son þeira var Styrbörn, er átti Yngvildi, dóttur Steinrøðar Heðinssonar frá Heðinshöfða; þeira dóttir Arn-dis, er átti Hamall Þormóðarson, Þorkelssonar mána.

Sæmundr enn suðreyski, félagi Ingimundar ens gamla, sem ritat er, hann kom skipi sínu í Gönguskarðsárós. Sæmundr nam Sæmundarhlíð alla til Vatnsskarðs, fyrir ofan Sæmundarlæk, ok bjó á Sæmundarstöðum; hans son var Geirmundr, er þar bjó síðan. Dóttir Sæmundar var Reginleif, er átti Þóroddr hjálmr; þeira dóttir Hallbera, móðir Guðmundar ens ríka, föður Eyjólf, föður Þóreyjar, móður Sæmundar, föður Rjúpu, er átti Þorgeirr, son Þórðar frá Höfða; þeira son var Halldórr frá Hofi.

Skefill hét maðr, er skipi sínu kom í Gönguskarðsárós á enni sömu viku ok Sæmundr; enn

meðan Sæmundr fór eldi um landnám sitt, þá nam Skefill land alt fyrir utan Sauða; þat tók hann af landnámi Sæmundar at ólofi hans, ok lét Sæmundr þat svábúið vera.

Úlfjótr hét maðr; hann nam Langaholt alt fyrir neðan Sæmundarlæk.

Þorkell vignir, son Skíða ens gamla, hann nam land um Vatnsskarð alt ok Svartárdal; hans son var Arnmóðr skjálgi, faðir Galta, föður Þorgeirs, föður Styrmis, föður Halls, föður Kolfinnu.

Álfgeirr hét maðr, er nam um Ásgeirsvöllu ok upp til Mælifellsár, ok bjó á Álfgeirsvöllum.

Þórviðr hét maðr, sá er land nam upp frá Mælifellsá til Giljár.

Hrosskell hét maðr, er nam Svartárdal allan ok Ýrarfellslönd öll með ráði Eiríks; hann nam ofan til Gilhaga ok bjó at Ýrarfelli. Hann átti þræl þann, er Roðrekr hét; hann sendi hann upp eftir Mælifellsdal í landaleitan suðr á fjöll; hann kom til gils þess, er verðr suðr frá Mælifelli ok nú heitir Roðreksgil; þar setti hann niðr staf nýbirktan, er þeir kölluðu landkönnuð, ok eftir þat snýr hann atr.

7. Eiríkr hét maðr ágætr; hann fór af Norgegi til Íslands; hann var son Hróalds Geirmundarsonar, Eiríkssonar örðigskeggja. Eiríkr nam land frá Giljá um Goðdali alla ok ofan til

Norðrár; hann bjó að Hofi í Goðdölum. Eiríkr átti Þuríði, dóttur Þórðar skeggja, systur Helgu, er Ketilbjörn átti enn gamli at Mosfelli; börn þeira Eiríks váru þau Þorkell ok Hróaldr. Þorgeirr ok Hólmgöngu-Starri ok Gunnhildr. Þorgeirr Eiríksson átti Yngvildi Þorgeirsdóttur; þeira dóttir Rannveig, er átti Bjarni Brodd-Helgason. Gunnhildi Eiríksdóttur átti Véfrøðr Ævarsson.

Vékell enn hamrammi hét maðr, er land nam ofan frá Giljá til Mælifelsár, ok bjó at Mæli felli; hann spurði til ferða Röðreks; þá fór hann lítlu síðar suðr á fjöll í landaleitan; hann kom til hauga þeira, er nú heita Vékelshaugar; hann skaut milli hauganna ok hvarf þaðan aftr. Enn er þetta spurði Eiríkr í Goðdölum, sendi hann þræl sinn suðr á fjöll, er hét Røngöðr; fór hann enn í landaleit; hann kom suðr til Blöndukvísla, ok fór þá upp með á þeiri, er fellr fyrir vestan Hvinverjadal, ok vestr á hraunit milli Reykjavalla ok Kjalar, ok kom þar á manns spor, ok skildi, at þau lágu sunnan at; hann hlóð þar vörðu þá, er nú heitir Rang-aðarvarða; þaðan fór hann aftr, ok gaf Eiríkr honum frelsi fyrir ferð sína, ok þaðan af tók-
ust ferðir um fjallit milli Sunnlendinga ok Norð-
lendinga.

Kráku-Hreiðarr hét maðr, enn Ófeigr lafskegg faðir hans, son Öxna-Þóris; þeir feðgar bjoggu

skip sitt til Islands; enn er þeir kvámu í landsýn, gekk Hreiðar til siglu, ok sagðist eigi mundu kasta öndvegissúlum fyrir borð; kveðst þat þykkja ómerkilegt at gera ráð sitt eftir því; kveðst heldr mundu heita á Þór, at hann vísaði honum til landa, ok kveðst þar mundu berjast til landa, ef áðr væri numit. Enn hann kom í Skagafjörð ok sigldi upp á Borgarsand til brots; Hávarðr hegri kom til hans, ok bauð honum til sín, ok þar var hann um vetrinn í Hegranesi. Um várit spurði Hávarðr, hvat hann vildi ráða sinna, enn hann kveðst ætla at berjast við Sæmund til landa; enn Hávarðr latti þess, ok kvað þat illa gefizt hafa; bað hann fara á fund Eiriks í Goðdölum ok taka ráð af honum; „því at hann er vitrastr maðr í heraði þessu“. Hreiðarr gerði svá. Enn er hann fann Eirik, latti hann þessa ófriðar ok kvað þat óheyrð, at menn deildi, meðen svá væri mannfátt á landi; kveðst heldr vilja gefa honum tunguna alla niðr frá Skálamýri; kvað Þór þangat hafa vísat honum, ok þar stafn á horft, þá er hann sigldi upp Borgarsand; kvað honum ærit þat landnám ok hans sonum. Þenna kost þekkist Hreiðarr, ok bjó á Steinsstöðum; hann kaus at deyja í Mælifell. Son hans var Ófeigr þunnskeggr, faðir Bjarnar, föður Tungu-Steins.

8. Önundr viss hét maðr, er land nam upp frá Merkgigli enn eystra dal alt fyrir austan;

setju

enn þá er Eiríkr vildi til fara at nema dalinn allan alt fyrir vestan, þá feldi Önundr blótspán til at hann skyldi verða viss, hvern tíma Eiríkr mundi til fara at nema dalinn, ok varð þá Önundr skjótari, ok skaut yfir ána með tundröru ok helgaði sér svá landit fyrir vestan, ok bjó milli á.

Kári hét maðr, er nam land milli Norðrár ok Merkgils, ok bjó í Flatatungu; hann var kallaðr Tungu-Kári; frá honum eru Silfrstæðingar komnir.

Þorbrandr örrek nam upp frá Bólstaðará Silfrstaðahlið alla, ok Norðrárdal allan fyrir norðan ok bjó á Þorbrandsstöðum, ok lét þar gera eldhús svá mikit, at allir þeir menn, er þeim megin fóru, skyldu þar bera klyfjar í gegnum, ok vera öllum matr heimill; við hann er kend Örreksheiði upp frá Hökustöðum; hann var enn göfgasti maðr ok enn kynstærsti.

Maðr hét Hjálmólfr, er land nam um Blönduhlið; hans son var Þorgrímr kuggi, faðir Odds í Axlarhaga, föður Sela-Kálfs; þaðan eru Axlhegingar komnir.

Þórir dúfunef var leysingi Öxna-Þóris; hann kom skipi sínu í Gönguskarðsárós; þá var byggt herað alt fyrir vestan; hann fór norður yfir Jökulsá at Landbroti, ok nam land á milli Glóðafeykisár ok Djúpár, ok bjó á Flugumýri. Í þann tíma kom út skip í Kolbeinsárósi, hlaðit kvikfé,

enn þeim hvarf í Brimnesskógum unghryssi eitt; enn Þórir dúfunef keypti vonina ok fann síðan; þat var allra hrossa skjótast, ok var kölluð Fluga. Örn hét maðr; hann fór landshorna í millum, ok var fjölkunnigr; hann sat fyrir Þóri í Hvinverjadal, er hann skyldi fara suðr um Kjöl, ok veðjaði við Þóri hvárs þeira hross mundi skjótara, því at hann hafði allgóðan hest, ok lagði hvárr þeira við hundrað silfrs. Þeir riðu báðir suðr um Kjöl, þar til er þeir kvámu á skeið þat, er síðan var kallat Dúfunefs-skeið; enn eigi varð minni skjótleiksmunr hrossa enn Þórir kom í móti Erni á miðju skeiði. Örn undi svá illa við félát sitt, at hann vildi eigi lifa, ok fór upp undir fjallit, er nú heitir Arnarfell, ok týndi sér þar sjálfr, en Fluga stóð þar eftir, því at hon var mjök móð. Enn er Þórir fór af þingi, fann hann hest föxóttan ok grán hjá Flugu; við þeim hafði hon fengit; undir þeim var alinn Eiðfaxi, er utan var færðr ok var sjau manna bani við Mjørs á einum degi, ok lézt hann þar sjálfr. Fluga týndist í feni á Flugumýri.

Kollsveinn enn rammi hét maðr, er nam land á milli Þverár ok Gljúfrár, ok bjó á Kollsveinstöðum yfir frá Þverá; hann hafði blót á Hofstöðum.

9. Gunnólfur hét maðr, er nam land milli Þverár ok Glóðafeykisár, ok bjó í Hvammi.

Gormr hét hersir ágætr í Svíþjóð; hann átti

Þóru, dóttur Eiríks konungs at Uppsölum; Þorgils hét son þeira; hann átti Elinu, dóttur Burisláfs konungs ór Görðum austan ok Ingigerðar, systur Dagstyggis Risakonungs. Synir þeira váru þeir Hergrímr ok Herfinnr, er átti Höllu, dóttur Heðins ok Arndísar Heðinsdóttur. Gróa hét dóttir Herfinns ok Höllu; hana átti Hróarr; þeira son Slétu-Björn, er land nam fyrst á milli Grjótár ok Deildarár, áðr þeir Hjalti ok Kolbeinn kvámu út; hann bjó á Slétu-Bjarnarstöðum. Hann átti ; þeira börn váru Örnólfr, er átti Þorljótu dóttur Hjalta Skálpssonar, ok Arnbjörn, er átti Þorlaugu Þórðardóttur frá Höfða ok Arnoddr; hann átti Þórnyju, dóttur Sigmundar Þorkelssonar, er Glúmr vá. Arnfriðr hét dóttir Slétu-Bjarnar, er Spak-Böðvarr átti, son Öndotts. Öndottr kom út í Kolbeinsárósi, ok kaupir land at Slétu-Birni ofan frá Hálsgröf enum eystra megin ok út til Kolbeinsárós, *enn* enum vestra megin ofan frá læk þeim, er verðr út frá Nautabúi ok inn til Gljúfrár, ok bjó í Viðvík.

Sigmundur á Vestfold átti Ingibjörgu, dóttur Rauðs ruggu í Naumudal, systur Þorsteins svarfaðar; þeira son var Kolbeinn; hann fór til Íslands ok nam land á milli Grjótár ok Deildarár, Kolbeinsdal ok Hjaltadal.

Hjalti, son Þórðar skálps, kom til Íslands ok nam Hjaltadal at ráði Kolbeins, ok bjó at

Hofi; hans synir váru þeir Þorvaldr ok Þórðr, ágætir menn. Þat hefir erfi verit ágætast á Íslandi, er þeir erfðu föður sinn, ok váru þar MCC boðsmanna, ok váru allir virðingamenn með gjöfum brutt leiddir. At erfi færði Oddr Breiðfirðingr drápu, þá er hann hafði ort um Hjalta. Áðr hafði Glúmr Geirason stefnt Oddi til Þorska-fjarðarpings; þá fóru Hjaltasynir norðan skipi til Steingrímsfjarðar, ok gengu norðan um heiðina, þar sem nú er kölluð Hjaltdæla laut; enn er þeir gengu á þingit, váru þeir svá vel búnir, at menn hugðu, at Æsir væri komnir. Þar um er þetta kveðit:

Mangi hugði manna,
 morðkannaðir, annat,
 ísarnmeiðr enn Æsir
 almærir þar færi,
 þás á Þorskafjarðar
 þing með ennitinglum
 holtvartaris Hjalta
 harðfengs synir gengu.

Frá Hjaltasonum er mikil ætt komin ok göfig.

Þórðr hét maðr ágætr; hann var son Bjarnar byrðusmjörs, Hróaldssonar hryggs, Bjarnarsonar járnsíðu, Ragnarssonar loðbrókar; Þórðr fór til Íslands, ok nam Höfðaströnd í Skagafirði á milli Unadalsár ok Hrolleifsdalsár, ok bjó at Höfða. Þórðr átti Þorgerði, dóttur Þóris himu ok Friðgerðar, dóttur Kjarvals Írakonungs; þau áttu nitján börn. Björn var son þeira; hann átti

- Þuriði, dóttur Refs frá Barði, ok váru þeira börn Arnórr kerlingarnef ok Þórdís, móðir Orms, föður Þórdisar, móður Bótólfs, föður Þórdisar, móður Helgu, móður Guðnýjar, móður Sturlusona. Þorgeirr hét annar son Þórðar; hann átti Rjúpu, dóttur Arnhallz Sæmundarsonar; þeira son Halldórr at Hofi. Snorri var enn þriði; hann átti Þórhildi rjúpu, dóttur Þórðar gellis. Þeira son var Þórðr hesthöfði *faðir Karlsefnis, er fann Vinland hit góða, föður Bjarnar, föður Steinunnar, konu Þorsteins rangláts, föður Guðrúnar, móður Höllu, móður Flosa föður Valgerðar, móður herra Erlends sterka*. Þorvaldr holbarki var enn fjórði; hann kom um haust eitt á Þorvarðsstaði til Smiðkels, ok dvaldist þar um hrið; þá fór hann upp til hellisins Surts ok færði þar drápu, er hann hafði ort um jötuninn í hellinum. Síðan fekk hann dóttur Smiðkels, ok þeira dóttir var Jórunn, móðir Þorbrands í Skarfsnesi. Bárðr var enn fimti son Þórðar; hann átti Þórögnu, dóttur Þorodds hjálms; þeira son var Daði skáld. Söxólfr var enn sétti son Þórðar, sjaundi Þorgrímr, átti Hróarr, níundi Knörr, tiundi Þormóðr skalli, ellefti Steinn. Dóttir Þórðar var Þorlaug, er átti Arnbjörn Slétu-Bjarnarson; þeira dóttir Guðlaug, er átti Þorleikr Höskuldsson; þeira son Bolli. Herdis var önnur dóttir Þórðar; hana átti Atli enn rammi; Þorgríma skeiðarkinn var en þriðja,

fjórða Arnbjörn, fimta Arnleif, setta Ásgerðr, sjaunda Þuriðr, átta Friðgerðr í Hvammi. *Son Arnórs Björnssonar, Þórðarsonar var Eldjárn, faðir Halls, föður Ragnhildar, móður Rafns, föður Hallberu, móður Valdísar, móður Snorra, föður Hallberu, er átti Markús Þórðarson á Melum.*

Hrolleifr enn mikli bygði Hrolleifsdal, sem ritat er, áðr Þórðr gerði hann norðan fyrir víg Odds Unasonar; þá fór hann í Vatnsdal.

11. Friðleifr hét maðr, gauzkr at föðurkyni, enn Bryngerðr hét móðir hans, ok var hon flamsk; Friðleifr nam Sléttahlið alla ok Friðleifsdal milli Friðleifsdalsár ok Stafár, ok bjó í Holti; hans son var Þjóðarr, faðir Ara ok Bryngerðar, móður Tungu-Steins.

Flóki, son Vilgerðar Hörða-Káradóttur, fór til Íslands ok nam Flókadal milli Flókadalsár ok Reykjarhóls; hann bjó á Mói. Flóki átti Gró, systur Þórðar frá Höfða; þeira son var Oddleifr stafr, er bjó á Stafhóli ok deildi við Hjallasonu; dóttir Flóka var Þjóðgerðr, móðir Koðráns, föður Þjóðgerðar, móður Koðráns, föður Kárs í Vatnsdal.

Þórðr knappr hét maðr scenskr, son Bjarnar at Haugi; annar hét Nafar-Helgi; þeir fóru samskipa til Íslands, ok kvámu við Haganes. Þórðr nam land upp frá Stíflu til Tunguár ok bjó á Knappsstöðum; hann átti Æsu, dóttur Ljótólfs goða; þeira son var Hafr, er átti Þuriði,

dóttur Þorkels ór Goðdölum; þeira son var Þórarinn, faðir Ófeigs. Nafar-Helgi nam land fyrir austan, upp frá Haganesi til Flókadalsár fyrir neðan Barð ok upp til Tunguár, ok bjó á Grindli; hann átti Gró ena snarskygnu; þeira börn váru þau: Þórólfr ok Arnórr, er barðist við Friðleif á Stafhóli; ok Þorgerðr, er átti Geirmundr Sæmundarson; ok Úlfhildr, er átti Arnórr Skefils-son í Gönguskarði; þeira son var Þorgeirr ofláti, er vá Blót-Má at Móbergi. Þórunn blá-kinn var ein.

Bárðr Suðreyingr nam land upp frá Stiflu til Mjóvadalsár; hans son var Hallr mjódælingr, faðir Þuríðar, er átti Arnórr kerlingarnef.

Bruni enn hvíti hét maður ágætr, son Háreks Upplendinga jarls; hann fór til Íslands af fýsi sinni ok nam land á milli Mjóvadalsár ok Úlfsdala; hann bjó á Brunastöðum; hann átti Arnóru, dóttur Þorgeirs ens óða, Ljótólfs-sonar goða; þeira synir vár þeir Ketill ok Úlfheðinn ok Þórðr, er Barðverjar eru frá komnir.

Úlfr vikingr ok Óláfr bekkur fóru samskipa til Íslands. Úlfr nam Úlfsdali ok bjó þar. Óláfr bekkur var son Karls ór Bjarkey af Hálogalandi; hann vá Þóri enn svarta, ok varð fyrir þat útlægr. Óláfr nam alla dali fyrir vestan, ok Óláfsfjörð suman til móts við Þormóð, ok bjó at Kvíabekk; hans synir váru þeir Steinmóðr,

faðir Bjarnar, ok Grímólfr, ok Arnoddr, faðir Vilborgar, móður Karls ens rauða.

Þormóðr enn rammi hét maðr; hann vá Gyrð, móðurföður Skjálgs á Jaðri, ok varð fyrir þat landflótti ok fór til Íslands; hann kom skipi sínu í Siglufjörð ok sigldi inn at Þormóðseyri, ok kallaði af því Siglufjörð; hann nam Siglufjörð allan á milli Úlfsdala ok *Hvanndala*, ok bjó á Siglunesi; hann deildi um Hvanndali við Ólaf bekk, ok varð sextán manna bani, áðr þeir sættust, enn þá skyldi sitt sumar hvárr hafa. Þormóðr var son Haralds víkings, enn hann átti Arngerði, systur Skiða ór Skiðadal; þeira synir váru þeir Arngeirr enn hvassi, ok Narfi, faðir Þrándar, föður Hríseyjar-Narfa, ok Alrekr, er barðist í Sléttahlið við Knör Þórðarson.

Gunnólfr enn gamli, son Þorbjarnar þjóta ór Sogni, hann vá Végeir, föður Vebjarnar sygnakappa, ok fór síðan til Íslands; hann nam Ólafsfjörð fyrir austan upp til Reykjaár, ok út til Vámúla, ok bjó á Gunnólfsá. Hann átti Gró, dóttur Þorvarðs frá Urðum; þeira synir váru þeir Steinólfr, Þórir ok Þorgrímr.

12. Björn hét maðr ágætr á Gautlandi; hann var son Hrólfs frá Ám; hann átti Hlíf, dóttur Hrólfs Ingjaldssonar, Fróða sonar konungs; Eyvindr hét son þeira. Björð varð ósáttr um jörð við Sigfast, mág Sölvars Gautakonungs, ok brendi Björn hann inni með þrim tigum manna. Síð-

an fór Björn til Noregs með tólfta mann, ok tók við honum Grímr hersir, son Þorbjarnar sneypis, ok var hann með honum einn vetr; þá vildi Grímr drepa Björn til fjár; því fór Björn til Öndotts kráku, er bjó í Hvinisfirði á Ögðum, ok tók hann við honum. Björn var á sumrum í vestríking, enn á vetrum með Öndótti, þar til er Hlíf, kona hans, andaðist á Gautlandi; þá kom Eyvindr, son hans, austan, ok tók við herskipum föður síns; enn Björn fekk Helgu, systur Öndotts kráku, ok var þeira son Þrándr. Eyvindr fór þá í vestríking, ok hafði útgerðir fyrir Írlandi; hann fekk Raförtu, dóttur Kjarvals Írakonungs, ok staðfestist þar; því var hann kallaðr Eyvindr austmaðr. Þau Raförta áttu son þann, er Helgi hét; hann seldu þau til fóstrs í Suðreyjar; enn er þau kómu þar út tveim vetrum síðar, þá var hann sveltr, svá at þau kendu hann eigi; þau höfðu hann brutt með sér, ok kölluðu hann Helga enn magra. Hann var foeddr á Írlandi; enn er hann var roskinn gerðist hann virðingamaðr mikill; hann fekk þá Þórunnar hyrnu, dóttur Ketils flatnefs, ok átti þau mörg börn; Hrólfr ok Ingjaldr hétu synir þeira.

Helgi enn magri fór til Íslands með konu sína og börn; þar var ok með honum Hámundr heljarskinn, mágr hans, er átti Ingunni, dóttur Helga. Helgi var blandinn mjök í trú; hann trúði á Krist, enn hét á Þór til sjófara ok harð-

ræða. Þá er Helgi sá Ísland, gekk hann til fréttar við Þór, hvar land skyldi taka, enn fréttin vísaði honum norður um landit; þá spurði Hrólfur, son hans, hvárt Helgi mundi halda í Dumbshaf, ef Þórr vísaði honum þangat, því at skipverjum þótti mál ór hafi, er áliðit var mjöksumarit. Helgi tók land fyrir utan Hrísey, enn fyrir innan Svarfaðardal; hann var enn fyrsta vetr á Hámundarstöðum. Þeir fengu vetr mikinn. Um várit gekk Helgi upp á Sólarfjall, þá sá hann at svartara var miklu at sjá inn tilljarðarins, er þeir kölluðu Eyjafjörð af eyjum þeim, er þar lágu úti fyrir. Eftir þat bar Helgi á skip sitt alt þat, er hann átti; enn Hámundur bjó eftir. Helgi lendi þar við Galtarhamar; þar skaut hann á land svínum tveimr, ok hét göltrin Sölvi; þau fundust þremr vetrum síðar í Sölvadal, ok váru þá saman lxx svína. Helgi kannaði um sumarit herat alt, ok nam allan Eyjafjörð milli Sigluness ok Reynisness, ok gerði eld mikinn við hvern vatnsós ok helgaði sér svá alt herað. Hann sat þann vetr at Bíldsá, enn um várit færði Helgi bú sitt í Kristsnes, ok bjó þar meðan hann lifði. Í búføerslunni varð Þórunn léttari í Þórunnareyju í Eyjafjarðará; þar fœddi hún Þorbjörgu hólmasól. Helgi trúði á Krist ok kendi því við hann bústað sinn. Eftir þetta tóku menn at byggja í landnámi Helga at hans ráði.

13. Maðr hét Þorsteinn svarfaðr, son Rauðs ruggu í Numudal; hann átti Hildi, dóttur Þrá-ins svarta þurs. Þorsteinn fór til Íslands ok nam Svarfaðardal at ráði Helga. Börn hans váru þau Karl enn rauði, er bjó á Karlsá, ok Guðrún, er átti Hafþórr vikingr; þeira börn váru þau Klaufi ok Gróa, er átti Gríss gleðill. Atli illingr hét maðr; hann drap Hafþór, enn setti Karl í járn; þá kom Klaufi á óvart ok drap Atla, enn tók Karl ór jární. Klaufi átti Yngvildi rauðkinn, dóttur Ásgeirs rauðfeldar, systur þeira Óláfs völubrjóts ok Þorleifs; fyrir þeim hjó hann jafnabelg, er þeir tóku í landi hans. Þá kvað Þorleifr þetta:

Belg hjó fyr mér
 boggvir snöggvan,
 enn fyr Óláfi
 ál ok verju;
 svá skal verða,
 ef vér lifum,
 við bøl búinn
 boggvir höggvinn.

Þar af gerðist Svarfdœla saga.

Karl hét maðr [*Steinrøðarson*], er nam Srönd alla upp frá Upsum til Migandi.

Hámundr heljarskinn, son Hjörs konungs, miðlaði lönd við Örn, frænda sinn, þá er hann kom vestan, þann er numit hafði Arnarfjörð, ok bjó hann í Arnarnesi; hans dóttir var Iðunn, er átti Ásgeirr rauðfeldr. Son Arnar var Narfi,

er Narfasker eru við kend; hann átti Úlfeiði, dóttur Ingjalds ór Gnúpufelli; þeira synir váru þeir Ásbrandr, faðir Hellu-Narfa, ok Eyjólf, faðir Þorvalds í Haga, ok Helgi, faðir Gríms á Kálfskinni.

Galmi hét maðr, er nam Galmaströnd, á milli Þorvaldsdalsár ok Reistarár; hans son var Þorvaldr, faðir Orms, föður Barna-Þórodds, föður Þórunnar, móður Dýrfinnu, móður Þorsteins smíðs Skeggjasonar; Þorvaldi gaf Hámundr land milli Reistarár ok Hörgár, enn hann hafði áðr búið í Þorvaldsdal.

Geirleifr hét maðr; hann nam Hörgárdal upp til Myrkár; hann var Hrappsson ok bjó í Hagnum forna; hans son var Björn enn auðgi, er Auðbrekkumenn eru frá komnir.

14. Maðr hét Þórðr slítandi; hann nam Hörgárdal upp frá Myrká ok ofan til Dranga öðrum megin; hans son var Örnólf, er átti Yngvildi allrasystur; þeira synir váru þeir Þórðr ok Þorvarðr í Kristnesi, ok Steingrímur at Kroppi; Þórðr slítandi gaf Skólmi, frænda sínum, af landnámi sínu; hans son var Þórálfr enn sterki, er bjó at Myrká.

Þórir þursasprengir hét maðr; hann var fæddr í Ömd á Hálogalandi, ok varð missáttr við Hákon jarl Grjótgarðsson, ok fór af því til Íslands; hann nam Öxnadal allan, ok bjó at Vatnsá; hans son var Steinröðr enn rammi, er mörgum

manni vann bót, þeim er aðrir meinvættir gerðu meim. Geirhildr hét fjölkunnig kona ok meinsöm; þat sá ófreskir menn, at Steinröðr kom at henni óvarri, enn hon brá sér í nautsbelgs líki vatnsfulls. Steinröðr var járnsmiðr; hann hafði járngadd mikinn í hendi; um fund þeira er þetta kveðit:

Fork lætr æ sem orkar
atglamrandi hamra
á glotkylli gjalla
Geirhildar hví meira.
Járnstafr skapar ærna
(eru sollin rif trolli)
hár á Hjaltaeyri
hrið kerlingar síðu.

Dóttir Steinrøðar var Þorljót, er átti Þorvarðr í Kristnesi.

Auðólfur hét maðr; hann fór af Jaðri til Íslands ok nam Hörgárdal niðr frá Þverá til Bægisár, ok bjó at enni syðri Bægisá; hann átti Þórhildi, dóttur Helga ens magra; þeira dóttir var Yngvildr, er átti Þóroddr hjálmr, faðir Arnljóts, föður Halldórs, *föður Einars, föður Jórunnar, móður Halls, föður Gizurar, föður Þorvalds, föður Gizurar jarls.*

Eysteinn son Rauðúlfs Öxna-Þórissonar nam land niðr fra Bægisá til Kræklingahlíðar, ok bjó at Lóni; hans son var Gunnsteinn, er átti Hlíf, dóttur Heðins ór Mjólu; þeira börn váru.

þau Halldóra, er Víga-Glúmr átti, ok Þorgrímr ok Grímr eyrarleggr.

Eyvindr hani hét maðr gøfigr; hann kom út síð landnámatíðar; hann átti skip við Þorgrím Hlífaron; hann var frændi Öndottssona; þeir gátu honum land, ok bjó hann í Hanatúni, ok var kallaðr Túnhani; þar er nú kallat Marbœli. Hann átti Þornýju, dóttur Stórolfs Öxna-Þórissonar; hans son var Snorri Hliðmannagoði.

15. Öndottr kráka, er fyrr var getið, gerðist ríkr maðr; enn er Björn mágr hans andaðist, þá kallaði Grímr hersir konungi allan arf hans, er hann var útlendr, enn synir hans váru fyrir vestan haf. Öndottr hélt fénu til handa Þrándi systursyni sínum; enn er Þrándr frá andlát föður síns, þá sigldi hann ór Suðreyjum svá mikla sigling, at fyrir þat var hann kallaðr Þrándr mjöksiglandi. Enn er bann hafði við erfð tekit, þá fór hann til Íslands ok nam fyrir sunnan land, sem enn mun sagt verða; enn fyrir þá sök vá Grímr Öndott, er hann náði eigi fénu í konungs trausti; enn á enni sömu nótt bar Signý, kona Öndotts, á skip alt lausafé sitt, ok fór með sonu þeira, Ásgrím ok Ásmund, til Sighvats föður síns, enn sendi sonu sína til Heðins fóstara síns í Sóknadal, enn þeir undu þar eigi, ok vildu fara til móður sinnar, ok kvámu at jólum til Ingjalds tryggva í Hvini; hann tók við þeim af áeggjun Gyðu konu sinn-

ar. Um sumarit eftir gerði Grímr hersir veizlu Auðuni, jarli Haralds konungs, enn þá nótt er ölhlita var at Gríms, brendu Öndottssynir hann inni, ok tóku síðan bát Ingjalds, föstra síns, ok røru á braut. Auðun kom til veizlu sem ætlat var, ok misti þar vinar í stað; þá kvámu Öndottssynir þar snemma um morguninn at svefnbúri því, er Auðun lá í, ok skutu stokki á hurð. Ásmundr varðveitti húskarla jarls tvá, enn Ásgrímr setti spjótsodd fyrir brjóst jarli, ok bað hann reiða föðurgjald; hann seldi fram þrjá gullhringa ok guðvefjarskikkju, enn Ásgrímr gaf jarli nafn ok kallaði Auðun geit. Síðað fóru þeir í Súrnadal til Eiríks ölfuss, lends manns, ok tók hann við þeim; þar bjó Hallsteinn hestr, annarr lendr maðr, ok höfðu þeir jóladrykkju saman, ok veitti Eiríkr fyrr vel ok trúlega, enn Hallsteinn veitti síðar óvingjarnlega; hann laust Eirík með dýrshorni; fór Eiríkr þá heim, enn Hallsteinn sat eftir með húskarla sína; þá gekk Ásgrímr inn einn, ok veitti Hallsteini mikit sár, enn þeir þóttust veita Ásgrími bana, enn hann komst út ok til skógar, ok græddi kona hann í jarðhúsi, svá at hann varð heill. Þat sumar fór Ásmundr til Íslands, ok hugði Ásgrím bróður sinn dauðan. Helgi enn magri gaf Ásmundi Kræklingahlið, ok bjó (hann) at Glerá enni syðri; enn þá er Ásgrímr varð heill, gaf Eiríkr honum langskip, ok herj-

aði hann vestr um haf, enn Hallsteinn dó ór sárum. Enn er Ásgrímur kom ór hernaði, gifti Eiríkur honum Geirhildi dóttur sína; þá fór Ásgrímur til Íslands; hann bjó at Glerá enni nørðri. Haraldur konungur sendi Þorgeir enn hvinverska til Íslands at drepa Ásgrím; hann var of vetr á Kili í Hvinverjadal, ok kom engu fram um hefndina. Sonur Ásgríms var Elliða-Grímur, föður Ásgríms ok Sigfúss, föður Þorgerðar, móður Gríms, föður Svertings, föður Vigðisar, móður Sturlu í Hvammi.

16. Helgi enn magri gaf Hámundi, mági sínum, land milli Merkigils ok Skjálgdalsár, ok bjó hann á Espihóli enum syðra; hans son var Þórir, er þar bjó síðan; hann átti Þórdísi Kaðalsdóttur; þeira son var Þórarinn á Espihóli enum nyrðra, ok Þorvaldur krókr á Grund, enn Þergrímur í Möðrufelli var eigi hennar son; Vigðís var dóttir þeira.

Helgi gaf Þóru, dóttur sína, Gunnari, syni Úlfjós, er lög hafði út, ok land upp frá Skjálgdalsá til Háls; hann bjó í Djúpadal; þeira börn váru þau Þorsteinn, Ketill ok Steinmóðr, enn dóttir Yngvildr ok Þórlaug.

Helgi gaf Auðuni rotni, syni Þórólfs smjørs, Þorsteins sonar skrofa, Gríms sonar kambans, Helgu dóttur sína, ok land upp frá Hálsi til Villingadals; hann bjó í Saurbæ. Þeira börn váru þau Einarr, faðir Eyjólf Valgerðarsonar,

ok Vigdús, móðir Halla ens hvíta, föður Orms, föður Gellis, föður Orms, föður Halla, föður Þorgeirs, föður Þorvarðs ok Ara, föður Guðmundar biskups. *Einarr Auðunarson átti Valgerði Rúnólfsdóttur; þeira son Eyjólfr, (er) átti Hallberu Þórodds dóttur hjálms, ok bjoggu þau á Jörunnarstöðum langa ævi, enn síðan á Möðruvöllum. Hallfríðr var dóttir Einars Eyjólfssonar, móðir Halldórs, föður Snorra, föður Guðrúnar, móður Hreins ábóta, föður Valdisar, móður Snorra, föður Hallberu, er átti Markús Þórðarson. Vigfúss Víga-Glúms-son vá Bárð, son Halla ens hvíta, ok er um hann ort Bárðardrápa, er þetta er stef í:*

*Bároðr of rístr báru
brautland varar andri,*

Enn Brúsi, bróðir Bárðar ok Orms, orti vísu þessa, þá er Glúmr stökk af þinginu;

*Höfum vér vegs af vígum
— veit ek orð á því — borða-
stóðs við stýrimeida
stafns, göndul, klut jafnan;
þó hygg fúrviðu fóru
fleygarðs enn mik varði
beiðihlökk fyr brekku
bliks harðara miklu.*

Hámundr heljarskinn fekk Helgu Helgadóttur eftir andlát Ingunnar, systur hennar, ok var þeira dóttir Yngvildr, er kölluð var allrasystir, er Örnólfr átti.

Helgi gaf Hrólfi, syni sínum, öll lönd fyrir austan Eyjafjarðará, frá Arnarhváli upp, ok bjó hann í Gnúpufelli, ok reisti þar hof mikit; hann átti Þórðrnu, dóttur Þrándar mjóbeins; þeira börn váru þau Hafliði enn örvi ok Valþjófr, Viðarr, Grani ok Böðvarr, Ingjaldr ok Eyvindr, enn dóttir Guðlaug, er Þorkell enn svartí átti. Valþjófr var faðir Helga, föður Þóris, föður Arnórs, föður Þuriðar, móður Þórdísar, móður Vigdísar, móður Sturlu í Hvammi.

Helgi enn magri gaf Ingjaldi, syni sínum, land út frá Arnarhváli til Þverár ennar ytri; hann bjó á Þverá enni efri, ok reisti þar hof mikit; hann átti Salgerði Steinólfsdóttur; þeira son Eyjólf, faðir Víga-Glúms, ok Steinólfr, faðir Þórarins illa ok Arnórs ens góða, Rauðæings. Víga-Glúmr var faðir Más, föður Þorköllu, móður Þórðar, föður Sturlu.

Helgi gaf Hlíf, dóttur sína, Þorgeiri, syni Þórðar bjálka, ok land út frá Þverá til Varðgjár; þau bjoggu at Fiskilæk; börn þeira Þórðr ok Helga.

Skagi Skoftason hét maðr ágætr á Mæri; hann varð ósátt við Eysteín glumru ok fór af því til Íslands; hann nam at ráði Helga Eyjafjarðarströnd ena eystri, út frá Varðgjá til Fújoskaldsár, ok bjó í Siglúvík; hans son var Þorbjörn, faðir Heðins ens milda, er Svalbarð lét

gera sextán vetrum fyrir kristni; hann átti Ragnheiði dóttur Eyjólfss Valgerðarsonar.

17. Þórir snepill hét maðr, son Ketils brimils; hann bjóst til Íslandsfarar; Gautr hét skipveri hans; enn er þeir lágu til hafs, kvámu at þeim víkingar ok vildu ræna þá, enn Gautr laust stafnbúann þeira með hjálmunveli, ok lögðu víkingar við þat frá; síðan var hann kallaðr Hjálmun-Gautr. Þeir Þórir fóru til Íslands, ok kvámu skipi sínu í Skjálfandafljótsós. Þórir nam Kaldakinn á milli Skuggabjarga ok Ljósavatnsskarðs; hann nam þar eigi yndi ok fór á braut; þá hvað hann þetta:

Hér liggr, kjóla keyrir,
Kaldakinn of aldr,
enn vér höldum heilir
Hjálmun-Gautr á braut.

Þórir nam síðan Hnjóskadal allan til Ódeilu, ok bjó at Lundi; hann blótaði lundinn. Hans son var Ormr töskubak, faðir Hlenna ens gamla, ok Þorkell svartí í Hleiðargarði; hann átti Guðlaugn Hrólfsdóltur; þeira synir Öngull enn svartí, ok Hrafn, faðir Þórðar at Stokkahlöðum, ok Guðríðr, er átti Þorgeirr goði at Ljósavatni.

Pengill mjöksiglandi fór af Hálogalandi til Íslands; hann nam land at ráði Helga út frá Hnjóská til Grenivíkr; hann bjó í Höfða; hans synir váru þeir Vémundr, faðir Ásólfss í Höfða

ok Hallsteinn, er þetta kvað, þá er hann sigldi af hafi ok frá andlát föður síns:

Drúpir Höfði,
dauðr er Þengill,
hlæja hliðir.
við Hallsteini

Þormóðr hét maðr, er nam Grenivik ok Hval-látr, ok Strönd alla út til Þorgeirsfjarðar; hans son var Snörtr, er Snertlingar eru frá komnir.

Þorgeirr hét maðr, er nam Þorgeirsfjörð ok Hvalvatnsfjörð.

Loðinn öngull hét maðr; hann var föddr Öi Öngley á Hálogalandi; hann fór fyrir ofriki Há-konar jarls Grjótgarðssonar til Íslands, ok dó li hafi; enn Eyvindr son hans nam Flateyjardal upp til Gunnsteina, ok blótaði þá; þar liggur Ó-deila á milli ok landnáms Þórir snepils. Ásbjörn dettiáss var son Eyvindar, faðir Finnboga ens ramma, föður *Narfa*, föður *Yngvildar*, móður *Jódisar*, móður *Höllu*, móður *Þorgils*, föður *Geirnýjar*, móður *Valgerðar*, móður *Helgu*, er átti *Snorri Markússon á Melum*.

18 Bárðr, son Heyjangrs-Bjarnar, kom skipi sínu í Skjálfandafljótsós, ok nam Bárðardal allan upp frá Kálfborgará ok Eyjardalsá, ok bjó at Lundarbrekku um hrið; þá markaði hann at veðrum, at landviðri váru betri enn hafviðri, ok ætlaði af því betri lönd fyrir sunnan heiði. Hann

sendi sonu sína suðr um góí. Þá fundu þeir góbeitla ok annan gróðr; enn annat vár eftir þá gerði Bárðr kjálka hverju kykvendi, því er gengt var, ok lét hvat draga sitt fóðr ok fjárlut; hann fór Vonarskarð, þar er síðan heitir Bárðargata; hann nam síðan Fljótshverfi, ok bjó at Gnúpum; þá var hann kallaðr Gnúpa-Bárðr. Hann átti mörg börn; hans son var Sigmundr, faðir Þorsteins, er átti Æsu, dóttur Hrólfs rauðskeggs; þeira dóttir var Þórunn, er átti Þorkell leifr, ok var þeira son Þorgeirr goði at Ljósavatni. Annarr son Bárðar var Þorsteinn, faðir Þóris, er var á Fitjum með Hákonu konungi, ok skar rauf á oxahúð, ok hafði þá hlíf; því var hann Leðrháls kallaðr; hann átti Fjörleifu Eyvindardóttur; þeira synir váru þeir Hávarðr í Fellsmúla, Herjólftr at Mývatni, Ketill í Húsavík, Vémundr kögr, er átti Halldóru, dóttur Þorkels svarta, ok Áskell ok Háls; hann bjó á Helgastöðum.

Kampa-Grímr fór ór Suðreyjum til Islands, ok velkti þá úti allt sumar, ok braut skip sitt við Skjálfandafljótsós; hann nam Kaldakinn í annat sinn ok seldi ýmsum mönnum síðan; hans dóttir var Arnbjörg, er Ásólfr í Höfða átti.

Þorfiðr máni hét maðr, son Áskels torfa; hann nam land fyrir neðan Eyjardalsá til Landamóts, ok sumt um Ljósavatnsskarð, ok bjó at Öxará.

Þórir, son Gríms gráfeldarmúla af Rogalandi,

nam um Ljósavatnsskarð; hans son var Þorkell leifr enn hávi, faðir Þorgeirs goða. Þorgeirr átti fyrst Guðriði, dóttur Þorkels svarta; þeira synir Þorkell hákr ok Höskuldr, Tjörfi, Kolgrímr, Þorsteinn ok Þorvarðr, enn dóttir Sigríðr. Síðan átti hann Álfgerði, dóttur Arngeirs ens aust-ræna; Þorgeirr átti ok Þorkötl, dóttur Dala-Kolls; synir hans ok þeira kvenna váru þeir Þorgrímr, Þorgils, Óttarr; þessir váru laungetnir: Þorgrímr ok Finni enn draumspaki; hans móðir hét Lecný, útlend.

Heðinn ok Höskuldr, synir Þorsteins þurs, fóru til Íslands ok námu fyrir innan Tunguheiði, Heðinn bjó at Heðinshöfða ok átti Guðrúnu; þeira dóttir var Arnriðr, er Ketill Fjörleifarson átti; Guðrún var dóttir þeira, er Hrólfr átti [*í Gnúpu-felli.*] Höskuldr nam lönd öll fyrir austan Laxá ok bjó í Skörðuvík; við hann er kent Höskuld-arvatn, því at hann druknaði þar. Í þeira landnámi er Húsavík, er Garðarr hafði vetrsetu. Son Höskulds var Hróaldr, er átti Ægileifu, dóttur Hrólfs Helgasonar.

19. Vestmaðr ok Úlfr fóstbræðr fóru einu skipi til Íslands; þeir námu Reykjadal allan fyrir vestan Laxá upp til Vestmannsvatns. Vestmaðr átti Guðlaugu. Úlfr bjó undir Skrattafelli; hann átti ; þeira son Geirólfr, er átti Vígdísi Konálsdóttur síðar enn Þorgrímr; þeira son Hallr.

Þorsteinn höfði hét maðr; hann var hersir á Hörðalandi; hans synir váru þeir Eyvindr ok Ketill hörðski. Eyvindr fýstist til Íslands eftir andlát föður síns, enn Ketill bað hann nema báðum þeim land, ef honum sýndist síðar at fara. Eyvindr kom í Húsavík skipi sínu, ok nam Reykjadal upp frá Vestmannsvatni; hann bjó at Helgastöðum ok er þar heygðr. Náttfari er með Garðari hafði út farit, eignaði sér áðr Reykjadal, ok hafði merkt á viðum, enn Eyvindr rak hann á braut ok lét hann hafa Náttfaravík. Ketill fór út at orðsendingu Eyvindar; hann bjó á Einarsstöðum; hans son var Konáll ok Þorsteinn, faðir Einars, er þar bjó síðan. Sonr Eyvindr var Áskell goði, er átti dóttur Grenjaðar; þeira synir Þorsteinn ok Víga-Skúta. Dóttir Eyvindar var Fjörleif. Konáll átti Oddnýju Einarsdóttur, systur Eyjólf's Valgerðarsonar; þeira börn váru þau Einarr, er átti sex sonu, ok dóttur Þóreyju, er átti Steinólfr Másson, ok önnur Eydis, er Þorsteinn goði átti ór Ásbjarnarvík. Þórðr Konálsson var faðir Sokka á Breiðamýri, föður Konáls. Dóttir Konáls var Vigdis, er átti Þorgrímr, son Þorbjarnar skaga, ok var þeira son Þorleifr Geirólfsstjúpr.

Grenjaðr hét maðr, Hrappsson, bróðir Geirleifs; hann nam Þegjandadal ok Kraunaheiði, Þorgerðarfell ok Laxárdal neðan; *hann bjó á Grenjaðarstöðum*; hann átti Þorgerði, dóttur Helga

hests; þeira son var Þorgils vāmúli, faðir Önundar, föður Hallberu, móður Halldóru, móður Þorgerðar, móður Halls ábóta, ok Hallberu, er átti Hreinn Styrmisson.

Böðólfr hét maðr, son Gríms Grímólfssonar af Ögðum, bróður Böðmóðs; hann átti Þórunni, dóttur Þórólfs ens fróða; þeira son var Skeggi. Þau fóru öll til Íslands, ok brutu skip sitt við Tjörnes, ok vörn at Auðólfsstöðum enn fyrsta vetr; hann nam Tjörnes alt á milli Tunguár ok Óss. Böðólfr átti síðar Þorbjörgu hólmasól, dóttur Magr-Helga; þeira dóttir var Þorgerðr, er átti Ásmundr Öndottsson; *þeira son Þorleifr, faðir Þuríðar, er átti Valla-Ljótr.*

Skeggi Böðólfsson nam Kelduhverfi upp til Kelduness, ok bjó í Miklagarði; hann átti Helgu, dóttur Þorgeirs at Fiskilæk; þeira son var Þórir farmaðr; hann lét gera knör í Sogni; þann vígði Sigurðr biskup; af þeim knerri eru brandar veðrspáir fyrir durum í Miklagarði. Um Þóri orti Grettir þetta:

Ríðk-at ek rækimeidum
 randar hóts á móti
 (sköpuð er þessum þegni
 þraut); ferr ek enn á brautu.
 Vil-k-at ek Viðris báлка
 vinnendr spaka finna
 (ek man þér eigi þykja
 ørr); leitak mér fœra.

Hnekkik frá þar er flokkar

fara Þóris mjök stórir;
er-a mér í þys þeira
þerfilegt at hverfa.
Förðumk frægra virða
fund, á eg veg til lundar
(verð ek Heimdala at hirða
hjör); björgum svá fjörvi.

*Án hét son Þóris, faðir Arnar, föður Ingi-
 bjargar, móður Skúms, föður Þorkels ábóta.*

20. Máni hét maðr, hann var fœddr í Ömð á Hálogalandi; hann fór til Íslands ok braut við Tjörnes, ok bjó at Máná nokkura vetr; síðan hrak Böðólfr hann á braut þaðan, ok nam hann þá fyrir nefan Kálfborgará; milli Fljóts ok Rauðaskriðu, ok bjó at Mánafelli; hans son var Ketill er átti Valdísi Þorbrandsdóttur, er keypti Rauðaskriðulönd at Mána; hans dóttir var Dalla, systir Þorgeirs Galtasonar; hana átti Þorvaldr Hjaltason.

Ljótr ópveginn hét maðr, er nam Kelduhverfi upp frá Keldunesi; hans son var Griss, faðir Galta í Ási; hann var vitr maðr ok vígamaðr mikill.

Önundr nam Kelduhverfi frá Keldunesi, ok bjó í Ási; hann var son Blæings Sótasonar, bróðir Bálda í Hrutafiði. Dóttir Önundar var Þorbjörg, er átti Hallgils Þorbrandsson ór Rauðaskriðu.

Þorsteinn, son Sigmundar Gnúpa-Bárðarsonar, bjó fyrst at Mývatni; hans svo var Þorgrímr,

faðir Arnórs í Reykjahlíð, er átti Þorkötu, dóttur Böðvars Hólfssonar ór Gnúpufelli; Böðvarr var son þeira.

Þorkell enn hávi kom ungr til Íslands, ok bjó fyrst at Grœnavatni, er gengr af Mývatni. Sigmundr hét son hans; hann átti Vigdís, dóttur Þóris af Espihóli; hann vá Glúmr á akrinum. Dóttir Þorkels var Arndís, er átti Vigfúss, bróðir Víga-Glúms. Þorkell gat son í elli sinni; þá hét Dagr; hann var faðir Þórarins, er átti Yngvildi, dóttur Halls af Síðu, síðar enn Eyjólfrenn halti.

Geiri hét maðr norrœnn, er fyrstr bjó fyrir sunnan Mývatn á Geirastöðum; hans son var Glúmr ok Þorkell. Þeir feðgar börðust við Þorberg höggvinkinna ok feldu Þorstein son hans; fyrir þau víg váru þeir gerðir norðan ór sveitum. Geiri sat um vetr á Geirastöðum við Húnavatn; síðan fóru þeir í Breiðafjörð, ok bjoggu í Geiradal í Króksfirði. Glúmr fekk Ingunnar, dóttur Þórólfs Véleifssonar; þeira börn váru þau Þórðr, er átti Guðrúnu Ósvífrsdóttur, ok Þorgerðr, er átti Þórarinn Ingjaldsson; þeira son Helgu-Steinarr.

Torf-Einarr jarl gat dóttur í æsku; sú hét Þórdís; hana fœddi Rögnvaldr jarl, ok gifti hana Þeirgeiri klaufa; þeira son var Einarr; hann fór til Orkneyja at finna frændr sína; þeir vildu eigi taka við frændsemi hans; þá kaupir Ein-

arr í skipi með bræðrum tveimr, Vestmanni ok Vémundi; þeir fóru til Íslands ok sigldu fyrir norðan landit, ok vestr um Sléttu í fjörðinn; þeir settu öxi í Reistargnúp ok kölluðu því Öxarfjörð; þeir settu örn upp fyrir vestan, ok kölluðu þar Arnarpúfu; enn í þriðja stað settu þeir kross; þar nefndu þeir Krossás; svá helguðu þeir sér allan Öxarfjörð. Börn Einars váru þau Eyólfr, er Galti Grisson vá, ok Ljót, móðir Hróaens skarpa, er hefndi Eyjólf ok vá Gatta. Synir Glíru-Halla, Brandr ok Bergr, váru dóttursynir Ljótar; þeir fellu í Böðvarsdal.

Reistr, son Bjarneyja-Ketils ok Hildar, systur Ketils pistils, faðir Arnsteins goða, hann nam land á milli Reistargnúps ok Rauðagnúps ok bjó í Leirhöfn.

Arngeirr hét maðr, er nam Sléttu alla milli Hávararlóns ok Sveinungsvíkr; hans börn váru þau Þorgils ok Oddr ok Þuríðr, er Steinólfr í Þjórsárdal átti. Þeir Arngeir ok Þorgils gengu heiman í fjúki at leita fjár, ok kvámu eigi heim; Oddr fór at leita þeira ok fann þá báða örenda, ok hafði hvítabjörn drepit þá, ok lá þá á pasti, er hann kom at. Oddr drap björninn ok færði heim, ok segja menn, at hann æti allan, ok kallaðist þá hefna föður síns, er hann drap björninn, enn þá bróður síns, er hann át hann. Oddr var síðan illr ok ódæll við at eiga; hann var hamrammr svá mjök, at hann gekk heiman ór

Hraunhöfn um kveldit, enn kom um morguninn eftir í Þjórárdal til liðs við systur sína, er Þjórdsöelir vildu berja grjóti í hel.

Sveinungr nam Sveinungsvík, enn Kolli Kollavík ok bjó þar hvárr sem við er kent síðan.

Ketill þistill nam Þistilsfjörð, milli Hundsness ok Sauðaness; hans son var Sigmundr, faðir Laugarbrekku-Einars.

Nú eru rituð landnám í Norðlendinga fjórðungi, ok eru þessir þar ágætastir landnámsmenn: Auðun skökull, Ingimundr, Ævarr, Sæmundr, Eiríkr í Goðdölum, Höfða-Þórðr, Helgi enn magri, Eyvindr Þorsteins son höfða; enn þar váru MCC bónda þá er talit var.

IV.

Þessir menn hafa land numit í Austfirðingafjórðungi, er nú munu upp taldir, ok ferra hvat af hendi norðan til fjórðungamóts, frá Langanesi á Sólheimasand, ok er þat sögn manna, at þessi fjórðungr hafi fyrst albygðr orðit.

1. Gunnólfr kroppa hét maðr, son Þóris hauknefs, hersis; hann nam Gunnólfsvík ok Gunnólfsfell ok Langanes alt fyrir utan Helkunduheiði, ok bjó í Fagravík; hans son var Skúli herkja, faðir Geirlaugar.

Finni hét maðr, er nam Finnafjörð ok Viðfjörð; hans son var Þórarinn, faðir Sigurðar, föður Glíru-Halla.

*Þorsteins
hvíta
saga
Vápnfjörðinn
saga*

Hróðgeirr enn hvíti Hrapsson nam Sandvík fyrir norðan Digranes, alt til Viðfjarðar, ok bjó á Skeggjastöðum; hans dóttir var Ingibjörg, er átti Þorsteinn enn hvíti; *hon var móðir Þorgils,* föður Helga, föður Bjarnar, föður Yngvildar, móður Ámunda, föður Guðrúnar, móður Þórdísar, móður Helgu, móður Þórðar prests, föður Markúss á Melum. Alrekr var bróðir Hróðgeirs, er út kom með honum; hann var faðir Ljótólfs goða í Svarfaðardal.

Eyvindr vápni ok Refr enn rauði, synir Þorsteins þjokkubeins, bjoggust til Íslands af Strind ór Þrándheimi, því at þeir urðu missáttir við Harald konung ok hafði sitt skipit hvárr þeira. Refr varð aftreka, ok lét konung drepa hann, enn Eyvindr kom í Vápnafjörð ok nam fjörðinn allan frá Vestradalsá, ok bjó í Krossavík enni iðri; hans son var Þorbjörn.

Steinbjörn kortr hét son Refs ens rauða; hann fór til Íslands ok kom í Vápnafjörð. Eyvindr föðurbróðir hans gaf honum land alt milli Vápnafjarðarar ok Vestradalsár; hann bjó at Hofi. Hans synir váru þeir Þormóðr stikublígr, er bjó í Sunnudal; annarr Refr á Refsstöðum; þriði Egill á Egilstöðum, faðir Þórarins ok Þrastar ok Hallbjarnar ok Hallfríðar, er átti Þorkell Geitisson.

Hróaldr bjóla var fóstbróðir Eyvindar vápna; hann nam land fyrir vestan Vestradalsá, dalinn hálfan, ok Selárdal allan út til Digraness; hann bjó á Torfastöðum. Hans son var Ísrøðr, faðir Gunnhildar, er átti Oddi, son Asólfs í Höfða. *Gunnhildr var móðir Gríms, föður Halldóru, móður Markúss, föður Valgerðar, móður Bøðvars, föður Þórðar prests, föður Markúss á Melum.*

Ölvér enn hvíti hét maðr, son Ósvalds Öxna-Þórissonar; hann var lendr maðr ok bjó í Álm-döllum; hann varð ósátt við Hákon jarl Grjót-garðsson, ok fór á Yrjar ok dó þar, enn Þorsteinn enn hvíti, son hans, fór til Íslands, ok kom skipi sínu í Vápnafjörð eftir landnám; hann keypti land af Eyvindi vápna, ok bjó á Tóftavelli fyrir utan Síreksstaði nokkura vetr, áðr hann komst at Hofslöndum, með því móti at hann heimti leigufé sitt af Steinbirni kort, enn hann hafði eigi til at gjalda nema landit; þar bjó Þorsteinn LX. vetra síðan ok var vitr maðr ok góðr. Hann átti Ingibjörgu, dóttur Hróðgeirs ens hvíta; þeira börn váru þau Þorgils ok Þórðr, Önundr, Þorbjörg ok Þóra. Þorgils átti Ásvöru, dóttur Þóris Graut-Atlasonar; þeira son var Bodd-Helgi. Hann átti fyrr Höllu Lýtingsdóttur, Arnbjarnarsonar; þeira son var Víga-Bjarni. Hann átti Rannveigu, dóttur Eiríks ór Goðdöllum; þeira son var Skegg-Broddi

enn dóttir Yngvildr, er átti Þorsteinn Hallsson. Skegg-Broddi átti Guðrúnu, dóttur Þórarins sælings ok Halldóru Einarsdóttur; þeira börn Þórir ok Bjarni húslangr. Þórir átti Steinunni, dóttur Þorgríms ens háva; þeira dóttir var Guðrún, er átti Flosi Kolbeinsson; þeira son var Bjarni, faðir Bjarna, er átti Höllu Jörundardóttur; þeira börn váru þau Flosi prestur ok Torfi prestur, Einarr brúðr ok Guðrún, er Þórðr Sturluson átti, ok Goðrún, er Einarr Berþórs-son átti, ok Helga, móðir Sigríðar Sighvatsdóttur. *Flosi prestur átti Ragnhildi, dóttur Barkar á Baugsstöðum; þeira börn Bjarni ok Einarr, Halla, móðir herra Kristoforus, ok Þórdís, móðir frú Ingigerðar, móður frú Guðrúnar ok Hallberu. Valgerðr var dóttir Flosa, móðir herra Erlends sterka, föður Hauks ok Valgerðar.*

2. Þorsteinn torfi ok Lýtingr bræðr fóru til Íslands. Lýtingr nam Vápnafjarðarströnd alla ena eystri, Bøðvarsdal ok Fagradal, ok bjó í Krossavík, frá honum eru Vápnfirðingar komnir. *Hans son var Geitir, faðir Þorkels, föður Ragneiðar, móður Höllu, móður Bótólfs, föður Þórdísar, móður Helgu, móður Þórðar prests, föður Markúss á Melum.*

Þorfiðr hét maðr, er fyrst bjó á Skeggjastöðum at ráði Þórðar hálma; hans son var Þorsteinn fagri, er vá Einar, son Þóris Graut-Atla-

sonar, ok bræðr hans tveir, Þorkell ok Heðinn, er vágur Þorgils, föður Brodd-Helga.

Þorsteinn torfi nam Hlíð alla útan frá Ósfjöllum ok upp til Hvannár, ok bjó at Forsvelli; hans son var Þorvaldr, faðir Þorgeirs, föður Hallgeirs, föður Hrapps á Forsvelli.

Hákon hét maðr, er nam Jökulsdal allan fyrir vestan Jökulsá ok fyrir ofan Teigará, ok bjó á Hákonarstöðum; hans dóttir var Þorbjörg, er áttu synir Brynjólfs ens gamla, Gunnbjörn ok Hallgrímr. Teigr lá ónuminn millum Þorsteins torfa ok Hákonar; þann lögðu þeir til hofs, ok heitir sá nú Hofsteigr.

Skjöldólfr Vémundarson, bróðir Berðlu-Kára, nam Jökulsdal fyrir austan Jökulsá upp frá Knefilsdalsá, ok bjó á Skjöldólfsstöðum; hans börn váru þau Þorsteinn, er átti Fastnýju Brynjólfsdóttur, ok Sigríðr, móðir Bersa Özurarsonar.

Þórðr hét maðr, son Þórólfs hálma, bróðir Helga bunhauss; hann nam Tungulönd öll á milli Lagarfljóts ok Jökulsár, fyrir útan Rangá; hans son var Þórólfr hálmi, er átti Guðríði Brynjólfsdóttur; þeira son var Þórðr þvari, faðir Þórodds, föður Brands, föður Steinunnar, móður Rannveigar, móður Söehildar, er Gizurr átti.

Özurr slagakollr nam land milli Ormsár ok

Rangár; hann átti Guðnýju Brynjólfsdóttur; þeira son var Ásmundr, faðir Marðar.

Ketill ok Graut-Atli, synir Þóris þiðranda, fóru ór Veradal til Íslands, ok námu land í Fljótsdal fyrr enn Brynjólfr kom út, Lagarfljótsstrandir báðar. Ketill nam fyrir vestan Fljót á milli Hengiforsár ok Ormsár. Ketill fór útan, ok var með Véþormi, syni Vémundar ens gamla; þá keypti hann at Véþormi Arneiði, dóttur Ásbjarnar jarls skerjablesa, er Hólmfastr, son Véþorms, hafði hertekit, þá er þeir Grímr systurson Véþorms, drápu Ásbjörn jarl. Ketill keypti Arneiði, dóttur Ásbjarnar, tveim hlutum dýrra enn Véþormr mat hana í fyrstu; enn er kaupit var orðit, þá gerði Ketill brúðkaup til Arneiðar. Eftir þat fann hon grafsilfr mikit undir viðarrótum; þá bauð Ketill at flytja hana til frænda sinna, enn hon kaus þá honum at fylgja. Þau fóru út ok bjöggu á Arneiðarstöðum; þeira son var Þiðrandi, faðir Ketils í Njarðvik. *Jóreiðr var dóttir Þiðranda, móðir Þorsteins, föður Guðríðar, móður Rannveigar, móður Salgerðar, móður Guðrúnar, móður Hreins ábóta, föður Valdísar, móður Snorra, föður Hallberu, er átti Markús Þórðarson á Melun.*

3. Graut-Atli nam ena eystri strönd Lagarfljóls, alt á milli Giljár ok Vallaness, fyrir vestan Öxnaðæk; hans synir váru þeir Þorbjörn ok Þórir, er átti Ásvöru Brynjólfsdóttur.

■ Þorgeirr Vestarson hét maðr göfigr; hann átti þrjá sonu: var einn Brynjólfr enn gamli, annarr Ævarr enn gamli, þriði Herjólfr. Þeir fóru allir til Íslands á sínu skipi hverr þeira. Brynjólfr kom skipi sínu í Eskifjörð, ok nam land fyrir ofan fjall, Fljótsdal allan fyrir ofan Hengiforsá, fyrir vestan, enn fyrir ofan Gilsá, fyrir austan, Skriðudal allan, ok svá Völluna út til Eyvindarár, ok tók mikit af landnámi Una Garðarssonar, ok bygði þar frændum sínum ok mágum; hann átti þá tíu börn, enn síðan fekk hann Helgu, er átt hafði Herjólfr, bróðir hans, ok áttu þau þrjú börn; þeira son var Özurr, faðir Bersa, föður Hólmsteins, föður Órækju, föður Hólmsteins, föður Helgu, móður Hólmsteins, föður Hallgerðar, móður Þorbjargar, er átti Loftr biskupsson.

Ævarr enn gamli, bróðir Brynjólfs, kom út í Reyðarfirði, ok fór upp um fjall; honum gaf Brynjólfr Skriðudal allan fyrir ofan Gilsá; hann bjó á Arnallzstöðum; hann átti tvá sonu ok dótr þrjár.

Ásrøðr hét maðr, er fekk Ásvarar Herjólfsdóttur, bróðurdóttur Brynjólfs ok stjúp dóttur; henni fylgdu heiman öll lönd milli Gilsár ok Eyvindarár; þau bjoggu á Ketilsstöðum. Þeira son var Þorvaldr holbarki, faðir Þorbergs, föður Hafljóts, föður Þórhadds skálar. Dóttir Holbarka var Þórunn, er átti Þorbjörn Graut-Atla-

son; önnur Ástriðr, móðir Asbjarnar loðinhöfða, föður Þórarins í Seyðarfirði, föður Asbjarnar, föður Kolskeggs ens fróða ok Ingileifar, móður Halls, föður Finns lögsögumanns.

Hrafnkell hét maðr, Hrafnsson; hann kom út síð landnámatiðar; hann var enn fyrsta vetr í Breiðdal, enn um várit fór hann upp um fjall; hann áði í Skriðudal ok sofnaði; þá dreymdi hann at maðr kom at honum ok bað hann upp standa ok fara braut sem skjótast; hann vaknaði ok fór braut. Enn er hann var skamt kominn, þá hljóp ofan fjallit alt, ok varð undir göltri ok griðungr, er hann átti. Síðan nam Hrafnkell Hrafnkelsdal ok bjó á Steinrøðarstöðum; hans son var Ásbjörn, faðir Helga, ok Þórir, faðir Hrafnkels goða, föður Sveinbjarnar, föður Þorsteins, föður Bótólfs, föður Þórdísar, móður Helgu, móður Þórðar prests, föður Markúss á Melum.

Uni, son Garðars, er fyrst fann Ísland, fór til Íslands með ráði Haralds konungs hárfagra, ok ætlaði at leggja undir sik landit, enn síðan hafði konungr heitit honum at gera hann jarl sinn. Uni tók land þar sem nú heitir Unaóss, ok húsaði þar; hann nam sér land til eignar fyrir sunnan Lagarfljót, alt herað til Unalækjar. Enn er landsmenn vissu ætlun hans, tóku þeir at ýfast við hann, ok vildu eigi selja honum kvikfé eðr vistir, ok mátti hann eigi þar hald-

ast. Uni fór í Álfafjörð enn syðra; hann náð þar eigi at staðfestast; þá fór hann austan með tólfta mann, ok kom at vetri til Leiðólfskappa í Skógarhverfi; hann tók við þeim. Uni þýddist Þórunni, dóttur Leiðólfs, ok var hon með barni um várit; þá vildi Uni hlaupast á braut með sína menn; enn Leiðólfr reið eftir honum ok fundust þeir hjá Flangastöðum ok börðust þar, því at Uni vildi eigi aftr fara með Leiðólfi; þar fellu nokkurir menn af Una, enn hann fór aftr nauðigr, því at Leiðólfr vildi at hann fengi konnnnar ok staðfestist ok tækir arf eftir hann. Nokkuru síðar hljóp Uni á braut, þá er Leiðólfr var eigi heima, enn Leiðólfr reið eftir honum, þá er hann vissi, ok fundust þeir hjá Kálfagröfum; var hann þá svá reiðr, at hann drap Una ok förunauta hans alla. Sonr Una ok Þórunnar var Hróarr Tungugoði; hann tók arf Leiðólfs allan, ok var et mesta afarmenni; hann átti dóttur Hámundar, systur Gunnars frá Hlíðarenda; þeira son var Hámundr enn halt, er var enn mesti vígamaðr, Tjörvi enn háðsami ok Gunnar váru systursynir Hróars. Tjörvi bað Ástriðar mannvitsbrekku Móðólfsdóttur, enn bræðr hennar Ketill ok Hrólfr synjuðu honum konunnar, enn þeir gáfu hana Þóri Ketilssyni; þá dró Tjörvi líkn-eski þeira á kamarsvegg, ok hvert kveld, er þeir Hróarr gengu til kamars; þá hrækti hann

í andlit líkneski Þóris, enn kysti hennar líkneski, áðr Hróarr skóf af. Eftir þat skar Tjörvi þau á hnifskefti sínu ok kvað þetta:

Vér höfum þar með Þóri
 (þat var sett við glettu)
 auðar unga Þrúði
 áðr á vegg of fáða.
 Nú hefik rastakarns ristit
 (réð ek mart við *Syn bjarta*
 hauka skofts) á hefti
 Hlín ölbækis mínu.

Hér af gerðust víg þeira Hróars ok systursona hans.

Þorkell fullspakur hét maðr, er nam Njarðvík alla ok bjó þar; hans dóttir var Þjóðhildr, er átti Ævarr enn gamli; ok var þeira dóttir Yngvildr, móðir Ketils í Njarðvík, Þiðrandasonar.

Vetrliði hét maðr, son Arnbjarnar Ólafs sonar langhals, bróðir þeira Lýtings, Þorsteins torfa ok Þorbjarnar í Arnarholti; Óláfr langhals var son Bjarnar reyðarsíðu; Vetrliði nam Borgarfjörð ok bjó þar.

Þórir lina hét maðr, er nam Breiðavík, ok bjó þar; hans synir váru þeir Sveinungr ok Gunnsteinn.

Nú hefir Kolskeggr fyrir sagt héðan frá um landnám.

5. Þorsteinn kleggi nam fyrst Húsavík ok

Bjó þar; hans son var Án, er Húsvíkingar eru frá komnir.

Loðmundr enn gamli hét maðr, enn annarr Bjólfr, fóstbróðir hans; þeir fóru til Íslands af Vors, af Þulunesi. Loðmundr var rammaukinn mjök ok fjölkunnigr; hann skaut fyrir borð öndvegissúlum sínum í hafi ok kvaðst þar byggja skyldu sem þær rækju á land. Enn þeir fóstbræðr tóku Austfjörðu, ok nam *Loðmundr* Loðmundarfjörð, ok bjó þar þenna vetr; þá frá hann til öndvegissúlna sinna fyrir sunnan land. Eftir þat bar hann á skip öll fōng sín; enn er segl var dregit, lagðist hann niðr, ok bað ōngvan mann vera svá djarfan at hann nefndi *sik*. Enn er hann hafði skamma hrið legit, varð gnýr mikill; þá sá menn, at skriða mikil hljóp á bœ þann, er Loðmundr hafði búið á; eftir þat settist hann upp ok tók til orða: „Þat er álag mitt, at þat skip skal aldri heilt af hafi koma, er hér siglir út“. Hann helt síðan suðr fyrir Horn ok vestr með landi, alt fyrir Hjörleifshöfða, ok lendi nökkuru vestar; hann nam þar land sem súlurnar höfðu komit, ok á milli Hafrsár ok Fúlalækjar; þat heitir nú Jökulsá á Sólheimasandi; hann bjó í Loðmundarhvammi, ok kallaði þar Sólheima. Þá er Loðmundr var gamall, bjó Þrasi í Skógum; hann var ok fjölkunnigr; þat var eitt sinn at Þrasi sá um morgun vatnahlaup mikit; hann veitti vatnit með fjölkyngi

austr fyrir Sólheima; enn þræll Loðmundar sá, ok kvað *falla* sjó norðan um landit at þeim. Loðmundr var þá blindr; hann bað þrælinn færa sér í dælikeri þat, er hann kallaði sjó; ok er hann kom aftr, sagði Loðmundr: „Ekkē þikki mér þetta sjór“. Síðan bað hann þrælinn fylgja sér til vatnsins: „ok stikk stafsbroddi mínum í vatnit“; hringr var í stafnum, ok helt Loðmundr tveim höndum um stafinn, enn beit í hringinn; þá tóku vötnin at falla vestr aftr fyrir Skóga; síðan veitti hvárr þeira vötnin frá sér, þar til er þeir fundust við gljúfr nökkur; þá sættust þeir á þat, at áin skyldi þar falla sem skemst væri til sjóvar. Sú er nú kölluð Jökulsá, ok skilr landsfjórðunga. [*Í þeim vatnagangi varð Sólheimasandr. Son Loðmundar var Sumarliði, faðir Þorsteins holmunz, föður Þóru, móður Steins Brandssonar. föður Þóru, er átti Skafti lögmaðr.*]

6. Bjólfr, fóstbróðir Loðmundar, nam Seyðisfjörð allan, ok bjó þar alla ævi; hann gaf Helgu, dóttur sína, Áni enum ramma, ok fylgði henni heiman öll en nyrðri strönd Seyðisfjarðar, til Vestdalsár. Ísólfr hét sonr Bjólfs, er þar bjó síðan, ok Seyðfirðingar eru frá komnir.

Eyvindr hét maðr, er út kom með Brynjólfi, ok færði síðan bygð sína í Mjóvafjörð ok bjó þar; hans son var Hrafn, er seldi Mjóvafjarðar-

land Þorkatli klöku, er þar bjó síðan; frá honum er Klökuætt komin.

Egill enn rauði hét maðr, er nam Norðfjörð ok bjó í Nesi út; hans son var Óláfr, er Nesmenn eru frá komnir.

Freysteinn enn fagri hét maðr; hann nam Sandvík, ok bjó á Barðsnesi, Viðfjörð ok Hellisfjörð; frá honum eru Sandvíkingar ok Viðfirðingar ok Hellisfirðingar komnir.

Þórir enn hávi ok Krumr, þeir fóru af Vors til Íslands; ok þá er þeir tóku land, nam Þórir Krossavík á milli Gerpis ok Reyðarfjarðar; þaðan eru Krossvíkingar komnir; enn Krumr nam land í Hafranesi ok til Þernuness ok alt et ytra, bæði Skrúðey ok aðrar úteyjar, ok þrjú lönd öðrum megin gegnt Þernunesi; þaðan eru Krymlingar komnir.

Ævarr var fyrst í Reyðarfirði áðr hann fór upp um fjall; enn Brynjólfur í Eskifirði, áðr hann fór upp at byggja Fljótsdal, sem áðr var ritat.

Vémundr hét maðr, er nam Fáfskrúðsfjörð allan, ok bjó þar alla ævi; hans son var Ölmóðr, er Ölmœðlingar eru frá komnir.

Þórhaddr enn gamli var hofgoði í Þrándheimi á Møri; hann fýstist til Íslands ok tók áðr ofan hofit, ok hafði með sér hofsmoldina ok súlurnar; enn hann kom í Stöðvarfjörð, ok lagði Mørina-helgi á allan fjörðinn, ok lét øngu tor-

týna þar nema kvikfé heimilu; hann bjó þar alla ævi, ok eru frá honum Stöðfirðingar komnir.

7. Hjalti hét maðr, er nam Kleifarlönd ok allan Breiðdal þar upp frá; hans son var Kolgrímr, er mart er manna frá komit.

Herjólfur hét maðr, er nam land alt út til Hvalsnesskriðna; hans son var Vápnir, er Væpnlingar eru frá komnir.

Herjólfur, bróðir Brynjólfs, nam Heydalalönd fyrir neðan Tinnudalsá ok út til Ormsár; hans son var Özurr, er Breiðdælir eru frá komnir.

Skjöldólfr hét maðr, er nam Stræti alt fyrir útan Gnúp, ok inn öðrum megin til Óss ok til Skjöldólfsness hjá Fagradalsá í Breiðdali; hans son var Háleygr, er þar bjó síðan; frá honum er Háleygjaætt komin.

Þjóðrekr hét maðr; hann nam fyrst Breiðdal allan, enn hann stökk braut þaðan fyrir Brynjólfi, ok ofan í Berufjörð, ok nam alla ena nyrðri strönd Berufjarðar, ok fyrir sunnan um Búlandsnes, ok inn til Rauðaskriðna öðrum megin, ok bjó þrjá vetr sem nú heitir Skáli; síðan keypti Björn enn hávi jarðir at honum, ok eru frá honum Berufirðingar komnir.

Björn sviðinhorni hét maðr, er nam Álftafjörð enn nyrðra, inn frá Rauðaskriðum, ok Sviðinhornadal.

Þorsteinn trumbubein hét frændi Böðvars ens hvíta, ok fór með honum til Íslands; hann nam

land fyrir utan Leiruvág til Hvalsnesskriðna; hans son var Kollr enn grái, faðir Þorsteins, föður Þorgrims í Borgarhöfn, föður Steinunnar, er átti Gizurr biskup.

Böðvarr enn hvíti var son Þorleifs miðlungs, Böðvarssonar snæþrymu, Þorleifssonar hvalaskúfs, Ánssonar, Arnarsonar hyrnu, konungs, Þórissonar konungs, Svína-Böðvarssonar, Kaunssonar konungs, Sölgasonar konungs, Hrólfs sonar ór Bergi, ok Brandönundr, frændi hans, fóru af Vors til Íslands ok kvámu í Álftafjörð enn syðra. Böðvar nam land inn frá Leiruvági, dali þá alla, er þar liggja, ok út öðrum megin til Múla ok bjó at Hofi; hann reisti þar hof mikit. Sonr Böðvars var Þorsteinn, er átti Þórdisi, dóttur Özurar keiliselgs, Hrollaugssonar; þeira son var Síðu-Hallr; hann átti Jóreiði Þiðrandadóttur, ok er þaðan mikil ætt komin. Son þeira var Þorsteinn, faðir Ámunda, föður Guðrúnar, móður Þórdisar, móður Helgu, móður Guðnýjar, móður Sturlusona.

Brandönundr nam land fyrir norðan Múla-Kambsdal ok Melrakkanes, ok inn til Hamarsár, ok er mart manna frá honum komit.

Þórðr skeggi, son Hrapps, Bjarnar sonar bunu, hann átti Vilborgu Ósvaldsdóttur ok Úlfrúnar Játmundardóttur. Þórðr fór til Íslands ok nam land í Lóni, fyrir norðan Jökulsá, milli ok Lónsheiðar, ok bjó í Bø tíu vetr eða lengr; þá frá.

hann til öndvegissúlna sinna fyrir neðan heiði í Leiruvági; þá réðst hann vestr þannig ok bjó á Skeggjastöðum, sem fyrr er ritat; hann seldi þá Lónlond Úlfjóti, er lög flutti út hingat. [*Bjó Þórðr þó nokkora vetr síðan í Lóni*]. Dóttir Þórðar var Helga, er Ketilbjörn enn gamli átti at Mosfelli. — *Þat var upphaf enna heiðnu laga, at menn skyldu eigi hafa höfuðskip í hafi, enn ef þeir hefði, þá skyldi þeir af taka höfuð, áðr þeir kæmi í lands sýn, ok sigla eigi at landi með gapandi höfðum eða gínandi trjónum, svá at landvættir fælist við. Baugr tæyringr eða meiri skyldi liggja í hverju höfuðhofi á stalla; þann baug skyldi hverr goði hafa á hendi sér til löginga allra, þeira er hann skyldi sjálfr heyja, ok [rjóða hann þar áðr í roðru nautblóðs, þess er hann blótaði þar sjálfr. Hver sá maðr, er þar þurfti lögskil af hendi at leysa at dómi, skyldi áðr eið vinna at þeim baugi, ok nefna sér vátta tvá eða fleiri; „nefni ek í þat vætt“, skyldi hann segja, „at ek vinn eið at baugi, lögeið; hjálpi mér svá Freyr ok Njörðr ok hinn almannatki Áss, sem ek man svá sök þessa sækja, eða verja, eða vitni bera, eða kviðu, eða dæma, sem ek veit réttast ok sannast ok helzt at lögum, ok öll lögmæt skil af hendi leysa, þau er undir mik koma, meðan ek er á þessu þingi“.* Þá var landinu skift í fjórðunga, ok skyldu vera þrjú þing í fjórðungi, enn þrjú höfuðhof í þingsókn hverri; þar váru menn

valdir til að geyma hofanna at viti ok réttlæti; þeir skyldu nefna dóma á þingum ok stýra sakferli; því váru þeir guðar kallaðir; hverr maðr skyldi gefa toll til hofs, sem nú til kirkju tíund.

8. Þorsteinn leggr, son Bjarnar blátannar, fór ór Suðreyjum til Íslands, ok nam lönd öll fyrir norðan Horn til Jökulsár í Lóni, ok bjó í Bøðvarsholti þrjá vetr, enn seldi síðan löndin ok fór aftr í Suðreyjar.

Rögnvaldr jarl á Mæri (*var*) son Eysteins glumru, Ívars sonar Upplendingajarls, Hálfðanar sonar ens gamla; Rögnvaldr átti Ragnhildi, dóttir Hrólfs nefju; þeira son var Ívarr, er fell í Suðreyjum með Haraldi konungi enum hárfagra; annarr var Göngu-Hrólf, er vann Norðmandi; frá honum eru Rúðujarlar komnir ok Englakonungar; þriði var Þórir jarl þegjandi, er átti Álöfu árbót, dóttur Haralds konungs hárfagra, ok var þeira dóttir Bergljót, móðir Hákonar jarls ens ríka. Rögnvaldr jarl átti frillusonu þrjá: hét einn Hrollaugr, annarr Einarr, þriði Hallaðr; sá veltist ór jarlsdómi í Orkneyjum. Ok er Rögnvaldr jarl frá þat, þá kallaði hann saman sonu sína ok spurði, hverr þeira þá vildi til eyjanna; enn Þórir bað hann sjá fyrir um sína för; jarlinn kvað honum vel fara, enn kvað hann þar skyldu ríki taka eftir sinn dag. Þá gekk Hrólf fram ok bauð sik til farar; Rögnvaldr kvað honum vel hent fyrir sakir afis ok

hreysti, enn kveðst ætla, að meiri ofsi væri í skapi hans enn hann mætti þegar at löndum setjast. Þá gekk Hrollaugr fram ok spurði, ef hann vildi at hann færi; Rögnvaldr kvað hann ekki mundu jarl verða: „Hefir þú þat skap, er engi styrjöld fylgir; munu vegir þínir liggja til Íslands; muntu þar göfigr þikkja í því landi, ok verða kynsæll, enn engi eru hér forlög þín“. Þá gekk Einarr fram ok mælti: „Láttu mik fara til Örkeneyja; ek mun þér því heita, er þér mun bezt þikkja, at ek mun aldri aftr koma þér í auglýn“. Jarlinn svarar: „Vel þikki mér, at þú farir brutt, enn lítils er mér ván at þér, því at móðurætt þín er öll þrælborin“. Eftir þat fór Einarr vestr, ok lagði undir sig eyjarnar, sem segir í sögu hans. Hrollaugr fór þá til Haralds konungs ok var með honum um hrið, því at þeir feðgar kómu eigi skapi saman eftir þetta.

9. Hrollaugr fór til Íslands með ráði Haralds konungs, ok hafði með sér konu sína ok sonu; hann kom austr at Horni ok skaut þar fyrir borð öndvegissúlum sínum, ok bar þær á land í Hornafirði, enn hann rak undan ok vestr fyrir land; fekk hann þá útivist harða ok vatnfátt. Þeir tóku land vestr í Leiruvági á Nesjum; var hann þar enn fyrsta vetr, þá frá hann til öndvegissúlna sinna ok fór austr þann veg; var hann annan vetr undir Ingólfsselli. Síðan

fór hann austr í Hornafjörð, ok nam land austan frá Horni til Kviár, ok bjó fyrst undir Skarðsbrekku í Hornafirði, enn síðan á Breiðabólstað í Fellshverfi. Þá hafði hann lógat þeim löndum, er norður váru frá Borgarhöfn, enn hann átti til dauðadags þau lönd, er suður váru frá Hreggsgerðismúla. Hrollaugr var höfðingi mikill ok helt vingan við Harald konung, enn fór aldri utan [*ok eigi vitjaði hann Rögnvalds jarls föður síns, því at honum var ótítt við stjúp-móður sína*]. Haraldr konungr sendi Hrollaugi [*gersimar á deyjanda degi,*] sverð ok ölhorn ok gullhring, þann er vá fimm aura; sverð þat átti Kolr, son Síðu-Halls, enn Kolskeggr enn fróði hafði sét hornit. Hrollaugr var faðir Özurar keiliselgs, er átti Gró, dóttur Þórðar illuga; dóttir þeira var Þórdís, móðir Halls á Síðu. Annarr son Hrollaugs var Hróaldr, faðir Óttars hvalróar, föður Guðlaugar, móður Þorgerðar, móður Járngerðar, móður Valgerðar, móður Böðvars, föður Guðnýjar, móður Sturlusona. Önundr var enn þriði son Hrollaugs. Hallr á Síðu átti Jóreiði Piðrandadóttur; þeira son var Þorsteinn, faðir Magnúss, föður Finars, föður Magnúss byskups. Annarr son Halls var Egill, faðir Þorgerðar, móður Jóns byskups ens helga. Þorvarðr Hallsson var faðir Þórdísar, móður Jórunnar, móður Halls prests, föður Gizurar, föður Magnúss byskups ok Þorvalds, föður Gizurar jarls.

Yngvildr Hallsdóttir var móðir Þóreyjar, móður Sæmundar prests ens fróða. Þorsteinn Halls-son var faðir Guðriðar, móður Jóreiðar, móður Ara prests ens fróða. Þorgerðr Hallsdóttir var móðir Yngvildar, móður Ljóts, föður Járngerðar, móður Valgerðar, móður Böðvars, föður Guðnýjar, móður Sturlusona.

10. Ketill hét maður, er Hrollaugr seldi Hornafjarðarströnd *útan frá Horni* ok inn til Hamra; hann bjó at Meðalfelli; frá honum eru Hornfirðingar komnir.

Auðunn enn rauði keypti land at Hrollaugi útan frá Hömrum ok út öðrum megin til Viðborðs; hann bjó í Hofsfelli ok reisti þar hof mikit; frá honum eru Hofsfellingar komnir.

Þorsteinn enn skjálgi keypti land at Hrollagi alt frá Viðborði suður um Mýrar ok til Heinabergsár; hans son var Vestmarr, er Mýramenn eru frá komnir.

Úlfr enn vorski keypti land at Hrollaugi suður frá Heinabergsá til Hreggerðismúla, ok bjó at Skálafelli *fyrstr manna; frá honum eru Vorsar komnir. Síðan færði Úlfr bú sitt í Papíli ok bjó á Breiðabólstað, ok er þar haugr hans ok svá Þorgeirs haugr. Þorgeirr var son Vorsu-Úlfs, er bjó at Hofi í Papíli.*

Þórðr illugi, son Eyvindar eykikróks, braut skip sitt á Breiðasandi; honum gaf Hrollaugr land milli Jökulsár ok Kvíár, ok bjó hann und-

ir Felli við Breiða; hans synir váru þeir Örn enn sterki, er deildi við Þórdísi jarlsdóttur, systur Hrollaugs, ok Eyvindr smiðr. Dætr hans váru þær Gróa, er Özurr átti, ok Þórdís, móðir Þorbjargar, móður Þórdísar, móður Þórðar illuga, er vá Viga-Skútu.

Ásbjörn hét maðr, son Heyangrs-Bjarnar, hersis ór Sogni; hann var son Helga Helgasonar, Bjarnar sonar bunu. Ásbjörn fór til Íslands ok dó í hafi, enn Þorgerðr kona hans ok synir þeira kvámu út. *Enn þat var mælt, at kona skyldi eigi víðara nema land, enn leiða mælti kvígu tvævetra várlangan dag sólsetra millum, hálfstalið naut ok haft vel. Því leiddi Þorgerðr kvígu sína undan Tóftafelli, skamt frá Kvía ok í Kiðjaleit hjá Jökulsfelli fyrir vestan. Þorgerðr nam því land um]* alt Ingólfshöfðahverfi á milli Kvíar og Jökulsár, ok bjó hon at Sandfelli, ok Guðlaugr, son þeira Ásbjarnar, eftir hana; frá honum eru Sandfellingar komnir. Annarr son þeira var Þorgils, er Hnappfellingar eru frá komnir; þriði var Özurr, faðir Þórðar Freysgoða, er mart manna er frá komit.

Helgi hét annarr son Heyjangrs-Bjarnar; hann fór til Íslands ok bjó at Rauðalæk; hans son var Hildir, er Rauðlækingar eru frá komnir.

Bárðr var enn þriði son Heyjangrs-Bjarnar, er fyrr er getit; hann nam fyrst Bárðardal norðr, enn síðan fór hann suðr um Vánarskarð Bárðar-

- * götu, ok nain Fljótshverfi alt, ok bjó at Gnúp-um; þá var hann kallaðr Gnúpa-Bárðr. Hans synir váru þeir Þorsteinn og Sigmundur, þriði Egill, fjórði Gísli, fimti Nefsteinn, sétti Þorbjörn krumr, sjaundi Hjörr, átti Þorgrímr, níundi Björn, faðir Geira at Lundum, föður Þorkels læknis, föður Geira, föður Þorkels kanoka, vinar Þorláks byskups ens helga; hann setti regúlastað í Þykkvabæ.

11. Eyvindr karpí nam land milli Almannafljóts ok Geirlandsár, ok bjó at Forsi, fyrir vestan Móðólfsgrúp; hans synir váru þeir Móðólfr, faðir þeira Hrólfs ok Ketils ok Ástriðar mannvitsbrekku; annarr var Önundr, föður Þraslaugar, móður Tyrfings ok Halldórs, föður Tyrfings, föður Teits. *Áðr Almannafljót hlypi var þat kallat Raftalækr.*

Maðr hét Ketill enn fíflski, son Jórunnar mannvitsbrekku, dóttur Ketils flatnefs; hann fór af Suðreyjum til Íslands; *hann* var kristinn; hann nam land milli Geirlandsár ok Fjarðarár, fyrir ofan Nýkoma. Ketill bjó í Kirkjubæ; þar höfðu áðr setit Papar, ok eigi máttu þar heiðnir menn búa. Ketill var faðir Ásbjarnar, föður Þorsteins, föður Surtz, föður Sighvats lögsögumanns, föður Kolbeins [*föður Guðrúnar, móður Narfa ok Loðmundar Skeggjasonar*]. Hildr hét dóttir Ásbjarnar, móðir Þóris, föður Hildar, er Skarpheðinn átti. Þorbjörg hét dóttir Ketils ens fíflska; hana átti Váli,

son Loðmundar ens gamla. [*Þórðr hét son Surts ór Kirkjubæ, faðir Guðrúnar, móður Þóru, móður Þorsteins holmunds, föður Gunnhildar, móður Jódísar, móður Vilborgar, móður Magnúss, föður Snorra, föður Hallberu, er átti Markús Þórðarson á Melum*].

Böðmóðr hét maðr, er land nam milli Drifandi ok Fjarðarár, ok uppp til Böðmóðshorns; hann bjó í Böðmóðstungu; hans son var Óleifr, er Óleifsborg er við kend; hann bjó í Holti. Hans son var Vestarr, faðir Helga, föður Gró, er Glœðir átti.

Eysteinn enn digri fór af Sunnmæri til Íslands; hann nam land fyrir austan Geirlandsá til móts við Ketil enn fíflska, ok bjó í Geirlandi; hans son var Þorsteinn frá Keldugnúpi; [*hann var faðir Þorkels, föður Þorsteins frá Keldugnúpi, föður Þuríðar, móður Álofar, móður Guðrúnar, móður Þorvalds, föður Ingiríðar, móður Ástríðar, móður Ingibjargar, móður Þuríðar, móður Hallberu, er átti Markús Þórðarson á Melum*].

Eysteinn son Hrana Hildissonar paraks, fór ór Noregi til Íslands; hann kaupir lönd at Eysteini digra, þau er hann haði numit, ok kvað vera Meðallönd; hann bjó at Skarði. Hans börn váru þau Hildir ok Þorljót, er átti Þorsteinn at Keldugnúpi. Hildir vildi færa bú sitt í Kirkjubæ eftir Ketil ok hugði, at þar mundi heiðinn maðr mega búa; enn er hann kom nær at tún-

garði, varð hann bráðdauðr; þar liggur hann í Hildishaugi.

Vilbaldr hét maðr, bróðir Áskels hnökkans; hann fór af Írlandi til Íslands ok hafði skip þat, er hann kallaði Kúða, ok kom í Kúðaflijótsós; hann nam Tunguland á milli Skaftár ok Hólmsár, ok bjó á Búlandi; hans börn váru þau Bjólan, faðir Þorsteins, ok Ölvér muðr, ok Bjólok er átti Áslákr örgoði.

Leiðólfr kappi hét maðr; hann nam land fyrir austan Skaftá til Drifandi, ok bjó at Á fyrir austan Skaftá, út frá Skál, en annat bú átti hann á Leiðólfsstöðum undir Leiðólfsfelli, ok var þar þá mart bygða, Leiðólfr var faðir Þórunnar, móður Hróars Tungugoða. Hróarr átti Arngunni Hámundardóttur, systur Gunnars frá Hlíðarenda; þeira börn váru þau Hámundr halti ok Ormhildr. Vébrandr hét son Hróars ok ambáttar. Hróarr tók Þórunni brún, dóttur Þorgils ór Hvammi í Mýdal; Þorfinnr hét son þeira. Hróarr bjó fyrst í Ásum; síðan tók hann Lómagnúpslönd af Eysteini, syni Þorsteins titlings ok Uðar Eyvindardóttur; systur þeira Móðólfs ok Branda. Þraslaug var dóttur Þorsteins titlings, er átti Þórðr freysgoði. Önundr töskubak, frændi Þorsteinsbarna, skoraði Hróari á hölm á Skaftafellspingi, ok fell at fótum Hróari. Þorsteinn Upplendingr tók Þórunni brún ok flutti útan; Hróarr fór ok útan; þá drap hann Þröst berserk á

hólmi, er nauðiga vildi eiga Sigríði konu hans, enn þeir Þorsteinn sættust. Móðólfssynir váru at vígi Hróars, ok Þórir, mágr þeira, Brandr frá Gnúpum ok Steinólfr búi hans. Hámundr hefndi þeira Hróars.

12. Ísólfr hét maðr; hann kom út síð landnámstiðar ok skoraði á Vilbald til landa eðr hólmgöngu, enn Vilbaldr vildi eigi berjast ok fór brutt af Búlandi; hann átti þá land milli Hólmsár ok Kúðafljóts. Enn Ísólfr fór á Búland ok átti land milli Kúðafljóts ok Skaftár. Hans son var Hrani á Hranastöðum, enn dóttir Björg, er átti Önundr, son Eyvindar karpa; Þraslaug var dóttir þeira, er átti Þórarinu son Ölvés í Höfða.

Hrafn hafnarlykill var vikingr mikill; hann fór til Íslands ok nam land milli Hólmsár ok Eyjarár ok bjó í Dynskógum; hann vissi fyrir elds uppkvámu ok færði bú sitt í Lágey; hans son var Áslákr örgoði, er Lágeyingar eru frá komnir.

Maðr hét Hrólfr höggvandi; hann bjó á Norðmæri, þar sem hét Moldatún; hans synir váru þeir Vémundr ok Molda-Gnúpr; þeir váru víga-menn miklir ok járnsmiðir. Vémundr kvað þetta, er hann var í smiðju:

Ek bar einn
af ellifu
bana orð.
Blástu meir!

Gnúpr fór til Íslands fyrir vígasakir þeira bræðra, ok nam land milli Kúðaflióts ok Eyjarár, ok Alftaver alt; þar var þá vatn mikit ok áltaveiðr á. Molda-Gnúpr seldi mörgum mönnum af landnámi sínu, ok gerðist þar fjölbyggt, áðr jarðeldr rann þar ofan, enn þá flýðu þeir vestr til Höfðabrekku, ok gerðu þar tjaldbúðir, er heitir á Tjaldavelli; enn Vémundr, son Sigmundar kleykis, leyfði þeim eigi þarvist; þá fóru þeir í Hrossagarð ok gerðu þar skála, ok sátu þar um vetrinn, ok gerðist þar ófriðr með þeim ok vígafar. Enn um várit eftir fóru þeir Molda-Gnúpr vestr í Grindavík ok staðfestust þar; þeir höfðu fátt kvikfjár. Þeir váru þá fulltiða synir Molda-Gnúps, Björn ok Gnúpr, Þorsteinn hrugnir ok Þórðr leggjaldi. Björn dreymdi um nótt at bergbúi kæmi at honum ok bauð at gera félag við hann, enn hann þóttist játa því; eftir þat kom hafr til geita hans, ok tingaðist þá svo skjótt fé hans, at hann varð skjótt vellauðigr; síðan var hann Hafr-Björn kallaðr. Þat sá ófreskir menn, at landvættir allar fylgðu Hafr-Birni til þings, enn þeim Þorsteini ok Þórði til veiðar ok fiski. Hafr-Björn átti *Jörunni, stjúp-dóttur Gnúps bróður síns*; þeira son var Svert-ingr, er átti Húngerði, dóttur Þórodds Tungu-Oddssonar ok Jófriðar Gunnarsdóttur; þeira dóttir Þorbjörg, móðir Sveinbjarnar, föður Bótólfs, föður Þórdisar, móður Helgu, móður Guð-

nýjar, móður Sturlusona. Gnúpr Molda-Gnúps-son átti Arnbjörgu Rapormsdóttur. Þúnn var dóttir Molda-Gnúps, er átti Þjóstarr á Álftanesi. Þormóðr var son þeira, sem fyrr er ritat.

13. Eysteinn hét maðr, son Þorsteins dranga-karls; hann fór til Íslands af Hálogalandi ok braut skip sitt, enn meiddist sjálfir í viðum. Hann bygði Fagradal, enn kerlingu eina rak af skipinu í Kerlingarfjörð; þar er nú Höfðársandr. Ölvér, son Eysteins, nam land fyrir austan Grímsá; þar hafði engi maðr þorat at nema fyrir land-vættum, síðan Hjörleifr var drepinn. Ölvér bjó í Höfða; hans son var Þórarinn í Höfða, bróðir sammœðri Halldórs Örnólfssonar, er Mörðr ó-rækja vá undir Hömrum, ok Arnórs, er þeir Flosi ok Kolbeinn, synir Þórðar Freysgoða vágu á Skaftafells þingi.

Sigmundr kleykir, son Önundar bílds, nam land milli Grímsár ok Kerlingarár, er þá fell fyrir vestan Höfða; frá Sigmundi eru þrír bysk-upar komnir: Þorlákr ok Páll ok Brandr.

Björn hét maðr, auðigr ok ofláti mikill; hann fór til Íslands af Valldresi, ok nam land milli Kerlingarár ok Hafrsár, ok bjó at Reyni; hann átti ilt við Loðmund enn gamla. Frá Reyni-Birni er enn helgi Þorlákr byskup kominn [*langfæðg-um at telja*].

Loðmundr enn gamli nam land milli Hafrsár ok Fúlalækjar, sem fyrr er ritat; þat er þá hét

Fúlalœkr er nú kölluð Jökulsá á Sólheimasandi, er skilr landsfjórðunga.

Loðmundr enn gamli á Sólheimum átti sex sonu eðr fleiri: Váli hét son hans, faðir Sigmundar, er átti Oddlaugu, dóttur Eyvindar ens eyverska. Sumarliði hét annar son Loðmundar, faðir Þorsteins holmunns í Mörk, föður Þóru, móður Steins, föður *Þóru*, *móður* Surtis ens hvíta Skaftastjúps; hann var Sumarliðason; Skafti lögsögumaðr átti Þóru siðar enn Sumarliði; þat segir í Ölfusínga kyni. Vémundr hét enn þriði son Loðmundar, faðir Þorkötlu, er átti Þorsteinn Vífill; þeira dóttir var Arnkatla, móðir Hróa ok Þórdísar, er átti Sveinn Brandsson; þeira dóttir var Þóra, er átti *Sumarliði ok Skafti lögsögumaðr*. Ari hét enn fjórði, Hróaldr hét enn fimti, Ófeigr hét enn sétti son Loðmundar, laungetinn; hann átti Þraslaugu, dóttur Eyvindar eyverska, systur Oddlaugar; frá þeim öllum er mart manna komit.

Nú eru rituð landnám í Austfirðinga fjórðungi, eftir því sem vitrir menn ok fróðir hafa sagt; hefir í þeim fjórðungi mart stórmenni verit siðan, ok þar hafa margar stórar sögur gerzt. Enn þessir hafa þar stærstir landnámsmenn verit: Þorsteinn hvíti, Brynjólfir enn gamli, Graut-Atli ok Ketill Þiðrandasynir, Hrafnkell goði, Böðvarr enn hvíti, Hrollaugr, son Rögnvalds jarls, Özurr, son Ásbjarnar Heyjangrs-Bjarnarsonar, er Freys-

gyðlingar eru frá komnir, Ketill enn fílski, Leiðólfr kappi.

V.

Hér hefst upp landnám í Sunnlendinga fjórðungi, er með mestum blóma er alls Íslands fyrir landskosta sakir ok höfðingja þeira, er þar hafa byggt, bæði lærðir ok ólærðir.

1. *Austfirðir byggðust fyrst á Íslandi, enn á millum Hornafjarðar ok Reykjaness varð seinast albyggt; þar réð veðr ok brim landtöku manna fyrir hafnleysis sakir ok öræfis. Sumir þeir, er fyrstir kómu út, byggðu næstir fjöllum, ok merkdðu at því landkostina, at kvikféit fýstist frá sjónum til fjallanna. Þeim mönnum, er síðarkómu út, þóttu hinir numit hafa of víðaland, er fyrri kómu, enn á þat sætti Haraldr konungr þá hinn hárfagri, at engi skyldi víðara nema enn hann mætti eldi yfir fara á degi með skipverjum sínum. Menn skyldu elda gera, þá er sól væri í austri; þar skyldi gera aðra reyki, svá at hvára sæi frá öðrum, enn þeir eldar, er gervir váru þá er sól var í austri, skyldi brenna til nætr; síðan skyldu þeir ganga til þess er sól væri í vestri, gera þar aðra elda.*

Prasi hét maðr, son Þórólfs (*Herjólfssonar?*)

hornabrjóts; hann fór af Hörðalandi til Íslands, ok nam land milli Kaldaklofsár ok Jökulsár; hann bjó í Skógum enum eystrum; hann var rammaukinn mjök, ok átti deilur við Loðmund enn gamla sem áðr er ritat. Sonr Þrasa var Geirmundr, faðir Þorbjarnar, föður Brands í Skógum, [*föður Skeggja í Skógum, föður Bolla í Skógum, föður Skeggja, föður Hildar, er átti Njáll í Skógum Sigmundarson; þeira son Skeggi faðir Eyjólf, föður Brands, er nú býr í Skógum*].

Hrafn enn heimski hét maðr, son Valgarðs Vémundar sonar orðlokars, Þórólfs sonar váganefs, Hrcereks sonar slöngvandbauga, Haralds sonar Hilditannar Danakonungs; hann fór ór Þrándheimi til Íslands, ok nam land milli Kaldaklofsár ok Lambafellsár; hann bjó at Rauðafelli enu eystra ok var et mesta göfigmennni; hans börn váru þau Jörundr goði ok Helgi bláfauskr ok Freygerðr.

2. Ásgeir kneif hét maðr, son Óleifs hvíta Skæringssonar, Þórólfssonar; móðir hans var Þórhildr, dóttir Þorsteins haugabrjóts; Ásgeirr fór til Íslands ok nam land milli Lambafellsár ok Seljalandsár, ok bjó þar er nú heitir at Auðnum; hans son var Jörundr ok Þorkell, faðir Ögmundar föður Jóns byskups ens helga. Dóttir Ásgeirs var Helga, móðir Þórunnar, móður Þorláks, föður Þórhalls, föður Þorláks byskups ens helga.

Þorgeirr enn hörðski, son Bárðar blönduhorns, fór ór Viggjum ór Þrándheimi til Íslands; hann keypti land at Ásgeiri kneif, milli Lambafellsár ok Írarár, ok bjó í Holti. Fám vetrum síðar fekk hann Ásgerðar, dóttur Asks ens ómálga, ok váru þeira synir Þorgrímr enn mikli ok Holta-Þórír, faðir Þorleifs kráks ok Skorrar-Geirs.

Ófeigr hét ágætr maðr í Raumsdælafylki; hann átti Ásgerði dóttur Asks ens ómálga. Ófeigr varð missátttr við Harald konung hárfagra, ok bjóst af því til Íslandsferðar; enn er hann var búinn, sendi Haraldr konungr menn til hans, ok var (hann) tekinn af lífi, enn Ásgerðr fór út með börn þeira, ok með henni Þórólfr, bróðir hennar laungetinn. Ásgerðr nam land millum Seljalandsmúla ok Markarfljóts, ok Langanes alt upp til Joldusteins, ok bjó norðan í Katanesi. Börn Ófeigs ok Ásgerðar váru Þorgeirr gollnir ok Þorsteinn flöskuskegg, Þorbjörn kyrri ok Álof elliðaskjöldr, er átti Þorbergr kornamúli; þeira börn Eysteinn og Hafþóra, er Eiðr Skeggjason átti. Þorgerðr var ok Ófeigs dóttir, er átti Fiðr Otkelsson.

Þórólfr, bróðir Ásgerðar, nam land að ráði hennar fyrir vestan Fljót milli Deildará tveggja, ok bjó í Þórólfsfelli; hann fœddi þar Þorgeir gollni, son Ásgerðar, er þar bjó síðan; hans son var Njáll, er inni var brendr.

Ásbjörn Reykrketilsson ok Steinfiðr bróðir hans námu land fyrir ofan Krossá fyrir austan Fljót. Steinfiðr bjó á Steinfinnsstöðum, ok er ekki manna frá honum komit. Ásbjörn helgaði landnám sitt Þór ok kallaði Þórsmörk; hans son var Ketill enn auðgi, er átti Þuriði Gollnisdóttur; þeira börn váru þau Helgi ok Asgerðr.

3. Ketill Hæingr hét ágætr maðr í Naumdælafylki, son Þorkels Naumdælajarls ok Hrafnhildar, dóttur Ketils hæings ór Hrafnistu. Ketill bjó þá í Naumudal, er Haraldr konungr hárfagri sendi þá Hallvarð harðfara ok Sigtrygg snarfara til Þórólfs Kveldúlfssonar, frænda Ketils; þá dró Ketill lið saman og ætlaði að veita Þórólfi, enn Haraldr konungr fór et efra um Eldueið, ok fekk skip í Naumdælafylki ok fór svá norðr í Alost á Sandanes, og tók þar af lífi Þórólf Kveldúlfsson; fór þá norðan et ytra ok fann þá marga menn, er til liðs ætluðu við þá Þórólf; hnekti konungr þeim þá. Enn litlu síðar fór Ketill hæingr norðr í Torgar, ok brendi inni Hárek ok Hrærek Hildiríðarsonu, er Þórólf höfðu rægðan dauðarógi; enn eftir þat réð Ketill til Íslandsferðar með Ingunni konu sína ok sonu þeira. Hann kom skipi sínu í Rangárós, ok var enn fyrsta vetr at Hrafnstöftum. Ketill nam öll lönd á milli Þjorsár ok Markarfljóts; þar námu síðan margir göfgir menn með ráði Hæings. Ketill eignaði sér eink-

um land milli Rangár ok Hróarslækjar, alt fyrir neðan Reyðarvatn, ok bjó at Hofi. Þá er Ketill hafði fært flest fong sín til Hofs, varð Ingunn léttari og fœddi þar Hrafn, er fyrst sagði lög upp á Íslandi; því heitir þar at Hrafnstóftum. Hængr hafði undir sik lönd öll fyrir austan Rangá ena eystri ok Vatnsfell, til lækjar þess, er er fellr fyrir utan Breiðabólstað, ok fyrir ofan Þverá, alt nema Dufpaksholt ok Mýrina; þat gaf hann þeim manni, er Dufpakr hét; hann var hamrammr mjök. Helgi hét annar son Hæings; hann átti Valdísi Jólgeirsdóttur; þeira dóttir var Helga, er átti Oddbjörn askasmiðr; við hann er kent Oddbjarnarleiði. Börn þeira Oddbjarnar ok Helgu váru þau Hróaldr, Kolbeinn, Kolfinna ok Ásvör. Stóroltr var enn þriði son Hæings; hans börn váru þau Ormr enn sterki ok Otkell ok Hrafnhildr, er átti Gunnar Baugsson; þeira son var Hámundr, faðir Gunnars á Hlíðarenda. Vestarr hét enn fjórði son Hæings, hann átti Móeiði; þeira dóttir var Ásný, er átti Ófeigr grettir; þeira börn váru þau Ásmundr skegglaus, Ásbjörn, Aldís, móðir Valla-Brands ok Ásvör, móðir Helga ens svarta; Æsa hét ein. Herjólftr hét enn fimti son Hæings faðir Sumarliða, föður Vetrliða skálds; þeir bjoggu í Sumarliðabæ; þar heitir nú undir Brekkum. Vetrliða vágur þeir Þangbrandr prestur ok Guðleifr Arason af Reykhólum um nið. Sæ-

björn goði var son Hrafns Hæingssonar, er átti Unni, dóttur Sigmundar; þeira son Arngeirr.

Sighvatr rauði hét maðr göfgr á Hálogalandi; hann átti Rannveigu, dóttur Eyvindar lamba ok Sigríðar, er átt hafði Þórólfr Kveldúlfsson; Rannveig var systir Finns ens skjálga. Sighvatr fór til Ísland at fýsn sinni, ok nam land at ráði Hæings í hans landnámi fyrir vestan Markarfljót, Einhyrningsmörk fyrir ofan Deildará, ok bjó í Bólstað; hans son (var) Sigmundr faðir Marðar gígju, ok Sigfúss í Hlíð ok Lamba á Lambastöðum, ok Rannveig, er átti Hámundr Gunnarsson ok Þorgerðr, er átti Önundr bildir í Flóa. Annarr son Sighvats var Bárekr, faðir Þórðar, föður Steins.

Jörundr goði, son Hrafns ens heimska, bygði fyrir vestan Fljót, þar er nú heitir á Svertingsstöðum; hann reisti þar hof mikit. Bjórr lá ónuminn fyrir austan Fljó tmilli Krossár ok Joldusteins; þat land fór Jörundr eldi, ok lagði til hofs. Jörundr átti *Þuríði*, dóttur *Þorbjarnar ens gaulverska*; þeira son var Valgarðr goði, faðir Marðar, ok Ulfr örgoði, er Oddverjar eru frá komnir ok Sturlungar; mart stórmenni er frá Jörundi komit á Íslandi.

Þorkell bund'nfóti nam land at ráði Hæings umhverfis Þrihyrning, ok bjó þar undi rfjallinu; hann var hamrammr mjök. Börn Þorkels váru

þau Börkr blátannarskgg, faðir Starkaðar undir Prihyrningi, ok Þórný, er átti Ormr enn sterki, ok Dagrún, móðir Bersa.

4. Baugr hét maðr, fóstbróðir Hæings; hann fór til Íslands, ok var enn fyrsta vetr á Baugsstöðum, enn annað með Hæingi; hann nam Fljóts-hlíð alla at ráði Hæings ofan um Breiðabólstað til móts við Hæing, ok bjó at Hlíðarenda; hans son var Gunnarr í Gunnarsholti ok Eyvindr at Eyvindarmúla; þriði Steinn enn snjalli ok *Híldr dóttir*, er átti Örn í Vælugerði. Þeir Steinn enn snjalli ok Sigmundr, son Sighvats rauða, áttu för utan af Eyrum, ok kvámu til Sandhólaferju allir senn, Sigmundr ok förunautar Steins, ok vildu hvárir fyrr fara yfir ána; þeir Sigmundr stökuðu húskörlum Steins, ok ráku þá frá skipinu; þá kom Steinn at, ok hjó þegar Sigmund banahögg. Um víg þetta urðu Baugssynir allir sekir ór Hlíðinni; fór Gunnarr í Gunnarsholt, enn Eyvindr undir Fjöll austur í Eyvindarhóla, enn Snjallsteinn í Snjallsteinshöfða. Þat líkaði illa [*Þorgerði*] dóttur Sigmundar, er föðurbani hennar fór út þannig, ok eggjaði Önund, bónda sinn, at hefna Sigmundar. Önundr fór með þrjá tigi manna í Snjallshöfða ok bar þar eld at húsum. Snjallsteinn gekk út ok gafst upp; þeir leiddu hann í höfðann, ok vágu hann þar; eftir víg þat mælti Gunnarr; hann átti þá Hrafnhildi Stórolfsdóttur, systur Orms ens sterka. Hámundr

var son þeira. Þeir váru báðir afreksmenn at afli ok vænleik. Önundr varð sekr um víg Snjallsteins; hann sat með fjölmenni tvá vetr. Örn í Vælugerði, mágr Gunnars, helt njósnum til Önundar. Eftir jól enn þriðja vetr fór Gunnarr með þrjá tigu manna at Önundi, at tilvísan Arnar; Önundr fór frá leik með tólfta mann til hrossa sinna; þeir fundust í Orrostudal; þar fell Önundr með fjórða mann, enn einn af Gunnari. Gunnarr var á blárri kápu; hann reið upp eftir Holtum til Þjórsár, ok skamt frá ánni fell hann af baki, ok var þá örendr af sárum. Þá er synir Önundar vóxu upp, Sigmundr kleykir ok Eilífr auðgi, sóttu þeir Mörðr gígju at eftirmáli, frænda sinn. Mörðr kvað þat óhægt um sekjan mann; þeir kváðu sér við Örn verst líka, er þeim sat næst. Mörðr lagði þat til, at þeir skyldu fá Erni skóggangssök, ok koma honum svá ór heraði. Önundarsynir tóku beitingamál á hendr Erni, ok varð hann svá sekr, at Örn skyldi falla óheilagr fyrir Önundarsonum hvarvetna nema í Vælugerði ok í örskotshelgi við landeign sína. Önundarsynir sátu jafnan um hann, en hann gætti sín vel. Svá fengu þeir færi á Erni, at hann rak naut ór landi sínu; þá vágðu þeir Örn, ok hugðu menn, at hann mundi óheilagr fallit hafa. Þorleifr gneisti, bróðir Arnar, keypti at Þormóði Þjóstarssyni, at hann helgaði Örn; Þormóðr var þá kominn út á Eyr-

um; hann skaut þá skot svá langt af handboga at fell Arnar varð í örskotshelgi hans. Þá mæltu þeir Hámundr Gunnarsson ok Þorleifr fyrir Örn, enn Mörðr veitti þeim bræðrum; þeir guldu eigi fé, enn skyldu vera heraðssekir ór Flóa; þá bað Mörðr til handa Eilífi Þorkötlu Ketilbjarnardóttur ok fylgðu henni heiman Höfðalönd, ok bjó Eilífr þar; enn til handa Sigmundi bað hann Arngunnar, dóttur Þorsteins drangakarls, ok réðist hann austr í sveit; þá gifti Mörðr ok Rannveigu, systur sína, Hámundi Gunnarssyni, ok réðst hann þá aftir í Hlíðina, ok var þeira son Gunnar at Hlíðarenda.

Hildir ok Hallgeirr ok Ljót, systir þeira, váru kynjuð af Vestrlöndum; þau fóru til Íslands, og námu land milli Fljóts ok Rangár, Eyjasveit alla upp til Þverár. Hildir bjó í Hildisey; hann var faðir Móeiðar. Hallgeirr bjó í Hallgeirsey; hans dóttir var Mabil, er átti Helgi Hæingsson; enn Ljót bjó á Ljótarstöðum.

5. Dufpakr í Dufpaksholti var leysingi þeira bræðra; hann var hamramr mjök, ok svá var Stórólfr Hæingsson; hann bjó þá at Hváli; þá skildi um beitingar. Þat sá ófreskr maðr um kveld nær dagsetri, at björn mikill gekk frá Hváli, enn griðungr frá Dufpaksholti, ok fundur á Stórólfsvelli, ok gengust at reiðir, ok mátti björninn meira. Um morguninn var þat sét, at dalr var þar eftir, er þeir höfðu fundizt, sem

um væri snúit-jörðinni, ok heitir þar nú Öldu-gröf; báðir váru þeir meiddir.

Ormr ánauðgi, son Bárðar Bárekssonar, bróðir Hallgríms sviðbálka, bygði fyrst Vestmannaeyjar, enn áðr var þar veiðistöð ok lítil vetrseta eðr engi; hans dóttir var Halldóra, er átti Eilífr Valla-Brandsson.

Eilífr ok Björn, bræðr, fóru ór Sogni til Íslands; Eilífr nam Odda ean litla upp til Reyðarvatns og Víkingslækjar; hann átti Helgu, dóttur Önundar bílds; þeira son var Eilífr ungi, er átti Oddnýju, dóttur Odds ens mjóva; þeira dóttir var Þuríðr, er átti Þorgeirr í Odda; þeira dóttir var Helga.

Björn bjó í Svínhaga, ok nam land upp með Rangá; hans börn váru þau Þorsteinn, faðir Gríms holtaskalla, ok Hallveig, móðir Þórunnar, móður Guðrúnar, móður Sæmundar, föður Brands byskups.

Kolr hét maðr, son Óttars ballar; hann nam land fyrir austan Reyðarvatn ok Stotalæk fyrir vestan Rangá, ok Tröllaskóg, og bjó at Sandgili; hans son var Egill, er sat fyrir Gunnari Hámundarsyni hjá Knafahólum, ok fell þar sjálfr ok austmenn tveir með honum, ok Ari húskarl hans, enn Hjörtr bróðir Gunnars af hans liði. Synir Gunnars váru þeir Hrani og Hámundr. Gunnar barðist við Otkel ór Kirkjubævið garð at Hofi, ok fell Otkell þar ok Skammkell. Geirr

goði ok Gizurr hvíti ok Ásgrímr Elliðagrímsson, ok Störkuðr undan Þríhyrningi, son Barkar blátannarskeggs, Þorkelssonar bundinfóta, er átti Þuríði Egilsdóttur frá Sandgili, þeir fóru um Leiðarskeið, ok kómu um nótt með þrjá tigu manna til Hlíðarenda, enn Gunnarr var fyrir með einn karlmann fulltíða; tveir menn fellu ór liði Geirs, enn sextán urðu sárir, áðr Gunnarr fell.

Hrólfur rauðskeggr hét maðr; hann nam Hólmslönd öll milli Fiskár ok Rangár, ok bjó at Forsi; hans börn váru þau Þorsteinn rauðnefr, er þar bjó síðan, ok Þóra, móðir Þorkels mána, ok Æsa, móður Þórunnar, móður Þorgeirs at Ljósavatni, ok Helga, móðir Odds frá Mjósyndi. Dóttir Odds var Ásborg, er átti Þorsteinn goði, faðir Bjarna ens spaka, föður Skeggja, föður Markúss lögsögumanns. Þorsteinn rauðnefr var blótmaðr mikill; hann blótaði forsinn, ok skyldi bera leifar allar á fossinn; hann var ok framsýnn mjök. Þorsteinn lét telja sauði sína ór rétt tuttugu hundruð, enn þá hljóp alla réttina þaðan af; því var sauðrinn svá margr, at hann sá á haustum, hverir feigir váru ok lét þá skera. Enn et síðasta haust er hann lifði, þá mælti hann í sauðarétt: „Skeri þér nú sauði þá er þér vilit; feigr em ek nú, eða allr sauðrinn elligar, nema bæði bæði sé.“ Enn þá nótt er hann andaðist, rak sauðinn allan í forsinn.

6. Úlfr gyldir hét hersir ríkr á Þelamörk hann bjó á Fíflavöllum; hans son var Ásgrímr, er þar bjó síðan. Haraldr konungr hárfagri sendi Þórorm frænda sinn ór Þrumu, at heimta skatt af Ásgrími, enn hann galt eigi; þá sendi hann Þórorm annat sinn til höfuðs honum, ok drap hann þá Ásgrím. Þá var Þorsteinn, son Asgríms, í vikingu, enn Þorgeirr, annarr son hans, var tíu vetra. Nökkuru síðar kom Þorsteinn úr hernaði ok lagði til Þrumu, ok brendi Þórorm inn ok hjú hans öll, enn hjó búið ok rænti öllu lausafé. Eftir þat fór hann til Íslands, ok Þorgeirr, bróðir hans, ok Þórunn, móðursystir þeira; hon nam Þórunnarhálsa alla.

Þorgeirr keypti Oddalönd at Hrafní Hæingsyni, ok Strandir báðar ok Varmadal, ok alt milli Rangár ok Hróarslækjar; hann bjó fyrst í Odda, ok fekk Þoríðar Eilífsdóttur.

Þorsteinn nam land at ráði Flosa, er numit hafði áðr Rangárvöllu, fyrir ofan Vikingslæk til móts við Svínhaga-Björn ok bjó í Skarðinu eystra; um hans daga kom skip út í Rangárós; þar var á sótt mikil, enn menn vildu eigi hjálpa þeim; þá fór Þorsteinn til þeira, ok færði þá þangat er nú heita Tjaldstaðir, ok gerði þeim þar tjald, ok þjónaði þeim sjálfr, meðan þeir lifðu; enn þeir dó allir; enn sá er lengst lifði gróf niðr fé mikit, ok hefir þat ekki fundizt síðan. Af

Þessum atburðum var Þorsteinn tjaldstœðingr kallaðr; hans synir váru þeir Gunnar ok Skeggi.

7. Flosi hét maðr, son Þorbjarnar ens gaulverska; hann drap þrjá sýslumenn Haralds konungs hárfagra, ok fór eftir þat til Íslands; hann nam land fyrir austan Rangá alla Rangárvöllu ena eystri; hans dóttir var Ásný, móðir Þoríðar er Valla-Brandr átti. Son Valla-Brands var Flosi, faðir Kolbeins, föður Guðrúnar, er Sæmundr fróði átti. *Flosi átti Guðrúnu Þírisdóttur, Skegg-Broddasonar; þeira synir váru þeir Kolbeinn, er fyrr var nefndr, ok Bjarni, faðir Bjarna, föður Flosa, föður Valgerðar, móður herra Erlends, föður Hauks. Af því fór Loftur hinn gamli, systurson Flosa, at blóta á Gaulum, at Flosa var ófritt í Noregi. Flosi hinn norræni átti Þórdísi ena miklu, dóttur Þírunnar ennar auðgu, Ketils dóttur hins einhenda; þeira dóttir var Ásný, er átti Þorgeirr.*

Ketill enn einhendi hét maðr, son Auðunar þunnkárs; hann nam Rangárvöllu alla ena ytri, fyrir ofan Lækjarbotna ok fyrir austan Þjórsá, ok bjó at Á; hann átti Asleifu Þorgilsdóttur. Þeira son var Auðunn, faðir Brynjólfs, föður Bergþórs, föður Þorláks, föður Þórhalls, föður Þorláks biskups ens helga.

Ketill örriði, bræðrungr Ketils einhenda, nam land et ytra með Þjórsá ok bjó at Völlum enum ytrum; hans son var Helgi hrogn, er átti Helgu,

dóttur Hrólfs rauðskeggs; þeira son var Oddr mjóvi, faðir Ásborgar, er átti Þorsteinn goði, ok Oddnýjar, er Filífr ungi átti.

Ormr auðgi, son Úlfs hvassa, nam land með Rangá at ráði Ketils einhenda, ok bjó í Húsa-garði ok Áskell, son hans. eftir hann, enn [*Brandr*] son [*Áskels*] reisti fyrst bæ á Völlum; frá honum eru Vallverjar komnir.

Þorsteinn lunan hét maðr norrænn ok farmaðr mikil; honum var þat spáð, at hann mundi á því landi deyja, er þá var eigi bygt. Þorsteinn fór til Íslands í elli sinni með Þorgilsi syni sínum; þeir námu enn efra hluta Þjorsárholta ok bjoggu í Lunansholti, ok þar var Þorsteinn heygðr. Dóttir Þorgils var Ásleif, er átti Ketill einhendi; synir þeira váru þeir Auðun, er áðr var nefndr, ok Eilífr, faðir Þorgeirs, föður Skeggja, föður Hjalta í Þjorsárdal; hann var faðir Jórunnar, móður Guðrúnar, móður Einars, föður Magnúss byskups.

Gunnsteinn berserkjabani, son Bölverks blind-ingatrjónu, drap tvá berserki, ok hafði annarr þeira áðr drepit Grjótgarð jarl í Sölva fyrir innan Agðanes. Gunnsteinn var síðan skotinn með öru finskri ór skógi á skipi sínu norðr í Hefni. Son Gunnsteins var Þorgeirr, er átti Þórunni ena auðgu, dóttur Ketils einhenda; þeira dóttir var Þórdís en mikla.

8. Rápormr ok Jógeirr, bræðr, kvámu vest.

an um haf til Íslands; þeir námu land milli Þjórsár ok Rangár; Ráþormr eignaðist land fyr-
austan Rauðalæk, ok bjó í Vætleifsholti; hans
dóttir var Arnbjörg, er átti Svertingr Hrolleifs-
son; þeira börn váru þau Grímr lögsögumaðr
ok Jórunn. Siðar átti Arnbjörgu Gnúpr Molda-
Gnúpsson, ok váru þeira börn Hallsteinn á
Hjalla ok Rannveig, móðir Skafta lögsögumanns,
ok Geirný, móðir Skáld-Hrafn. Jólgeirr eign-
aðist land fyrir utan Sauðalæk ok til Steinslækj-
ar; hann bjó á Jólgeirsstöðum.

Áskell hnokan, son Dufþaks Dufnialssonar,
Kjarvals sonar Írakonungs, hann nam land milli
Steinlækjar ok Þjórsár, ok bjó á Árkelshöfða;
hans son var Ásmundr, faðir Ásgauts, föður
Skeggja, föður Þorvalds, föður Þorlaugar, móður
Þorgerðar, móður Jóns byskups ens helga.

Þorkell bjálfi, fósbróðir Ráþorms, eignaðist
lönd öll milli Rangár ok Þjórsár, ok bjó í Háfi;
hann átti Þórunni eyversku; þeira dóttir var
Þórdís, móðir Skeggja, föður Þorvalds í Ási; það-
an hafði Hjalti mágr hans reiðskjóta til alþingis,
ok þeir tólf, þá er hann var út kominn með
kristni, enn engi treystist annarr fyrir ofríki
Runólfs Úlfssonar, er sektan hafði Hjalta um
goðgá.

Nú eru ritaðir þeir menn, er lönd hafa numit
í landnámi Ketils hæings.

Loftr, son Orms Fróðasonar, kom af Gaulum

til Íslands ungr at aldri, ok nam fyrir útan Þjórsár, milli Rauðár ok Þjórsár, ok upp til Skúfslækjar, ok Breiðamýri ena eystri upp til Súluholts, ok bjó í Gaulverjabœ, ok Oddný, móðir hans, dóttir Þorbjarnar gaulverska. Loftr fór útan et þriðja hvert sumar fyrir hönd þeira Flosa beggja, móðurbróður síns, at blóta at hofi því, er Þorbjörn móðurfaðir hans hafði varðveitt. Frá Lofti er mart stórmenni komit: Þorlákr enn helgi, Páll ok Brandr.

Þorviðr, son Úlfars, bróðir Hildar, fór af Vors til Íslands enn Loftr frændi hans gaf honum land á Breiðamýri, ok bjó hann í Vorsabœ; hans börn váru þau Hrafn ok Hallveig, er átti Özurr enn hvíti; þeira son Þorgrímr kampi.

Þórarinn hét maðr, son Þorkels ór Alviðru, Hallbjarnarsonar Hörðakappa; hann kom skipi sínu í Þjórsárós, ok hafði þjórshöfuð á stafni, ok er þar áin við kend. Þórarinn nam land fyrir ofan Skúfslæk til Rauðár, með Þjórsá; hans dóttir var Heimlaug, er Loftr gekk at eiga sextugr.

9. Haraldr gullskeggr hét konungr í Sogni; hann átti Sólvöru, dóttur Hundólfs jarls, systur Atla jarls ens mjóva; þeira dóetr váru þær Þóra, er átti Hálfðán svarti Upplendingakonung, ok Þuríðr, er átti Ketill helluflagi. Haraldr ungi var son þeira Hálfðanar ok Þóru; honum gaf Haraldr gullskeggr nafn sitt ok ríki. Haraldr kon-

ungr andaðist fyrst þeira, enn þá Þóra, enn Haraldr ungi síðast; enn þá bar ríkit undir Hálfðan konung, enn hann setti yfir þat Atla jarl enn mjóva. Síðan fekk Hálfðan konungr Ragnhildar, dóttur Sigurðar hjartar, ok var þeira son Haraldr hárfagri. Þá er Haraldr konungr gekk til ríkis í Noregi, ok hann mægðist við Hákon jarl Grjótgarðsson, fekk hann Sygnafylki Hákon jarli, mági sínum, er Haraldr konungr fór í Vík austr; enn Atli jarl vildi eigi af láta ríkinu, áðr hann fyndi Harald konung. Jarlarnir þreyttu þetta með kappi, ok drógust at her; þeir fundust á Fjöllum í Stafanesvági ok börðust; þar fell Hákon jarl, enn Atli varð sárr, ok fluttr í Atley; hann dó þar ór sárum. Eftir þat helt Hásteinn ríkinu, þar til er Haraldr konungr ok Sigurðr jarl drógu her at honum; Hallsteinn stökk þá undan, ok brá til Íslandsferðar; hann átti Þóru Ölvésdóttur; Ölvér ok Atli váru synir þeira. Hallsteinn skaut setstökkum fyrir borð í hafi at fornum síð; þeir kómu á Stálfjöru fyrir Stokkseyri, enn Hallsteinn kom í Hallsteinsund fyrir austan Stokkseyri, ok braut þar. Hallsteinn nam land milli Rauðár ok Ölfusár upp til Fyllarlækjar, ok Breiðamýri alla upp at Holtum, ok bjó á Stjörnusteinum, ok svá Ölvér son hans, eftir hann; þar heita nú Ölvésstaðir. Ölvér hafði landnám alt fyrir utan Grímsá, Stokkseyri ok Ásgautsstaði, enn Atli átti alt

milli Grímsár ok Rauðár; hann bjó í Traðarholti. Ölvér andaðist barnlauss. Atli tók eftir hann lönd ok lausafé; hans leysingi var Brattr í Brattsholti ok Leiðólfr á Leiðólfsstöðum. Atli var faðir Þórðar dofna, föður Þorgils Errubeinsstjúps, föður *Grímsglammaðar*, föður *Ingjalds*, föður *Gríms*, föður *þeira Barkar ok Einars*, föður *Hallkötlu*, er átti *Rafn Sveinbjarnarson*; *þeira dóttir Steinunn*, móðir *herra Rafns*, ok *Herdís*, móðir *Ála*, föður *Steinunnar*, er *Haukr Erlendsson* átti. *Börkr Grímsson* var faðir *Ragnhildar*, er *Flosi Bjarnason* átti; *þeira börn Einarr ok Bjarni*, ok *Valgerðr*, móðir *herra Erlends*, föður *Hauks*. *Þórdís* var önnur dóttir *Flosa*, móðir *frú Ingigerðar*, móður *frú Guðrúnar ok Hallberu abbadísar*; *Halla* var ok dóttir *Flosa*, móður *herra Kristóforus*.

Hallsteinn hét maðr, er fór ór Sogni til Íslands, mágr Hallsteins; honum gaf hann ytra hlut Eyrarbakka; hann bjó á Framnesi; hans son var Þorsteinn, faðir Arngríms, er veginn var at fauskagrefti; hans son Þorbjörn á Framnesi.

Þórir, son Asa hersis, Ingjaldssonar, Hróaldssonar, fór til Íslands ok nam Kallnesinga hrepp allan, upp frá Fyllarlæk, ok bjó at Selforsi; hans son var Tyrfingr, faðir Þuriðar, móður Tyrfings, föður Þorbjarnar prests ok Hámundar prests í Goðdölum.

Hróðgeirr enn spaki ok Oddgeir, bróðir hans,

er þeir Fiðr enn auðgi ok Hafnar-Ormr keyptu brutt ór landnámi sínu, námu Hraungerðinga hrepp, ok bjó Oddgeir í Oddgeirshólum; hans son var Þorsteinn öxnabroddr, faðir Hróðgeirs, föður Ögurs í Kambakistu; enn dóttir Hróðgeirs ens spaka var Gunnvör, er átti Kolgrímr enn gamli; þaðan eru Kvistlingar komnir.

Önundr bíldr, er fyrr var getit, nam land fyrir austan Hróarslæk ok bjó í Önundarholti; frá honum er mart stórmenni komit, sem fyrr er ritat.

10. Özurr hvíti hét maðr, son Þorleifs ór Sogni. Özurr vá víg í véum á Upplöndum, þá er hann var í brúðför með Sigurði hrísa; fyrir þat varð hann landflótti til Íslands, ok nam fyrst öll Holtalönd milli Þjórsár ok Hraunslækjar; þá var hann seytján vetra, er hann vá vígit. Hann fekk Hallveigar Þorviðardóttur; þeira son var Þorgrímr kampi, faðir Özurar, föður Þorbjarnar, föður Þórarins, föður Gríms Tófusonar. Özurr bjó í Kampaholti; hans leysingi var Böðvarr, er bjó í Böðvarstöftum við Viðiskóg: honum gaf Özurr hlut í skóginum, ok skildi sér eftir hann barnslausan. Örn ór Vælugerði, er fyrr er getit, stefndi Böðvari um sauðatöku; því handsalaði Böðvarr Atla Hallsteinssyni fé sitt, enn hann ónýtti mál fyrir Erni. Özurr andaðist, þá er Þorgrímr var ungr; þá tók Hrafn Þorviðarson við fjárvarðveislu Þorgríms. Eftir andlát Böð-

vars taldi Hrafn til Viðiskógs, ok bannaði Atla, enn Atli þóttist eiga. Þeir Atli fjórir fóru eftir viði. Leiðólfr var með honum; smalamaðr sagði Hrafn þat, enn hann reið eftir þeim við átta mann. Þeir fundust í Orrostudal ok börðust þar; húskarlar Hrafn's féllu tveir; hann varð sárr; einn fell af Atla, enn *hann* varð sárr banasárum ok reið heim; Önundr bildr skildi þá ok bauð Atla til sín. Þórðr dofni, son Atla, var þá tíu vetra; enn þá er hann var fimtán vetra, reið Hrafn í Einarshöfn til skips; hann var í blárri bápu ok reið heim um nótt. Þórðr sat einn fyrir honum hjá Haugavaði skamt frá Traðarholti, ok vá hann þar með spjóti; þar er Hrafn's haugur fyrir austan götuna, enn fyrir vestan Hallsteins haugr ok Atla haugr ok Ölvés; vígin fellust í faðma. Þórðr hófst af þessu; hann fekk þá Þórunnar, dóttur Ásgeirs aust mannaskelfis, er drap skipshöfn austmanna í Grímsárósi, fyrir rán þat, er hann var rænt austr. Þórðr hafði þá tvá vetr ok tuttugu, er hann keypti skip í Knarrarsundi ok vildi heimta arf sinn; þá tal hann fé mikit; því vildi Þórunn eigi fara, ok tók þá við löndum. Þorgils, son Þórðar, var þá tvævetr. Skip Þórðar hvarf. Vetri síðar kom Þorgrímr errubeinn til ráða með Þórunni, son Þormóðar ok Þuríðar Ketilbjarnardóttur; hann fekk Þórunnar, ok var þeira son Hæringr.

Óláfr tvennumbrúni hét maðr; hann fór af Lófót til Íslands; hann nam Skeið öll milli Þjórsár ok Hvítár til Sandlækjar; hann var hamrammr mjök. Óláfr bjó á Ólafsvöllum; hann liggir í Brúnahaugi undir Vörðufelli. Óláfr átti Áshildi, ok var þeira son Helgi transti ok Þórir drífa, faðir Þorkels gullkárs, föður Orms, föður Helgu, móður Odds Hallvarðssonar. Vaði var enn þriði son Óláfs, faðir Gerðar. Þorgrímr lagði hug á Áshildi, þá er Ólafur var dauðr, enn Helgi vandaði um; hann sat fyrir Þorgrími við gatnamót fyrir neðan Áshildarmýri; Helgi bað hann láta af komum; Þorgrímr lézt eigi hafa barna skap; þeir börðust; þar fell Þorgrímr. Áshildr spurði, hvar Helgi hefði verit; hann kvað vísu:

Vark þars fell til fyllar
 (fram sótti vinr dróttar)
 Errubeinn, es unnar
 ítr-tungur hátt sungu.
 Ásmóðar gaf ek Óðni
 arfa þróttar djarfan,
 guldum gálgavaldi
 Gauts tafn, enn ná hrafni.

Áshildr kvað hann hafa höggvit sér höfuðsbana Helgi tók sér far í Einarshöfn. Hæringr, son Þorgríms, var þá sextán vetra er hann reið í Höfða at finna Teit Gizurarson með þriðja mann. Þeir Teitr riðu fimtán at banna Helga far; þeir fundust í Merkrhruuni upp frá Mörk við

Helgahvál; þeir Helgi váru þrír saman, komnir af Eyrum; þar fell Helgi ok maðr með honum ok einn af þeim Teiti; í faðma fellust víg þau. Sonr Helga var Sigurðr enn landverski ok Skefill enn haukdælski, faðir Helga dýrs, er barðist við Sigurð, son Ljóts löngubaks, í Öxarárhólma á alþingi. Um þat orti Helgi þetta:

Band er á hægri hendi
(hlaut ek sár af Tý báru
(lýg ek eigi þat) leygjjar
linnvengis Bl) minni.

Hrafn var annar son Skefils, faðir Gríms, föður Ásgeirs, föður Helga.

11. Þrándr mjöksiglandi Bjarnarson, bróðir Eyvindar austmanns, er fyrr er getit, hann var í Hafrsfirði mót Haraldi konungi, ok varð síðan landflótti, ok kom til Íslands síð landnámatíðar; hann nam land milli Þjórsár ok Laxár, ok upp til Kálfár ok til Sandlækjar; hann bjó í Þrándarholti; hans dóttir var Helga, er Þormóðr skafti átti.

Ölvér barnakarl hét maðr ágætr í Noregi; hann var víkingr mikill; hann lét eigi henda börn á spjótsoddum, sem þá var víkingum títt; því var hann barnakarl kallaðr; hans synir váru þeir Steinólfr, faðir Unu, er átti Þorbjörn laxakarl, ok Einarr, faðir Ófeigs grettis ok Óleifs breiðs, föður Þormóðar skafta. Steinmóðr

var enn þriði son Ölvés barnakarls, faðir Konáls, föður Álfðisar ennar bareysku, er Óleifr feilan átti. Son Konáls var Steinmóðr, faðir Halldóru, er átti Eilifr, son Ketils einhenda. Þeir frændr Ófeigr grettir ok Þormóðr skafti fóru til Íslands ok váru enn fyrsta vetr með Þorbirni laxakarli, mági sínum; enn um vart gaf hann þeim Gnúpverjahrepp: Ófeigi enn ytra hlut milli Þverár ok Kálfár, ok bjó hann á Ófeigsstöðum hjá Steinholti; enn Þormóði gaf hann enn eystra hlut, ok bjó hann í Skaftaholti. Dætr Þormóðar váru þær Þórvör, móðir Þórodds goða, föður Lög-Skafta, ok Þórvé, móðir Þorsteins goða, föður Bjarna ens spaka, föður Skegga, föður Markúss lögsögunnans, föður Valgerðar, móður Böðvars, föður Þórðar prests, föður Þorleifs í Görðum ok Markúss á Melum ok Böðvars í Bæ. Lög-Skafti var faðir Þorsteins holmun(n)s, föður Gunnhildar, móður Vilborgar, móður Magnúss, föður Snorra á Melum. Ófeigr fell fyrir Þorbirni jarlakappa í Grettisgeil hjá Hæli. Dóttir Ófeigs var Aldis, móðir Valla-Brands.

Þorbjörn laxakarl nam Þjórsárdal allan ok Gnúpverjahrepp allan ofan til Kálfár, ok bjó enn fyrsta vetr at Miðhúsum; hann hafði þrjár vetrsetr, áðr hann kom í Haga; þar bjó hann til dauðadags; hans synir váru þeir Otkell í Þjórsárdal ok Þorkell trandill, ok Þorgils, faðir

Otkötlu, móður Þorkötlu, móður Þorvalds, föður Döllu, móður Gizurar byskups.

Þorbjörn jarlakappi hét maðr, norrœnn at kyni; hann fór ór Orkneyjum til Íslands; hann keypti land í Hrunamannahreppi at Mávi Naddoðarsyni, alt fyrir neðan Selslæk, á milli (ok) Laxár, ok bjó at Hólum; hans synir váru þeir Sölmundr, faðir Sviðu-Kára, ok Þormóðr, faðir Finnu, er átti Þormóðr í Karlafirði; þeira dóttir var Álfgerðr, móðir Gests, föður Valgerðar, móður Þorleifs beiskalda, *föður Álfeidar móður Þorláks. föður Ketils prests, föður Herðisar, móður barna Páls byskups.*

Bröndólfr ok Már, Naddoðar synir ok Jórunnar, dóttur Övés barnakarls, kómu til Íslandsbygðar snemma; þeir námu Hrunamannahrepp, svá vítt sem vötn deila. Bröndólfr bjó at Berg-hyl; hans synir váru þeir Þorleifr, faðir Bröndólfs, föður Þorkels skotakolls, föður Þórarins, föður Halls í Haukadal ok Þorláks, föður Rúnólfs, föður Þorláks byskups. Már bjó á Mástöðum; hans son var Beinir, faðir Kolgrímu, móður Skeggja, föður Hjalta.

Þorbrandr son Þorbjarnar ens óarga, ok Ásbrandr son hans, kómu til Íslands síð landnámstíðar, ok visaði Ketilbjörn þeim til landnáms fyrir ofan múla þann, er fram gengr hjá Stakksá, ok til Kaldakvísar, ok bjoggu í Haukadal. Þeim þóttu þau lönd of lítil, er tungan

eystri var þá bygð; þá jóku þeir landnám sitt, ok námu enn efra hlut Hrunamannahrepps sjónhending ór Múla í Ingjaldsgnúp fyrir ofan Gyldarhaga. Börn Ásbrands váru Vébrandr ok Arngerðr. *Vébrandr var faðir Oddlaugar, er átti Svertingr Rúnólfsson.*

Eyfrøðr enn gamli nam tunguna eystri milli Kaldakvislar ok Hvítár, ok bjó í Tungu; með honum kom út Drumboddr, er bjó á Drumboddsstöðum.

12. Ketilbjörn hét maðr ágætr í Naumudal; hann var Ketilsson ok Æsu, dóttur Hákonar jarls Grjótgarðssonar; hann átti Helgu dóttur Þórðar skeggja. Ketilbjörn fór til Íslands, þá er landit var víða byggt með sjá; hann hafði skip þat, er Elliði hét; hann kom í Elliðaárós fyrir neðan heiði; hann var enn fyrsta vetr með Þórði skeggja, mági sinum. Um várit fór hann upp um heiði at leita sér landkosta; þeir höfðu náttból ok gerðu sér skála; þar heitir nú Skálabrekka. Enn er þeir fóru þaðan, kvámu þeir at á þeiri, er þeir kölluðu Öxará; þeir týndu þar öxi sinni; þeir áttu dvöl undir fjallsmúla þeim, er þeir nefndu Reyðarmúla; þar lágu þeim eftir áreyðar þær, er þeir tóku í ánni. Ketilbjörn nam Grímsnes alt upp frá Höskuldsloek, ok Laugarþal allan, ok alla Biskupstungu upp til Stakksár, ok bjó at Mosfelli. Börn þeira váru þau Teitr ok Þormóðr, Þorleifr, Ketill, Þorkatla, Odd-

leif, Þorgerðr, Puriðr. Skæringr hét einn son Ketilbjarnar laungetinn. Ketilbjörn var svá auðigr at lausafé, at hann bauð sonum sínum at slá þvertré af silfri í hofit, þat er þeir létu gera; þeir vildu þat eigi; þá ók hann silfrit upp á fjallit á tveimr öxnum, ok Haki, þræll hans, ok Bót, ambátt hans; þau fálu féit svá at eigi finst. Síðan drap hann Haka í Hakaskarði, enn Bót í Bótarskarði. Teitr átti Álöfu, dóttur Bøðvars af Vors, Víkinga-Kárazonar; þeira son var Gizurr hvíti, faðir Ísleifs byskups, föður Gizurar byskups. Annarr son Teits var Ketilbjörn, faðir Kols, föður Þorkells, föður Kols Víkverkjabyskups. Marí stórmenni er frá Ketilbirni komit.

Ásgeir hét maðr, Úlfsson; honum gaf Ketilbjörn Þorgerði, dóttur sína, ok lét henni heiman fylgja Hlíðarlönd öll fyrir ofan Hagagarð; hann bjó at Hlíð enni ytri; þeira son var Geirr goði ok Þorgeir, faðir Bárðar at Mosfelli.

Eilífr auðgi, son Önundar bílds, fekk Þorkötl Ketilbjarnardóttur, ok fylgdu henni heiman Höfðalönd; þar bjoggu þau; þeira son var Þórir, faðir Þórarins sælings.

Véþormr, son Vémundar ens gamla, var hersir ríkr; hann stökk fyrir Haraldi konungi austr á Jamtaland ok ruddi þar merkr til bygðar. Hólmfastr hét son hans, enn Grímr hét systurson hans; þeir váru í vestrvíking, ok drápu í Suðreyjum Ásbjörn jarl skerjablesa, ok tóku þar at

herfangi Álöfu, konu hans, ok Arneiði, dóttur hans, ok hlaut Hólmfastr hana ok seldi hana í hendr föður sínum ok lét vera ambátt. Grímr fekk Álofar, dóttur Þórðar vaggagða, er jarl hafði átta. Grímr fór til Íslands og nam Grímsnes alt upp til Svínavatns. ok bjó í Öndurðunesi fjóra vetr, enn síðan at Búrfelli; hans son var Þorgils, er átti Æsu, *systur* Gests [*Oddleifssonar*]; þeira synir váru þeir Þórarinn at Búrfelli ok Jörundr í Miðengi.

Hallkell, bróðir Ketilbjarnar sammæddr, kom til Íslands, ok var með Ketilbirni enn fyrsta vetr; Ketilbjörn bauð at gefa honum land; Hallkatli þótti lítilmannlegt at þiggja land, ok skoraði á Grím til landa eðr hólmgöngu. Grímr gekk á hólmi við Hallkel undir Hallkelshólum ok fell þar, enn Hallkell bjó þar síðan; hans synir váru þeir Otkell, er Gunnarr Hámundarson vá, ok Oddr at Kiðjabergi, faðir Hallbjarnar, er veginn var við Hallbjarnarvörður, ok Hallkell, faðir Hallvarðar, föður Þorsteins, er Einnarr Hjaltlendingr vá. Son Hallkels Oddssonar var Bjarni, faðir Halls, föður Orms, föður Bárðar, föður Valgerðar, móður Halldóru, er Magnús byskup Gizurarson átti.

Nú er komit at landnámi Ingólfs; enn þeir menn, er nú eru taldir, hafa bygt í hans landnámi.

13. Þorgrímr bíldr, bróðir Önundar hífds,

nam lönd öll fyrir ofan Þverá ok bjó at Bildsfelli; hans leysingi var Steinrøðr, son Melpatrix af Írlandi; hann eignaðist öll Vatnslönd, ok bjó á Steinrøðarstöðum; *Steinrøðr* var manna vænstr; hans son var Þormóðr, faðir Kárs, föður Þormóðar, föður Brands, föður Þóris, er átti Helgu Jónsdóttur.

Hrolleifr, son Einars, Ölvés sonar barnakarls, kom í Leiruvág, þá er byggt var alt með sjó; hann nam lönd til móts við Steinrøð öll fyrir utan Exará, er fellr um Þingvöll, ok bjó í Heiðabæ nokkora vetr. Þá skoraði hann á Eyvind í Kvíguvágum til hólmgöngu eðr landsölu, enn Eyvindr kaus heldr at þeir keyptu löndum. Eyvindr bjó nokkora vetr síðan í Heiðarbæ, ok fór síðan á Rosmhvalanes til Bearskerja, enn Hrolleifr bjó síðan í Kvíguvágum, ok er þar heygðr; hans son var Svertingr, faðir Gríms lögsögumanns at Mosfelli.

Ormr enn gamli (*var*) son Eyvindar jarls, Arn móðs sonar jarls, Nereiðs sonar jarls ens gamla; Ormr nam land fyrir austan Varmá til Þverár, ok um Ingólfsfell alt, ok bjó í Hvammi; hans son var Darri, faðir Arnar. Eyvindr jarl var með Kjötvauða mót Haraldi konungi í Hafrsfirði.

Alfr enn egðski stökk fyrir Haraldi konungi af Ögðum ór Noregi; hann fór til Íslands ok kom skipi sínu í ós þann, er við hann er kendr ok Alfsós heitir; hann nam lönd öll fyrir utan

Varmá ok bjó at Gnúpum. Þorgrímr Grímólfs-son var bróðurson Álfs; hann fór út með honum ok tók arf eftir hann, því at Álfr átti ekki barn. Sonr Þorgríms var Eyvindr, faðir Þór-odds goða, ok Özurar, er átti Beru, dóttur Egils Skalla-Grímssonar. Móðir Þorgríms var Körmlöð, dóttir Kjarvals Írakonungs. *Dóttir Þór-odds goða var Helga, móðir Gríms glömmuðs, föður Ingjalds, föður Gríms, föður Barkar, föður Ragnhildar, föður Valgerðar, móður herra Erlends, föður Hauks.*

14. Þórir haustmyrkr nam Selvág ok Krýsuvík, enn Heggr, son hans, bjó at Vági. Böðmóðr, annarr son hans, var faðir Þórarins, föður Súganda, föður Þorvarðar, föður Þórhildar, móður Sigurðar Þorgrímssonar.

Molda-Gnúpssynir bygðu Grindavík, sem fyrr er ritat.

Steinuðr en gamla, frændkona Ingólfs, fór til Islands ok var með Ingólfi enn fyrsta vetr; hann bauð at gefa henni Rosmhvalanes alt fyrir utan Hvassahraun, enn hön gaf fyrir heklu flekkötta ok vildi kaup kalla; henni þótti þat óhættara við riftingum. *Steinunni hafði átt Herlaugr, bróðir Skalla-Gríms; þeira son var Njáll ok Arnórr.*

Eyvindr hét maðr, frændi Steinunnar ok fóstri; honum gaf hön land milli Kvíguvágabjarga ok Hvassahrauns; hans son var Egill, faðir Þórar-

ins, föður Sigmundar, föður Þórörnu, móður Þorbjarnar í Krýsuvík, ok Álofar, móður Finns lögmanns, ok Freygerðar, móður Lofts, föður Guðlaugs smiðs.

Herjólfur, sá er fyrr var frá sagt, var frændi Ingólfs ok fóstbróðir; af því gaf Ingólfur honum land milli Reykjaness ok Vágs; hans son var Bárðr, faðir Herjólf, þess er fór til Grænlands ok kom í hafgerðingar. Á skipi hans var suðreyskr maðr; sá orti Hafgerðinga-drápu; þar er þetta upphaf:

*Allir hlýði ossu fulli
amra fjalla Dvalins hallar*

Ásbjörn Özurarson, bróðurson Ingólfs, nam land milli Hraunsholtslækjar ok Hvsssahrauns, Álftanes alt, ok bjó á Skúlastöðum; hans son var Egill, faðir Özurar, föður Þórarins, föður Óláfs, föður Sveinbjarnar, föður Ásmundar, föður Sveinbjarnar, föður Styrkárs, föður Hafr-Bjarnar, föður þeira Þorsteins ok Gizurar í Seltjarnarnesi.

15. Nú er yfir farit um landnám þau, er vér höfum heyrt at verit hafi á Íslandi, enn þessir landnámsmenn hafa göfgastir verit í Sunnlendingafjórðungi: Hrafn enn heimski, Ketill hæingr, Sighvatr rauði, Hallsteinn Atlason, Ketilbjörn enn gamli, Ingólfr, Örlygr gamli, Helgi bjóla, Kolgrímr enn gamli, Björn gullberi, Öundur breiðskeggr.

Svá segja fróðir menn, at landit yrði albyggt á sex tigum vetra, svá at eigi hefir síðan orðit fjölbygðara; þá lifðu enn margir landnámsmenn ok synir þeira. Þá er landit hafði sex tigu vetra byggt verit, váru þessir höfðingjar mestir á landinu: í Sunnlendinga fjórðungi: Mörðr gígja, Jörundr goði, Geirr goði, Þorsteinn Ingólfsson, Tungu-Oddr; enn í Vestfirðinga fjórðungi: Egill Skalla-Grimsson, Þorgrímr Kjallaksson, Þórðr gellir; enn norðr: Miðfjarðar-Skeggi, Þorsteinn Ingimundarson, Guððælir, Hjaltasynir, Eyjólfur Valgerðarson, Áskell goði; enn í Austfirðinga-fjórðungi: Þorsteinn hvíti, Hrafnkell goði, Þorsteinn, faðir Síðu-Halls, Þórðr Freysgoði. Hrafn Hæingsson hafði þá lögsögu.

Svá segja vitrir menn, at nökkurir landnámsmenn hafi skirðir verit, þeir er byggt hafa Ísland, flestir þeir er kvámu vestan um haf; er til þess nefndr Helgi magri ok Örlygr enn gamli, Helgi bjóla, Jörundr kristni, Uðr djúpauðga, Ketill enn fiflski ok enn fleiri menn, er kvámu vestan um haf, ok héldu þeir sumir vel kristni til dauðadags; enn þat gekk óviða í ættir, því at synir þeira sumra reistu hof ok blótuðu, enn land var alheiðit nær hundraði vetra.

Viðboetir.

1. *Úr Skarðsárþók.*

Óaldr vetr varð mikill á Íslandi í heiðni, í þann tíma er Haraldr konungr gráfeldr fell, enn Hákon jarl tók ríki í Noregi; sá hefir mestr verit á Íslandi; þá átu menn hrafna ok melrakka, ok mörg óátan ill var etin, enn sumir létu drepa gamalmenni ok ómaga, ok hrinda fyrri hamra; þá sultu margir menn til bana, enn sumir lögðust út at stela, ok urðu fyrir þat sekir ok drepnir; þá vágust skógarmenn sjálfir, því at þat var lögtekit at ráði Eyjólfss Valgerðarsonar, at hverr frelsi sik sá er þrjá dræpi seka.

Áttatigi vetra síðar varð annat óáran; þat hófst þann vetr er Ísleifr tók byskupsvígslu af Alberto Brima biskupi; þat var um daga Haralds konungs Sigurðssonar. Enn þann fyrsta vetr er Ísleifr byskup var á Íslandi, var manndauði sem mestr á Íslandi af sulti; þá var alt þat etit, er tönn festi á. Enn um sumarit lét byskup því heita á þingi, at menn skyldu fasta enn tólfta dag jóla um þrjú ár, því at svá var gert í Herfurðu, þar er byskup hafði í skóla verit, á Saxlandi. Þá var svá snæmikit hvarvetna, at menn gengu flestir til alþingis; enn

er heitit var, batnaði þegar veðráttu, ok varð sumat hit bezta, enn vetrinn eftir var svá góðr at engi kom þeli í jörð, ok gengu menn berfœttir til tíða um jól, enn húsuðu ok lögðu garða á þorra. Hit næsta sumar eftir var þat í lög tekit, at jafnan skyldi fasta hinn tólfta dag jóla, ef eigi bæri á drottins dag. Son Ísleifs byskups var Gizurr byskup.

Bjarni Skegg-Broddason sótti eldhúsið til Nor-egs ok gerði eldhús í Krossavík hálfertugt föðmum, enn fjogrtán alna hátt ok fjogrtán alna breitt; hann var því kallaðr Bjarni húslangr; hann druknaði með sjaunda mann á Skjálfanda, er hann fór til þings. Broddi Þórisson, bróðurson Bjarna húslangs, færði skálann mikla ór Krossavík til Hofs ok lét þar upp gera; hann var þá hálfprítogr föðmum ok prettán alna breiðr ok prettán alna hár. Broddi var hinn mesti ágætismaðr, ok varð félauss; hann fór þá vestr til Hóla í Hjaltadal til Ketils byskups Þorsteinsonar ok andaðist þar með honum.

Sigurðr, son Sigmundar konungs, er kallaðr var Fáfnisbani, ok Brynhildr Buðladóttir áttu dóttur þá, er Áslaug hét; hon var fœdd með Heimi jarli í Hringdölum, þar til er hann var drepinn, Ragnarr loðbrók, son Sigurðar hrings, átti Þóru, dóttur Herrøðar Gautajarls; þeira börn váru Agnarr, ok Eiríkr ok Óluf, er átti Hunda-Steinarr Englajarl; þeira son var Björn,

faðir Auðunar skökuls, föður Þóru mosháls, móður Úlfhildar, er átti Guðbrandr kúla; þeira dóttir Ásta, móðir Óláfs konungs ens helga. Annarr son Hunda-Steinars ok Ólofar hét Eiríkr; hann var faðir Sigurðar bjóðaskalla, föður Víkinga-Kára, föður þeira Bøðvars ok Vigfúss ok Eiríks á Ofrustöðum, föður Ástriðar, móður Óláfs konungs Tryggvasonar. Dóttir Vigfúss var Ástriðr, móðir Víga-Glúms, föður Vigfúss, föður Bergs, föður Steinunnar, móður Þorsteins rangláts, föður Guðrúnar, móður Höllu, móður Flosa, föður Valgerðar, móður herra Erlends lögmanns, föður herra Hauks lögmanns. Óluf hét dóttir Bøðvars hersis, er átti Teitr Ketilbjarnarson frá Mosfelli; þeira son Gizurr hvíti, faðir Ísleifs byskups, föður Gizurar byskups. Ragnarr loðbrók átti síðar Áslaugu, dóttur Sigurðar Fáfnisbana; Sigurðr ormr í auga var son þeira, ok Hvítserkr ok Björn járnsiða, ok Ívarr hinn beinlausi ok Ragnhildr.

Hálfðan svarti Upplendingakonungr, son Guðrøðar ljóma, átti Þóru, dóttur Haralds gullskeggs Sygnakonungs ok Sólvarar Hundólfsdóttur jarls ór Fjörðum, systur Atla jarls ens mjóva. Son þeira Hálfðánnar ok Þóru var Haraldr; enn er hann var ungr, þá andaðist móðir hans, enn sveinninn litlu síðar. Litlu síðar fekk Hálfðan Ragnhildar, dóttur Sigurðar hjartar; móðir Sigurðar var Áslaug, dóttir Sigurðar

orms í auga; þeira son var Haraldr enn hárfagri. Enn þá er hann var tíu vetra, þá druknaði Hálfðan, faðir hans, á Hringaríki, í vatni því, er Rönd heitir, er hann ók eftir ísinum; þá brast ísinn, er þeir kómu á nautabrunna fyrir Sverðsstöðum í Rykinvík, ok druknaði hann þar ok alt lið hans; tók þá Haraldr konungsnafn. Enn þá er hann var tvítogr, þá lagði hann fyrst undir sig Sygnafylki; enn Atli jarl hafði aldri skatt goldit; enn síðan lagði hann undir sik allan Noreg, sem segir í sögu hans.

Vikarr hét konungr, son Haralds Egða konungs; hans son var Vatnarr konungr, sá er haug á fyrir sunnan Hákonarhellu. Enn kaupmaðr í Noregi var sá, er sagði sögu Vatnars, er þeir sigldu með landi fram, ok kallaði hann verit hafa ágætan mann; enn er hann lá við Vatnarshaug, dreymdi hann, at Vatnarr konungr kom at honum ok mælti við hann: „Þú hefir sagt sögu mína, vil ek þat launa þér; leita þér féar í haugi mínum ok muntu finna“. Hann leitaði ok fann þar mikit fé.

Svá er sagt, þá er Haraldr konungr harðráði lá við Glaumstein í Hallandi með her sinn, þeir sá þar haug mikinn á sjávarhellunni ok annan lítlu ofar; hann spurði, hverir þar væri leiddir, enn þat kunni enginn at segja; enn um nóttina eftir, er hann hafði þessa spurt, dreymdi Sig-

urð enn hvíta, at maðr kom at honum í her-
klæðum ok kvað þetta:

Snjallr á haug á hellu,
Hjaldr á búð til kalda,
veki þér í dag dreyra
drótt, nú er sigr á spjótum.
Valdr man hitt, at Hildar
hlējandi rauð ek blæju
(skjöld nefni ek svá) sköfnum
skjóma, fyrstr at rómu.

Ena sömu nótt dreymdi Björn bukk, at ann-
arr maðr kom at honum með hinum sama bün-
ingi ok kvað visu:

Mín stóð búð síz bræðra
branz gekk hvárr fyr annan
hyllr ok heldum snjallir
hér (f-ellum þá) velli.
Hrósar hug fyr vísa
Hjaldr, eru víg til sjaldan ;
gleðr oss þat, er val Viðri
veit ek þik gefa teitan.

Enn er Haraldr konungr kom til Noregs, þá
sagði honum Kári enn svartí, frændi Þjóðólfs ór
Hvini, at þeir váru synir Vatnars konungs þeir
Snjallr ok Hjaldr, ok váru hinir mestu her-
menn. Snjallr var faðir Einars, föður Ölvés
barnakarls; hans son var Steinólfr ok Grímr
ok Einarr, faðir þeirra Hrolleifs, föður Svert-
ings, föður Gríms at Mosfelli, ok Óleifs breiðs,
föður þeira Þormóðs skafta ok Ófeigs grettis.
Svá segja sumir menn, at Guðbrandr kúla væri

son Óleifs breiðs. Enn Hjaldr var faðir Grims, föður Bjarnar bunu. Björn buna átti Vélaugu, systur Vémundar hins gamla; þeira synir váru þeir Ketill flatnefr ok Hrappr ok Helgi, faðir Helga, föður Heyangurs-Bjarnar, hverr er ríkr hersir ok ágætr var í Sogni.

Yxna-Þórir hét maðr ágætr á Ögðum ok auðigr; hann átti þar þær þrjár eyjar, er átta tigr yxna var á hverri; enn er Haraldr konungr hárfagri bað hann strandhöggs, þá gaf hann honum eina eyrna ok alla yxnina með. Af því var hann kallaðr Yxna-Þórir, ok er frá honum komit mart stórmenni á Íslandi ok í Norvegi. Son Þóris var Ósvaldr, faðir Ölvés hins hvíta, föður Þorsteins hins hvíta, föður Þorgils, föður Brodd-Helga, föður Víga-Bjarna.

Á því ári er Gizurr byskup Ísleifsson andaðist gerði hallæri mikit á Íslandi; þá kom hríð svá mikit á dymbildögum, at menn máttu eigi veita tíðir í kirkjum í sumum stöðum ok heruðum fyrir norðan land. Föstudag hinn langa tók upp knör undir Eyjafjöllum ok snøri á lofti ok kom hvalfandi niðr; hann var sex rúm ok tuttugu. Páskadaginn fyrsta máttu fáir menn tíðir sækja ok taka þjónustu, enn sumir urðu úti dauðir. Annat illviðri kom um sumarit eftir andlát hans, þann dag er menn riðu á þing; þá braut kirkju á Þingvelli, þá er Haraldr konungr Sigurðarson lét höggva viðinn til;

þat sumar fóru fjórir tígir skipa út hingat, ok braut mörg við land, enn sum týndust í hafi ok leysti sundr undir mönnum, enn átta ein kvámust brott, með þeim er áðr váru hér, ok kvámust þau engi fyrir Micháelmessu af hafi; af þeim mannfjölda varð hallæri mikit hér á landi.

Þá er Gizurr byskup andaðist, váru þessir mestir höfðingjar á Íslandi: Hafliði Másson norðr ok synir Ásbjarnar Arnórssonar í Skagafirði, Þorgeirr Hallason ok Ketill Þorsteinsson prest; enn austr: Gizurr Einarsson, Sigmundur Þorgilsson; hann andaðist á því ári í Rómför; enn suðr: Hallr Teitsson, Skúli Egilsson; enn vestr: Styrmar Hreinsson, Halldórr Egilsson, Þorgils Oddason, Þórðr Gilsson, Þórðr Þorvaldsson ór Vatnsfirði. Einum vetri eftir andlát Gizurar byskups. var Þorsteinn Hallvarðsson veginn, göfgr maðr; enn vetri eftir þat var þing fjölment; þau misseri hafði svá mikill manndauði verit, at Sæmundr prest enn fróði sagði svá á þingi, at eigi mundi færri menn hafa andazt af sótt enn þá váru til þings komnir. Þat sumar var þröng mikil at dómum; þá særði Þorgils Oddason Hafliða Másson; þá varð um ekkert mál at lögum dæmt. Þorgils varð sekr um áverkann ok sat í sekt um vetrinn; þá var svá lítill vápnaburðr, at ein var stálhúfa á alþingi, ok reið drjúgum hverrbóndi til þings er þá var á Íslandi.

Þat vár er þrír vetr váru liðnir frá andláti Gizurar byskups, andaðist Jón byskup at Hólum níunda kalend. maji; þat sumar sat Hafliði Másson á efrum völlum með xcc manna, ok ætlaði at banna Þorgils Oddasyni þingreið; þar var með honum Hallr Teitsson ok Þórðr ór Vatnsfirði, mágr hans, ok margir aðrir höfðingjar; þat var hinn næsta dag fyrir Jónsmessu. Þorlákr byskup gekk þannig til með kennimenn, ok leitaði marga vega um sættir með þeim; enn er þat tjáði eigi, þá fyrirbauð hann þeim þar at sitja, ok lézt mundu bannsetja þá, ef þeir gengi eigi heim; þá kvað Hafliði, at þeir skyldi heim ganga til búða. Þorgils reið á þing með sjau manna; með honum váru flestir höfðingjar ór Vestfirðinga fjórðungi nema Þórðr ór Vatnsfirði; enn er um sættir var leitat, var þat í meðal þeira, at Hafliði vildi hafa sjálfðæmi um alt, óskorat, enn Þorgils vildi undan taka goðorð ok staðfestu ok sektir allar; þann skakka gat Ketill prestur Þorsteinsson niðr feldan með umtölum sínum. Þat sumar var hann kosinn til byskups í stað Jóns byskups, ok fór utan. Þorgils handsalaði Hafliða sjálfðæmi, enn hann gerði sextigi hundraða sex álna aura vöruvirðis fjár í gulli og brendu silfri eðr í rifum aurum, eðr í gripum þeim, er honum þœtti gersimum sæta ok hann virði sjálfr eðr þeir menn, er hann tœki til; þetta fé handsöluðu sex menn ok unnu at

fimmtardóms eið at þeir skyldu þetta fé gjalda sem fyrr var mælt. Þorgils ok Hafliði veittu sjálfir trygðir ok heldu vel sætt þessa. Hafliði Másson átti fyrr Þuríði, dóttur Þórðar Sturlusonar; Þórður hét son þeira; hann átti Sólvöru, dóttur Ásgríms Þórhallssonar; Ivarr hét son þeira. Hafliði átti síðar Rannveigu, dóttur Teits ór Haukadal; Sigriður hét dóttir þeira, er átti Þórður í Vatnsfirði; Þórður ok Páll váru synir þeira. Valgerður hét önnur dóttir þeira Hafliða; hana átti Ingimundr prestur Illugason ok Ornýjar, dóttur Þorkels Gellissonar; Illugi var son þeira, er druknaði þá er hann flutti lim til steinkirkju þeirar, er hann ætlaði at láta gera á Breiðabólstað á Vestrhópi.

Rögnvaldr jarl kali var veginn fimm nóttum eftir Máriumessu fyrri.

Óláfr konungr Tryggvason barðist á Orminum langa næsta dag eftir Máriumessu síðari.

Þessi eru nöfn byskupa þeira útlendra, er verit hafa á Íslandi: Friðrekr, Bjarnarður, Óláfr Grœnlendingabyskup, Kolr, Roðólfr, Jón, Bjarnarður, Heinrekr, Arnaldr Grœnlendingabyskup, Jón Grœnlendingabyskup ok Helgi Grœnlendingabyskup; verit hafa enn þeir fleiri, er byskupar létust vera: Guðiskólkr, Örnólfr, ok fjórir af Armenia; Petrús, Stephánús ok Ábrahám.

Friðrekr byskup kom í heiðni til Íslands með Þorvaldi víðförla, ok var at Giljá ok Lækja-

móti; Bjarnarðr enn bókvísi var á Íslandi fimm vetr. *Hungrvaka segir, at Bjarnarðr Vilráðsson hinn bókvísi hafi verit af Englandi ok farit til Íslands af ráðum Ólafs konungs ens helga, því hann hafi með honum verit áðr. Kolr fá ár; hann var með Halli í Haukadal, ok er jarðaðr í Skálholti fyrstr byskupa, segir Hungrvaka. Roðólfr nitján ár; hann setti munklíf í Bæ í Borgarfirði; hann bjó ok á Lundi. Hungrvaka segir Úlfr byskup hafi verit af Rúðuborg ór Englandi, ok nefndr því Rúðuólfr. Jón hinn saxneski fjögur ár; Hungrvaka segir Jón írskan, ok farit heðan til Vindlands, kristnat þar, verit þar síðan pínðr ok drepinn. Heinrekr tvau ár. Bjarnarðr nitján ár; hann bjó at Giljá í Vatnsdal. Hungrvaka talar svá um þenna Bjarnarð: hinn sjötti útlenzkr byskup var Bjarnvarðr byskup enn saxlenzki, er var með Magnúsi konungi enum góða, Ólafssyni, ok fór síðan til Íslands, ok var á Íslandi xx vetr; hann hafði tvá hústaði í Vatnsdal, at Giljá ok Steinstöðum (ek meina þat Steinnes); hann vígði marga hluti, þá er mörg merki hafa at vorðit: kirkjur ok klukkur, brúar ok brunna, vöð ok vötn, björg ok bjöllur, ok þikkja þessir hlutir hafa birt sanna tígn hans ok gæzku. Bjarnvarðr var á Íslandi meðan Haraldr konungr var í Noregi Sigurðarson, því at þeir váru eigi samsáttir; síðan fór hann útan, ok til handa Óláfi konungi kyrra Haraldssyni, ok síðan fór*

hann til Róms at bæn konungs, ok friðaði fyrir önduðum; er byskup kom aftr, þá skipaði konungr hann byskup í Selju, enn síðan fór hann í Björgvin ok andaðist þar, ok er einmælt hann hafi verit hinn mesti merkismaðr.

2. Úr Melabók hinni yngri.

Úlfjotr hét maðr norrænn, systurson Þorleifs spaka; hann kom út í Lóni ok keypti land at Þórði skeggja alt fyrir austan Jökulsá. Enn þá er hann var nær hálfsextugr at aldri, fór hann útan ok var þrjá vetr með Þorleifi frænda sínum; þeir samanskrifuðu lög þau, er hann hafði út ok þá váru kölluð Úlfjótsslög. Enn er hann kom út, þá var sett alþingi, ok höfðu þá allir ein lög hér á landi, ok váru þau nokkurn veg samin eftir Gulapingslögum. Landinu var skift í fjórðunga um daga Þórðar gellis; þá skyldu vera þrjú þing í hverjum fjórðungi, enn þrjú höfuðhof í hverri þingsókn; þar váru menn vandaðir til at varðveita hofin, at vitrleik ok réttlæti; þeir skyldu dóm nefna á þingum ok stýra sakferlum; því váru þeir goðar kallaðir ok hofgoðar, enn þeira tígn ok umdæmi kallat goðorð. Hverr skyldi ok gjalda hofstóll, eigi siðr enn nú kirkjutíund. Fé þat, er til hofs var gefit, skyldi hafa til mannfagnaðar, þar er blótveizlur váru. Norðlendinga fjórðungi var skift í fjögur þing; hann var stærri enn hinir fjórðungarnir.

Þat er upphaf hinna heiðnu laga, at menn skyldu eigi hafa höfðuð skip í haf, enn ef þeir hefði, þá skyldu þeir af taka höfuðit áðr enn

þeir kæmi í landsýn, og sigla eigi at landi með gapandi höfðum né gínandi trjónu, svá at landvættir föeldist við.

Baugr tæyringr eðr meira skyldi liggja at hverju hofi á stalli; þann baug skyldi hverr goði hafa á hendi sér til lögbinga þeira allra, er hann skyldi sjálfr heyja, ok rjóða þar í rauðu blót-nauts þess, er hann blótaði.

Dómhringr var á þingstaðnum, er þeir menn váru í skipaðir, er þat straff höfðu, at þeir váru dæmdir til blóts. Á Þórnes þingi stendr steinninn eftir, sem þeir menn váru brotnir við, ok sér enn blóðlitinn á steininum, segir Eyrbyggja.

Sá maðr hvern, er lögskil þyrfti af hendi at leysa at dómi, skyldi áðr eið vinna at baugi, ok nefna sér vátta tvá eða fleiri, ok mæla svá: „Ykkir nefni ek í þat vætti“, skyldi hann segja, „at ek vinn eið at baugi, lögeið; hjálpi mér svá Freyr ok Njörðr ok Áss hinn almatki, sem ek mun þessa sök seekja, eða verja, vitni eða vætti eða kviðu bera, eða dóm dæma, ok öll lögmæt skil af hendi leysa, þau er undir mik koma, meðan ek er á þessu þingi, sem ek veit réttast ok sannast ok helst at lögum“. Svá sagði vitr maðr, Þormóðr, er allsherjar goði var á Íslandi, at með þessum orðum ok þingmörkum helguðu langfæðgar hans alþingi.

Böðvarr enn hvíti af Vors ór Noregi byggði fyrstr at Hofi; hann reisti þar hof ok gerðist þar hofgoði; hann var faðir Þorsteins, föður Halls á Siðu.

Hof í Vatnsdal ok Hof á Kjalarnesi hafa hér á landi stærst verit, einkum stórt hundrað fóta á lengð, þat syðra var ok sex tigu fóta breitt.

Kór eða goðastúka var hjá hverju hofi; þar váru í goðin; Þórr eða Júníþer var æðstr ok mest göfgaðr, þá Freyr, sonr Óðins, conditor, sá er fyrst bygði Uppsali í Svíaríki; ok þó eigi sé glögt að skilja, hvé mörg goð eða með hverju nafni þau hafa verit hér dýrkuð at sérhverju hofi, þá eru þó í gömlum eiðstaf ánefndir þessir þrir: Freyr, Njörðr, ok Ass, sem vér hyggjum þá meina með Óðin, af því hann var æðsti höfðingi hingat í Norðrlönd kominn ór Asía. Æsar eða Æsir kölluðust fleiri. Þessi goð stóðu á stalli eða hávum bekk; frammi fyrir þar stóð stalli með miklum hagleik, ok þiljaðr ofan með járn; þar skyldi á vera eldr, sá *er* aldri sloknaði; þat kölluðu þeir vígðan eld; á þeim stalli skyldi standa bolli mjök af kopar; þar skyldi í láta blóð þat alt, sem kæmi af fé því, er þar var til gefit, eða mönnum þeim, sem til blóts váru dæmdir; þat kölluðu þeir hlaut eða hlautbolla, enn hlautinni skyldi bæði dreifa yfir menn ok fé. Vatzhyrna.



Vísna skýringar.

II, 6., 64: Steinastoð¹, ek byggji einn Atals hrafni² stafnrúm; skal-at þrangbýlt of þegn á þiljum á ranga mar³. Böðvitrum⁴, knáum brimdýrs⁵ stýri es betra rúm enn ilt of⁶ gengi⁷; þat man lifa lengr (lengi) með lofðum.

1. *Steinastoð*, kvenkenning. — 2. *Atall*, sækonungr; Atals *hrafni*, skip. — 3. *ranga-marr*, skip. — 4. *böðvitr*, herkönn (*böð* = orrusta). — 5. *brimdýr*, skip. — 6. *of* er sett hér til fyllingar til þess að samstöfur séu nógu margar. — 7. *gengi*, fylgd, föruneysi.

Kona, ég vildi mega búa einn í stafnrúmi skipsins; skyldi eigi vera þröngt um mig á þiljum. Mér er betra að hafa (nóg) rúm enn ilt föruneysi (þræl); það mun lengi uppi vera.

II, 7., 66: Ek vas þar es flóðkorn¹ móður jötuns, heiðins bergrisa, fell af fjalli ór hám himni á nóleiðar². Ífingafold³, fár jötunn gerir fleiri báta hamváta mér moldu hömluþrumlu heiðar.

1. *flóðkorn*, steinn, bjarg. — 2. *nór*, skip; nóleiðar, skipsleiðar, sjór. — 3. *ífingamold*, kenning; ífingr, höfuðdúkr. — 4. *hömlu-þrumla*, skip; hömlu-þrumlu heiðr, sjór.

Ég var þar er tröllkonu-bjarg úr fjalli féll úr háva lofti í sjó. Fáir jötnar gera fleiri báta alvota af sjó enn ég.

II, 8 — 9., 67 og 70. Þessar vísur þurfa eigi skýringar við.

II, 14., 80: Ek bið meinalausan¹ munkareyni² beina farar mínar; dróttinn hárar foldarhallar³ haldi heiðisstalli⁴ of mér.

1. *meinalauss*, góðr. — 2. *munkareynir*, guðs. — 3. *höll*, hvelving; foldarhöll, himinn. — 4. *heiðir*, haukr; heiðisstallr, hönd.

Ég bið góðan guð (að) beina ferðir mínar; drottinn himinsins haldi hendi sinni yfir mér.

II, 19., 90: Þessi vísa þarf eigi skýringar við.

II, 30., 113: Ölkarma eik¹, linbundin erma Lofn² lætr mik leika fyr lesnis stafni³ sínum; firrumk þat. Ek man aldrigi biða bótir of brúði; bál görir mik fölván; harmr snertumk í hjarta hrót⁴.

1. *ölkarma eik*, kvenkenning. — 2. *erma Lofn*, kvenkenning. — 3. *lesnis stafn*, höfuð? — 4. *hrót*, rót.

Hin linklædda kona lætr mig leika frammi fyrir sér; ég forðast það; ég mun aldrei biða hennar bætr; harmr inn snertir hjartarætr mínar.

II, 30 , 114: Þessi vísa þarf eigi skýringar við.

II, 33., 120: Ek heyri út bláfjallaðan¹ sára þorns² sveita svan gjalla, es mornar; bráð vegr borginmóða³. Svá gól Gunnar⁴ haukr fyrr, es fólknárungar⁵ váru feigir, es gaukar Gauts⁶ bragða sagðu spá.

1. *bláfjallaðr*, með bláu eða svörtu skinni (fell, skinn). — 2. *þorn*, þyrnir; sáraþorn, sverð; sáraþorns sveiti, blóð, sáraþorns sveita svanr, hrafn. — 3. *hraf*n. — 4. *Gunnr*, valkyrja; Gunnar haukr, hrafn. — 5. *fólk*-

nárungr, höfðingi. — 6. *Gautr*, Óðins heiti; gaukar Gauts bragða, hrafnar.

Ég heyri svartan hrafn gjalla úti er mornar; bráðin vekr hann. Svo gól hann fyrr, þá er höfðingjar voru feigir og hrafnar voru að spá.

II, 33., 120: Már valkastar báru¹ hlakkar hagli stokkinn es (hann) kemr at hræs sævi²; (hann) krefr móðr morginbráðar. Svá gól hræva gaukr³ endr⁴ af fornum meiði⁵ þá es unda haukar⁶ vildu eiðs mjöð⁷ hildingar.

1. *bára valkastar*, blóð; blóðs már, hrafn. — 2. *hræs sær*, blóð. — 3. hrafn. — 4. forðum. — 5. tré. — 6. hrafnar. — 7. *eiðsmjöðr*, blóð, nefnt svo af því, að menn blönduðu blóði saman, er þeir sórust í fóstbræðralag.

Hrafninn hlakkar, hagli stokkinn, er hann kemr á vígvöllinn; hann er móðr og krefr morgunbráðarinnar. Svo gól hann forðum á tré, er hrafnar vřdu höfðingablóð.

II, 33., 120: Draugr flatvallar bauga¹, vas-at mér áðr of ráðinn dauði í dag né gær; búumk við Ilmar jálmi². Ek ræki lítt, þót litvöndr Hedins fitjar³ leiki við rauða skjaldu; oss var áðr of markaðr aldr.

1. *Draugr*, víðr; *flatvallar baugr*, skjöldr; *draugr flatvallar bauga*, mannkenning. — *Ilmar jálmr*, bardagi. — 3. *Hedins fit*, brynja; *litvöndr Hedins fitjar*, sverð.

Maðr, mér var ekki ákveðið að deyja í gær né í dag; ég býst við bardaga. Ég hirði ekki, þótt sverð leiki við rauða skjöldu. Aldr minn var áðr markaðr.

II, 33., 121: Sex svipnjörðungar sverða¹, þeir es sæfast sárteini², hafa hér bana sútlaust úti á brústeinum. Hygg, at heftendr laga liggi hálfir eftir; ek lét óbíðingum³ sviða eggskeindar undir.

1. *svipr*, sveiflan; *njörðungar*, afkomendr Njarðar, *svip-njörðungar sverða*, veifendr sverða, menn. — 2. *sárteinn*, sverð. — 3. *óbiðingar*, þeir sem eigi biða, ragmenn.

Sex menn, sæfðir sverði, hafa hér bana úti á brústeinum, og ekki harmdauðir. Helmingr lögbrotsmanna hygg ég að liggi eftir; ég lét ragmenninu sviða eggjasárin.

II, 33., 121: Ek bark-at fetla stígs fúr¹ at vígi með fleiri; várum þar fyrir fjórir frændr, vændir ofstopa; enn tólf hvatir gunnþingsrunnar² af Gylfa glað³, þeir es vildu skunda til várs fundar, ruðu köld vápn sín.

1. *fetill*, sverðsfetillinn, er liggr utan á brynjunni; *fetla stígr*, brynja; *fúr*, eldr; *fetla stígs fúr*, sverð. — 2. mannkenning. — 3. *Gylfi*, sækonungr; *gladr*, hestr; *Gylfa gladr*, sækonungs hestr, skip.

Ég bar eigi sverð til vígs við fleiri; vér frændr vórum þar fjórir fyrir og bjuggumst við ofstopa. Enn tólf röskvir menn of skipinu, er vildu finna oss, ruðu sín köldu vopn.

II, 33., 121: Sjav sækitivar Svölnis garðs¹ hafa höggvit nösum til jarðar; varmt blóð, valdögg, fell til vallar. Mun-at fleiri Fjölnis þings fúrviðir² færa Jálks mærar skæ³ út of Ekkils brautir⁴, enn hingat.

1. *Svölnir*, Óðins heiti; *Svölnis garðr*, skjöldr; *tívar*, guðir; *Svölnis garðs sækitívar*, menn. — 2. *Fjölnir*, Óðinsheiti; *Fjölnis þing*, bardagi; *Fjölnisþingsfúr*, bardagaeldr, sverð. — 3. *Jálkr*, sækonungsheiti; *Jálks mærr*, sækonungs mýri, sjór; *skær*, hestr; *Jálks mærar skær*, skip. — 4. *Ekkill*, sækonungsheiti; *Ekkils brautir*, sjór.

Sjð menn hafa höggvið nösum til jarðar; varmt blóð

(valdögg) féll til vallar. Munu eigi fleiri menn föera skipit út, enn hingað (komu á því).

II, 33., 122: Hælibörvar skjóma hljóms¹ megu hér súa merki dýrs dagverks daltangar², hvat fjórir drýgðu; enn ek hugða, Gunnar ræfrs hyrbrigðir³, at gefim grið-bítum lítinn frið; hrafn sleit þeitu af ná.

1. *skjómi*, sverð; *hælibörvar skjóma hljóms*, hœlandi viðir sverðahljóms, mannkenning. — 2. *dalr*, bogi; *daltöng*, hönd. — 3. *Gunnar ræfr*, valkyrju þak, skjöldr; *Gunnar ræfrs hyrbrigðir*, mannkenning.

Hér megu menn sjá ágæt merki handaverks fjögurra manna á einum degi; ég hygg, at vér höfum gefið grið-rofunum lítinn frið; hrafn át af náum (þeirra).

II, 33., 122: Unnum auðimönnum¹ dreyruga Gunnar serki²; ek á þunna hjör; vér drýgðum verk at vígi. Herðilofðar³ höfðu hildarborðs valfasta tungur⁴ und skildi; hangvölum⁵ þvarr hengihungr⁶.

1. *auðimenn* líkl. eyðingarmenn, spillvirkjar. — 2. *Gunnar serkr*, brynja. — 3. *herðilofðar*, herðimenn, hreystimenn. — 4. *hildarborð*, skjöldr; *valfasti*, eldr; *hildarborðs valfasta tunga*, sverð. — 5. *hangvalr* = hanga valr, hrafn. — 6. *hengihungr*, líklega ákaft hungr (sbr. hanga niðr), ef orðið er rétt tekið saman.

Vér gerðum spillvirkjum blóðuga serki; ég á hvasst sverð; vér störfuðum að vígi. Hinir vösku menn höfðu sverð undir skjöldum sínum; hrafnar söddu hungr sitt.

II, 33., 122: Harðr vas gnýr þá er gørdum snarpa grjóttvarps lotu, grá Þundar klæði¹ gengr sundr at sverðs söngvi, áðr hækings viðir æki á hæl til hvíldar; þeir hlutu fleiri bana; hjaldrs hrið kom á skjöldu.

1. *Þundr*, Óðinsheiti; *Þundar klæði*, herklæði, brynjur.
— 2. *hækingr*, sverð; *hækings víðir*, sverðaviðir, mannkenning.

Þá var harðr gnýr, er vér gerðum snarpa grjóthrið; hinar gráu brynjur gengu sundr í bardaganum áðr mennirnir hörfuðu undan. Fleiri af þeim blutu bana Hríðin kom (og) á skjölduna.

II, 33., 122—23: Heyri sára svan¹ gjalla of ná, þar es sigrstalls víðir² falla; benskári³ drekkir blóðsfalls báru. Örn fekk þar sylg⁴, er segð-auðigr⁵ Sleitu-Helgi felt⁶ rauðu; enn greipr eru erni hræjum sveipðar.

1. *sára svanr*, hrafn. — 2. *sigrstallr*, skjöldr; *sigrstalls víðr*, mannkenning. — 3. *lenskári*, hrafn (skári = már). — 4. *sylgr*, drykkir. — 5. *segð* = sekt? — 6. *felt* = faldaði.

Ég heyri (eða heyri þér) hrafn gjalla yfir ná, þar sem menn falla; hrafn drekkir blóðsfallsöldu. Örn fekk þar drykk, er Sleitu-Helgi faldaði rauðu (var drepinn); enn klær hans eru hræugar.

II, 33., 123: Ýtar álþings¹ báru sama² hjálma at mōti oss upp af allþakklegum³ ára blakki⁴; enn goðum leiðir beiðendr hauðrmens hliða⁵ báru á braut rauðar skarar⁶ til beitis⁷, herðimeidar⁸.

1. *álþing*, bogaping, bardagi; *ýtir*, hrærandi; *ýtir álþings*, mannkenning. — 2. — *sámr*, dökkur. — 3. *allþakklegr* = allþekkilegr. fagr. — 4. *blakkr*, hestr; *ára-blakkr*, skip. — 5. *hliðr*, uxi; *hauðrmen*, sjór, *beiðandi hauðrmens hliða*, mannkenning. — 6. *skör*, höfuð. — 7. *beit*, skip. — 8. *herðir*, sverð; *herðimeidr*, mannkenning.

Menn báru dökkva hjálma mót oss upp af hinu íagra

skipi; enn þeir báru blóðug höfuð til skips, leiðir goð-unum, drengir!

III, 10., 145: Manna morðkannaðir¹, mangi ísarnmeiðr² hugði annat enn almærir³ Æsir færi þar, þá es synir harðfengs Hjaltu gengu á Þorskafjarðarþing með ennitingum holtvartaris⁴.

1. *morðkannaðr*, sá er kannar morð, bardagamaðr. — 2. *ísarn* = járn (e. iron, þ. Eisen), *ísarnmeiðr* mannkenning. — 3. *almærr*, alfrægr; á að rita með æ, enn ekki æ, þótt hér sé svo ritað, vegna hendinga. — 4. *vartari*, fiskr, holtvartari, holtfiskr, ormr; *enni tingl holtvartaris*, einhver gullskrautskening.

Bardagamenn, engi maðr hugði annað enn hinir alfrægu Æsir færi þar, er synir hins harðfenga Hjaltu gengu á Þorskafjarðarþing í gullskartinu.

III. 13., 152: Bøggvir¹ hjó fyr mér snöggvan belg, enn ál² ok verju fyr Óláfi, svá skal bøggvir verða höggvinn ef vér lifum, búinn við böðl.

1. *bøggvir*, byggvir, bóndi. — 2. *ál*, ól. — 3. *verja*, yfirhöfn.

III, 14., 154: Atglamrandi hamra¹ lætr æ hví meira fork gjalla á glotkylli² Geirhildar, sem orkar. Hár járnstafr skapar kerlingar síðu ærna hrið á Hjaltueyri; trolli eru sollin³ rif.

1. járnsmiðr. — 2. *glot*, lögr (sbr. glæta), *glotkyllir*, belgr með lög í, hér vatnsbelgr. — 3. bólgin.

Járnsmiðr lætr ávalt járnstaf sinn, sem er hverju meiri, dynja á vatnsbelg Geirhildar eftir megni. Járnstafrinn gerir síðu kerlingar harða hrið; rif tröllsins eru bólgin.

III, 16., 158: Bárðr¹ of rístr báru brautland² varar andri³.

1. Bárðr = Bárðr. — 2. báru brautland, sjór. — 3. andurr, skíð, varar andurr, skip.

III, 16., 158: Þessi vísa verðr hér eigi skýrð, því að hún á heima í Víga-Glúms sögu.

III, 17., 160: Kjólakeyrir¹, hér liggir Kaldakinn of aldr, enn vér höldum heilir á braut, Hjálmun-Gautr.

1. kjóll, eins konar skip; kjólakeyrir, skipstjóri.

III, 17., 161: Þessi vísa þarf eigi skýringar við.

III, 19., 165—166: Þessar vísur verða ekki skýrðar hér, því að þær eiga heima í Grettissögu.

IV, 4., 178: Vér höfum áðr of fáða þar á vegg unga auðar Þrúði¹ með Þóri; þat var sett við glettu. Nú hefík ristit rastakarns Hlín² á ölbækis hefti³ mínu; ek réð mart við bjarta hauka skofts Syn⁴.

1. Þrúðr, Ásynja, auðar Þrúðr, kvenkenning. — 2. Hlín, Ásynja, rastakarn, steinn; rastakarns Hlín, kvenkenning. — 3. ölbækis hefti; ölbæki er líklega viðartegund, sem hnífskeflið hefir verið gert af. — 4. Syn, Ásynja; haukaskoft, hönd, haukaskofts Syn, kvenkenning.

Vér höfum áðr dregið líkneski hinnar ungu konu á vegg með líkneski Þóris; það var gert af glettni. Nú hefí, ég ristið mynd hennar á hnífskefti mínu; ég hefí talað mart við þá konu.

V, 10, 217: Ek vas þar er Errubeinn fell til fyllar¹, es ítr-tungur unnar² sungu hátt; vinr dróttar sótti fram.

Eg gaf Óðni þróttardjarfan arfa Ásmóðar; guldum gálga-
valdi⁴ Gauts tafn⁵, enn hrafni ná.

1. *fyllr* = fylli; að falla til fyllar = að falla til bráð-
ar. — 2. einhver hluti sverðs; *ítrtungur unnar*, brandar.
— 3. *drótt*, menn. — 4. *gálgavaldr*, Óðinn. — 5. *Gautr*,
Óðinn; *tafn Gauts*, fórn til Óðins.

Ég var þar sem (Þorgrímr) errubeinn fell og varð að
bráð, er brandar kváðu hátt við. Ég gaf Óðni hinn hrausta
son Ásmóðar; vér guldum Óðni fórnina og hrafninum
náinn.

V, 10., 218: Band er á hægri hendi minni; ek hlaut
sár af báru leygjar Tý¹; ek lýg þat eigi, linnvengis Bil².

1. *leygr*, eldr, *báruleygr*, gull; *báruleygjar Týr*, mann-
kenning. — 2. *linnr*, ormr; *linnvengi*, gull, *linnvengis*
Bil, Ásynja gulls, kvenkenning.

Viðbætur I, 232: Snjallr á haug á hellu; Hjaldr á
til kalda búð. Veki þér drótt dreyra í dag, nú es sigr
á spjótum. Valdr¹ man hitt, at ek rauð hlæjandi blæju
Hildar (ek nefni skjöld svá) fyrstr at rómu.

1. Þetta orð er annaðhvort mannsnafn, eða vísuorðið
er aflagað. Það gæti verið: *Þat man Hjaldr at Hildar*.

Snjallr á haug á sjávarhelli; Hjaldr á of kaldan bú-
stað. Ef þér vekið mönnum blóð (berizt) í dag, þá er nú
sigr í vopnum. Ég man það, að ég rauð skjöld minn
hlæjandi fyrstr allra að bardaga.

Viðbætur I, 232: Hyllr brandz¹, mín búð stóð hér
síz² hvárr bræðra gekk fyr annan ok heldum sjallir
velli; fellum þá. Hjaldr hrósar hug fyr vísa; víg eru
til sjaldan; þat gleðr oss at ek veit þik teitan gefa
Viðri⁴ val.

1. *hyllr*, viðartegund (d. Hyld, n. Hyll); *hyllr brands*. manntenning. — 2. *síz* = síð es = síðan er. — 3. *vísi*. konungr. — 4. *Viðurr*, Óðinn.

Maðr, haugr minn hefir staðið hér síðan við bræðr börðumst saman og heldum vígvelli, enn féllum. Hjaldr lofar hug konungs; víg eru of sjaldan, enn það gleðr oss að þú gengr glaðr fram í bardaga.



Nöfn landnámsmanna.

- Álfarinn** Válasón 63, 67, 68.
Álfgeirr á Álfgeirsvöllum 139.
Álfr enn egðski 224.
Ar(n)móðr enn rauði 101, 102.
Arndís en auðga 94, 119.
Arngeirr á Sléttu 168.
Ásbjörn Reyrekilsson 201
Ásbjörn Özurarson 226.
Ásbrandr Þorbrandsson 220 221.
Ásgeirr kneif 198.
Ásgerðr Ásksdóttir 199.
Áskell hnokan 192, 211,
Ásmundr Atlason 63, 64.
Ásmundr undir Gnúpi 129.
Atli Válasón 63, 64.
Auðunskökull 126 134, 169,
Auðun stoti 71, 72.
Ávangr enn írski 40.

Bálki Blæingsson 48, 58.
Bárðr suðreyingr 148.
Baugr Rauðsson 203.

Bekan á Bekansstöðum 44.
Bersi goðlauss 58, 118.
Bjólfr í Seyðarfirði 179, 180.
Björn enn austroeni 36, 72, 73, 83, 88, 93, 123.
Björn í Bjarnarfirði 100 118.
Björn gullberi 39, 48, 63, 226.
Björn Herfinnsson = Skjalda-Björn.
Björn at Reini 195.
Björn sviðinhorni 182.
Björn í Svinhaga 206, 208.
Brandönundr 183.
Brynjólfr enn gamli 173, 174, 175, 180, 181, 182, 196.
Brúni enn hvíti 148.
Bröndólfr Naddaðarson 220
Böðólfr ór Hvini 165, 166.
Böðvarr enn hvíti 183 239,

Dala-Kollr 82, 85, 100, 163,

Egill enn rauði 181.
Eilífr örn 137, 138.

- Einar Þorgeirsson 167, 168.
 Eiríkr í Goðdölum 136, 139.
 140, 141, 142, 169, 171.
 Eiríkr í Keldudal 104.
 Eiríkr snara 117.
 Eiríkr enn rauði 10, 78, 79,
 80, 81, 84, 97 117.
 Eyfrøðr enn gamli 221.
 Eysteinn enn digri 191.
 Eysteinn Hranason 191.
 Eysteinn Rauðúlfsen 154.
 Eysteinn Þorsteinsson 195.
 Eyvindr auðkúla 135.
 Eyvindr í Eyvindarfirði 117.
 Eyvindur kné 104, 110.
 Eyvindr Loðinsson 161.
 Eyvindr sörkvir 128, 135.
 136.
 Eyvindr Þorsteinsson 162,
 164, 169.
 Eyvindr vápni 170, 171.

 Finni í Finnafrði 170.
 Flóki þræll Ketils gufu 48,
 98.
 Flóki Vilgerðarson =
 Hrafna-Flóki 28, 29, 147.
 Flosi en norrœni 208, 209
 212.
 Freysteinn enn fagri 181.
 Friðmundr í Forsæludal
 128, 120.

 Galmi á Galmaströnd 153,
 Gautr í Gautsdal 135, 136.

 Geiri í Geiradal 92, 96, 145,
 167.
 Geirleifr Eiríksson 40, 101,
 102.
 Geirleifr Hrapppsson 153.
 Geirmundr Gunnbjarnar-
 son 57.
 Geirmundr heljaraskinn 90,
 91, 92, 93, 94, 99, 103,
 111, 116, 123.
 Geirr enn auði 49.
 Geirsteinn kjálki 101.
 Geirþjófr Valþjófsen 104.
 Gils skeiðarnef 92, 95, 96,
 118.
 Gnúpa-Bárðr 161, 162, 166,
 189, 190.
 Graut-Atli 171, 172, 174,
 Grenjaðr Hermundarson
 119.
 Grenjuðr Hrapppsson 164.
 Grímkell Ulfsson 67.
 Grímr við Grímsegil 50.
 Grímr í Grímsnesi 101, 174,
 222, 223.
 Grímr enn háleyski 46, 47,
 51, 55, 127, 128.
 Gunnólfur í Hvammi 143.
 Gunnólfur enn gamli 149.
 Gunnólfur kroppa 169.

 Hafnar-Ormr 41, 44, 45,
 48, 215.
 Hákon á Hákonarstöðum
 173.

- Halldórr Gunnbjarnarson 111.
 Hallgeirr í Hallgeirsey 205
 Hallkell Hrosskelsson 44, 54, 67.
 Hallr goðlauss 36.
 Hallsteinn (eða Hásteinn) Atlason 30, 31, 213, 214, 215, 216, 236.
 Hallsteinn Þorskafjarðar-goði 8, 75, 87, 97.
 Hallvarðr sugandi 109.
 Haraldr bringr 125.
 Heðinn at Heðinshöfða 138, 163.
 Helgi enn magri 6, 21, 82, 96, 101, 106, 112, 150, 151, 152, 154, 157, 158, 159, 160, 163, 169, 227.
 Helgi Heyangrs-Bjarnarson 189.
 Helgi Hrólfsson 109.
 Helgi bjóla 36, 38, 83, 226, 227.
 Herjólfur í Breiðdal 182.
 Herjólfur Þorgeirsson 175, 182.
 Herjólfur hokinrazi 70.
 Hjálmólfur í Blönduhlíð 142.
 Hjalti í Breiðdal 182.
 Hjalti Þórðarson 144.
 Hólmgöngu Máni 137.
 Holti á Holtastöðum 136.
 Hrafn hafnarlykill 193.
 Hrafn enn heimski 198, 202, 226.
 Hrafnkell Hrafnsson 176.
 Hróðgeirr enn hvíti 170.
 Hróðgeirr enn spaki 41, 45, 214, 215.
 Hrólfur enn digri 64.
 Hrólfur rauðskeggr 162, 207, 210.
 Hrollaugr Rögnvaldsson 5, 20, 183, 185, 186, 187, 188, 189, 196.
 Hrolleifr Einarsson 211, 224, 232.
 Hrómundur Þórisson 39, 55, 56, 227.
 Hrosskell at Ýrarfelli 139.
 Hrosskell Þorsteinsson 54, 123.
 Hvamm-Þórir 14.
 Hvati á Hvatastöðum 128, 129.
 Höfða-Þórðr 130, 138, 144, 145, 146, 147, 169.
 Höskuldr Þorsteinsson 163.
 Ingjaldr Brúnason 107.
 Ingimundur enn gamli 126, 127, 128, 129, 130 131, 132, 135, 136, 138, 169.
 Ingólfr enn sterki Ánason 80, 81.
 Ingólfr Arnarson 4, 6, 10, 30, 31, 32, 33, 34, 35, 36, 37, 40, 45, 46, 80, 223, 225, 226.
 Ingólfr í Ingólfsfirði 117.
 Ísleifr á Ísleifstöðum 56.
 Ísrøðr á Ísrøðarstöðum 56.
 Jólgeirr á Jólgeirsstöðum 201, 210.
 Jörundr háls 128, 129, 132, 188.
 Kalman enn suðreyski 41, 52, 53.
 Kampa-Grímr 87, 162.
 Karl undir Karlsfelli 58.
 Ketilbjörn enn gamli 5, 11, 20, 36, 112, 140, 184,

- 205, 216, 220, 221, 222, 223, 226, 230.
 Ketill enn einhenti 87, 209, 210, 219.
 Ketill blundr 49, 55.
 Ketill Bresason 41, 44, 54.
 Ketill enn fíflski 190, 191, 197, 227.
 Ketill þistill 64, 169.
 Ketill ilbreiðr 92, 96, 103.
 Ketill Þórisson 174, 196.
 Ketill hæingr 200, 201, 202, 203, 205, 208, 211, 226.
 Ketill enn hörðski 164.
 Ketill gufa 45, 48, 59, 98, 99, 100, 116.
 Kjallakr enn gamli 63, 71, 72, 73, 75.
 Kjallakr á Kjallaksstöðum 88, 89, 93.
 Kolbeinn í Kolbeinsdal 144.
 Kolgrímr enn gamli 41.
 Kolli undir Felli 118, 200.
 Kolli Hróaldsson 60.
 Kolli í Kollavík 169.
 Kollr í Kollsvík 37, 38, 102.
 Kollsveinn enn rammi 143.
 Kolr at Kolgröfum 71.
 Kolr Óttarsson 206.
 Kráku-Hreiðarr 140, 141.
 Krumr á Hafranesi 181.
- Leiðólfrkappi 177, 192, 197.
 Ljót á Ljótastöðum 205.
 Ljótr öpveginn 166.
 Loðmundr enn gamli 179, 180, 191, 195, 196, 198.
 Lofttr enn gamli 35, 63, 203, 212.
 Lýtingr Arnbjarnarson 57, 171, 172, 178.
- Máni at Mánafeili 166.
- Molda-Gnúpr 40, 193, 194, 195, 211.
- Nafar-Helgi á Grindli 147, 148.
 Nesja-Knjúkr 100, 101, 103, 106.
- Oddgeirr í Oddgeirshólum 45, 214, 215.
 Ófeigr í Ófeigsfirði 117.
 Óláfr bekk, 148.
 Óláfr belgr 68, 95.
 Óláfr feilan 8, 21, 22, 49, 75, 82, 87, 88, 219.
 Óláfr jafnakollr 104, 115.
 Óláfr tvennumbrúni 217.
 Óleifr hjalti 7, 48.
 Ormr enn auðgi 210.
 Ormr enn ánauðgi 206.
 Ormr enn gamli 224.
- Rauða-Björn 57, 58.
 Rauðr at Rauðsgili 50.
 Ráþormr í Veteifsholti 210, 211.
 Reistr Ketilsson 168.
- Sel-Þórir Grímsson 50, 61, 62, 76, 123.
 Sighvatr enn rauði 202, 203, 226.
 Sigmundur Ketilsson 64, 65, 66, 169.
 Sigmundur kleykir 194, 195, 204, 205.
 Skagi Skoftason 159.
 Skalla Grímr 45, 46, 47, 48, 49, 58, 59, 60, 86, 99, 223, 225.
 Skefill á Reykjaströnd 138, 139, 148.
 Skeggi Bööðlfsson 156.

- Skjalda-Björn 95, 116.
 Skinna-Björn 125.
 Skjöldólfr á Stræti 182.
 Skjöldólfr Vémundarson 173.
 Skorri leysingi Ketils gufu 48, 98, 99.
 Sléttu-Björn 86, 94, 116 144, 146.
 Snæbjörn Eyvindarson 112.
 Sóti undir Sótafelli 126.
 Steinfíðr Reykrketilsson 200.
 Steingrímur í Tröllatungu 188.
 Steinn mjöksiglandi 60, 77, 98.
 Steinólfr í Hraundal 59, 60.
 Steinólfr enn lági 91, 94, 95, 96, 119.
 Svartkell enn katneski 39.
 Sveinungr í Sveinungsvík 169.
 Sæmundr enn suðreyski 127, 130, 138, 139, 141, 146, 148, 169.
 Sölvi á Sölvahamri 164.
 Tungu-Kári 142.
 Uðr en djúpauðga 6, 21, 36, 81, 82, 83, 84, 85, 87, 88, 123, 227.
 Úlfjótr á Langaholti 239.
 Úlfjótr Grímsson 51.
 Úlfr hinn skjálgi 90, 91, 96, 97, 104, 123.
 Uni enn danski 28, 175, 176, 177.
 Valbjófr enn gamli 38 39, 48, 50, 67, 100.
 Vébjörn Sygnakappi 105, 110, 111, 115, 149.
 Vécell enn hamrammi 140.
 Vémundri Fáskrúðsfirði 181.
 Vestarr á Eyri 70, 71, 93, 101.
 Vésteinn Végeirsson 104, 105, 110.
 Vestmaðr í Reykjadal 163.
 Vetrliði Arnbjarnarson 178.
 Vilbaldr Dofnaksson 192, 193.
 Völu-Steinn 95, 107, 109.
 Þengill mjöksiglandi 160, 161.
 Þjóðrekr í Berufirði 182.
 Þórarinn krókr 95, 96.
 Þórarinn Þorkelsson 212.
 Þorbergr í Langadal 77.
 Þorbjörn í Arnarholti 48, 57, 178.
 Þorbjörn bitra 118.
 Þorbjörn blesi 57.
 Þorbjörn loki 98.
 Þorbjörn skúma 27, 103.
 Þorbjörn tálkni 37, 103.
 Þorbjörn jarlakappi 219, 220.
 Þorbjörn laxakarl 219.
 Þorbrandr Þorbjarnarson 220.
 Þorbrandr örrek 142.
 Þórðr knappr 147.
 Þórðr hálmí 172 (= Þórðr Þórólfsson?).
 Þórðr skeggi 36, 140, 183, 184, 221, 238.
 Þórðr gnúpa 62.
 Þórðr slitandi 153.
 Þórðr Víkingsson 100, 105, 106, 109, 123.
 Þórðr Þórólfsson 173 (= Þórðr hálmí?).
 Þorfiðr máni 162.
 Þorgeirr enn hörðski 42, 199.

Þorgeirr meldun 48.
 Þorgeirr í Þorgeirsfirði 161.
 Þorgerðr at Sandfelli 189.
 Þorgils knappi, leysingi 60.
 Þorgrímr bíldr 223.
 Þórhaddr enn gamli 181.
 Þórhaddr í Hitárdal 58 60,
 78, 119.
 Þórir Ásason 214.
 Þórir lína 178.
 Þórir Grímsson 162.
 Þórir enn hávi 181.
 Þórir snepill 160, 161.
 Þórir haustmyrkr 77, 225.
 Þórir dúfunef 142, 143.
 Þórir þursasprengir 153.
 Þorkell enn hávi 144, 167.
 Þorkell bjálfi 211.
 Þorkell kornamúli 51.
 Þorkell fullspakr 178.
 Þorkell vignir 139.
 Þorkell bundinfóti 202, 207.
 Þormóðr enn gamli 38, 41, 49.
 Þormóðr enn rammi 149.
 Þormóðr goði 62, 71, 73.
 Þormóðr í Grenivík 161.
 Þórólfr Asksson 199.
 Þórólfr brækir 104.
 Þórólfr fasthaldi 115, 124.
 Þórólfr heljarskinn 132.
 Þórólfr mostrarskegg 8, 73,
 74, 75, 97, 123.
 Þórólfr spörr 100, 102, 103.
 Þorsteinn torfi 172, 173.
 Þorsteinn tjaldstæðingr
 208, 209.
 Þorsteinn leggr 185.
 Þorsteinn kleggi 178.

Þorsteinn lunan 210.
 Þorsteinn svörfuðr 144, 152.
 Þorsteinn Sölmundarson
 40, 102.
 Þorsteinn enn hvíti 170,
 171, 196, 233.
 Þorvaldr Ásvaldsson 78, 116
 Þórríðr í Skagafirði 139.
 Þrándr mjöksiglandi 150,
 155, 218.
 Þrándr mjóbeinn 92, 96, 159.
 Þrasi í Skógum 179, 197, 198
 Þröstr Hermundarson 119.
 Þuríðr rynggylta 104, 110.
 Þuríðr sundafyllir 109.

Ævarr enn gamli Ketilsson
 135, 136, 140, 169.
 Ævarr enn gamli Þorgeirs-
 son 175, 178, 181.

Ölvér Eysteinnsson 193, 195.
 Önundr Blæingsson 166.
 Önundr bíldr, 195, 202 203,
 204, 206, 125, 222, 223.
 Önundr tréfótr 117.
 Önundr breiðskeggr 49.
 Önundr Víkingsson 109.
 Önundr viss 141, 142.
 Örlygr enn gamli 37, 38,
 39, 50, 51, 54, 55, 100,
 102, 103, 226, 227.
 Örn í Arnarnesi 103, 152.
 Örn enn gamli 57.
 Örn á Örnólfsstöðum 55.
 Özurr slagakollr 173.
 Özurr enn hvíti 212, 215.



UNIVERSITY OF ILLINOIS-URBANA



3 0112 114873984